

O Tiute ma Faamanuiaga o le Perisitua



Tusi Lesona Faavae mo e Umia le Perisitua, Vaega E

O Tiute ma Faamanuiaga o le Perisitua

Tusi Lesona Faavae mo e Umia le Perisitua, Vaega E

Lomia e le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta

© 1979, 1987, 1993, 1996, e le Ekalesia a Iesu Keriso
o le Au Paia o Aso e Gata Ai
Ua taofia aia uma
Lomia i le Lunaite Setete o Amerika
Faamaonia le faa-Peretania: 9/96
Faamaonia le faaliliuina: 9/96
Faaliliuga o le *Duties and Blessings of the Priesthood:*
Basic Manual for Priesthood Holders, Part B

Faasino Mataupu

Faatomuaga	v
Taiala Faapitoa mo le Faaafiaina ai o i Latou e iai ni Tulaga le Atoatoa	vii

O le Perisitua ma le Faatulagaina o le Ekalesia

1. O le Tautoga ma le Feagaiga a le Perisitua	1
2. O Ki o le Perisitua	7
3. Faamamaluina o le Perisitua	18
4. O le Faamoemoega o Sauniga a le Perisitua	26
5. Faataunuaina o Sauniga o le Perisitua.....	40
6. Aoaoga i Aiga	48
7. Saunia o le Tagata Lava Ia ma le Aiga	61
8. Gafa ma Talafaamaumau o Aiga.....	70
9. O le Tufatufaina Atu o le Talalelei.....	81
10. O le Faaamea: O se Tiutetauave a le Perisitua.....	91

O le Aiga ma Fegalegaleaiga Faaleaiga

11. O le Tama i le Avea ai ma Peteriaka.....	98
12. Taitaiina Lelei o le Aiga	107
13. O le Faamalosi o le Aiga e Ala i Afiafi Faaleaiga	114
14. O le Fiafia Faatasi o Aiga	126
15. O le Fegalegaleai i Galuega a le Aiga.....	135
16. O le Faia o Togalaau i le Aiga.....	143

Atinae o le Tagata Lava Ia

17. Sini a le Tagata ia ma le Aiga	156
18. Atinaeina ma le Aoaina o le Pulea e le Tagata o ia Lava.....	166
19. Atinaeina o a Tatou Taleni	176
20. Atinaeina o le Atamai i le Avea ai ma Taitai.....	185
21. O le Tulaga Taitai: O le Faia o Faaiuga Musuia.....	194
22. Tiutetauave ma le Faasafua atu o le Pule	203
23. O le Faia o Faatalanoaga ma le Taitaiga o Fonotaga.....	210
24. O le Faatamauiina o le Soifua Maloloina Lelei o le Tino.....	219

25. Ola i le Upu o le Poto.....	225
26. Sailiga o le Atamai	233
Mataupu ma Aoaoga Faavae o le Talalelei	
27. O Iesu Keriso, o lo Tatou Faavae Mautu	242
28. Saolotoga—O se Meaalofa Mai le Atua	248
29. Tausia o le Aso Sapati ia Paia	256
30. Sefuluai ma Taulaga.....	262
31. Ia Faamaoni	269
32. O le Mama o Mafaufauga.....	278
33. Tuuina atu o le Faamagaloga ma le Taliaina o le Faamagaloga.....	285
34. Meaalofa Faaleagaga	294
35. Fausia o le Malo o le Atua	303
Tusi na Sii Mai ai Faamatalaga.....	310
Faasino Upu.....	313
Faamatalaga o Ata 1–16	322

FAATOMUAGA

Fuafuaina o le Lesona

O lenei tusi lesona ua fuafua e faaaogaina e i latou ua umia le Perisitua Arona ma le Perisitua Mekisateko i vaega o le lalolagi o loo tau atinae ai le Ekalesia. O loo aoaoina atu i lesona ia mataupu ma aooga faavae ma tiutetauave ma matafaioi faavae o le perisitua.

Suesuega a le Tagata Lava ia ma le Vaega

O nei lesona ua tusia e le gata i le suesue iai o le tagata lava ia ae faapea foi ma le vaega. I paranesi laiti, o le a aoga tele lenei tusi lesona e maua atu ai faatonuga mo sauniga faaleperisitua i Aso Sa. I paranesi e toatele i latou e umia le perisitua Mekisateko ma le Perisitua Arona, e tatau lava ona faamaopopo ma fetuutuuna'i lesona ina ia faafetauia ai manaoga o vaega taitasi.

E tatau i tagata taitoatasi o loo umia le perisitua ona suesue i lana tusi lesona i le vaiaso ma aumaia lenei tusi lesona faatasi ma ana tusitusiga paia i sauniga a le perisitua. O le ala lenei o le a iloa ai lona nofo saunia e auai i le talanoaina o le lesona. O lu'i o loo i faaiuga o lesona taitasi ua tuuina atu ina ia fesoasoani ai ia i latou o loo umia le perisitua ina ia latou faaaogaina mataupu faavae na latou aoaoina.

Fautuaga mo le Faiaoga

O loo maua i le faaiuga o lesona taitasi ia fautuaga mo le faiaoga i lalo o le ulutala "Sauniuniga a le Faiaoga." O isi fautuaga o loo tuuina atu i mataitusi ninii i totonu o lesona. O nei fesoasoani e aofia ai le talanoaina o fesili, fautuaga mo le auai o le vasega, ma faatonuga mo le faaaogaina o le laupapa, tala, ata, ma siata. Atonu o le a mananao faiaoga latou te faaaogaina nisi ala aoga mo le tuuina atu o le lesona. E toetoe lava o lesona uma e manaomia ai se laupapa, o lea e tatau ai ona fuafuaina e le faiaoga ina ia iai se laupapa ma se penisina i totonu o o latou potuaoga i lesona taitasi. (O le tele o fesoasoani vaaia ua fautuaina mo le faaaogaina e pei o ni siata e mafai ona faapipii i luga o le laupapa.)

O le tusi lesona o *Mataupu Faavae o le Talalelei* e tatau ona suesueina faatasi ma lenei tusi lesona, aemaise lava i mataupu na o loo fautuaina atu i totonu o lenei tusi lesona i lalo o le ulutala "Sauniuniga a le Faiaoga."

E tatau i faiaoga ona tofi mamao atu tagata o le vasega e faia tala poo mau na e mananao i tagata o le vasega latou te tuuina atu ina ia lava le taimi e saunia lelei ai mo a latou sauniuniga.

O loo lisiina atu i le faaiuga o le tele o lesona ia fesoasoani vaaia. E tatau la ona faaaogaina e pei ona faaalua mai ai i totonu o le lesona. O loo iai se vaega faapitoa o ata lanu e faatatau i matafaioi autu a le perisitua o loo i le pito i tua o le tusi lesona. O nei ata e mafai ona faaaogaina pe afai e talafeagai ai, i le aoaoina o lesona e le gata mai le tusi lesona lenei ae faapea foi ma le tusi lesona Vaega A.

E tatau ona tuuina uma atu lesona o loo iai i le tusi lesona. E mafai e faiaoga ona faamisi se lesona pe afai e le talafeagai ai i lea atunuu poo le alalafaga. E tatau ona tuuina atu lesona i le faasologa e pei lava ona iai i le tusi lesona.

E tatau ona iai se taumafaiga faapitoa ina ia aafia ai alii talavou i lesona. O le a avea lea ma fesoasoani mo le saunia o i latou e siitia o latou perisitua ma auauna atu ai i le perisitua ma tiutetauave i le lumanai i le avea ai ma tane ma tama.

Numera o Lesona

O lenei tusi lesona o loo aafia ai ni lesona se tolusefululima. O le a avea lea ma mea o le a maua ai e taitai o le perisitua le avanoa e faaaogaina ai nisi vasega e talanoaina ai nisi o manatu ma manaoga e taua i a latou lava vaega faapitoa o le perisitua. O le taimi e totee a mafai ona faaaogaina e:

- Talanoaina ma fuafua ni gaioioiga ma galuega i totonu o le uarota poo le tuuina atu foi lea o ni mataupu faapitoa e pei ona faatonuina ai e taitai o le perisitua.
- Talanoaina savali a le Au Pulega Aoao e pei ona tuuina mai i konafesi aoao, e pei ona lomua ai i mekasini a le Ekalesia.
- Ia faaaluaia ia sili atu i le tasi le vaiaso e talanoaina ai mataupu e moomia ona fai ai nisi suesuega.
- Ia faaoga le taimi ina ia manuia ai i latou o loo umia le perisitua a o taitaiina ai e le Agaga o le Alii.

Tau ina ia faamanuia le Alii ia i latou taitoatasi o e umia le perisitua o le a suesueina ma aoao i lenei tusi lesona faatasi ma se malamalamaaga faateleina, ma le iloa, ma le molimau i le perisitua paia ma le talalelei a Iesu Keriso.

Taiala Faapitoa mo le Faaofiaina ai o i Latou e I Ai ni Tulaga le Atoatoa

I le gasologa o le galuega a lesu i le lalolagi, sa ia afio atu ai i le mauga e latalata i le Sami o Kalilaia.

“Ona o mai ai lea ia te ia o le motu o tagata e toatele, ua ia te i latou o e pipili, o e tauaso, o e gugu, o e mumutu, atoa ma nisi e toatele, ua latou tuu atu ia te i latou i vae o lesu; ona faamalolo ai lea e ia o i latou:

“Ona taufaiofo ai lea o le motu o tagata ina ua latou iloa atu e sa gugu ua tautala, o e sa mumutu ua atoatoa, o e sa pipili ua savavali, o e sa tauaso foi ua vaai; ona latou vivii atu ai lea i le Atua o Isaraelu” (Mataio 15:30–31.)

Na faia e le Faaoia se faataitaiga mo i tatou i lo tatou lagonaina lea o le alofa mutimutivale mo i latou e iai ni le atoatoa. Ina ua asiasi atu o ia i Sa Nifae ina ua mavae lona toetu, sa ia faapea atu:

“Faauta, ua tumu lo’u loto i le alofa mutimutivale ia te outou.

“Po ua ia te outou nisi ua mama’i? Aumai ia i latou iinei. Po ua ia te outou ea nisi ua pipili, pe tauaso, pe setu, pe manu’a, pe lepera, pe mamae, pe tutuli, pe puapuagatia i se tasi mea? Ina aumai ia i latou iinei, ou te faamaloloina i latou, aua ua mutimutivale lo’u alofa ia te outou; ua tumu lo’u loto i le alofa.” (3 Nifae 17:6–7).

O se faiaoga i totonu o le Ekalesia, o se avanoa sili lea e faailoa atu ai le alofa ia i latou e iai ni le atoatoa. E ui lava ina e le masani ona aoaoina le faiaoga e na te tuuina atu se fesoasoani maoae i tagata faapea e iai ni le atoatoa, ae tatau ona iai sona malamalama, manatu mamafa, ma sona faanaunauga ina ia aofia ai i latou nei i gaioiga e aoao mai ai a le vasega. E manaomia le tagai toto’a lelei i tagata o le vasega e le atoatoa le mafaufau, faalogo, vaai, tautala, tino, tau le aganuu (ma le gagana), lagona, vafealoai, tausaga, ma aoaoina. O taiala nei e tatau ona fesoasoani ai i faiaoga ina ia latou aapa atu ai i tagata e iai ni le atoatoa:

- la iloa manaoga ma mea e mafaia e tagata uma o le vasega.
- la muamua ona suesue i latou e iai ni tulaga le atoatoa a’o le’i tuuina atu iai se tofiga e pei o le faitau, tatalo, poo le auai foi e ala lea i le tuuina atu iai o fesili e pei o “O le a sou lagona e tusa ai ma lou faitauina o se tusi i luma o le vasega?” “E mafai ona e tatalo i luma o ni tagata lautele?”

-
- la talanoa atu i taitai o le perisitua, matua, tagata o le aiga, faapea foi ma le uso e le atoatoa, pe afai e talafeagai ai, ina ia iloilo ai o latou manaoga faapitoa.
 - Taumafai ina ia faateleina ma faaleleia le aoaoina ma le aafia ai o i latou e iai ni le atoatoa.
 - la faia taumafaiga uma ina ia mautinoa ua faaalua e tagata taitoatasi o le vasega le faaaloalo ma le loto malamalama o le tasi i le tasi.
 - la faaalua ou uiga tausaaafia, uiga faauo, ma ia loto alofa. E tofu manaomia uma lava e fanau a le Atua le alofa ma le malamalama, e tusa lava pe iai ni le atoatoa, pe leai foi.

E tatau ona manatua e faiaoga i totonu o le Ekalesia o loo i ai i uso taitasi le malosi ofoofogia e tuputupu ae ai e tau atu i le faaeaga, e tusa lava poo le a le tulaga faaletonu o iai i le mafaufau, tino, lagona, poo le tulaga i le vafealoai. Ua iai i le faiaoga le tiutetauave o le fesoasoani lea i tagata taitoatasi ina ia aoaoina mea uma na te mafaia ona aoaoina. Ia manatua le fetalaiga a le Faaola:

“Aua na faia e outou i le tasi e aupito itiiti o o’u uso nei, o a’u lava lea ua outou faia iai.” (Mataio 25:40.)

O le Tautoga ma le Feagaiga a le Perisitua

Lesona 1

O le faamoemoega o lenei lesona ia fesoasoani ia i tatou ina ia tatou malamalama i le tautoga ma le feagaiga a le perisitua ma le ala e faalauteleina ai o tatou valaauga.

Faatomuaga

Sa avea Elder Reed Smoot ma se tasi o le Korama a le Toasefulua mai le 1900 seia oo ina ua maliu i le 1941. I le tele lava o lea taimi, sa avea ai o ia ma se sui maoae o le Senate a le lunaite Setete. E toatele tagata sa uunaia o ia ina ia auai i le tauvaga mo le peresitene o le lunaite Setete. Ae sa ta'u atu iai e nei tagata e tatau ona tuu ese lana lotu ona talu ai o tagata i lena vaiatai latou te le palota mo se tagata Mamona mo le tofi peresitene o le malo. Fai mai a ia, "A faapea e oo mai ia te au se filifiliga i mea e lua o le avea ma tiakono o le Ekalesia a Iesu Keriso o le Au Paia o Aso e Gata Ai, poo le avea ma Peresitene o le luniata Setete, ou te fia avea ma tiakono" (quoted by Bryant S. Hinckley, *The Faith of Our Pioneer Fathers*, p. 202).

A faapea e faamalosia oe e te filifili i le avea ma tiakono poo se taitai malosi ma le maualuga i tulaga tau pisinisi po o le malo, o le fea e te filifilia? Aisea?

Aisea e te manatu ai sa taua tele ia Elder Smoot le perisitua?

E iai tulaga manaomia sa tatau ona ausia e Elder Smoot ina ia avea ai ma sui o le Senate a le lunaite Setete. E faapena foi i tatou, ina ia mafai ona tatou mauaina le perisitua, e tatau ona tatou ausia nisi o tulaga faapitoa e manaomia. E tatau ona faatalanoaina i tatou e o tatou taitai o le perisitua, o i latou na o le a latou tuuina mai ia i tatou ni fesili faapitoa ina ia iloa ai pe ua tatou agavaa e mauaina le perisitua ma pe ua tatou naunau e talia tiutetauave paia o le perisitua.

O a nisi o fesili e tuuina mai ia i tatou e o tatou taitai o le perisitua?

Ina ua uma ona filifilia Elder Smoot e avea ma sui o le Senate, sa fai loa lana tautoga o le tofi ma sa ia folafola atu ai o le a ia faataunuuna ona tiute i totonu o le malo. O le auata lava foi lea e tasi, pe afai tatou te mauaina le perisitua, tatou te folafola atu ai o le a tatou faataunuuna o tatou tiutetauave i le Alii.

O le Tautoga ma le Feagaiga a le Perisitua

Tatou te maua le perisitua paia e ala i se "tautoga ma se feagaiga." O le uiga o lea mea ua tuu mai ia i tatou e le Tama Faalelagi lana tautoga (faamaoniga) e mafai ona tatou maua le mana ma

faamanuiaga o le perisitua pe a faapea o le a tatou osifeagaiga (folafola) atu ia te la o le a tatou faia ni mea faapitoa. “O lea, o i latou uma o e maua le perisitua, ua maua lenei tautoga ma feagaiga a lo’u Tama, na te le mafai ona solia, e le faamaluelueina foi.” (MFF 84:40).

Sa faamatala mai e Persitene Marion G. Romney le uiga o se feagaiga: “O se feagaiga o se konekalate, ma o se konekalate o se maliliega lea i le va o ni tagata se toalua poo le sili atu foi. A faapea o le a ta osifeagaiga ma oe, o lona uiga o le a ou folafolaina atu se mea ia te oe ona o mea ua e folafolaina mai ia te au. A faapea foi o le a ou auai i se maliega ma oe e totogi atu se vaega tupe mo se taavale afi, ma ua e folafola mai foi o le a e tuuina mai le taavale afi mo lea vaega tupe, o lona uiga o lona mea o se feagaiga. O le mea lea, i le feagaiga o le perisitua, tatou te folafola atu se mea i le Alii, ma na te folafolaina mai foi se mea ia i tatou e tali ai le mea na tatou tuu atu ia te la.” (in Conference Report, Korea Area Conference 1975, p. 36).

O le tautoga ma le feagaiga a le perisitua o loo faamatalaina mai i le Mataupu Faavae ma Feagaiga, vaega 84. O loo faamatala manino mai e lenei mau ia folafolaga tatou te faia ma folafolaga foi ua faia e le Alii ia i tatou pe a tatou maua le Perisitua Mekisateko.

Tusi i luga o le laupapa: O a *Tatou Folafolaga* ma *Folafolaga a le Alii*. Tusi i lalo o nei ulutala ia folafolaga na tatou faia ma folafolaga na faia e le Alii.

Faitau le Mataupu Faavae ma Feagaiga 84:33.

O A TATOU FOLAFOLAGA I LE ALII

I le vaega muamua o le fuaiupu e 33 na faailoa mai ai e le Alii la tatou vaega o le feagaiga: “Aua ai se faamaoni i le mauaina o nei perisitua e lua ua ou tautala atu ai, ma le *faalauteleina o lo latou valaaulia*”

O le a la tatou vaega o le feagaiga?

Ua tatou folafola atu e *faalautele o tatou valaaulia*. O lona uiga o le a tatou faia le mea aupito sili i le taliaina ma le tauaveina o o tatou valaauga uma lava faale-perisitua. O le faalauteleina o o tatou valaauga o le faateleina lea, faatupulaia, ma faalauteleina le malo o le Alii i le lalolagi e ala lea i la tatou auunaga. Ua tatou folafola atu foi o le a tatou faamaoni ma tausua uma lava poloaiga pe a tatou maua le perisitua.

O FOLAFOLAGA A LE ALII IA I TATOU

Faitau le Mataupu Faavae ma Feagaiga 84:33–38. Malolo i faaiuga o vaega taitasi o le folafolaga a le Alii, tusi i luga o le laupapa ona talanoaina lea.

Ua folafola mai e le Alii ia i tatou, afai tatou te tausua la tatou vaega o le feagaiga, o le a “*faapaiaina i tatou e le Agaga i le faafouina o o tatou tino*” (MFF 84:33). E mafai ona tatou faamoemoe e faamalosia i tatou i le tino ma le agaga pe a tatou faataunuaina o tatou valaauga.

E mafai foi ona avea i tatou ma “*atalii o Mose ma Arona*” (MFF 84:34). O atalii o Mose ma Arona sa latou faataunuaina sauniga o le faaolataga

i le fanauga a Isaraelu. O loo ia i tatou foi nei lava avanoa e tasi i le faatauunuina lea o sauniga paia e ala lea i le perisitua i ona po nei.

Ua folafola mai e le Alii o le a avea i tatou ma “*fanau a Aperaaamo*” (MFF 84:34). I se isi faaupuga, e mafai ona tatou maua faamanuiaga na folafolaina atu ia Aperaaamo i le avea ai o i tatou ma ana fanau.

Fai atu i se tagata o le vasega e faitau le Aperaaamo 2:8–11.

Sa osifeagaiga le Atua ma Aperaaamo ma lana fanau o le a avea i latou ma mea o le a faamanuiaina ai malo uma o le lalolagi i le talalelei. Ma e ala atu i le mana ma le pule lea e faatinoina e i latou o e faamaoni o loo umia le perisitua o le a faapea ona tuuina atu ai nei faamanuiaga i le lalolagi.

Ua uma foi ona folafola mai e le Alii o le a avea i tatou “*ma ‘au filifilia a le Atua*” (MFF 84:34). O lona uiga o lenei mea o i latou uma lava e umia le perisitua ma le faamaoni ma faalateleina o latou valaauga ma mauaina sauniga paia uma e faaolaina ai o le perisitua o le a tuuina atu ia i latou le atoatoaga o le malo o le Tama.

Ona fetalai mai ai lea o le Alii: “*O le a tuuina atu ai ia te ia mea uma o iai i lo’u Tama*” (MFF 84:38).

Sa faamatala mai e Peresitene Spencer W. Kimball e faapea: “Pe ua e mapu ane teisi ma faitau faamanuiaga, o mana o loo i le Alii? O mana uma, aafiaga uma, ma malosiaga uma o le a e maua e tusa ai ma le tautoga ma le feagaiga a le perisitua paia lena o loo e umia.” (in Conference Report, Buenos Aires Area Conference 1975, p. 51).

E le o se mea e tau masalomia le faatauunuina e le Alii lava ia o ana folafolaga ia i latou e faamaoni ma usiusitai. O lea la, o le tiutetauave, o la tatou vaega lena. A faapea o le a tatou le tausisi i a tatou folafolaga i le Alii, o le a avea lena ma mea e taofia ai lona tuuina mai ia i tatou o mea uma lava ua ia saunia e tuuina mai ia i tatou.

Faalateleina o o Tatou Valaauga Faaleperisitua

Ua tatou folafola atu i la tatou feagaiga ma lo tatou Tama Faalelagi o le a tatou faalateleina o tatou valaauga.

O a o tatou valaauga faaleperisitua?

Ina ua faaee mai le Perisitua Arona ia i tatou, ua faauuina i tatou i se tofiga i lena perisitua: tiakono, aoao, poo le ositaulaga. O nei tofiga taitasi o se valaauga ma e iai foi ma ona tiute patino ma ona matafaioi. O tofiga i le Perisitua Mekisateko e iai le toaina, faitaulaga sili, Fitugafulu, ma le Aposetolo. (Tagai i *Mataupu Faavae o le Talalelei*, mataupu 14, i. 81–85, mo se faamalamalamaga o tiute o nei valaauga.)

“O le perisitua o le mana ma le pule lea a le Atua ua tuuina atu i le tagata i le lalolagi ina ia galue ai i le faia o mea uma mo le faaolataga o tagata. O le faaogaina o le pule o le perisitua e moomia ai le faatagaga mai ia i latou o loo umia ki ma ua tofiaina e pule

faamalumu ai, ina ia faatumaui ai le faatulagaina pea o le fale o le Atua” (*Melchizedek Priesthood Handbook* [1984], p. 1).

Na saunoa mai Peresitene Spencer W. Kimball e faapea:

O lenei perisitua e le o se meataalo. E le o se mea foi tau ina ia e umia ona faagalo lea. E tusa o le mea pito i sili lea ona taua i le lalolagi atoa, ma tatou te mauaina faatasi ma se tautoga ma se feagaiga. . . .

“Sa silafia lelei e le Alii o i tatou o ni tagata soifua vaivai ma e ono mafai ona faaosoosoina i tatou, ma sa ia fetalai mai o le pogai lea na ia augani mai ai ia i tatou ina ia tatou tatalo i le ao ma le po ma taimi uma lava. O le mafuaaga foi lena na ia tuuina mai ai afiafi faaleaiga ina ia mafai ai ona faamanatu ia i tatou lava e le aunoa. O le mafuaaga foi lea na ia tuuina mai ai ia i tatou sauniga faaleperisitua, ina ia mafai ai ona tatou o atu ma fegalegaleai ma le au uso ma ia faamanatu mai ai pea ia i tatou ia mea uma.” (in Conference Report, Korea Area Conference 1975, pp. 40–41).

A’o le’i mafai e se tasi ona faalateleina lona valaauga o le perisitua, e tatau ona ia iloa le mea o loo manaomia mai ia te ia. E tatau ona ia muamua ona aoaoina lona tiute, ma . . . galue ai i le tofiga ua tofiaina o ia iai, i le maelega atoatoa” (MFF 107:99).

O le tala o le a sosoo ai o loo faailoa mai ai sa malamalama Peresitene Kimball i ona tiute ma sa faalateleina lona valaauga o se tiakono.

“Ou te manatuaina le taimi a’o avea a’u ma se tiakono. . . . sa ou manatu o se faamanuiaga sili ia te au le avea ma se tiakono. Sa manatu mamafa lo’u tama i o’u tiutetauave ma sa ia faatagaina lava a’u ou te aveina le taavale solofanua e ao mai ai taulaga anapogi. O lo’u tiutetauave e aofia ai ma le vaega o le aai lea ou te nofo ai, ae peitai sa fai si mamao e savavali mai ai i le isi aiga i le isi aiga, ma e faasolo lava ina mamafa se taga falaoamata poo se fagu fualaaui ‘aina poo fualaaui faisua poo falaoa foi pe a faaopoopo mai pea. O lea sa matuai aoga tele ai le taavale solofanua. . . . Sa avea ma se faamamaluga sili le faia o lenei galuega mo lo’u Tama Faalelagi; . . . ma o loo avea pea ma se faamamaluga maua le faia o lenei galuega.

“O a’u o se tiakono, ma ou te mitamita pea i le avea ai o a’u ma se tiakono. A ou vaai atu i Aposetolo o savavali atu i luga o le tulaga i totonu o le faapotopotoga paia e faamanuia le faamanatuga, ae savavali atu isi o le Pulega Aoao i luma o le laulau faamanatuga e aumai le areto ma le vai ma tufatufaina atu ma le faaaloalo i tagata uma o iai i le faapotopotoga ma toe foi mai ma a latou fata ua gaogao ma leai ni mea o iai, ou te matua fiafia lava ma mitamita ona o au o se tiakono, o se aoao, ma o se ositaulaga” (*Liahona*, Oketopa 1975, i. 15).

O le a se lagona o Peresitene Kimball e tusa ai ma lona valaauga faaleperisitua?

E mafai faapefea ona faa-aafiaina isi i le auata tatou te faalateleina ai o tatou valaauga?

O le Mauaina o le Fesoasoani i le Faalateleina o Tatou Valaauga

Na saunoa mai Peresitene Marion G. Romney e faapea: “Ina ia faalateleina o tatou valaauga i le perisitua, e tolu lava mea e tatau ona iai: O le tasi mea o le maua lea o le *agaga naunautai* e faia ai lea mea. O le isi o lo tatou *saili lea ma mafau fau loloto i upu o le ola e faavavau*. Ma lona tolu o lo tatou *tatalo lea*” (*Liahona*, Tesema 1973, i. 34).

O a mea e tolu ia na ta'u mai e Peresitene Romney e tatau mo i tatou ina ia mafai ai ona faalateleina o tatou valaauga? Tusi i luga o le laupapa:

E tatau ia ia tatou ona—

1. I ai se agaga naunautai
2. Suesue i tusitusiga paia
3. Tatalo

Afai tatou te faia ia mea ma tausia poloaiga, o le a tatou mauaina le fesoasani mai lo tatou Tama Faalelagi i le faalateleina o o tatou valaauga.

O Elder Orson Pratt, o se tasi o faifeautalai maoae o le Ekalesia, na talitonu o ia i lena mea ma lona loto atoa. Ina ua valaauina o ia i se misiona i Sikotilani, sa na o le valusefulu le aofaiga o tagata o le Ekalesia i lena atunuu. O faifeautalai sa i ai muamua i Sikotilani na aveesea faamalosi ona o sauaga ma faiga a tagata ia i latou. I lona taunuu atu i le amataga o le 1840, “sa ia malaga atu ai agai . . . i Edinburgh, le laumua. I le aso ina ua mavae lona taunuu atu iina, sa ia aeaina ai se mapuepue lafulafua i le ogatotonu o se nofoaga mo tafaoga, ma vaaia ai se vaaiga matagofie o le nuu tuai. E taua e tagata o le atunuu lea nofoaga o le Nofoa o Afa, ae lauiloa ma lagonaina ma le lotonutimomoia e le Au Paia o le Mapuepue o Palate. O iina na augani atu ai Orson Pratt i le Alii ina ia tuu atu ia te ia ni agaga se luaselau ina ia faaliliuina. Na faafogaina e le Alii ma tali mai i lena tatalo (Muriel Cuthbert, “Strong Saints in Scotland,” *Ensign*, Oct. 1978, p. 36.)

Sa faalateleina e Pratt lona valaauga; ma sa faapea foi ona faamanuiaina ai isi sa mulimuli atu i lana faataitaiga. E oo mai i le tausaga e 1853, e tusa ma le sefulutolu tausaga talu ona uma ona aea e Elder Pratt lea mauga ma talosaga atu i le Alii mo se fesoasoani, ua tusa ma le 3,291 tagata o le Ekalesia ua iai i Sikotilani.

Faaiuga

“O faamanuiaga a le Alii o loo ofoina atu i le Au Paia ma le lalolagi e ala atu i talaiga a i latou o e umia le perisitua paia. . . . O le umiaina o le perisitua e le o se mea mama poo se mea itiiti. O loo tatou taulimaina le mana ma le pule a le Alii, lea na tuuina mai ia i tatou e ala lea i le tatalaina o le lagi i nei ona po ina ia mafai ai ona tatou maua faamanuiaga uma lava” (Joseph Fielding Smith, “Blessing of the Priesthood,” *Ensign*, Dec. 1971, p. 98).

Ua uma ona folafola mai e le Faaola le tautoga ma le feagaiga e faapea, afai tatou te faalateleina o tatou valaauga faaleperisitua o le a tatou mauaina mea uma o iai i lo tatou Tama. O le meaalofa sili o loo ia te ia mo i tatou o le ola lea e faavavau (tagai i le MFF 14:7), ma ua tuuina mai ia i tatou le folafolaga e mafai ona avea ma tatou ma e mafai ona tatou fesoasoani atu i isi ina ia latou mauaina. E tatau ona tatou manatunatu e le aunoa i faamanuiaga sili ua folafolaina mai e le Alii ia i tatou. A tatou faia faapea, o le a faatupulaia lo tatou naunau e tausia a tatou feagaiga ma taitaiina atu ai i tatou i le ola e faavavau.

Lu'i

Ia fuafua nei i le aso o le a faalateleina lou valaauga. Suesue i tusitusiga paia ma mauaina musumusuga, ona tatalo lea ma le faatauana mo se fesoasoani. Ia manatua le tautoga ma le feagaiga a le perisitua, ia manatua e finagalo lo tatou Tama Faalelagi e tuu uma atu ia te oe mea o loo ia te ia. Ia e agalelei i lou auuana atu i isi, i le faaaogaina o ou tofiga ma valaauga i le perisitua e faamanuiaina ai o latou olaga.

Mau Faapoopo

Iakopo 1:17–19 (faalateleina o valaauga)

Mosaea 2:20–24 (o lo tatou nofo aitalafu i le Atua)

MFF 58:26–29 (ia matuai auai ma le naunau i se galuega lelei)

MFF 121:34–36 (o le pulea e le perisitua o aoaoga faavae o le amiotonu)

Sauniuniga a le Faiaoga

Ao le'i tuuina atu lenei lesona—

1. Faitau le Mataupu Faavae ma Feagaiga 84:1–48. Ia e faamasani, aemaise lava i le fuaiupu 33–44.
2. Fai atu i tagata uma o le vasega e aumai a latou tusitusiga paia i le vasega ma faaaogaina mo le faitauina o mau e faasino iai.
3. Ia i ai se laupapa ma se penisina.
4. Fai atu i tagata o le vasega e faitau pe faamatala mai tala ma mau o loo iai i lenei lesona.

O le faamoemoega o lenei lesona ina ia faaleleia atili lo tatou malamalamaaga i ki o le perisitua—o uiga ma le faaaogaina.

Faatomuaga

O se ki e matala ai se faitotoa o se fale. E le mafai lava ona tatou ulufale atu i se fale seiloga ua tatou maua le ki po o le faatagaga foi a le e ona le fale. E faapea foi le tulaga o tane ma tama, o i latou ia e faamanuiaina ai o latou aiga, e faapea foi le alii na te umia le perisitua e faatoa mafai ona ia faaaogaina pe, a ia maua le faatagaga tonu. Mo se faataitaiga, o se ositulaga e iai le pule na te faauuina ai se isi uso i se tofiga i le Perisitua Arona, ae na te le mafaia la ona faia lea mea e aunoa ma le maua mai o le faatagaga na te faataunuuna ai lea mea mai lana epikopo poo le perisitene o le paranesi. O lenei mana e tuuina atu ai le faatagaga e taua o ki o le perisitua.

“O se mea tatau tele la i soo se gaoioiga e faia i lalo o lenei pule e tatau ona faia i le taimi sa’o ma le nofoaga sa’o, i le auala sa’o, ma le faatulagaga sa’o. O le mana o loo faatonutonuina ai nei galuega e tusa o ki na o le Perisitua” (Joseph F. Smith, *Gospel Doctrine*, p. 136).

Sa faamatalaina mai e Perisitene Iosefa Filitia Samita e faapea: “O nei ki o le aia tatau lea e pule faamalumu ai; o ia lava ki o le mana ma le pule lea e taitaia ai ma faatonutonu ai mea uma lava tau i le malo o le Alii i le lalolagi. O e latou te umiaina o loo iai le mana e taitaia ma pulea ai le tulaga tatau ina ia mafai ai e isi tagata uma lava ona auuina atu i le perisitua. O tatou uma lava e mafai ona umia le perisitua, ae peitai e pau le ala e mafai ai ona tatou faaaogaina le perisitua pe afai e faatagaina ma faatonuina e i latou o e o loo umia ia ki” (“O Ki e Faavavau ma le Aia e Pule Faamalumu Ai,” *Liahona*, Mati 1973, i. 18.)

O le a le eseeseaga o le perisitua ma ki o le perisitua?

O le perisitua o le mana poo le pule a le Atua. O ki o le aia lena e faaaogaina ai lena mana poo lena pule i ni auala faapitoa ma le patino.

O Ai e Umiaina Ki o le Perisitua?

O Iesu Keriso lava sa umia uma ki o le perisitua. Ina ua ia muai valaauina ana Aposetolo e toasefululua, sa tuuina atu loa e Iesu ia i latou uma lava taitoatasi le perisitua (tagai i le loane 15:16.)

Faaali atu le ata 2-a, “Ua faauuina e Keriso ana Aposetolo ma tuu atu iai ki o le perisitua.”



A'o le'i faasatauroina o ia, sa tuuina atu e Keriso ki o le perisitua ia Peteru, Iakopo, ma Ioane. Sa faia lenei mea i luga o le Mauga o Liua. (Tagai i *Teachings of the Prophet Joseph Smith*, p. 158; Mataio 17:1–9.) Ae peitai, i senituri na mulimuli ane ai ina ua maliliu ia Aposetolo, sa le toe i ai nei ki; ma, a'o le'i mafai e tagata ona toe faaaogaina le perisitua, o lea sa tatau ai ona toefuataina mai nei ki. Talu ai ona o lenei mafuaaga, o lea na auina mai ai e le Alii ia Peteru, Iakopo, ma Ioane i le Perofeta o Iosefa Samita e toefuatai mai iai le Perisitua Mekisateko ma ki o lena perisitua (tagai i le MFF 27:12–13).

O nei ki paia sa tuuina atu i Aposetolo ma perofeta uma o le Ekalesia, ma o loo umia e le perofeta ma Aposetolo o le Ekalesia i ona po nei.

Faaali atu le ata 2-e, "Peresitene Gordon B. Hinckley."

E ui lava o Aposetolo taitoatasi uma lava latou te umia ki uma o le perisitua, ae o le fuafuaga lava a le Alii e na o le toatasi le tagata mai lea taimi i lea taimi e na te faaaogaina nei ki e fai ai o ia ma sui o le Ekalesia. Talu ai ona o le mafuaaga lea, o lea e faauuina ai le Aposetolo sinia o loo soifua (e fua i le aso e faauuina ai, ae le o tausaga o le soifua) e avea ma Peresitene o le Ekalesia e le Korama a le Toasefululua ma tuuina atu iai le aia na te faaaogaina uma ai ki o le perisitua. Afai e maliu o ia, o le a faapea ona faauu e Aposetolo o loo totoe le Aposetolo sinia o loo sosoo atu i ai (le Peresitene o le Korama a le Toasefululua) na te faaaogaina uma ana ki faa-Aposetolo e pei o le Peresitene o le Ekalesia.

O lea la, ua na o le Peresitene lava o le Ekalesia le tagata i luga o le fogaeleele e iai le mana na te faaaogaina uma ai ki o le perisitua (tagai i le MFF 132:7). Ae peitai, na te tuuina atu nisi o ki faapitoa i taitai o loo pule faamalumu i le Ekalesia. (O nei alii e aofia ai peresitene o misiona, peresitene o paranesi, peresitene o malumu, epikopo, peresitene o siteki, ma peresitene o Korama a le Perisitua Mekisateko.) O i latou na latou te tuuina atu se vaega o la latou pule (ae le o a latou ki) i alii ma tamaitai i a latou iunite e ala lea i le faamanuiaina o i latou i tofiga eseese ma valaauga.

Na faamatala mai e Peresitene Iosefa F. Samita: "E na o le toatasi lava le tagata na te umia nei ki i lo latou atoatoaga i le taimi e tasi, o le perofeta lea ma o le Peresitene foi o le Ekalesia. E mafai ona ia tuuina atu soo se vaega o lenei mana i se isi tagata, a faapea la ona fai, o le a umia loa e lena tagata ia ki e faatatau tonu lava i lena tofiga o loo ia galue ai. O le mea lea, o le peresitene o se malumu, o le peresitene o se siteki, o le epikopo o se uarota, o le peresitene o se misiona, o le peresitene o se korama, latou te umia uma lava ia ki o galuega e faataunuuna i lena vaega faapitoa poo lea nofoaga. E le faapea



o le a faateleina ai lona Perisitua e ala i lenei tofiga faapitoa” (*Gospel Doctrine*, p. 136).

O nisi ki e otometi lava le tuuina atu i se alii pe a tuuina atu le Perisitua Arona poo le Mekisateko. O nei ki o loo iai ni aia tatau patino ma o le a ia umiaina mo le umi lava na te tauaveina ai le perisitua. Mo se faataitaiga, afai e faauuina se alii i le Perisitua Mekisateko, e tuuina atu ia te ia ia ki na tuuina atu ai faamanuiaga faaletama, na te tuuina atu ai faamanuiaga o le faamafanafanaga, ma faamalolo ai ma'i. O nei ki e mafai ona aveesea mai ia te ia pe afai na te faia se agasala e matuia ma titina ai lona igoa mai le Ekalesia. Ae afai e leai, e oo foi i le oti e le mafai ona aveeseina mai ia te ia.

I le isi itu, e iai lava mana ma aia tatau e mafai ona tuuina atu i se tasi mo na o se taimi e le tumau. Mo se faataitaiga, o se peresitene o se paranesi na te umiaina ki mo lana paranesi mo na o le taimi lava e avee ai o ia ma peresitene o le paranesi. Afai e faamaloloina o ia mai lona tofiga, o lona uiga o le a ia le toe umiaina loa nei ki.

Taua o Ki o le Perisitua

Afai o le a valaauiina se tasi e galue i se tofiga o le Ekalesia mo se taimi le tumau i le avee ai ma se taitai poo se faiaoga, e *faamanuiaina* o ia i lona tofiga. O le taitai o le Ekalesia o loo ia umia ki i lona valaauga na tuuina atu i lea tagata le aia e galue ai i lona valaauga i le faamanuiaga. A maea lona, e leai se tasi e toe mafai ona galue i lona valaauga—e pei lava ona ia le mafaia foi ona faia o tiute o valaauga a se isi tagata. O le a iai pea i lea tagata lona aia seia oo ina faamaloloina mai o ia mai lona tofiga. O lona faamalologa e tuuina atu e le taitai pule faamalumalu; a mavae lona, o le a le toe umia loa e lea tagata le aia e galue ai i lona tofiga. E mafai ona faamanuiaina tagata o le Ekalesia e latou te auauna atu ai i ni tofiga mo se vaitaimi mo ni nai vaiaso, masina, poo tausaga. O le umi o le auaunaga e fuafua i le tulaga manaomia, o le faatinoga a le tagata lava ia, faapea ai ma le taitaiga a le Alii i le taitai pule faamalumalu.

E ui lava e mafai ona *faamanuiaina* alii ma tamaitai i *valaauga*, ae na o i latou e umiaina le perisitua e *faauuina* i *tofiga o le perisitua*. O nei tofiga e aofia ai le tiakono, aoao, ositaulaga, toeaina, faitaulaga sili, epikopo, peteriaka, Fitugafulu, ma Aposetolo. O le faauuina i nei tofi o le a mafai ai e se tagata ona auauna atu i le Ekalesia i ni ala faapitoa—ae se'i vagana ai, e pei ona talanoaina i le taimi ua tuanai, pe a faapea o le a tuuina atu iai le faatagaga mai ia i latou o loo umiaina ki o le perisitua e faia ai.

O loo faailoa mai i le tala lenei le ala e mafai ai ona faatulagaina lelei ma tulaga manuia le Ekalesia pe a faapea o le a faaogaina ma le tatau ki o le perisitua:

I popo fou o le Ekalesia, sa oo ane ia Hiram Page le manatu faapea sa ia te ia le pule e faaali atu ai afioga a le Alii i le Ekalesia. Sa amata loa ona ia ta'u atu i isi tagata e uiga i ana faaaliga, ma sa toatele lava tagata o le Ekalesia sa talitonu i mea sa ia aoaoina. Sa tatalo loa le Perofeta o Iosefa Samita ma fesili atu i le Alii poo le a le mea o le a fai. Sa tali mai loa le Alii ia te ia ma faapea mai, "O le a le tofia se tasi e talia poloaiga ma faaaliga i lenei Ekalesia, tau lava o la'u auuuna o Iosefa Samita le Itiiti" (MFF 28:2). Sa ia fetalai mai foi e tatau ia Iosefa ona ta'u atu ia Hiram Page o mea sa ia aoaoina ma tusitusia e mai le tiapolo. Sa faamalamalamaina mai e le Alii e le o Hiram le tagata na te taliaina faaaliga mo le Ekalesia. Na ia fetalai mai, "E le'i tofia o ia i nei mea. . . . Aua e ao ona faia mea uma i le faasologa tatau" (MFF 28:11-13).

Sa faia lava e le Perofeta o Iosefa Samita e pei ona fetalai mai ai le Alii ia te ia. Sa feiloai o ia ma Hiram Page ma tau atu ia te ia mea na fetalai mai ai le Alii. Sa faamauualaloina le loto o le Uso o Page ma sa faaaliga lona faanoanoa ma folafola atu o le a tuu le mea sa ia faia. Ina ua vaaia lona salamo, o lea sa faapea atu loa le Perofeta ia te ia e alu atu loa e ave sana misiona. Mulimuli ane ina ua tauaofia se konafesi, sa faamatala atu loa e le Perofeta i tagata o le Ekalesia mea sa faaali ane e le Alii ia te ia ma talosaga atu ai loa i tagata e aua le toe manatu se tasi i mea sa aoaoina ai i latou e Hiram Page. Sa latou malilie uma, ma sa latou palota ma taliaina ia Iosefa ua na o le pau lea o lo latou perofeta, tagata vaai, tali faaaliga. (Tagai ia Iosefa Samita, *History of the Church*, 1:109-15.)

Aisea e taua ai le na o le toatasi lava o le tagata na te faaaogaina uma ki o le perisitua?

O le Ekalesia a le Alii o se "Fale o le Faatulagaga"

Talu ai ona e paia tele le perisitua, o lea ua faatonuina ai i tatou ina ia tatou faaaogaina ma le faaeteete. O le mea lea e pulea ai le perisitua i se ala tatau ma le faatulagaina lelei ina ia aua nei iai se faasoesa ma puipuia mai ai i le faaaogaina sese. "Faauta, o lo'u fale o le fale faatulagaina tonu ma tatau, ua faapea mai ai le Alii le Atua, ae le o le fale o le faasoesa" (MFF 132:8).

O lea faatulagaga sa avea lava e le aunoa o se vaega o le malo o le Alii i luga o le fogaeleele. Mo se faataitaiga, sa iloa e Mose le matua manaomia lava o le faatulagaina lelei ina ua mavae ona valaauina o ia e taitaia le fanauga a Isaraelu. Sa manaomia e le fanauga a Isaraelu le taitaiga ina ia faatumauina ai lo latou loto gatasi, ae sa iloa e Mose e le mafai ona ia taitaiina na o ia nei tagata uma. O lea sa ia filifilia ai mai le nuu atoa "ni tagata loto tetele, o e matatau i le Atua, o tagata faamaoni ma valaauina i latou e avea ma pule i tagata. Na ia faamanuiaina nisi e avea ma alii o taitoaselau, o nisi e avea ma alii o taitoalimagafulu, ma isi e avea ma alii o taitoatinogafulu. Ona ia

aoaoina lea o i latou i le ala latou te pule faamalumu ai i a latou vaega. (Tagai i le Esoto 18:17–22.)

O ona po nei la, ua tuuina atu ai i o tatou taitai perisitua—o epikopo ma persitene o siteki, itu, misiona, paranesi, ma korama—ia ki o le perisitua ina ia mafai ai ona taitaiina i tatou i se ala tonu ma ia maua ai sauniga e talafeagai ai o le talalelei. E aofia ai tulaga nei i matafaioi o loo iai i taitai o le Ekalesia ona o loo umia e i latou ki o le perisitua:

- Faatalanoa i latou o le a mauaina sauniga.
- Ia faamalalama atu le taua o le sauniga.
- Fuafua pe ua saunia pe leai le tagata e mauaina sauniga.
- Ia tausia faamaumauga e talafeagai ai.
- Fuafuaina le agavaa o i latou o le a faataunuaina se sauniga.
- Fai atu i se tasi na te taitaiina sauniga o le Ekalesia.
- Fesili atu mo se palota e faamaonia ai mai tagata o le Ekalesia.

O Loo i le Tama ia Ki e Faamanuiaina ai Lona Aiga

E ala mai i le filifiliga a le Alii, o lea ua avea ai se tama ma ulu o le aiga. Ina ia avea ma se tagata agavaa e avea ai o ia ma ulu faaleagaga o lona aiga, e tatau ona ia faamamaluina lona perisitua. Afai na te faia faapea, o le a ia mauaina le mana e taitaiina ai lona aiga i le alofa ma le faautauta.

O a ki o loo ia i tatou i le avea ai ma ulu o o tatou aiga?

O a mea o loo faataga mai e nei ki tatou te faia mo o tatou aiga?

E mafaia e le perisitua ona aumaia le tele o faamanuiaga ofofofia i o tatou olaga. Ua maea ona lisiina atu e Epikopo H. Burke Peterson nisi o nei faamanuiaga: “Afai o le a tatou ola e tusa ai ma ia mea, o le a maua e i tatou le mana mai le Tama Faalelagi lea o le a aumaia ai le filemu i totonu o se aiga fevaevaeai. O le a tatou maua le mana e faamanuia ma faamafanafana atu ai i fanau laiti, o le a faamatuina ai loimata maligi i le vaveao. E mafai ona avea i tatou ma mana e faafilemuina ai le tino vaivai o se ava. O i tatou e mafai ona avea ma mana e tuuina atu ai le taitaiga lelei i se tagata talavou o loo fememeai. O loo ia i tatou le mana e faamanuiaina ai se afafine faatoa alu atu i se tafaoga faamasani pe a’o le’i alu atu o ia e faaipoipo i le malumu, poo le faamanuia ai foi o se atalii o le a malaga atu i se misiona poo le kolisi. . . . O i tatou e mafai ona avea ma mana e faamalolo ai e mamai ma faamafanafana ai e lagona faaesea” (“Priesthood—Authority and Power,” *Ensign*, May 1976, p. 33).

O le a se lagona e oo ia te oe i se tama agavaa o loo iai le mana ma le pule na te faamanuiaina ai lona toalua ma lana fanau? O le a sou lagona pe a fesili atu se tasi o le aiga ia te oe mo se faamanuiaga faapena?

Sa maua e Sister Kyuln Lee o Korea se faamafanafanaga o se faamanuiaga faaleperisitua i lona aiga. Sa ia faamatalaina le tala lenei:

“O lenei mea na tupu pe tusa ma le fitu tausaga talu ai, ina ua faatoa sefulu masina o la’u pepe muamua. O lo’u toalua o se tasi o le au peresitene o le Itu a Korea, ma e fai ma malaga o ia i ni nofoaga taumamao e toetiiti lava o faaiuga o vaiaso uma ina ia faataunuaina ona tofiga o le Ekalesia, ae tuu ai na o a’u ma le ma tama teine o Po Hee. O le faaiuga la o lea vaiaso faapitoa, sa malaga atu ai mo le 270 maila i Pusan i le Aso Toonai (tusa lea e ta’ifitu itula e alu ai ma toe foi mai) ma toe foi ane i Seoul i lona lava po e auai i le konafesi a le Paranesi o Seoul i Sasae i le Aso Sa. O se mea faavaivai tagata, ma sa ou lagona lava le alofa i si o’u toalua.

“Sa manuia lava Po Hee i le Aso Toonai ma le Aso Sa, ma, e ui lava sa fai si ona pisa tele i le taimi o le sauniga o le faamanatuga, ae ina ua ma foi atu i lo matou fale, sa inu loa lana fagususu ma moe loa. E tusa o le 9:30 i le po ae amata loa ona tagi. Ua leotele atu lana tagi lea nai lo le mea e masani ai, ma ina ua ou siiina o ia i luga, sa ou iloa ai ua matua’i maualuga lava lona fiva. Sa ou leiloa le mea o le a fai. Sa ou iloa o loo tapuni le falemai e tasi lea e latalata atu i lo matou fale. Na faaauau pea ona tagi o ia mo sina taimi, ma e oo i le taimi na savali mai ai lo’u toalua i totonu o le faitotoa, sa amata loa foi ona ou tagi atu ai ma a’u.

“Sa tago mai lo’u toalua ma fusi atu le pepe faatasi ma a’u ma fesili mai poo le a le mea o faaletonu. Ua matua tigaina lava foliga ua oo nei i si a ma tama laititi o Po Hee. Ina ua ou faamatalaina atu ia te ia le mea ua tupu, sa ia tuuina i lalo lona peleue ma lana atopa’u laititi ma avane i fafo lana suauu paia. Ona ia faauuina lea o le ma tama teine. Ou te le manatuaina uma upu ae ina ua uma ona ia faia upu autu o le faauuga, sa faapea loa lo’u toalua: “Le Tama e Faalelagi, ua ou matua faafetai ona o le ola, mo lo’u toalua ma pepe. Ou te faafetai ona o lenei talalelei toefuataiina ma le avanoa e auauna atu ai. Sa e auina atu a’u i lalo i Pusan ma le Paranesi a Seoul i Sasa’e e taulimaina nisi o mataupu tau le Ekalesia. O lea ua ou faataunuaina o’u tiutetauave e pei ona tuuina mai i le aso ananafi ma le aso, ma o lea ua ou tau mai o loo matuai ma’i lava si o’u afafine pepe. Sa e fesoasoani mai ia te a’u i taimi uma e le aunoa. Faamolemole, fesoasoani mai ia te a’u i le po nei.’

“A’o le’i faamaeaina e ia lana tatalo, ae ua moe filemu le pepe, ma i le taimi sa ou tepa a’e ai i luga, sa ou vaايا lo’u toalua o loo tu pea ma ona loimata o loo maligi ifo.

“O loo iai nei la ma tama teine i le vasega lua laiti ma o loo maloloina ma fiafia, ae o loo mafai lava ona ou manatuaina ma le manino le vaega o le tatalo a lo’u toalua lea sa ia tauina atu ai i le Alii, “O lea ua ou



faataunuina o'u tiutetauave e pei ona tuuina mai i le aso ananafi ma le aso.' Ou te faamoemoe o le a ou faaauau pea ona ou lagolago ia te ia ina ia mafai e ia ona ta'u atu i le Alii sa ia usiuitai. O se matuai faamanuiaga lava le iai o se toalua na te faamamaluina le perisitua!" ("Our Baby, My Husband, and the Priesthood," *Ensign*, Aug. 1975, p. 65).

Faali atu le ata 2-i, "E avanoa faamanuiaga o le perisitua i tagata uma o le aiga."

E iai faamanuiaga faapitoa o le perisitua e avanoa mo tagata uma o le aiga. O se tamaititi o loo iai se faafitauli ua faigata ona foia, poo se tina o loo ia manaomia se faamafanafanaga po o se taitaiga, e mafai ona talosagaina se faamanuiaga faapitoa ma o le a faapea foi ona ia maua ai le fesoasoani o loo latou manaomia mai le Alii. I le taliaina ia o nei faamanuiaga faapea, e moomia ona tatou manatua le tele o tofotofoga o le a oo mai ia i tatou. E tatau ona tatou foia nei faafitauli i le mea e gata mai ai lo tatou malosi. Ae afai ua tatou iloa o le a tatou manaomia sina fesoasoani e sili atu, e mafai ona tatou o atu i se tasi o umia le perisitua i o tatou aiga, o o tatou faiaoga o aiga, po o se isi taitai perisitua ma fesili atu iai mo se faamanuiaga faapitoa a le peisitua.

Fai atu i alii e faamatala faapuupuu mai nisi o faamanuiaga na mauaina e o latou aiga e ala mai i le perisitua.

"E tatau i le tama ona matelaina ma galala ma naunau atu e faamanuia lona aiga, ma alu atu i le Alii, mafaufau loloto i afioga a le Atua, ma ola e ala i le Agaga ina ia iloa le mafaufau ma le finagalo o le Alii ma le mea e tatau ona ia faia e taitaiina ai lona aiga" (Ezra Taft Benson, *God, Family, Country: Our Three Great Loyalties*, p. 185).

I le faaopoopo atu la i lea ituaiga taitaiga, "o se tama agavaa na te umiaina le Perisitua Mekisateko e tatau ona uunaiina na te faaigoa ma faamanuia lana fanau. E tatau ona ia faauuina tagata mamai i totonu o lona aiga. . . . E mafai ona ia tuuina atu ni faamanuiaga faaletama."

Na saunoa mai Elder Theodore Tuttle e faapea: "I le avea ai ma peteriaka o lona aiga, o le tama o se tali faaaliga foi lea i lona aiga . . . ma . . . o le uiga o lea mea ua iai o ia i le tulaga o le taliaina o faaaliga mai le Alii mo le lelei ma le faamanuiaina o lona aiga (tagai i *Doctrines of Salvation*, 3:172)" (A. Theodore Tuttle, "The Role of Fathers," *Ensign*, Jan. 1974, pp. 66-67). O tama agavaa e tatau ona latou papatisoina a latou fanau, ma faamauiina i o latou luga le meaalofa o le Agaga Paia, ma faauuina i latou i le perisitua. Ae peitai, faatoa mafai ona faataunuina e se tama nei sauniga pe a ia mauaina le faatagaga mai taitai o le perisitua o loo latou umiaina ki i le iunite o le Ekalesia o loo iai lea tama.

Faaiuga

E ui lava ua ia te i tatou le pule e faataunuina ai sauniga patino i le avea ai ma nisi e umiaina le perisitua, ae le mafai ona tatou faataunuina sei vagana ua tatou maua le faatagaga mai o tatou taitai

o le Ekalesia e faia ai. O le mana e tuuina atu ai lea faatagaga e taua o ki o le perisitua. O le perofeta ua na o le pau lea o le tagata i luga o le fogaeleele o loo umiaina ki uma o le perisitua, ae ua ia tuuina mai nisi o nei ki i taitai o loo pule faamalumu i iunite o le Ekalesia; ona latou tuuina mai ai foi lea ia i tatou o le faatagaga e faaaogaina ai o tatou perisitua.

I le isi itu, ina ua faauuina i tatou i le Perisitua Mekisateko, ua tatou mauaina nisi ki patino mo le faaaogaina i le avea ai lea o i tatou ma tama. Faatasi ai la ma nei ki, e mafai ai ona faaaogaina le perisitua e faamanuia ai o tatou aiga e aunoa ma le tau mauaina mai o se faatagaga.

Lu'i

Fuafua ma le agaga tatalo pe mafai faapefea ona e faaaogaina lou perisitua ina ia faamanuiaina ai tagata o lou aiga.

Mau Faaopoopo

MFF 65:1–6 (o ki o le malo o le Atua ua tuuina atu i le tagata)

MFF 110:11–16 (o ki o le tisipenisione lenei faapea ma isi ua uma ona tuuina atu i le tagata)

Sauniuniga a le Faiaoga

A'o le'i tuuina atu le lesona—

1. Suesue le 1 Korinito 12:12–28.
2. Fai atu i tagata o le vasega e faatamala mai ni tala poo ni mau o loo i leni lesona.

Faamamaluina o le Perisitua

Lesona 3

Ua fuafuaina lenei lesona ia fesoasoani ai ina ia tatou malamalama i le mana paia o le perisitua ma faateleina lo tatou naunau e faamamaluina .

Faatomuaga

“E toalua ni faifeautalai sa galulue i Hong Kong ma sa valaaulia mai i laua e fai taumafataga faatasi i le afiafi ma Brother ma Sister Wong. Sa i luga o le laulau ni ipu ‘ai eseese. O Sister Wong sa kuka mai le isi itu o le potu ma sa faaali mai ona laufofoga fiafia i faifeautalai nei e toalua. Sa tuu e ia meaai i luga o le laulau. Sa matua maofa lava ma faateia faifeautalai i le taumafataga. Sa iai ipu araisa, ae sa iai foi ipu o loo iai ia ula, ma isi lava mau meaai taugata eseese e seasea ona mau, ua sili atu le tau nai lo tupe e mauaina e lenei aiga sulufai ma lotomauualalo. Sa faamanuia e Brother Wong le meaai ma amata loa le taumafataga; e le’i ai tele Brother ma Sister Wong, ae na o ni nai meaai laiti sa laua ‘aina, ae tuu uma atu meaai mo faifeautalai. Sa mafai ona lagonaina e faifeautalai le faamaoni o lenei faaaloaloga, ma e ui lava ina la iloa o loo laua taumafaina ni meaai e sili atu ona lelei nai lo ni meaai e mafai e le aiga lenei o Wong ona taumamafa ai ia latou taumafataga masani—aua a fuafua i nei meaai e tusa lea o le tofogi o le masina atoa—ae sa le mananao lava faifeautalai e faaali atu se lagona tetee pe faamanualia ai finagalo pe teena foi le faaaloalo, o le tulaga lea ua manino mai ai le tele o lenei osigataulaga o loo aafia ai.

“O se taumafataga e faigata ona ai; i le manao e taliaina le meaalofa na tuuina mai ma le loto atoa, ae a mafaufau atu foi iai i le faigata ma aso o le a matelaina ai—o le osigataulaga—na mafai ai ona faia lenei meaalofa. Sa na o sina tofo lava o Brother ma Sister Wong ma le laua fanau tama i le taumafataga. Ae ina ua maea, sa latou faaalua lo latou malilie ma sa latou naunau lava e fia iloa pe ua laulelei alii faifeautalai. A’o tulai uma tagata i luga a’o tapenaina ese atu e Sister Wong ia ipu, sa uu e se tasi o alii faifeau nei le lima o Brother Wong ma faapea atu ma le lagona ootia: ‘Aisea ua outou faaaloalo mai ai ia te i maua faapenei, ae o le a tele ai lo outou tigaina?’ Faatasi ai ma le filemu ma le agamalu lea na mafai ona aumaia e ia mai lona aiga ma lona atunuu moni ma ia taliaina ai le talalelei i se atunuu ese, sa faapea mai Brother Wong: ‘Ua matou faia mo oulua, talu ai ona o loo oulua umiaina le perisitua, ma ua auina mai oulua e le Atua iinei e aoao ia i matou’ ” (*Life and Teachings of Jesus*, p. 134).

Na faapefea ona faaali atu e Brother ma Sister Wong le faamamalu ia i latou o loo umiaina le perisitua a le Atua?

Aisea e taua ai lo tatou faamamaluina o le perisitua o loo tatou umia?

O le Perisitua—le Mana Aupito Sili o i le Fogaeleele

O le perisitua o le mana sili lea o loo iai i le lalolagi. E le gata o le mana o le Atua ua tuuina atu i tagata e faia ai lana galuega, ae o le mana foi lava lea sa faaogaina e le Tama Faalelagi ma Iesu Keriso e faia ai la laua galuega. O le mea moni, o le mana o le perisitua na foafoaina ai e le Faaola le lalolagi.

Faaali atu le ata 3-a, “Na foafoaina le lalolagi e ala mai i le mana o le perisitua.”

O se avanoa sili mo i tatou le tuuina mai o lenei perisitua ma ona mana.

Tuu atu i tagata o le vasega e faitau le Mataupu Faavae ma Feagaiga 107:1–4 ma saili le igoa aloaia o le perisitua.

O le igoa moni lava o le perisitua o le “Perisitua Paia, e tusa ai ma le Faatulagaga a le Alo o le Atua.” Tatou te taua o le Perisitua Mekisateko ina ia aloese mai ai ma le faaogaina soo o le suafa “o le Alo o le Atua.” Ae o le perisitua lava ia o le perisitua a le Faaola.

O le toatele o i tatou e le malamalama i le malosi tele o le perisitua. I le taimi o Enoka, sa faia ai e le Atua se folafolaga “o tagata soifua uma lava taitoatasi o le a faauina i lenei tulaga ma le valaauga e tataua ona ia te ia le mana, e ala i le faatuatua, e faamalepeina ai mauga, e vaevaeina ai sami, e faamamateina ai vai, ma suia ai o latou ala, ma tuuina le felotoai i vaegaau a malo, e vaevaeina le lalolagi, ma motusia soo se noanoataga, ma tu atu i luma o le afioaga o le Atua; *ma faia mea uma lava e tusa ai ma lona finagalo*, e tusa ai ma lana poloaiga” (John Taylor, *The Meditation and Atonement*, p. 85; see also Joseph Smith Translation, Genesis 14:30–31).

Talu ai ona ua tatou umia le perisitua, o lea ua avea ai i tatou ma sui o Keriso. O le mea lea, e tataua ai ona tatou faia le mea na ia tuuina mai tatou te faia ina ia maua ai lona mana. E tataua ona tatou usiusitai i ana poloaiga ma taumafai i soo se taimi lava e faaogaina ai le perisitua, ina ia galulue i le auala e finagalo Keriso tatou te galulue ai.

“Ua ou malamalama e iai se eseesea i le va o le pule a le perisitua ma le mana o le perisitua. . . . O i tatou uma lava o loo umia le perisitua ua iai le pule e galulue ai mo le Alii, ae peitai, o le aoga o la tatou pule—pe afai e te finagalo iai, o le mana lea e oo mai ona o lona pule—e faalagolago lea i le ituaiga olaga o loo tatou ola ai; e faalagolago i lo tatou amiotonu” (H. Burke Peterson, *Ensign*, May 1976, p. 33).

Afai tatou te agavaa, e ia i tatou le mana e faamanuia ai o tatou aiga, e maua ai faaliga mo o tatou valaauga faaleperisitua, e faia ai vavega, ma faatoilaloina ai Satani. O le perisitua o le mana lea o loo faatauina ai sauniga, e faia ai galuega o le malumalu, ma talaiina



ai le talalelei. E le mafai lava ona tatou mauaina se tasi o nei sauniga poo faamanuiaga e aunoa ma le mana o le perisitua.

Na faapefea ona e vaaia le mana o le perisitua i lou olaga?

O mea na tutupu i le tagata lava ia na fesoasoani ai i se tasi faifeautalai talavou ia malamalama ai i le mana o le perisitua.

Sa malaga atu o ia ma lana soa i se tasi itu sili ona matitiva o le aai e faia ai ni lesona. O le ulugalii talavou lenei o loo sailiili i le talalelei e matuai matitiva lava. O le mea pito i sili ona taua ma faapelepele ia te i laua o si a laua tama teine laititi muamua lea, ae o le taimi lea o loo matuai ma'i tigaina ai lava le teineitiiti. O ona foliga ua pei e solouli. Sa fai pea ma moeiini ona mata e pei e tautulemoe. Sa na o le fetagisi ma le faavauvau ona matua. Sa laua iloa si a laua tama faapelepele o le a oti. Sa oo ane se manatu malosi i le faifeautalai talavou lenei—“Faaaoga lou perisitua!” O lea sa ia faapea atu ai i le tama na te siiina lona afafine i ona lima. Ona faaee atu lea o lima o le faifeautalai lenei ma lana soa i luga o si ulu laititi o lenei pepe meamea ma faataunuu loa le faaogaina o lo laua faatuatua ma tuuina atu ia te ia se faamanuiaga. O le leo o le Agaga na tauina atu ia te i laua ina ia faamanuia ia te ia ina ia maua lona soifua maloloina ma ia tuputupu ae ma avea ma se tamaitai talavou tausafia. Sa faataunuuina lava le faamanuiaga. Sa toe faafoisia le malosi atoatoa o le teineitiiti.

Sa olioli lenei faifeautalai talavou i le Alii mo le avanoa sa avea ai o ia o sana auauna. Ma o lenei mea na tupu ia te ia o se mea e ui ina faagaetia ae sa ia maua ai foi ma le toafimalie. Sa ia aoaoina ai foi se mea e uiga i le silisiliese o le mana o le Atua lea e mafai e ana auauna ona faaogaina.

Aisea e taua tele ai lo tatou faatuatua i le faaogaina o le mana o le perisitua?

Faamamaluina o le Perisitua

Talu ai ona o le perisitua lenei a le Faaola, o lea e tatau ai ona tatou faamamaluina e pei ona finagalo ai Keriso tatou te faamamaluina. Tatou te faamamaluina le Alii ma lana perisitua pe afai tatou te tausia poloaiga ma faia galuega faaleperisitua ua poloaia i tatou e faia. Talu ai ona o loo tatou umia le perisitua, o lea e tatau ai ona tatou galulue ma le amiotonu.

Sa tusia e Elder James E. Talmage e faatatau ia te ia a'o ia taumafai e faamamalu iai:

“Ina ua uma ona faauuina a'u, sa oo mai ia te au se lagona ese lava ou te le'i matua mafai lava ona faamatalaina atoatoa. E pei o se mea lea e toetoe lava a le mafai, ona o a'u ua na o se tamaititi, a ua amanaiaina ma faamamaluina e le Atua ina ia valaauina atu au i le perisitua. . . .sa galo ia te au ua na o a'u o se tama e sefulutasi

tausaga; ae sa ou lagona le malosi pe a ou manatu o a'u lea ua ou i le Alii, ma o le a ia fesoasoani mai ia te au i soo se mea lava o le a manaomia ai a'u. . . .

“O le aafiaga o lo'u faauuga [e avea ma tiakono] sa oo mai lea i totonu o lo'u olaga faatama. O le mea ou te popole ai ona o nisi o taimi e galo ai ia te a'u lo'u tulaga, ae ou te faafetai pea ona o le tele o taimi ou te manatua ai, ma e avea lea ma mea ou te lagona ai le sili atu ona ou fiafia. A oo la i le taimi ou te auai ai i taaloga i le malae taalo, ma atonu foi e iai nisi taimi e faasoosoina ai au e fai nisi tulaga e le tusa ai ma le tulafono i ni taaloga, pe ou te iai i se feteenaiga ma se uo ae ou manatua loa, ma e avea lava lea manatu ma se fesoasoani aoga tele e pei lava o loo faamatala leotele mai—'O a'u o se tiakono; ma e le o se mea sa'o le faia o ni uiga faapea e se tiakono.' A oo i aso o suega, pe a foliga mai ia te au e faigofie lava ona kopi atu i galuega a se isi tama, . . . ou te faapea ifo i lo'u mafaufau, 'E sili atu ona leaga ia te a'u ona ou faia lea mea nai lo i latou, aua o a'u o le tiakono.'

“. . . O lenei lagona o le faamamaluina tele o lo'u faauuga na ou maua ai le fiafia e auauna atu i le Alii atoa ma tagata. . . .

“E le mafai ona mou ese atu le tulaga lea sa oo mai i lo'u mafaufau ina ua avea a'u ma tiakono. O le lagona lea faapea sa valaauina au i se tulaga faapitoa o le auauna atu i le Alii, e avea ma se tasi e tauaveina le perisitua, sa avea lea ma puna o le malosi ia te au i nei tausaga uma lava. Ina ua faauuina mulimuli ane ai a'u i isi tofiga maualuluga o le Ekalesia, sa faapea foi ona oo mai ia te au lea faamafanafanaga, i soo se sauniga lava,—ua tuuina moni mai lava ia te au le mana mai le lagi, ma ua finagalo le Alii ina ia ou faamamaluina lana pule. Sa faapea ona fauuina au e avea ma aoao, o se toeaina, o se faitaulaga sili, ma mulimuli ane ai i le avea ma Aposetolo a le Alii o Iesu Keriso, ma o faauuga uma taitasi e oo mai ai ia te au se lagona ofoofogia ma le fou e pei o lea sa ou lagonaina i le uluai taimi sa valaauina ai au e avea ma tiakono i le galuega a le Alii” (*Incidents from the Lives of Our Church Leaders* [deacon's instruction manual, 1914], pp. 135–136).

O a ni auala e mafai ai ona tatou faamamaluina le perisitua?

Sa taua e Peresitene Polika laga i se tasi taimi e faapea “O alii e umia . . . le Perisitua Paia, o e ua poloaiina e folafola atu le ola faavavau i le lalolagi, e tatau ona latou tauivi pea lava pea e ala i a latou upu ma gaoloiga. . . ina ia faamamaluina ma lo latou maelega atoatoa i o latou valaauga ma tofiga i le avea ai ma faifeau ma sui o le Silisili Ese” (*Discourses of Brigham Young*, p. 130).

Tauaveina o le Perisitua ma le Mamalu

Na faamatala mai e Peresitene Harold B. Lee le tala lenei:

“Ou te manatua lava se tala sa faamatalaina mai e se tagata o le Ekalesia sa i totonu o le vaegaau. Sa valaaulia o ia i se kalapu a le au

mautofi sa faia ai se pati inuga pia, ma sa pisapisao tele ma lē manuia e pei o uiga fouvale sa faaalua ai. Sa ia maitauina le alii e toatasi lava e ese mai ai i le isi vaega, ma o lea alii e foliga mai e le fiafia o ia i nei mea o loo fai nei, ma o lea sa taufaaofiofi atu ai loa o ia i le mea o loo iai lenei alii, e pei foi o ia, e le o auai i le inuga pia la o loo fai ma sa ia faapea atu loa iai, 'E foliga mai e te le fiafia tele i lenei ituaiga pati.' Sa tu sa'o lenei alii i luga ma faaloloa ona lima i le mea e gata ai ma faapea mai, 'E leai lau susuga, ou te le auai i lea ituaiga pati, aua e pei ona e vaai mai, o a'u o se tasi o le Aigatupu o Egelani.' Sa faapea atu loa ma le mitamita lenei alii o le Au Paia o Aso e Gata Ai, 'E faapena foi au, aua o a'u o se tasi o le Aigatupu o le Atua'" (*Ye Are the Light of the World*, p. 22; tagai i le 1 Peteru 2:9).

Ina ia avea i tatou o ni alii agavaa o le perisitua, e tatau ona tatou faamamaluina le perisitua i lo tatou ola lea ma le amiotonu. Na saunoa mai foi faapea Peresitene Harold B. Lee: "E tatau ona tatou faapea atu, 'Talu ai ona o au ou te umia le perisitua a le Atua soifua, o au o le sui o lo tatou Tama Faalelagi ma o loo o'u umia le perisitua lea e mafai ai ona ia galue e ala mai ia te a'u; e le mafai foi ona ou punou ifo ma faia nisi o mea lea atonu ua ou faia talu ai lo ma sootaga ma le perisitua a le Atua. . . .' Ma o le mea tonu lena e tatau i ai latou uma ua umia le perisitua ona latou fai ifo ia i latou lava: 'E le mafai ona avea i tatou ma tagata e umia le perisitua ma avea faapei o isi tagata. E tatau lava ona ese i tatou.' " (*Ensign*, Jan. 1974, p. 97).

Faitau atu i le vasega le faamatalaga leni: Fai atu iai e maitau mai ia auala e tauaveina ai le perisitua ma le mamalu.

Na saunoa mai Elder Robert L. Simpson e faapea:

"O le tauaveina o le perisitua a le Atua ma le mamalu o lona uiga. . . . e tatau ona tatou galulue ma le mamalu toafimalie, e le gata i le laulau faamanatuga ae faapea foi i galuega, i le aoga, ma e oo foi i le taimi e savali atu ai Tama i le auala e agai atu i lana galuega; o i tatou nei o loo umia le perisitua e ese mai ai lava i tatou, e le faapea e iloga mai so tatou sili atu nai lo se isi, ae ese mai ai lava i tatou. O se sui o le Atua e *laei lelei*; e tusaafia i ona uiga uma. . . . Ma o le mea pito i mautinoa lava, e tatau ona matua *mama* lava o tatou tino faapea foi ma o tatou laei. . . .

"O nisi foi taimi e manaomia ai ona faaleleia atili le gagana e tautala ai le tagata o loo umia le perisitua. E leai se mamalu i le soona faaagaina o le gagana masoa. O le palauvale o se faatiga lea i le Atua. . . .

"Ua tatou faoa mea a le Atua pe afai o le a tatou le tausia le tulafono o le sefuluai. (Tagai i le Malaki 3:8). E leai se tagata e umiaina le perisitua e mafai ona tulai atu ma le mamalu e sili nai lo le taimi lea na te iloa ai o loo maea ona totogiina pea lana aitalafu tau tupe i le Alii ma o loo atoatoa.

“E leai se tagata e umiaina le perisitua e tulai mai ma sona mamalu e itiiti ifo nai lo le tulaga o le tausia lea o lona tino ma ta’ua o le malumalu o le Atua. . . . Uso e, o le mea moni lava o loo aunoa i tatou ma le faamamaluina pe a tatou solia le tulafono a le Tama Faalelagi mo le *soifua maloloina* [e ala lea i le faaaogaina o ava malosi, vailaau oona, poo le tapaa]” (in Conference Report, Melbourne Area Conference 1976, p. 38).

O le a le mea na fautuaina mai e Elder Simpson e faapea e mafai ona fesoasoani ai ia i tatou ina ia mafai ai ona tatou umia le perisitua ma le mamalu? Ia lisi i luga o le laupapa manatu e tauina mai e le vasega. (Atonu e mafai ona aofia ai i le lisi le lotomauualalo, laei mama ma le talafeagai, ia le gaoina, ia tumama, ia saunoa i le gagana e talafeagai ai, sefuluai, ma usiusitai i le Upu o le Poto.)

O a nisi mea e mafai ona fesoasoani ai ia i tatou ina ia tatou umia ma tauaveina le perisitua ma le mamalu?

Na faamatalaina mai e Elder Vaughn J. Featherstone le mea lenei na tupu ia te ia:

“Ou te manatuaina lo’u foi mai i lo’u aiga i le tasi aso mai lo’u ofisa tusa lea o le itula e 7:00 i le afiafi ae faatoa savali atu lava i fafo ia Merlene [lona toalua] e aoao lana vasega o le Lora. Fai mai lona faletua, ‘E le o malosi lelei ia Jill—aua le tuua na o ia.’ Ma o lea sa ma faamuli ai loa ma Jill i le fale. Sa ou faitauina atu tusi ia te ia, ona ma matamata ai lea i se ata i le TV mo le afa itula. Ina ua mavae lena sa ma taaalo i nai taaloga, ma pe tusa o le 9:30 i le afiafi, sa ou faapea atu ai, ‘La’u pele e, o le a sau faalogo ia te oe?’

“Ou te le o lagona lava so’u malosi lelei, Tama, ma sa fai mai tina ia te a’u afai ou te lagona se faaletonu, ona ou fai atu lea ia te oe mo se faamanuiaga mo a’u. Faamata e mafai ona e tuuina mai se faamanuiaga mo a’u?”

“Sa ou faapea atu, ‘E mafai, la’u pele.’ Sa ou alu atu i totonu o le potu, ma fai lo’u peleue, o lo’u ofutino paepae ma le fusiua, ona ou alu atu lea i lona moega. Sa nofo o ia i le pito o le moega ma sa ou tuuina atu loa ia te ia se faamanuiaga. Ona ou toe foi atu lea i le pusatu, ma talai ese lo’u ofutino paepae ma le fusiua ma le peleue, ma sauni e moe.

“E te manatu o le a galo i lenei teineititi lena mea? Ailoga. Atonu e galo ia te ia le faamanuiaga, ae o le a le mafai ona galo ia te ia lo’u faaalologia o lo’u perisitua faapea ma ia i le faia lelei o lavalava mo lena sauniga” (*A Generation of Excellence*, p. 145).

Na faapefea ona tauaveina e Elder Featherstone lona perisitua ma le mamalu?

O se matuai faamamaluina lava le umiaina o le perisitua a le Atua, ma le avea ai ma se tasi o le aiga tupu o le Atua. E tatau ona tatou matuai faaeteete ina ia faaaogaina le perisitua ma le mamalu ma tausia i tatou lava ina ia agavaa mo faamanuiaga a le Alii.

Faaiuga

O le perisitua o le mana lea o le Atua. Ma o lea foi mana, o le mana sili lea o loo iai i luga o le fogaeleele. E mafai ona tatou faamamaluina le perisitua i lo tatou manatua lea o loo tatou umia le pule a le Atua ma ua finagalo le Alii ina ia tatou faamamaluina lea pule. Tatou te umia le perisitua ma le mamalu pe a tatou usiusitai i poloaiga ma faia mea uma tatou te mafaia ina ia tatou amiotonu ai.

Lu'i

1. Mafaufau loloto e uiga i lou perisitua. Fesili ifo ia te oe lava, “E iai se isi mea o loo ou faia e le tatau ona faia e se tasi ua umia le perisitua? Pe o o'u matuai faatauaina ea lo'u perisitua ma mea ua aafia ai a'u gaoioiga?”
2. Tatalo faatauanau ina ia maua ai lagona i totonu ia sa faamatalaina e Elder Talmage. Ona maitau lea o ni auala se tasi poo se lua e mafai ona e faaleleia atili ai.
3. Ia e taumafai malosi ina ia tauaveina ma le mamalu le perisitua e ala lea i lou faaleleia atili o lou olaga.

Mau Faapoopo

1 Peteru 2:9 (o se tupulaga filifilia)

MFF 121:39–43 (taiala mo e umia le perisitua)

Sauniuniga a le Faiaoga

Ao lei tuuina atu le lesona—

1. Suesue *Tiute ma Faamanuiaga o le Perisitua, Vaega A*, lesona 2, “O le Perisitua mai ia Atamu e oo i le Toefuataiina.”
2. Afai e te manao iai, ia saunia e usu e le vasega le viiga “I Luga o Mauga” e avea ma pese amata. (Tagai i le *Mataupu Faavae o le Talalelei*, i. 338.)
3. Ia i ai se laupapa ma se penisina.
4. Fai atu i tagata o le vasega e faitau mai pe tuuina mai ni tala poo mau o loo i lenei lesona.

O le Faamoemoega o Sauniga a le Perisitua

Lesona 4

Ua tatau ona faateleina e lenei lesona lo tatou malamalama i sauniga o le perisitua ma lo latou taua i o tatou olaga.

Faatomuaga

“Matou te talitonu e faaolaina tagata uma lava i le togisala a Keriso pe a tausia poloaiga ma sauniga o le talalelei” (Mataupu Faavae o le Faatuatua 1:3).

O se sauniga o soo se mea lea e faauuina e le Atua, poo le poloaiina foi e ia, ia faia. Ae ui i lea o le tele lava o taimi, tatou te faaogaina le upu ina ia faatatau i sauniga ma taumafaiga ua tuuina mai e le Alii mo lo tatou faaolataga ma lo tatou faamafanafanaga. (See Bruce R. McConkie, *Mormon Doctrine*, p. 548.) I le tulaga la lenei, o sauniga o ni gaioiiga faaletino ia e fai ma faailoga o mea faaleagaga. I lo tatou auai la i ia sauniga, e mafai ona tatou maua mai ai le mana faaleagaga tatou te manaomia ina ia suia ai o tatou olaga. Mo se faataitaiga, o le papatisoga, e ese mai ai i isi mea, e tusa lea o se faamamaina o agasala pe a mavae ona salamo faamaoni.

Ina ia puipuia ai la le soona nunumi ma le faaogaina sese o nei sauniga, o lea ua manaomia ai e lo tatou Tama Faalelagi le pule faaleperisitua e faataunuuna ai sauniga o le talalelei. Seiloga lava ua faataunuuna e le tagata tonu ua tuuina iai le pule i se sauniga ona faapea lea ua faamaonia e lo tatou Tama Faalelagi le faatinoina o lenei sauniga.

E lua ituaiga sauniga faaleperisitua: o sauniga e moomia mo le faaeaga ma sauniga e faataunuuna mo lo tatou faamafanafanaga ma le taitaiga.

Sauniga e Moomia mo le Faaeaga

O loo ta'u mai ia i tatou e tusitusiga paia e na o sauniga lava tau le perisitua e mafai ai ona tatou toe foi atu i lo tatou Tama o i le Lagi ma tatou toe feiloai ai ma ia (tagai i le MFF 84:20–22).

Tusi i luga o le laupapa pe faaali atu se pepa o loo lisiina atu ai sauniga e moomia mo le faaeaga. (Tagai i fautuaga o loo i le vaega (“Sauniuniga a le Faiaoga.”))

Na saunoa Peresitene Wilford Woodruff e faapea, “E leai se tagata e mafai ona ulufale atu i le malo o le Atua sei vagana ua fanau o ia i le vai ma le Agaga. . . . E leai se tagata e na te mauaina le mamalu

faaselesitila sei vagana ua ui atu o ia i sauniga o le Maota o le Atua” (in *Journal Discourses*, 19:361).

Faitau le loane 3:3–5. O a sauniga o loo taua mai i lenei mau? (Papatísoga ma le faaee atu o lima mo le meaalofo o le Agaga Paia.)

PAPATÍSOGA

Faaali atu le fesoasoani vaaia 4-a, “O le papatísoga o le uluai sauniga lea o le talalelei.”

O le sauniga o le papatísoga o le uluai sauniga lea e tatau ona tatou muai mauaina pe a faapea tatou te toe nonofo ma lo tatou Tama Faalelagi. Ina ia toe foi atu ia te Ia, e tatau ona tatou iai i se tulaga mama ma le agavaa. O le a avea le papatísoga ma mea o le a mafai ai ona faamagaloina i tatou mai agasala ua tatou salamo mai ai. Ua maua ai e i tatou le avanoa tatou te mama ai ma ola ai i le afioaga o le Alii. (Tagai i *Tiute ma Faamanuiaga o le Perisitua, Vaega A*, mataupu 29, “Papatísoga, o se Feagaiga e Faaauauina.”)

Aisea e foliga mai ai o le papatísoga o le amataga o se olaga fou? E faapefea ona fesoasoani le papatísoga ia i tatou ina ia tatou toe foi atu i lo tatou Tama Faalelagi?

A papatísoina i tatou, ua faatofuina i tatou i lalo i le vai. Ua faatusa e tusitusiga paia lena mea o le tanumia o o tatou tagata tuai. A tatou o ese mai le vai, o lona uiga e pei ua faamamaina a tatou agasala ma ua toe amataina se olaga fou. Ona o lea la ua fufuluina ese a tatou agasala ua tuanai, o le a tatou maua ai se mana sili faaleagaga e suia ai o tatou olaga ma avea ai i tatou e atili foliga ai e pei o lo tatou Tama Faalelagi.

Ia valaaulia ni tagata o le vasega e faamatala atu pe na faapefea ona aafia o latou olaga i le papatísoga.

O LE FAAMANATUGA

O le sauniga o le faamanatuga o loo faamanatu mai ai ia i tatou folafolaga sa tatou faia i le papatísoga. I le taimi tatou te fetagofi atu ai i le areto ma le vai, tatou te toe manatua ai foi le soifuaga o lo tatou Faaola ma lana taulaga. Tatou te manatua ai la tatou folafolaga ina ia mulimuli atu ia te Ia. A faapea o le a tatou taumamafa ma le tatau o le a avea ai le faamanatuga ma puna o le malosiaga faaleagaga. E fesoasoani mai ia i tatou ia atinae le mana sili ina ia tausia ai poloaiga, aua o le salamo faamaoni ma le fetagofi atu ma le agavaa i le faamanatuga, e mafai ai ona faamamaina a tatou agasala na solia ina ua uma le papatísoga. O le auala lea tatou te faafouina ai la tatou feagaiga o le papatísoga.

O LE MEAALOF A O LE AGAGA PAIA

Faaali atu le fesoasoani vaaia 4-e, “O le tuuina atu o le meaalofo o le Agaga Paia o se sauniga a le Perisitua Mekisateko.”

4-a, O le papatísoga le uluai sauniga o le talalelei.

4-e, O le tuuina atu o le meaalofo o le Agaga Paia o se sauniga o le Perisitua Mekisateko







Sa taua i se tasi saunoaga a Iosefa Samita: “O le papatisoga i le vai, e aunoa ma le papatisoga i le afi ma le Agaga Paia e auai atu iai, e leai se aoga; o ia tulaga e matuai manaomia lava ma e le mafai ona tuueseeseina. E ao ina fanau se tasi i le vai ma le Agaga ina ia sao atu ai i le malo o le Atua” (*Teachings of the Prophet Joseph Smith*, p. 360).

Aisea tatou te moomia ai le meaalofa o le Agaga Paia mo i tatou ina ia faaeaina?

O le meaalofa o le Agaga Paia e ala i le faaee atu o lima ua folafolaina atu ia i latou ua salamo mai a latou agasala ma ua papatisoina ma faamauina o ni tagata o le Ekalesia a Iesu Keriso o le Au Paia o Aso e Gata Ai. O lenei sauniga, e faataunuuina e alii latou te umia le Perisitua Mekisateko e tuuina mai ai ia i tatou le aia tatau e ave a le Agaga Paia ma o tatou taitai e ala i lenei olaga faaletino ma e fesoasoani ai foi ia i tatou ia ususitai i tulafono, aooga faavae, ma sauniga o le talalelei. O le Agaga Paia e mafai ona molimau mai i le Tama ma le Alo (tagai i le 3 Nifae 28:11), faailoa ai mea o le a oo mai (Ioane 16:13), ma toe faamanatu mai ai ia i tatou nisi o mea taua (Ioane 14:26), ma e aoao mai ai i tatou i le mea moni o mea uma (Moronae 10:5). (Tagai i *Tiute ma Faamanuiaga o le Perisitua, Vaega A*, mataupu 30, “O le Meaalofa o le Agaga Paia.”)

Na faapefea ona faatosinaina lou olaga e le Agaga Paia?

FAAUUINA I LE PERISITUA MEKISATEKO

Faali atu le fesoasoani vaai 4-i, “E tatau ona manaomia le faauuina i le Perisitua Mekisateko mo le faaeaina.”

E tatau ona faauuina tane agavaa o le Ekalsia i le Perisitua Mekisateko ina ia maua ai le faaeaina. O lenei sauniga e maua ai e le tane se avanoa e talia ai le mana ma le pule a le Atua, lea e mafai ai e ia ona ia faataunuuina sauniga mo i latou o e pele ia te ia, e le gata ia i latou o loo ola ae faapea foi ma i latou ua malilii. O le a ave le perisitua o se puna o le malamalama ma o le a fesoasoani ia te ia ina ia malamalama ai i mea faaleagaga. E fesoasoani foi ia te ia e auuina atu i ona uso a tagata ma faia le galuega a le Atua i luga o lenei fogaeleele.

O nisi o ala e mafai ai e se tamaitai ona maua faamanuiaga o le Perisitua Mekisateko o le talia lea o sauniga o le talalelei i lalo o aao o le perisitua, ma lona faaiipoipo atu lea i se tasi e amiotonu o loo ia umia le perisitua. O faamanuiaga foi e oo mai i se aiga pe a oo ina faalauteleina e se alii lona perisitua e aafia ai lana ava e pei lava ona aafia ai o ia. Atonu o le ala aupito i taua lava e mafai ai ona auai le tamaitai i faamanuiaga o le perisitua o lona talia lea o le feagaiga paia ma lona faaiipoipo i totonu o le malumalu.

O LE FAAEEGA PAIA

Faali atu le fesoasoani vaai 4-o, “O le faaolataga e ala mai i sauniga o le malumalu.”

4-i, O le faauuina i le Perisitua Mekisateko e moomia mo le faaeaga



4-d

O le faaeega paia o se sauniga paia lea e na o totonu lava o le malumalu e faataunuuna ai. Sa saunoa Peresitene Polika laga e faapea, “O la outou faaeega paia o le talia uma lava lea o sauniga i totonu o le Maota o le Alii, lea e tatau mo oe pe a e tuua lenei olaga, ina ia e mafai ai ona toe savali atu i le afioaga o le Tama, e te ui atu ai i agelu o loo tutu o ni leoleo, ma o le a e mafai ai ona tauina atu upu autu, ma faailoga, e faatatau i le Perisitua Paia ma o le a e maua ai loa lou faaeaina e faavavau e ui lava ina iai i le lalolagi ma seoli” (in *Journal of Discourses*, 3:31).

O le faaeega paia i le malumalu e aoao mai ai ia i tatou le tele o mea e tatau ona tatou iloa ma faia ina ia tatou toe foi atu ai i lo tatou Tama o i le Lagi. Sa tatou faia foi ni folafolaga i le Alii. Mo se faaitaiga, sa tatou folafola atu o le a tatou usiusitai ma o le a tatou naunau foi e tuuina atu soo se mea lava o loo ia i tatou e fesoasoani ai i le galuega a le Alii. Ona e talu ai e paia tele nei folafolaga, o le mea lea e tuuina atu ai le faaeega paia na o i latou lava ua faaalua lo latou naunau e tausia poloaiga a lo tatou Tama Faalelagi. Ina ia faamanatu atu la ia i latou e faatatau i nei folafolaga, ua tuuina atu ia i latou ni ofu malumalu e ofu faapito i o latou tino.

E faapefea ona fesoasoani mai lo tatou tausia o nei folafolaga ia i tatou ina ia tatou toe foi atu ai i lo tatou Tama Faalelagi?

FAAIPOIPOGA I LE MALUMALU

O le sauniga o le faaiipoipoga i le malumalu e tatau foi pe a faapea o le a tatou foliga i lo tatou Tama o i le Lagi. O le faaeaina o aiga, e manaomia ai ina ia faamauina faatasi i tatou ma o tatou aiga mo le faavavau. Ona o lenei la mafuaaga, e tatau ona tatou aoao i a tatou fanau ina ia ava ma migao i le malumalu ma saunia i latou mo faaiipoipoga i le malumalu.

Faitau le tala lenei sa faamatala atu ia Peresitene Harold B. Lee e se tasi o alii leoleo o le Malumalu i Sate Leki.

“I se tasi taeao i se taimi e le mamao atu a’o o’u nofo i la’u laulau i le faitotoa o le malumalu ma faitau la’u tusi, ae faafuasei ona tosina atu la’u faalogo ma le vaai i le tuitui mai a se tagata i le faitotoa. Ma sa tutu mai ai ni tamaiti e toalua atonu po o le fitu i le valu tausaga lo la matutua. Ina ua ou tatalaina le faitotoa, sa ou iloa ai e leaga tele o la laei ma e le’i taele foi i laua ma e le’i seluina foi o la ulu. E foliga mai na tuua e nei tamaiti lo latou aiga ae le’i ala mai le tama po o le tina i lea taeao. A’o laaloa atu la lau vaai i nei tamaiti laiti e toalua, sa ou iloa ai ni pepe i totonu o a laua taavale toso e lua. Ma pei o se tali mai i la’u fesili po o le a le mea e mananao i ai nei tamaiti, sa tusi loa le lima o le isi alii laititi i lona uso laititi o loo i totonu o le taavale toso ma tali mai: “O le igoa o le alii laititi lea o Sio. Faamolemole lava

pe mafai ona oulua faatalofa ma Sio laititi? O le aso fanau lenei o Sio laititi—ua lua nei ona tausaga i le aso, ma ou te manao ia te ia ia pa'i i le malumalu ina ia oo ai i le taimi o le a avea ai o ia ma toeaina matua o le a ia manatua sa ia pai i le malumalu ina ua lua ona tausaga.'

“Sa tusi lona lima i le isi tamaititi pepe o loo i le isi taavale toso, sa ia fai mai: ‘O Mareko lea, e lua foi tausaga lona matua. Ona sosoo ai loa lea ma se uiga e seasea ona maua i tamaiti laiti tele faapea sa ia fesili mai: ‘Ia faamolemole lava pe mafai ona matou o atu loa i le isi itu lea e pai atu i le malumalu?’ Sa ou tali atu: ‘loe, e matua mafai lava.’ Sa tulei atu loa a la taavale toso laiti i le mea o loo iai le malumalu ma sii ae i luga nai pepe meamea, ma faapapai atu o la lima i lea fale paia. Ma i le taimi lava lea a'o o'u tu ai ua ou le magagana e pei ua iai se mea ua ponatia ai lo'u faai, sa ou faalogo atu loa i le tamaititi o faapea i lona uso, ‘O lea la Sio, o le a e manatua e le aunoa i le taimi sa na o le lua ai ou tausaga sa e pai ai i le malumalu.’ Sa latou faafetai mai loa ia te au ma agai atu loa i lo latou aiga” (“Marriage for Eternity,” *Improvement Era*, June 1957, p. 406).

Tofi ane se tagata o le vasega na te faitauina mai le Mataupu Faavae ma Feagaiga 131:1–4. E tusa ai ma lenei mau, aisea e tatau ai ona faaipoipo i le malumalu?

O faaipoipoga e faavavau, lea e faatinoina na o totonu lava o le malumalu, o le a mafai ai e aiga ona faatasi i le faavavau. O se tasi o faamanuiaga aupito sili o le faaipoipoga e faia i totonu o le malumalu ona e mafai ai e i tatou ona maua so tatou aiga e faavavau e pei o lo tatou Tama Faalelagi.

E faapefea ona avea lou iloa e faavavau lau faaipoipoga ma mea o le a iai se eseese i lau faaipoipoga ma isi tulaga tau vafealoai i totonu o lou aiga?

Aisea e tatau ai ona tatou ta'ua le faaipoipoga i le malumalu o se sauniga taua?

Sauniga mo le Faamafanafanaga ma le Taiala

Tusi i luga o le laupapa po o le faaali mai foi o le pepa o faaaliga lea o loo tusia ai le faasologa o sauniga mo le faamafanafanaga ma le taitaiga. (Tagai i fautuaga i lalo o “Sauniuniga a le Faiaoga.”)

FAAIGOAINA MA LE FAAMANUIAINA O TAMAITI

Faaali le fesoasoani vaaia 4-u, “E masani lava ona faaigoaina ma faamanuia tamaiti i sauniga molimau.”

E masani lava ona faamanuiaina tamaiti i le sauniga molimau. E faaigoa aloaia ai le tamaititi, ma o le a faapea foi ona tuuina atu ia te ia se faamanuiaga e se tasi o loo umia le Perisitua Mekisateko, ae sili atu pe a faia e le tama (tagai i le MFF 20:70).

Afai e iai se tasi ua ia faamanuiaina lana fanau, ona fesili lea iai e fetuفاai mai ona lagona e faatatau i lenei avanoa. Ona faamatala mai lea o lana tala, lea e faailoa mai ai pe faapefea ona fesoasoani mai lo tatou Tama o i le Lagi ia i tatou ina ia faatinoina sauniga.

4-u, E masani ona faaigoa ma faamanuiaina tamaiti i sauniga molimau



“Sa faamatalaina e se tama faatoa fai sona aiga se . . . tala musuia, ma o se musumusuga sa molimauina lava e tagata o le uarota i le taimi na tupu ai: ‘Ua ou matua ootia lava i lenei aoauli. Ina ua ou alu atu i luga e faamanuia Mareko, sa ou le mautinoa po o a a’u tala e fai, e ui lava sa iai nai mea i lo’u manatu. Ae ina ua u’u o ia i o’u lima ma amata le tatalo, sa amata loa ona oo mai manatu i lo’u mafaufau. Sa le tuua na o a’u e tuuina atu se faamanuiaga i lo’u atalii: sa musuia a’u e le Alii e ala i le mana o le Agaga Paia ia ou iloa ai le mea e tatau ona fai” (Jay A. Parry, “Miracles Today?” *Ensign*, Jan. 19778, p. 53).

FAAUUINA O E MAMAI

Faaali ane le fesoasoani vaايا 4-f, “O faifeautalai e faamaoni e i ai le mana e tuuina atu ai faamanuiaga e toe faafoisia ai le soifua maloloina i e mamai.”

O le faauuina o e mamai o se tasi lea o sauniga e mafai ona faataunuaina e alii o loo latou umia le Perisitua Mekisateko. E pei lava ona faamanuia e lesu e mamai, e i ai foi i toeaiina faamaoni o le Ekalesia le mana e faamanuia ai ma faamalolo e mamai. E tatau lava ona manatua e toeaiina, a oo loa ina faamanuiaina e i latou e mamai, e tatau lava ona faia le finagalo o le Alii. (Tagai i le MFF 42:43–48.)

Fai atu i tagata o le vasega e fetuفاai mai ni mea foi na latou oo i ai i le faauuina lea o tagata mamai.

FAAPAIAINA O LE SUAUU

O le faapaiaina o le suauu e faia lea e alii e umia le Perisitua Mekisateko e sauni ai mo le faauuina o e mamai. E na o le suauu moni lava mama o le olive e faapaiaina ma e tuuina atu patino lava faapitoa mo le faauuina o e mamai.

O FAAMANUIAGA FAAPETERIAKA

O faamanuiaga faapeteriaka o faamanuiaga musuia na e tuuina atu i tagata agavaa o le Ekalesia, e peteriaka ua faauuina. O nei faamanuiaga ua fuafuaina ina ia maua ai e le tagata le taitaiga ma le fautuaga. E latou te faaalua mai ai foi le gafa o sea ituaga tagata i le aiga tupu o Isaraelu. O faamanuiaga faapeteriaka e tuuina atu e peteriaka faauuina e faamaumauina ma tausia foi e le Ekalesia. O nei mea o meatotino ma e paia, ma ona o le tulaga lea e le tatau ai ona faalauaitelina atu.

FAAMANUIAGA FAALETAMA

E mafai ona tuuina atu faamanuiaga faaletama i taimi faapitoa i olaga o tagata o le aiga. Ma o ia taimi e pei o le alu atu i se misiona, faaipoopoga, po o le alu ese atu foi e aoga e masani lava ona musuia ai le tama e tuuina atu i lona alo se faamanuiaga faapitoa. E mafai foi ona tuuina atu faamanuiaga faaletama e fesoasoani ai i tagata

4-f, O toeaiina faamaoni latou te maua le mana e tuuina atu ai i e mamai se faamanuiaga



taitoatasi e feagai ma tofotofoga po o le tali ai foi o ni fesili taua ma ni faafitauli.

FAAMANUIAGA O TAITAIGA MA FAAMAFANAFANAGA

A faapea e leai se faamanuiaga faaletama e mafai ona maua, e mafai foi la ona tuuina atu faamanuiaga o le taitaiga ma le faamafanafanaga e epikopo, peresitene o paranesi, faiaoga o aiga, po o i latou o loo umia le Perisitua Mekisateko. O nei faamanuiaga e tali foliga lava i faamanuiaga faaletama. E fesoasoani ai i tagata taitoatasi e saunia ai mo taimi faapitoa i o latou olaga po o le faatoilaloina foi o ni faafitauli e manaomia ai se fesoasoani faapitoa mai lo tatou Tama Faalelagi.

Fai atu i le vasega e fetufaai i mea sa tutupu ia i latou e faatatau i nei faamanuiaga.

FAAMANUIAINA O TUUGAMAU

O le faamanuiaina o tuugamau e faataunuaina lea e se tasi o i ai le Perisitua Mekisateko. O le tatalo lea o le faamanuiaga e masani lava ona aofia ai upu faamafanafana mo le aiga o lē ua maliu, ma talosaga ai foi mo le puipuiga faapitoa o le tuugamau, ma e aofia ai foi ma isi faamanuiaga e pei ona tauina ane e le Agaga.

Faiuga

Ua tuuina mai ia i tatou sauniga o le perisitua ina ia fesoasoani mai ai ia i tatou e toe foi atu i lo tatou Tama o i le Lagi. Ae ui i lea, ina ia taliaina i tatou e le Atua, e tatau lava ona faataunuaina nei sauniga e le tagata tonu o loo iai le perisitua e gafa ma lea sauniga. Sa taua e Peresitene Lorenzo Snow e faapea:

“E na o le tasi lava le ala e mafai ai ona faamaonia ma mautinoa le faaeaina ma le mamalu. E tatau ona papatisoina i tatou mo le faamagaloina o a tatou agasala ma ia faaeaina mai lima i o tatou luga mo le taliaina o le Agaga Paia. O nei la tulaga ma isi sauniga e matua tatau lava ona faia mo le faaeaina ma le mamalu.” (*Millenial Star*, 27 June 1895, p. 405.)

O isi sauniga e tuuina mai ai ia i tatou le taitaiga ma le faamafanafanaga. A sa’o le faiga, o nei tulaga o sauniga faaleperisitua e masani lava ona tuuina mai faatasi ma le mana sili faaleagaga e fesoasoani ai ia i tatou ina ia suia o tatou olaga i se tulaga e sili atu.

E tatau lava ona manatua o faamanuiaga nei ua folafolaina mai e faatatau i soo se sauniga lava e faatoa oo mai lava ma iloa e ala i le ola ma le amiotonu.

Lu’i

1. Ia fai ni fuafuaga faapitoa ma le patino e talia ai sauniga uma lava e tatau mo le faaeaina.
2. Soifua agavaa ina ia tuuina atu ma faatino sauniga tau le perisitua mo isi.

3. Fuafua ina ia avea o se sauniga faapitoa ma le paia o sauniga taitasi uma lava e faia mo tagata o lou aiga.

Mau Faaopoopo

Iakopo 5:14–15 (e iai i toeaina le mana e faamanuia ai e mamai)

Mosaea 13:30 (taua o le tausia o sauniga)

3 Nifae 11:32–40 (o le tatau o le papatisoga mo le meaalofa o le Agaga Paia)

Mamona 9:24 (faaeina o lima e faamanuia ai e mamai)

MFF 20:41 (taliaina o le meaalofa o le Agaga Paia)

MFF 105:33 (faaeega paia e tuuina atu)

Sauniuniga a le Faiaoga

Ao lei tuuina atu lenei lesona—

1. Ia saunia se lisi i luga o le laupapa po o le faia foi lea o se pepa tele o faaaliga e tusia ai le faasologa o sauniga e tatau mo le faaeaina: papatisoga, faamanatuga, faaeina o lima mo le meaalofa o le Agaga Paia, faauina i le Perisitua Mekisateko, o le faaeega paia, ma le faaipoipoga i le malumalu.
2. Ia nofo sauni e tusi mai i luga o le laupapa se faasologa po o le faia foi lea o se pepa o faaaliga e tusia uma mai ai sauniga mo le faamafanafanaga ma le taitaiga: faamanuiaina o tamaiti, faamanuiaina o e mamai, faapaiaina o le suauu, faamanuiaga faapeteriaka, faamanuiaga faaletama, faamanuiaga o le taitaiga ma le faamafanafanaga, ma le faamanuiaina o tuugamau.
3. Fai atu i tagata o le vasega e faitau mai po o le faatino mai foi o tala ma mau o loo i totonu o lenei lesona.

Faaaliga: Aua nei agai tele atu i le auiliiliga pe faapefea ona faataunuuna sauniga.

O lena faamatalaga o le a tuuina atu i le lesona 5.

Faataunuaina o Sauniga o le Perisitua

Lesona 5

Ua fuafuaina lenei lesona ina ia aoao mai ai ia i tatou pe faapefea ona faataunuaina sauniga faaleperisitua.

Faatomuaga

Ua uma ona ta'u mai ia i tatou e le Alii, "O lea ia taitoatasi ai le tagata ma aoaina lona tiute, ma galue i le tofi ua tofia ai o ia, i le maelega atoatoa" (MFF 107:99). E tatau ia i latou o loo umia le perisitua ona iloa pe faapefea ona faataunuaina sauniga o le perisitua ma agavaa, ia latou maua ai le taitaiga a le Agaga Paia i le faataunuaina o nei sauniga.

O lo tatou tomai e faamanuiaina ai olaga o isi e ala atu i faamanuiaga faaleperisitua e fuafua lava lea i lo tatou faamaoni ma le usiusitai e pei ona sa taua mai e Iosefa Filitia Samita, "Ua ou mautinoa . . . o le a tatou vaai i nisi foi o galuega a le Agaga o le Atua, mo se faataitaiga i le faamaloloina o e mamai, pe a faapea o le a tatou ola e latalata teisi atu lava i nei mea moni autu [o le faataunuaina lea ma le faatinoina o le faatuatua i le Atua i le faataunuaina o o tatou tiute o i tatou o tagata o le Ekalesia]" (*Doctrines of Salvation*, 2:311–12).

O le a mafai ona faateleina lo tatou tomai i le avefaa o i tatou ma tagata o loo umia le perisitua e ala i le tatalo. Ae tatou te lei faataunuaina ni sauniga a le perisitua e tatau ona tatou saili atu i le Alii i le tatalo. E oo foi i le taimi o le anapogi e i ai isi taimi e tatau ai ma manaomia i tulaga faapitoa. (Tagai i *Tiute ma Faamanuiaga o le Perisitua*, Vaega A, lesona 31, Tatalo ma Anapogi.) A faapea o le a tatou saili atu i le Alii i le agaga o le tatalo ma le anapogi ma ola i aoaoga a lo tatou Tama Faalelagi i le mea aupito sili tatou te mafaia, o le a taitaia i tatou e le Agaga i la tatou galuega faaleperisitua.

O a Sauniga e Mafai Ona Tatou Faataunuaina?

O a sauniga e mafai ona tatou faataunuaina e ala i tofiga o le perisitua o loo tatou umia? Faaoga faamatalaga nei e fesoasoani i le talanoaga.

TIAKONO

O tiakono latou te auai i le faataunuaina o sauniga o le faamanatuga i lo latou tautuina lea o le faamanatuga i tagata o le Ekalesia.

AOAO

O aoao latou te auai i sauniga o le faamanatuga i lo latou saunia lea o le faamanatuga. E latou te tautuina foi le faamanatuga pe a faapea e le o i ai se taikono.

OSITAULAGA

O ositaulaga latou te auai i le sauniga o le faamanatuga i lo latou faamanuiaina lea o le falaoa ma le vai. E mafai foi ona latou fesoasoani e saunia ma tautuina le faamanatuga pe a manaomia. A faapea o le a faatagaina mai e le epikopo po o le peresitene o le paranesi, e mafai e ositaulaga ona faataunuuna le sauniga o le papatisoga ma tuuina atu le Perisitua Arona, ma faauu foi se tasi i se tofiga i le Perisitua Arona.

O E UMIA LE PERISITUA MEKISATEKO

E mafai e i latou o loo umia le Perisitua Mekisateko ona faataunuuna sauniga uma a le Perisitua Arona. Ae le gata i lea, e mafai foi ona latou faamanuia ma faaigoa tamaiti laiti, ma faamaonia tagata o le Ekalesia, ma tuuina atu le meaalofa o le Agaga Paia, faapaia i le suauu, faauu e mamai, faamanuia tuugamau, tuu atu faamanuiaga faaletama i tagata o o latou aiga, ma tuuina atu faamanuiaga o faamafanafanaga ma fautuaga, ma tuuina atu le Perisitua Mekisateko i isi tagata pe a faatagaina ai e le peresitene o le siteki po o le misiona. E mafai e toeaina ona faauu isi i le tofiga o le toeaina, ma faitaulaga sili e mafai ona faauuina isi i le tofiga o le faitaulaga sili.

Mo nisi faamatalaga auiliili e faatatau i sauniga e faataunuuna e le perisitua, ia tagai i *Tiute ma Faamanuiaga o le Perisitua, Vaega A*, lesona 5, 6, 7, ma le 9.

Pe Faapefea Ona Faataunuuna Sauniga

E le o iai ni upu filifilia mautu mo sauniga o le perisitua e faataunuuna i fafo atu o malumalu—sei vagana ai le papatisoga ma le faamanuiaina o le faamanatuga. A o sauniga e iai le papatisoga, faamanatuga, faamauga, ma le faaeina atu o le perisitua, po o le faamanuiaina po o le faaigoaina o se tamaititi, e tatau lava ona faia i se ala mamalu ma ia faia i lalo o le taitaiga a se tasi o loo ia umia ki. O sauniga uma lava e faia i le suafa o lesu Keriso ma le pule a le perisitua. (Tagai i le lesona 3 o lenei tusi lesona .) A faapea o le a tatou faataunuuna sauniga o le perisitua, e tatau ona tatou iloa o loo tatou faia nei mea e aveia ai i tatou ma sui o le Faaola.

Filifili nisi o nei sauniga. Toe iloilo auiliili ma faataitai. Fai i tagata o le vasega latou te faataitai le faataunuuna o nei sauniga. A faapea o loo i ai se tasi e umia le perisitua i totonu o le vasega o le a ia faataunuuna se sauniga i se taimi lata mai, ia toe iloilo lena sauniga mo le lelei o lena tagata. *Faaaliga*: Tagai ia mautinoa e le o faataunuuna e i latou e umia le Perisitua Arona sauniga e faataunuuna e le Perisitua Mekisateko.

O le faamatalaga lenei e faatatau i sauniga autu o le talalelei e faataunuuna e le perisitua:

FAAMANUIAINA MA LE FAAIGOAINA O TAMAITI

I lalo o le taitaiga a le taitai pule faamalumalu, e na o uso e umia le Perisitua Mekisateko e mafai ona auai i le sauniga o le faaigoaina ma le faamanuiaina o tamaiti (tagai MFF 20:70). O tama agavaa latou te

umia le Perisitua Mekisateko e tatau ona uunaia e faamanuia a latou lava fanau.

A faamanuiaina se pepe, e tatau i uso ona tutu faataalilolio ma tuu o latou lima i lalo o le pepe. A faamanuiaina se tamaititi matua, e tuu e uso o latou lima i luga o le ulu o le tamaititi. O le tagata na te tuuina atu le faamanuiaga—

1. Ta'u atu le suafa o le Tama Faalelagi.
2. Tau le pule o le Perisitua Mekisateko lea o loo faia ai le sauniga.
3. Tuu atu se igoa i le tamaititi.
4. Faaopoopo atu ni upu o le faamanuiaga e pei ona taitaiina ai e le Agaga.
5. Faaiu i le suafa o Iesu Keriso.

PAPATISOGA

E na o se ositaulaga agavaa po o Perisitua Mekisateko e mafai ona faataunuaina le papatisoga. O le tagata o loo umia le perisitua e—

1. Tu i totonu o le vai ma le tagata lea o le a papatisoina.
2. (Mo le sologa lelei ma le saogalemu) uuina le tapulima taumatau o le tagata o le a papatisoina i lona lima agavale, ona uuina lea e le tagata o le a papatisoina i lona lima taumatau le tapulima agavale o le tagata o le a papatisoina.
3. Sii lona lima taumatau i le sikuea.
4. Tau le igoa atoa o le tagata ma fai le tatalo o le papatisoga (tagai i le MFF 20:73).
5. (Mo le sologa lelei) fai i le tagata o le a papatisoina e pupuni lona isu i lona lima taumatau; ona tuu lea o le lima taumatau o le tagata o loo iai le perisitua i le papatua o le tagata ma faatofuina o ia ina ia lilofia uma i le vai.
6. Fesoasoani i le tagata ina ia toe alu ae i luga mai le vai. O papatisoga taitasi e tatau ona molimauina e ni ositaulaga se toalua po o ni Perisitua Mekisateko. La te faamautinoaina ua faataunuaina ma le sao. Afai e le'i sao le faiga o le tatalo, e tatau ona toe fai ma e tatau ona toe faatofuina le tagata. Afai e iai se vaega o le tino poo le ofu o le tagata na papatisoina e lei lilofia i le vai, e tatau ona toe faia le tatalo o le papatisoga ma e tatau ona faatofuina atoa le tagata.

FAAMAUGA MA LE TUUINA ATU O LE AGAGA PAIA

E na o se tagata lava e umia le Perisitua Mekisateko e mafai ona ia faamauina le tagata fou ma tuuina atu iai le Agaga Paia. E tatau ona ia—

1. Faaee ona lima i luga o le ulu o le tagata o le a faamauina.
2. Valaau atu i le tagata i lona igoa atoa.

3. Tau le pule (o le Perisitua Mekisateko) le o loo faataunuuna ai le sauniga.
4. Faamau le tagata ua avea o se tagata O le Ekalesia a Iesu Keriso o le Au Paia o Aso e Gata Ai.
5. Faaee atu le Agaga Paia e ala i le faia o upu e pei o le “Talia le Agaga Paia.”
6. Faaopoopo atu i ai nisi upu o le faamanuiaga pei ona musuia ai e le Agaga.
7. Faaiu i le suafa o Iesu Keriso.

O LE FAAMANATUGA

O le faamanatuga o se sauniga paia tele lea ma e faataunuuna i lalo o le taitaiga a se tasi o tagata maufofi o le perisitua o loo pule faamalumalu i lea fonotaga.

E tatau ona tuu se fasi falaoa i se ipu mafolafola mama i luga o se tamai laulau. E tatau foi ona tuu i luga o le laulau ni tamai ipu malamalama taitasi po o ni fata o ipu e i ai i totonu ni vai laiti. E tatau ona maua ni ipu eseese mo tagata uma o le a auai. E tatau ona ufiufi le falaoa ma le vai i se ie paepae mama. E tatau ona aveese le ie lea e ufiufi ai le falaoa i le taimi e faamanuia ai, ma e tatau foi ona toe ufiufi le ipu i le taimi e uma ona tufaina atu ai le falaoa. O le faiga foi lea e tasi e tatau ona faia i le vai.

I le taimi o usuina le viiga o le faamanatuga e tatau i le tagata o loo iai le perisitua ona ia vaevae le falaoa i ni fasi mea laiti. A maea loa le viiga e tatau i le tagata lea o loo iai le perisitua ona tootuli ma tuuina atu le faamanuiaga o le falaoa (tagai MFF 20:77). A maea lea ona tufatufa atu loa lea i tagata o le Ekalesia le falaoa lea ua uma ona faamanuiaina.

A uma loa ona tufatufaina atu le falaoa, e tatau foi i le tagata lea e i ai le perisitua ona tootuli ma saunia le faamanuiaga o le vai (tagai MFF 20:79, ma suia ai le upu *uaina* i le *vai*). A maea lea ona tufatufaina atu foi lea o le vai lea ua faamanuiaina i tagata o le Ekalesia.

O tatalo o le faamanatuga na faaalai mai e le Alii, ma e tatau i le taitai perisitua ona mauiinoa o loo sao lelei ona tau. Afai e tatau i le taitai perisitua ona faasao se mea sese, e tatau ona aloese mai o ia mai le faalumaina o le na faia le tatalo poo le aveesea ai foi o le paia o le sauniga.

E tatau ona aveeseina mai le faamanatuga mai le laulau i se taimi vave lava e mafai ai pe a maea le sauniga. Po o a lava ni falaoa e totoe ai e ao ina faaaogaina tatau mo mea taumafa.

E mafai e ositaulaga po o i latou foi o loo i ai le Perisitua Mekisateko ona faamanuia le faamanatuga. E le faatagaina aoao ma tiakono latou te faia lea mea (tagai MFF 20:58). E mafai ona tofia tiakono, aoao,

ositaulaga, ma i latou e umia le Perisitua Mekisateko latou te tufaina atu le faamanatuga. O foliga vaaia o i latou uma lava o le a auai e tatau ona atagia ai le paia o le sauniga o loo faataunuuna.

FAAEEINA ATU O LE PERISITUA MA LE FAAUUNA I SE TOFIGA O LE PERISITUA

O faauuga i tofiga o le Perisitua Arona e faia lea e le taitai o le perisitua e feagai ma lea tiute po o lalo ifo foi o lana taitaiga. E mafai e ositaulaga ona latou faauuna isi tagata i tofiga o le Perisitua Arona, pe a faapea o le a faatonuina ai latou e le taitai o le perisitua. O le faauuna i le tofiga o le toeaina e faia lea e le peresitene o le siteki po o le misiona po o lalo foi o lana faatonuga.

E tatau i le taitai maufofi o le perisitua lea e faafoeina le sauniga ona—

1. Faaee ona lima i luga o le ulu o le tagata.
2. Valaau atu i le tagata i lona igoa atoa.
3. Tau le pule (Perisitua Mekisateko po o le Perisitua Arona) lea o loo faataunuuna ai lea sauniga.
4. Faaee atu le Perisitua Mekisateko po o le Perisitua Arona, po o le a lava le mea e tatau ai, sei vagana ai ua uma ona faaee atu.
5. Faauu i le tofiga patino i le Perisitua Mekisateko po o le Perisitua Arona ma faaee atu iai aia tatau, mana, ma le pule e faasino tonu i lena tofiga ua tuu atu i ai.
6. Faaopoopo atu iai ma ni upu o faamanuiaga e pei ona musuia ai e le Agaga.
7. Faaiu i le suafa o Iesu Keriso.

FAAPAIAINA O LE SUAUU

E tatau ona faapaiaina le suauu olive ao lei faaaogaina e faauuna ai tagata mamai. E tatau ona maua mai se suauu moni lava ma lelei i itu uma, ma o i latou o loo umia le Perisitua Mekisateko e ao ona faapaia le suauu mo faamoemoega paia o le a faaaoga iai. E le tatau lava ona faaaogaina se isi lava ituaiga suauu.

E tatau i le o loo umia le perisitua ona—

1. Uu le fagu suauu olive o loo matala.
2. Tau atu lo matou Tama Faalelagi e pei ona faia i le tatalo.
3. Tau le pule (Perisitua Mekisateko) lea ua faapaiaina ai le suauu.
4. Faapaia le suauu (ae le o le fagu) ma faamanuiaina mo le faamanuiaina ma le faauuna o e mamai ma mafatia.
5. Faaiu i le suafa o Iesu Keriso.

FAAUUINA O E MAMAI

E lua vaega o le faauuina o se tagata mai: o le faauuga ma le faamauga.

O le faauuga e faia e se o loo umia le Perisitua Mekisateko. E tatau ona ia—

1. Faauu le ulu o le tagata mai, i le faaaogaina lea o sina uu laitiiti lava.
2. Tuu ona lima i luga o le ulu o le tagata mai ma tau lona igoa atoa.
3. Tau atu le pule (Perisitua Mekisateko) lea o loo faataunuuina ai le sauniga.
4. Tau atu o loo ia faauuina i le suauu paia.
5. Tau atu o loo ia faia nei mea i le suafa o lesu Keriso.

O le tulaga masani lava e toalua po o le sili atu foi Perisitua Mekisateko latou te faamauina le faauuga. E faaee o latou lima i luga o le ulu o le tagata mai ona fai lea o se tasi o i latou ma leo. Na te —

1. Tau le igoa o le tagata mai.
2. Tau atu le pule (Perisitua Mekisateko) lea o loo faataunuuina ai le sauniga.
3. Faamau ma faamaonia le faauuga lea ua uma ona faia.
4. Fai atu se faamanuiaga e pei ona musuia ai o ia e le Agaga.
5. Faaiu i le suafa o lesu Keriso.

E le manaomia ona faauuina se tagata i le suauu mo le mai lava e tasi. Afai ua talosagaina soo se toaina e faia le faauuga mo le mai lava e tasi, e masani lava ona ia le toe faaaogaina le suauu pe a maea le taimi muamua, ae e mafai ona ia tuuina atu se faamanuiaga e ala lea i le faaee atu o lima ma le pule o le perisitua.

FAAMANUIAINA O TUUGAMAU

O le faamanuiaina o tuugamau e tatau ona faia e se tasi o loo umia le Perisitua Mekisateko, e pei ona tofia ai e le taitai pule faamalumalu o le perisitua pe a uma ni feutagaiga ma le aiga. E tatau ona ia—

1. Tau lo matou Tama o i le Lagi e pei ona faia i le tatalo.
2. Tau le pule (Perisitua Mekisateko) lea o loo faataunuuina ai le sauniga.
3. Faamanuia ma faapaia le ogaeleele lea o le a avea ma nofoaga e malolo ai le tino o le ua maliu.
4. Tatalo i le Alii, pe afai e talafeagai ai, ina ia faapaia lenei vaega o le eleele ma puipuia seia oo i le taimi ua tuupoina mo le tino e toetu mai ai ma toe fesootai ma le agaga.
5. Talosaga i le Alii e faamafanafana i le aiga, ma ia faia foi nisi faaupuga e pei ona tauina atu e le Agaga ia te ia.

6. Faaiu i le suafa o Iesu Keriso.

FAAMANUIAGA FAALETAMA MA FAAMANUIAGA O LE FAAMAFANAFANAGA MA LE FAUTUAGA

O tama (mo o latou aiga) ma isi e umia le Perisitua Mekisateko e mafai ona tuuina atu faamanuiaga o le faamafanafanaga ma fautuaga. E mafai e tama ona tuuina atu faamanuiaga i a latou fanau i ni tulaga faapitoa, e pei o le ulufale atu o se tamaitiiti i le vaegaau po o le tuua o le aiga ae alu atu i le aoga po o le misiona. E mafai e se aiga ona faamaumuina faamanuiaga a se tama i faamaumauga faaleaiga, ae le teuina mo le faaogaina i le Ekalesia. O se faamanuiaga faaletama e tuuina atu i le auala lava e tasi e pei ona tuuina atu se faamanuiaga o le faamafanafanaga ma le fautuaga.

Ina ia tuuina atu se faamanuiaga o lea ituaiga, e tatau i le tagata o le a tuuina atu le faamanuiaga ona —

1. Faaee ona lima i luga o le ulu o le tagata o le a faamanuiaina.
2. Tau le igoa atoa o le tagata.
3. Tau atu le pule (Perisitua Mekisateko) lea o loo faataunuuna ai le faamanuiaga.
4. Tuu atu le faafetai, fautuaga, apoapoiga, ma ni folafolaga e pei ona tau atu e le Agaga.
5. Faaiu i le suafa o Iesu Keriso.

Tuu atu i tagata taitoatasi o loo umia le Perisitua Mekisateko na te faapaia se suauu olive mo ia faapea isi tagata o le vasega o loo manaomia se suauu i o latou aiga.

Faaiuga

Ona o i tatou o loo umia le perisitua e tatau ai ona saunia i tatou mo taimi o le a manaomia ai i tatou e faataunuu sauniga. O le nofo sauni e faataunuu sauniga o le perisitua o lona uiga o loo tatou ola i poloaiga i le mea aupito sili tatou te mafaia ma e tatou te iloa foi ona faataunuu nei sauniga. O nei la sauniuniga o le a oo mai ai faamanuiaga e le gata ia i tatou ae faapea foi ma isi.

Lu'i

1. Suesue i faasologa mo le faataunuuina o sauniga. Fai sau sini ina ia aoao i nei sauniga ia tofu le vaiaso ma le sauniga.
2. Mafaufau i se vaega e tasi o lou olaga e mafaia ona e faaleleia atili ai lou agavaa e faataunuuina ai sauniga tau le perisitua. Fai sau faaiuga o le a faaleleia atili lea vaega o lou olaga.

Mau Faapoopo

Mataio 3:13–16 (papatisoga o Iesu)

Mareko 6:13 (tagata mai ua faauuina i le suauu)

Mareko 16:17–18 (faaee o lima i e mamai)

Iakopo 5:14–16 (toeaiina o le Ekalesia e faauu i e mamai)

3 Nifae 11:22–26 (faiga o le papatisoga)

Moronaē 2:2 (tuuina atu o le Agaga Paia i le faaeeina o lima)

MFF 42:11 (alii e faauuina e i latou o loo i ai le pule)

Sauniuniga a le Faiaoga

Ao lei tuuina atu lenei lesona—

1. Iloilo *Tiute ma Faamanuiaga o le Perisitua, Vaega A*, lesona 4, “O le Korama a le Perisitua,” ma le lesona 31, “Tatalo ma le Anapogi.”
2. Saili ane ia maua ni nai tama'i fagu suauu mama o le olive—e tasi mo aiga uma lava o loo i ai o latou tagata i le vasega.. O le a avea lea ma mea o le a tofu ai aiga uma lava ma le fagu suauu paia e faaoga e se tasi o i latou e umia le Perisitua Mekisateko pe a oo i le taimi e tuuina atu ai faamanuiaga.
3. Siaki i tagata o le vasega ia iloa ai pe i ai ni sauniga e faataunuuna i se taimi lata mai i le lumanai. Nofo sauniuni e toe iloilo maeaea sauniga.
4. Fuafua ina ia vave ona gaoioi i le faasologa o le vaega muamua o le lesona ina ia mafai ai ona faaogaina le taimi o le vasega e talanoaina ai pe faapefea ona faataunuuna sauniga.
5. Fesili atu i tagata o le vasega e faitau mai pe faatinoaina foi tala ma mau o loo i totonu o lenei lesona.

O le faamoemoega o lenei lesona ina ia fesoasoani lea ia i tatou ia malamalama ma faataunuuiina o tatou valaauga o le avea ai ma faiaoga o aiga.

Faatomuaga

I le avea ai o ni aoao, ositaulaga, po o e umia le Perisitua Mekisateko, atonu o le a valaauina i tatou e faia aoaoga i aiga. O le vaega o le faalauteleina o o tatou valaauga i le perisitua o le aoao atu, leoleo, ma lagolagoina ma fesoasoani i tagata o le Ekalesia. O le aoaoina la o aiga ua mafai ai ona tatou maua lea avanoa o le faalauteleina o tatou valaauga.

Ua valaauina i tatou e avea ma ni faiaoga o aiga e taitai o le perisitua. I uarota ma paranesi o loo faatulagaina lelei, o le valaauliaina e avea ma faiaoga o aiga e faia lea e le taitai o le korama a le Perisitua Mekisateko ina ua uma ona feutagai ma le epikopo po o le peresitene o le paranesi. O ni uso se toalua e umia le perisitua e taitoalua i aoaoga i aiga. Ua tuuina atu ia i laua ina ia asiasia e le aunoa ia aiga ua tofia i ai i laua.

Faaali atu le fesoasoani vaaia 6-a, "O faiaoga o aiga e valaauina e le taitai o le korama."

Na faapea mai le faamatalaga a Elder Boyd K. Packer i se tasi taimi, "Ua ou faalogo i alii ua latou tali atu i se fesili e faatatau i o latou tofiga o loo galulue ai i le Ekalesia, e faapea, 'O au e na o se faiaoga o aiga.' " Ona ia faamalamalama lea e faapea, o le aoaoina o aiga o se tasi lea o tofiga po o se galuega aupito i taua a le perisitua i totonu o le Ekalesia. O faiaoga o aiga o i latou o leoleo o le lafu mamoe. Ua tofia i latou i le vaega e pito i sili ona taua ai le talaiga. O i latou o auauna a le Alii (The Saints Securely Dwell, *Ensign*, Jan. 1973, p. 90).

Faiaoga o Aiga—O Auauna a le Alii


O le taua o le aoaoina o aiga o loo faaalua i le tala o loo taua e Brother Earl Stowell. I le avea ai o ia o se faiaoga o aiga, na tofia ai o ia ma lana soa e asiasi atu i nisi aiga ua le toe toaaga i le Ekalesia. Na faamatalaina la e ia faapea:

"I nisi aso na mulimuli ane . . . na ma taunuu atu ai i le faitotoa o le fale o lea lava aiga. Ona ou te puupuu, o lea e masani ai lava ona ou autilo i luga ina ia mafai ona ou iloa ai se tasi i foliga. A o le taimi lenei sa

6-a, O faiaoga o aiga e valaauina e le taitai o le latou korama



6-a



gau ifo i lalo lo'u ulu ina ua matala mai le faitotoa, ma sa tu mai ai se tagata laititi e le sili atu i le lima futu lona maualuga.

Faaali atu le fesoasoani vaaia 6-e, "Peni Laititi."

"O ia o se tagata faatinoini [ma le toeaina], ae o lona tu sa'o mai ma ana gaoioiga tiotio na tauina mai ai ia i maua o lenei alii e mitamita o ia i lona tulaga. O nai ona mata faapuiti ua matuai pupula sao mai. O lona fofoga e foliga o se laina sa'o, ua taulagaina i ona foliga. O lona pau foi e le i oo iai le manuminumi.

"Na ma faapea atu iai o i maua o ni tuaoi ma o ni uso o le Ekalesia, ma ua ma o mai e matou te faamasani. Sa foliga mai e lei maua e ia se lagona lelei, a o ia valaauina mai i maua ma te o atu i se tamai potu malolo laititi, o loo iai ni talefulefu. . . . Na ia faapea mai o ia e ave loli. Sa ou manatu ai o se pikiapu, ae leai os e loli pusa sasaa. Ma sa ou ofo.

" 'O tagata ave loli o ni tagata laulauā. Ae faapefea ona e—'

"Na ia faasalaveia mai la'u faamatalaga. 'E iai sa'u faau e sefululua inisi le umi e tuu lava i luga o lo'u nofoa i o'u tafatafa i taimi uma lava. E iloa lelei lava e le isi aualii. E leai lava la se isi e soona faia fua a'u.' . . .

"Ao faagasolo atu pea masina, sa amata lava ona oo mai le lagona fiafia e asiasi atu ia Peni. [I se tasi o afiafi ina ua ma asiasi atu ia te ia, sa ma o atu a ua le lava tele o ia mai lana loli] o lea na lei umi ai se taimi o ma iai. Ina ua ma latalata atu i le faitotoa, sa tepa ae i luga ia Peni ma fesili mai, "O a fea e amata ai ona oulua tauina mai ai te au mea e tatau ona ou faia—tuu le ulaula, ma ia amata ona sau i le lotu ma le perisitua, ma isi mau mea?"

" 'Peni,' na ou faapea atu ai ia te ia, 'o le a sili atu lo maua fiafia pe afai o le a e faia na mea, ae o loo ia te oe lava lau filifiliga i lona tulaga. O se tulaga faamaasiasi pe afai o le a ma tauina atu ia te oe lona tulaga ia faia ae o loo e silafia. Ua ma o mai e asiasi mai ia te oe—aua e le o atoatoa lo tatou aiga e aunoa ma oe. Ona ia tago mai ai lea i lo'u lima. . . .

"I le faaiuga o le vaiaso lava lona na maua ai se telefoni mai ia Peni e fesili mai, 'O le a le taimi o le lotu perisitua?' Na ou tauina atu ia te ia le taimi ma ofo atu o le a ou alu atu ma te toalua mai i le lotu.

" 'E leai, ou te iloa lava e a'u ia le auala ma e le tau manaomia fua se isi e na te ave au i le mea e tatau ona ou i ai.'

"Na ou maua o ia o tutu i fafo o le falesa. 'Masalo e le tatau ona ou alu i totonu seiloga ua tuu la'u ulaula,' o lona tala lea. Ona ou faapea atu lea ia te ia atonu o le a faigofie pe a faia faatasi ma le fesoasoani a le Alii. Sa ia faamatala mai, 'Na ou ulaula lava ina ua valu o'u tausaga, ma ou te le mautinoa pe mafai ona tuu.' Sa ou fai atu iai ou te manatu lava e mafai ona tuu.

“Sa lei umi ae faaigoa o ia ia Peni Laititi, ma e ui lava e lei lelei lana aoga, o lona faaletinoā, ma lona matua, ae sa vave lava ona maua ni ana uo ma sa faapea ona auai o ia i soo se gaoiōiga lava e faia a le korama a toeaina.

“I se tasi afiafi na ou maua ai se telefoni. ‘Ou te fia talanoa ia te oe.’ Sa foliga mai lona leo o loo ua i ai se mea ua fefe ai o ia. ‘Ua latou mananao e aveā au ma se faiaoga o le uarota. E le mafai ona ou faia lena mea. Ou te ulaula ma ou te le iloā se mea. E faapefea ona ou aoāo i tagata mea ou te le iloā? . . . O le a la’u mea a fai?’

“Sa ou le mautonu. O Peni Laititi o se tagata faapitoā ia i maua, ma te le mananao foi e solomuli o ia i le lotu. Sa amata loa ona ou tatalo malosi i totonu lava o lo’u lotu i le mea ou te mafaiā. Ona ou mapueā lea ma ou faapea atu, ‘Peni, pe na i ai ea se taimi na ma tauina atu ai ia te oe le mea e tatau ona e faia?’

“ ‘E leai, na ona oulua faaali mai e taua tele a’u ia te oulua, ma na ou maua ai le lagona ou te taua. Masalo o le mea lena na amata ai ona ou alu lava a’u ia i le lotu.’

“ ‘Ina ua tatou feiloai, na ma iloā ai se tagata ua agavaā ma ua aoga i ai soo se galuega lava po o se taumafaiga e mafai ona ma faia. Ma e mafai la ona e valaauina nei tagata ma toe manatuaina lo latou taua? E mafai ona e ta’u atu lava ia i latou e taua i latou ma ua e fia nofo ai faatasi ma i latou i le taimi nei ma taimi uma lava ma ta’u atu ia i latou e uiga i se mea ua e maua e matua taua tele ia te oe, e te manaō e fetufaai ma i latou?’

“Sa fai sina umi e leai se pisa, ona toe faapea mai loa lea, ‘Ia ua lelei o le a ou faia lena mea.’

“I le faaiuga o le aso e masani lava ona ou alu atu i ai i la’u taavale i le auāla o loo nonofo ai le isi foi vaega o le aiga o Peni. O i latou uma lava ua le toe toaaga i le lotu, o le tele lava o i latou o loo nofotane i alii po o loo faiaua i tamaitai e le auai i le Ekalesia, ma o ni tagata ua pei e fou i le Ekalesia i le tele o tausaga. I se tasi la o afiafi na ou vaaia ai Peni o ia tauaveina mai se meleni ua pito sili ona lapoa sa ou vaaia i lena vaitausaga. Sa ia sapaiina mai le meleni i ona lima ma o se galuega tele le tauaveina o le meleni. E tusa e tolu ni poloka ua tea ese mai ai o ia mai le maketi. A o ou alu atu la i la’u taavale ae ou vaaia loa ua afe o ia i se tasi o fale.

“Ina ua ou toe fetui ia te ia na ou faamatala ia te ia lana mea sa ou vaaia o fai. Sa ia punou ma faapea mai, ‘Ina ua ou sau i le fale na ou ui mai i le maketi. Ona ou manatu ai lea i tamaiti e i ai i le aiga na ou afe iai. O lo latou tama e le o toe faigaluega. O le meleni ua tau le maua foi ma taugata i lenei tausaga. Ou te iloā e lei maua lava e nai tamaiti ia se meleni. Ma ia mautinoā ua tofu le tamaititi ma le fasi

meleni, o lea na ou faatauina mai ai le meleni pito i sili ona lapoa mai le faleoloa.’

“Mulimuli ane na ou vaaia ai o ia o savali fiafia atu i se tasi afiafi mafanafana o loo uu i lona lima se pepa tele o se faamanuiaga o se aso fanau. Na ia faamatala mai mulimuli, ‘O lea teineititi, e na o ia lava le teine ae o tama uma lo latou aiga. Na latou iloa uma lava. Na ou manatu afai e avatu i ai ae aua le lafoina i le meli, le pepa faamanuia, o le a iloa ai e lenei tamaitai laititi e taua o ia. E pei lava foi i ni nai vaiaso ua tea, i se tasi o nofoaga sa seieseina ai e ni tamaiti le lima o se pepe meataalo. E leai lava se isi na popole i ai ae foliga mai lava na o le teineititi lea. Na ou alu ma au i le fale lana pepe meataalo, ma su’e ane se lave ma toe faapipiina ai le lima o le pepe meataalo. Na alu le afiafi atoa o tau faapipii ae sa ou iloa sa alu aoga lea taimi. Ina ua ou toe foi atu ma avatu le pepe meataalo i le tamaitai e ona, sa nofo o ia i luga o le fola o le fale i o’u luma, ma faalagolago mai ia te au. Na ou manatu na ou faalogo i se tulaga ootia i lona leo.

“E lei umi lava lenei mea ae ou maua loa se telefoni fiafia. O se tamaitai laititi sa avea au ma ona faiaoga o aiga o le a papatisoina!’ O se taunuuga lea o le [aoaoina o aiga na ia faia ma le loto i ai]. Sa ou matuai fiafia lava foi au. . . .

“I le lima tausaga ua tea atu nei, o na aiga sa leai lava se fesootaiga faale-Ekalesia ae na o le faiaoga lava o aiga ma se asiasiga mai faiaoga asiasi a le [Aualofa]. Ae faavalu ona telefoni mai ia Peni Laitiiti i le isi tolu tausaga na sosoo ai, ma lona fiafia tele e le aunoa, e tau mai ai ia te au ona o se faamanuiaga ua tuuina atu, o le faia o se papatisoga, po o le siitiaina o se perisitua o se alii talavou. Na ou fesili atu ia te ia pe faapefea ona ia suia o latou olaga. ‘Na ou faia le mea na e fai mai ai. Na ou faaali atu e le sili atu au nai lo i latou ma ou te lei taumafai lava e faatonu i latou i le mea e tatau ona latou faia. Na ou i ai i lea mea, aua ua faatulagaina lelei mai e le Alii alofa se laulau faaleagaga, aua ana faapea e latou te lei fetufaai mai ma i matou, o le a i ai se avanoa i le laulau, e le o atoa le aiga.

“Ina ua suia aoaoga a uarota i aoaoga i aiga, e na o le pau lava le mea matou te faia o le faaaogaina lea o mea na faia e Peni Laitiiti e avea ma faaitaitaiga” (“Little Ben,” *Ensign*, Mar. 1977, pp. 66–68).

O le a le ki o le manuia o taumafaiga a faiaoga o aiga a Peni Laitiiti? Na faapefea ona faaaogaina foi e Peni Laitiiti lenei lava ki e tasi ina ua avea o ia o se faiaoga o aiga?

Tiutetauave o Faiaoga o Aiga

Ia faaali atu le fesoasoani vaaia 6-i, “O Faiaoga o Aiga ua Valaauina ia Asiasi atu i Aiga.”

O le tiutetauave o faiaoga o aiga o le asiasi atu lea i aiga o le au paia ma faamalositia latou e tatalo ma auai i o latou tiute faaleaiga na tuuina mai e le Alii. Ua ia valaauina i latou ia avea ma “tagata leoleo” e vaavaaia ma tausua lana fanau. (Tagai i le Ieremia 31:6; Esekielu 33:1–9).



Na faapea mai se saunoaga a Peresitene Harold B. Lee o faiaoga o aiga e tatau ona malamalama o la latou galuega o le vaai lea, faamalosia, ma ia fesoasoani i tagata o le Ekalesia ia faataunuaina o latou tiute. Na ia fai atu i taitai o le perisitua ia suia le faamamafaina o le avea o faiaoga o aiga o loo aoaina lesona ae ia faapea o leoleo o aiga o loo vaavaaia le Ekalesia. A tatou malamalama i lenei manatu, ona tatou faia ai lea aoaga i aiga e maua mai ai ni taunuuga. (Tagai i Regional Representatives' seminar, Apr. 1972, p. 8.)

O le a le uiga o le avea ma leoleo i le Ekalesia? Aisea e taua ai le iloa e aiga o loo tatou asiasi ia i e tatou te manatu atu ma naunau atu ia i latou ae tatou te lei aoao atu ia i latou? (Ia toe vaai i le tala ia Peni Laititi).

I le avea o i tatou ma faiaoga o aiga, o loo avea i tatou ma sui o le epikopo po o le peresitene o le paranesi i aiga ma tagata taitoatasi e tatou te asiasi i ai. I le avea foi ma faiaoga o aiga, ua talosagaina ai i tatou ia lipotia mai e le aunoa i se faatalanoaga ma le taitai o le perisitua e uiga i asiasiga o loo faia i aiga ma tulaga o loo manaomia e uso o le talalelei ua tofia i tatou e asia. E soo se taimi lava tatou te iloa ai se faafitauli po o se faalavelave i aiga ua tofia mai tatou e asia e tatau lava ona tatou lipotia atu i taitai o le perisitua i se taimi vave lava, ae aua le tau faatalitali sei oo i le taimi e faia ai le faatalanoaga.

E Manaomia e Aiga Faiaoga o Aiga

I le avea ai o faiaoga o aiga, e tatau ona tatou manatunatu i mea e manaomia e aiga ua tofia i ai tatou e asia. E tatau ona tatou faailogaina ia mea ua manaomia e tagata taitoatasi ma ae le gata foi i lea o mea e manaomia e aiga, ona faia lea o asiasiga ina ia atinae ai agaga—ae le tau lava na ona asiasi. E tatau ona tatou alolofa le tasi i le tasi ma ia fesoasoani le tasi i le tasi. E tatau ona tatou fesoasoani ia i latou o e o loo manaomia e atinae lo latou lototele ma le malosi.

Ia fesili atu i le vasega ia faailoa mai ia manaoga o loo i ai i le tele o aiga. Ia tusia a latou tali i luga o le laupapa. Ia faaopoopo atu i lenei lisi nisi o manaoga, a o faapea ona tuuina mai i se taimi mulimuli i le lesona.

O aiga taitasi uma lava i le Ekalesia e latou te manaomia le Agaga o le Tama Faalelagi. Ua faapea mai le faamatalaga a Peresitene Tavita O. Makei, “O lo tatou tiute lava i le avea ai ma Faiaoga o Aiga le tauaveina atu o le agaga faalelagi i totonu o aiga ma loto o tagata uma” (siiina mai e Peresitene Marion G. Romney, “The Responsibilities of Home Teachers,” *Ensign*, Mar. 1973, p. 15). Ina ia mafai ona fesoasoani i aiga ua tofia mai ia i tatou ina ia maua le Agaga, e tatau ona tatou faamalosia i latou ina ia faia afiafi faaleaiga, ia faia tatalo faaleaiga ma tatalo a le tagata lava ia, ma ia toaaga i le lotu (tagai MFF 20:53–55).

O le isi manaoga e manaomia e aiga o le fesoasoani lea i le taimi o ma'i. Ua fautua mai le Alii a oo i le taimi o ma'i e tatau ona “aami

toeaiina o le Ekalesia.” I le avea ma faiaoga o aiga, e tatau lava ona tatou iloa se ma’i ua oo i se aiga ua tofia i ai i tatou e aoaoina ma ia agavaa ma ia saunia e faauuina lena ma’i pe afai ua latou talosagaina. (Tagai i le lakopo 5:14–15.)

O tagata taitoatasi uma lava ma aiga e latou te feagai ma ni lu’i o le olaga ma ua avea ma mea e loto vaivai ai. I le avea ai la ma faiaoga o aiga, e tatau lava ona tatou maua le loto tatalo e iloa ai manaoga o tagata taitoatasi ma aiga ina ia mafai ona tatou saili i ni auala e lagolagoina ai i latou, ma faamalosiā, ma ia fesoasoani i matua, fanau, ma talavou matutua taitoatasi ua tofia i tatou e aoaoina ma asia, i soo se auala lava e tatou te mafaia. Ua le lava le na ona ofoina atu e fesoasoani.

E le gata ina manaomia e aiga ia faiaoga o aiga ae faapea foi i tagata taitoatasi. O nisi o taimi latou te le iloa ai, ae latou te manaomia lava faiaoga o aiga. Afai o i tatou o ni faiaoga o aiga e loto tatalo ma le filiga i le sailia o auala e fesoasoani atu ai i tagata taitoatasi faapea ma aiga ua tofia i ai i tatou, o le a faapea ona tatou maua ia musumusuga e taitaiina ai i tatou i le aumaia o faamanuiaga manaomia ia i latou.

Na faapefea ona iloa e Peni Laititi ia manaoga o aiga na ia asia a o avea o ia ma faiaoga o aiga?

O le tala o loo taua i lalo o loo faamalamalamaina ai pe faapefea ona fesoasoani atu se faiaoga lelei o aiga i se aiga.

“O Brother ma Sister Robertson . . . o se ulugalii talavou ma e toaaga i le Ekalesia ae le faia lava e i laua ni tatalo faaleaiga po o ni afiafi faaleaiga aua e na o i laua lava e toalua.’ Na matou tuuina atu ni lesone e faatatau i nei mataupu ma uunaia i laua, ae le tulaga manuia lea taumafaiga. . . .

“I le faagasologa o le isi lua vaiaso na sosoo ai na ma feiloai ai ma la’u soa i le tele o taimi mo le talanoaina o ni manaoga ma te iloa o loo ia i ia maua aiga o loo asia. Na ma manatu na o mea na ma lagona e manaomia e tusa ai ma lo maua iloa. Ma o le ma asiasiga la na sosoo ai na ma taumafai ai e faaaogaina la ma ua faiga po o a ma auala fou. I le alii o Robertson ma lona faletua, sa ma le fesili atu iai, ‘O le a se mea e mafai ona ma faia e fesoasoani ai?’, ae ua ma fesili atu, ‘E mafai ona tatou feiloai i le Aso Tofi a sau nei i lo’u fale e auai i se afiafi faaleaiga faapitoa?’ [Na la tali mai,] la ua lelei, faafetai lava!’ . . .

“Ina ua tuua le sauniga faamanatuga ua tuanai atu, na o mai ai ia te au le alii o Robertson ma lona faletua ma faamatala mai ia te au a laua molimau faamaoni, i lo laua faamatala mai lea ia te au le faatupulaia o lo la fiafia i totonu o lo laua aiga talu ona la faataunuaina tatalo ma afiafi faaleaiga” (Don B. Center, “The Day We Really Started Home Teaching,” *Ensign*, June 1977, pp. 18–19).

6-o, O faiaoga o aiga e tatau ona fesoasoani i le tama i le taitaiina o lona aiga



Fesoasoani i Tama

Ia faaali atu le fesoasoani vaaia 6-o, "O faiaoga o aiga e lagolagoina ia le tama i le taitaiina o lona aiga."

Ua faavaeina le Ekalesia a Iesu Keriso ina ia faasaoina ai aiga, ae le na o tagata taitoatasi. O le tama, i le avea ai o ia o le ulu o le aiga, o loo ia te ia le tiutetauave autu o le taitaiina o lona aiga i le faaeaina. E tatau ona malamalama faiaoga o aiga i lenei mataupu faavae pe afai e avea i latou o ni faiaoga o aiga e sili ona lelei ma aoga. I le avea ai ma faiaoga o aiga e tatau ona tatou iloa ua valaauina i tatou e fesoasoani i le tama po o isi tagata o loo avea ma ulu o aiga i le taitaiina lea o i latou ma o latou aiga i le atoatoaga sili.

O se tasi o auala sili lava mo le sailia o ala e avea ai i tatou o se fesoasoani i aiga ua tofia i ai i tatou o le faia lea o sau lava asiasiga a oe lava ia i le tama po o le ulu o le aiga. I lea lava taimi e mafai ai ona tatou fesili atu i le ulu o le aiga po o a ni tulaga o loo manaomia e lona aiga, ma mea e mafai ona tatou fesoasoani atu ai i le faafetaiaia o nei manaoga.

O le faamatalaga o loo taua i lalo o loo taua ai le auala na galulue ai ni faiaoga o aiga se toalua faatasi ma se tasi o tama.

"O le alii o Samuel Bowen o se uso e le auai i le Ekalesia. O lona faletua ma lana fanau o ni tagata o le Ekalesia ma ona o lea mea, e tele ai lava ni asiasiga a ausilali ma asiasiga a faiaoga o aiga e faia i le aiga o Bowen. O nei asiasiga e masani lava ona faia faatatau tonu lava i uso o le Ekalesia i totonu o aiga. O se taunuuga la, e faanoi ai lava Bro. Bowen o le a le auai po o le le auai lava o ia i ia asiasiga. . . .

"I le lua tausaga ua mavae, na tofia ai se isi faiaoga o aiga fou e asia le aiga o Bro. Bowen. Ina ua mavae ona feiloai Bro. Walker ma le aiga o Bro. Bowen ma talanoaina le tulaga o loo i ai lea lava aiga ma taitai o le perisitua, na maua ai e Bro. Walker se lagona malosi lava e tatau ona ia galue faapitoa lava i le ulu o le aiga—o Brother Bowen. I masina mulimuli ane ai, na ia faataunuaina ai lenei tulaga ina ua uma ona ia manatunatu lelei iai. Mo se faaitaiga, e le faia lava e ia se fesoaitaiga mo se asiasiga e auala atu i lona faletua, ae faia sao lava ia Bro. Bowen. . . . I taimi la o nei asiasiga, e talanoa ai Bro. Walker i ni auala e na te mafai ai ona avea ma se fesoasoani i tagata taitoatasi o lo latou aiga. I le taimi muamua, sa lei fiafia Bro. Bowen i lea faaaloaloga ua tuuina atu ia te ia ona e le masani ai, ae peitai e lei umi ae faatupuina lona fiafia ia Bro. Walker. Sa tele lava ni asiasiga fiafia sa faia i le aiga o Bro. Bowen, ae seasea lava faia se savali e faatatau tonu i le talalelei e tuuina atu i le aiga.

"I se tasi o afiafi, na faia ai e Bro. Walker se asiasiga na o ia lava ma Bro. Bowen i le potu malolo o le fale o Bro. Bowen. Na ia fesili atu,

'Sam, na faapefea ona e maua se aiga toaaga ma le matagofie faapea i le Ekalesia, ae e te lei manatu lava e te auai i le Ekalesia? Sa faateia Bro. Walker i le tali na tuuina atu ia te ia: 'Ou te masalo e leai lava se isi ua ia fesiligia au pe ou te fiafia i le Ekalesia. O le mea moni lava ua ou faitauina le tele o tusitusiga a la outou Ekalesia ma ou te talitonu foi e pei ona outou talitonu i ai.'

"Na papatisoina Sam Bowen i le Ekalesia i le masina na sosoo ai ma ua uma nei ona faamauina o ia ma lona aiga i le malumalu' (*When Thou Art Converted, Strengthen Thy Brethren* [Melchizedek Priesthood manual, 1974], pp. 217–18).

Ia tuuina atu i se faiaoga o aiga e tuuina mai lana molimau e uiga i le aoaoina o aiga. Ona tuuina atu lea i se tama o se aiga e tuuina mai lana molimau e faatatau i le aoaga o se aoaoga i aiga ua maua e lona aiga.

Faaiuga

I le avea ai o ni faiaoga o aiga, ua tuuina mai ia i tatou le tiutetauave mo aiga i totonu o le Ekalesia. E tatau ona tatou asia i latou e le aunoa, aoao atu ia i latou le talalelei, ma faamalosi i latou ia ola amiotonu. Ina ia faataunuaina lo tatou valaauga, e tatau ona atinae le alofa mo tagata taitoatasi uma o le aiga. E tatau foi ona tatou galulue ma le agaga tatalo faatasi ma ulu o aiga ina ia iloa ai ma fesoaosani i manaoga o o latou aiga.

Lu'i

1. Ia iloiloina faatasi ma le agaga tatalo lou tiutetauave o se faiaoga o aiga.
2. Ia fuafuaina ni auala e mafai ai ona e—
 - a. Faaleleia atili lau galuega o le avea ai ma faiaoga o aiga.
 - e. Ia fesoasoani i lau soa ia avea ma se faiaoga lelei o aiga.
 - i. Ia galulue faatasi ma le tama o aiga taitasi ua tofi atu.
 - o. Ia faafetaiaia manaoga o tagata taitoatasi o aiga.
3. Ia talanoaina faatasi ma lou lava aiga pe mafai faapefea ona e fesoasoani i o outou faiaoga o aiga. Atonu o le a e manao e faitauina atu le tala "Aoaoina o le Aiga o le Perofeta o Iosefa Samita," i *Tiute ma Faamanuiaga o le Perisitua, Vaega A*, lesona 6 "Tiute o le Faiaoga."

Mau Faapoopo

Ioane 21:15–17 (o le poloaiga ia aoao atu i isi)

Efeso 5:23 (o le tane o le ulu ia o le aiga)

2 Timoteo 2:2 (o e faamaoni ia aoao atu i isi)

1 Peteru 5:1–4 (tiutetauave o toeaina)

MFF 46:27 (o le meaalofa o le iloa o le mea tatau ma le mea e le tatau
ua tuuina atu i faiaoga o aiga)

MFF 84:106 (o e malolosi e faamalosi i e vaivai)

Sauniuniga a le Faiaoga

Ao lei tuuina atu lenei lesona—

1. Ia susesue i le Mataupu Faavae ma Feagaiga 20:46–47, 51–55.
2. I le faaiuga o le lesona ia valaaulia—
 - a. Se faiaoga o aiga e tuuina mai lana molimau e uiga i le aoaoina o aiga.
 - e. Se tama e tuuina mai lana molimau i se tulaga aoga ua maua e lona aiga ona o faiaoga o aiga.
3. Ia talosaga atu i tagata o le vasega e faitauina mai pe faamatala mai mau ma tala o loo i lenei lesona.

Saunia o le Tagata Lava ia ma le Aiga

Lesona 7

O lenei lesona e tatau ona fesoasoani ia i tatou ia malamalama ai i le saunia o le tagata lava ia ma le aiga ma fuafua e mulimuli ai.

Faatomuaga

I le aso 9 o Fepuari, 1971, na faalogoina ai e le Au Paia i le Vanu o San Fernando i Kalefonia se mafuie. Na faamatalaina e Sister Ina Easton le mea na tupu i lona aiga:

“Na amata mai le taeao po o le Aso Lua, 9 o Fepuari—e lei leva talu ona lulu le mafuie—e oo i le afiafi o le Aso Faraile, 12 o Fepuari, sa iai i totonu o lo matou fale tagata e 17–22 mai isi aiga matou te tausia. Sa atoa le ao ma le po e leai se eletise leai ma se kesi po o se ea e mafai ai ona maua se mafanafana ma kuka ai meaai mo le taimi lea na i ai tagata i lo matou aiga.

“ . . . O se matua lu’itau lava le tausiga o ni tagata e toatele ae laititi le fale. Na mafai lava ona matou ola i ia tulaga, ma o lea e faafetai ai i a matou uo agalelei atoa ma fuafuaga a le Ekalesia mo le teuina o meaai ma vaiinu. . . .

“ ‘E tele mea na matou iloa mai lea mea na tupu. O nisi o ia mea na teuina o fasimoli po o pauta ta lavalava ma isi mea e faaaoga i le vai malulu; o solo tuai . . . ; pepa o faleese ma pepa solo; pulumu fulunifo ma kulimi fulunifo. . . . Ae faapefea ni lavalava faasili—e tasi le suiga mo tagata taitoatasi o le aiga? O mea e faaaogaina i le fesoasoani muamua e manaomia tele. Sa tele o matou manuania. O nisi o ia manuania o ni manua laiti, peitai na iu ina avefa ma manua tugā talu ai e lei fusiina ma togafitia lelei. E toatele fanau laiti sa mafatia ona o le fia aai ma le fia maua o se faalogona lelei. Sa sili atu ona le fiafia tamaiti pepe. Ae ana i ai ni meaai pepe, fagususu, palanikeke, susu ma napekini e lafoai pe a uma ona faaaoga, se manu e iai se eseese e aliali mai i lea tulaga. . . . O nisi o mea e galo i tagata i taimi o faalavelave tutupu faafuasei o fualaau ia mo le fatu ma vai mo le ma’i suka. O isi tulaga faapea o se matua faanoanoga lava lea.

“ ‘O iina na matou iloa mai ai le taua tele o le i ai o se ogaumu e alu i le kesi. E saogalemu ma faigofie le teuina o le fagu ea. E manaia lava le malamalama o le moli e mumu i le kesi pe a pe le eletise. . . .

“ ‘E tele naunau mea e mafai ona faamatalaina atu, peitai, o le mea taua lava ia tatou manatua ua fetalai mai le Alii ia i tatou ia teu meaai,

vai, lavalava, ma tupe aua e oo mai le aso tatou te manaomia tele ai ia mea. Ou te molimau atu na matou matua manaomia tele ia mea. Sa tele ma sa lava foi mea na matou fetufaaaina ma a matou uo agalelei atoa ma tagata o le uarota ia na faamalosia ina ia tuua o latou fale' ” (*Relief Society Courses of Study 1977–78*, pp. 78–79).

O Le Fuafuaga a le Alii

O le fuafuaga a le Alii mo le tausiga o tagata o le Ekalesia atoa ma le ola tutoatasi ma le saogalemu e faigofie lava. E manaomia lea fuafuaga ina ia tatou faia le mea sili e mafai ona tatou faia e saunia ai mea mo o tatou lava manaoga ma manaoga o le aiga. E aofia ai i lenei mea le atinae o uiga lelei o le galue, posiposi lelei, faaputuputuina o se sapalai mo mea manaomia e mafai ona faaogaina e tusa ma le tausaga e tasi, fuafuaina mamao atu o mea tatou te manaomia i le lumanai, ma ia tausia le faaaloalo o le tagata lava ia ia te ia.

O le faavae o le fuafuaga a le Alii e autu i le galue. O loo ia faamoemoe ia i tatou uma lava ina ia tatou tutoatasi e ala lea i lo tatou saunia o mea tatou te manaomia. O le faamoemoega autu lava o le Ekalesia o le fesoasoani mai lea ia te i tatou ina ia tatou fesoasoani mo i tatou lava. O lea la, o le saunia e amata lava i le tagata lava ia ma le aiga.

Ia tuuina atu i se tasi o le vasega e tuuina mai se lipoti e faatatau i “Tiutetauave o le Aiga” mai *Mataupu Faavae o le Talalelei*, i. 191, mataupu 27.

O ai e i ai le tiutetauave muamua lava o le tausia lea o manaoga o e pele ia i tatou?

“A tatou talanoa e uiga i le saunia o le aiga, e tatau ona tatou talanoa i manaoga tatou te iloa o le a oo mai, faamoemoeina, manaoga e mafai ona faafetaiaia e ala i le sauniuni lelei lea ma le atamai. E oo lava foi i faalavelave faafuasei e mafai ona faaitiitia e ala i fuafuaga lelei” (H. Burke Peterson, “The Family in Welfare Services,” *Welfare Services Meeting*, Apr. 1975, p. 5).

Afai tatou le mafai ona maua e i tatou mea e tausia ai i tatou lava, e tatau ona tatou saili muamua i se fesoasoani mai o tatou aiga. Mo se faataitaiga, o tagata o le Ekalesia e le atoatoa le malolosi, pe ua i ai foi nisi faafitauli e taofia ai i latou mai le tausia o i latou lava, e mafai ona talosagaina nisi fesoasoani e sili atu nai lo mea e mafai ona maua e o latou aiga. O le tulaga la lena, e tatau ai ona talosagaina le fesoasoani a tagata o aiga e fesoasoani mai. Afai e le lava lea fesoasoani, ona mafai ai lea ona talosagaina le Ekalesia e fesoasoani atu ia te i latou.

O le saunia lelei ua le gata ina mafai ona fesoasoani i le tausia ai o i tatou lava, ae ua faapea foi ona fesoasoani ia i tatou mo le tuuina atu o le fesoasoani i isi tagata i le taimi latou te manaomia ai. O le fuafuaga lenei a le Alii—o le tuputupu ae faaleagaga e maua lea i le tuuina atu o i tatou lava, lo tatou taimi, ma a tatou taleni ma le le manatu faapito e fesoasoani ai i isi.

Aisea ua finagalo ai lo tatou Tama Faalelagi ia i tatou e saunia po o le galue mo i tatou lava ma o tatou aiga ina ia tatou mafai ona faia? Pe tatau ea ona tatou faamoemoe atu i isi tagata latou te saunia mea e tausia ai i tatou?

E mafai faapefea ona tatou tuputupu ae faaleagaga i lo tatou fesoasoani atu lea i isi tagata e le o tagolima po o latou manaomia le fesoasoani?

Saunia o o Tatou Aiga

Ia faaali atu le ata faatulaga o le saunia o le tagata lava ia ma le aiga (fesoasoani vaaia 7-a) ao lei amataina le vasega. (E mafai ona toe tusia lenei ata i luga o se laupapa.)

Ua faailoa mai e le Alii e ala mai i ana perofeta ua tatau ona tatou saunia o i tatou lava ia maua mea e tausii ai o tatou manaoga o le taimi nei ma le lumanai i le faaaogaina lea o ni auala se ono:

1. Totoina ma faaputuina meaai ma ia teuina isi mea aoga
2. Taumafa i meaai tatau ma ia faia faamalositino
3. Fiafia ma ia fealofani le tasi i le tasi ma le Atua
4. Faitau ma aoao
5. Atinae le atamai ina ia maua nisi galuega lelei
6. Faaaogaina tatau o tupe

TOTOINA MA FAAPUTU MEAAI MA IA TEUINA ISI MEA AOGA


O nisi o atunuu e latou te le faatagaina le faaputuina ma le teuina o meaai. Ae i nofoaga e faatagaina ai ma e mafai ai, e tatau i tagata taitoatasi po o aiga ona i ai meaai ia lava mo le tausiga o i latou mo se tausaga e tasi. O le uiga o lenei mea, e tatau ona totoina ma faasaoina meaai (tagai i le lesona 16 mo se talanoaga e faatatau i le faia o togalaau aina) ona faaoga lea o meaai e le umi ona teuina ma ia toe faatumu atu. (O le uiga o lea mea o le faaoga ma toe faatumu a tatou meaai e teu.) E tatau foi ona tatou iloa le faiga o lavalava, ma pe afai e mafai, e tatau ona faasaoina ma teuina suauu ma vaiala faafomai. O le gaosia ma le teuina o mea e fesoasoani ia i tatou e tausii o tatou manaoga, faapea ma o tatou lava aiga, faapea foi ma isi tagata e le o tagolima ma manaomia le fesoasoani. (Tagai i *Tiute ma Faamanuiaga o le Perisitua, Vaega A*, lesona 22, "Gaosiga o Mea ma le Teuina.")

O le a se mea e mafai ona tatou faia ia faatupulaia ai lo tatou saunia i le gaosia o mea i le aiga ma le teuina o mea?

TAUMAFI I MEAAI TATAU MA IA FAIA FAAMALOSITINO

Ina ia maua le soifua maloloina lelei ma ia lava le malosi e faafoeina ai faalavelave faafuasei, e tatau i o tatou aiga ona aai i meaai e maua ai le malosi ma aoga mo le tino. Mo lenei la mafuaaga o lea ua ala ai ona tuuina atu e le Alii ia i tatou le tulafono o le Upu o le Poto (tagai MFF 89). O lenei mau o loo maua ai le fautuaga mo le soifua maloloina lelei ma folafolaga o faamanuiaga e maua pe a tatou ola ai i le tulafono o le soifua maloloina lelei. Ina ia tetee atu i faamai, e tatau foi ona tatou

Siata o Sauniuniga a le Tagata Lava Ia ma le Aiga



tausia ia mama o tatou fale ma o tatou nofoaga. Ia mautinoa ia faia ni faamalosi tino e le aunoa, tausia ia mama o tatou tino, ma ia mulimuli i isi faiga lelei o le soifua maloloina.

O le a se mea e mafai ona tatou faia ina ia faaleleia atili ai le tulaga o le soifua maloloina lelei o o tatou aiga?

IA FIAFIA MA FEALOFANI LE TASI I LE TASI MA LE ATUA

O le a sili atu ona saunia lelei lo tatou aiga i le tulaga o le vafealoai ma lagona loloto pe afai e mafai ona latou talia faanoanoaga ma faafitauli o lenei olaga e aunoa ma le faatoilaloina o i tatou e nei tulaga. Na faapea mai se faamatalaga a Elder Boyd K. Packer:

“O le faamoemoega lava ia avea le olaga o se lui. O le mea masani lava lo tatou mafatia i le popole, faanoanoaga, o le ita, e oo lava foi i ni taumafaiga le manuia.

“Ia aoao atu i o tatou tagata ina ia tutu mausali ma faafetaiaia ni mea faanoanoa e oo mai i se taimi, pe faalausosoo mai foi. O le a iai lava le taimi e toe lelei ai mea uma.

“O loo iai se faamoemoega tele i la tatou tauiviga o loo faia nei i le olaga” (*Ensign*, May 1978, p. 93).

A maua e o tatou aiga ni faafitauli, e tatau ona tatou alolofa, lagolago, talisapaia, ma ia faamalosia e le tasi le tasi; aua e na o le fesoasoani lava o le tasi i le tasi, o le a mafai ai ona tatou atinae le malosi i lagona loloto e faafoia ai o tatou faafitauli. O le tala o loo taua i lalo o loo faamatala ai se aiga na atinae lea ituaiga malosiaga:

O le aiga e aofia ai matua, atalii e toatolu, ma ni afafine se toalua. O le afafine pito i laitiiti o loo faafeagai o ia ma se mafatiaga matautia tele o le faiai talu ona fanau mai, ma o lea tulaga na avea ma mea e le mafai ai e lenei teineititi ona tuputupu ae ma ola i se tulaga e pei lava o isi tagata. Na maliu o ia ina ua sefulu fitu tausaga lona matua.

“O le tausiga le mavae ma le alofa a le tina, le onosai ma le faamafanafana mai se tama agalelei, ma agaga malamalama o ni tuagane se toatolu tausaaafia ma se uso manatunatu lelei na mafai ai ona avea le i ai o lenei teineititi ma tulaga faapitoa i lenei aiga. . . . [Na faapea mai le tala a lona tama], ‘E leai se mea e mafai ona faatauina mai e tupe e mafai ona tuufaatasia ai i matou i le alofa, onosai, ma le lotomauualalo, nai lo le tausia ma le vaavaaia o ia.’ O se mala . . . na liua i se avanoa o faamanuiaga” (Marvin J. Ashton, “Family Home Storage,” in *1977 Devotional Speeches of the Year*, p. 69).

E pei ona faamalamalama mai e lenei tala, se ituaiga agalelei, agaga tatalo, ma se mafutaga o le alofa faaleaiga, e mafai ona avea ma se faamanuiaga tele lava i olaga i tagata taitoatasi o le aiga. E tatau ona avea lea ituaiga o mafutaga ma sini a aiga taitasi uma lava. Na faapea

7-a, O vaega e ono o sauniuniga a le tagata lava ia ma le aiga.

mai se faamatalaga a Elder Marvin J. Ashton: “E masani lava o [fesoasoani] silisili tatou te maua, e maua mai lea i totonu o o tatou aiga. O nisi o taimi o fesoasoani e tatou te sili atu ona mananao iai o fesoasoani ia mai ia i latou o loo pito sili ona tatou vavalalata. . . . Ua poloaiina e le Alii ia tagata o le aiga ina ia fesoasoani i tagata uma lava o le aiga. . . . e tatau ona tago atu i lima o tagata o o tatou aiga ma faaali atu ia i latou lo tatou alofa moni e le uma” (“He Took Him by the Hand,” *Ensign*, July 1975, p. 73).

Aisea e tatau ai ona tatou atinae ma tuuina atu le fesoasoani tau i lagona loloto i o tatou aiga?

Aisea e taua ai le fesoasoani, malamalama, ma le alofa i isi tagata e maua ai lo tatou nofo filemu ma le fealofani ma le fiafia?

FAITAU MA AOAQ

I totonu o le Mataupu Faavae ma Feagaiga o loo faamatalaina mai ai “o le mamalu o le Atua o le malamalama lea, o lona uiga o le malamalama ma le upu moni” ma o loo poloai mai ai “e taitaiina a outou fanau i le malamalama ma le upu moni” (MFF 93:36, 40). Afai tatou te taitaiina a tatou fanau i lea tulaga, e tatau lava ona tatou mafai ona tatou faitau, tusitusi, ma ia iloa matematika po o numera faavae. O lea foi e tatau ai ona tatou suesue e le aunoa i tusitusiga paia, faapea foi ma isi tusi lelei, ma ia faaaogaina soo se fesoasoani lava o loo maua e aoao atu ai nei atamai i o tatou aiga. O lona uiga o lenei mea o i tatou, o a tatou ava, ma a tatou fanau e tatau ona faaogaina lelei avanoa faaleaogaina ma avanoa lautele.

Aisea e tatau ai ia i tatou ma o tatou aiga ona iloa faitau ma tusitusi? Aisea e taua ai aogaina?

ATINAE TOMAI MO GALUEGA LELEI

Pe a mafai ai, e tatau ona tatou maua ni galuega e mafai ai ona tatou tausia o tatou aiga ma maua ai e i tatou le faamalieina o o tatou lava manaoga. O ia ituaiga o galuega e tatau ona talafeagai lelei ma ogatasi ma aiaiga a le Ekalesia ma mafai ai ona tatou auai atu i o tatou tiute faaleEkalesia. O lea e tatau ai i tagata taitoatasi ona maua se fautuaga i le filifilia o se galuega ua talafeagai ai. Mo i tatou la ua i ai nei galuega e tatau ona matua aoao i tulaga uma lava e tatou te mafaia e uiga i a tatou galuega ina ia mafai ai ona tatou tausia lelei o tatou aiga.

Na faapea mai se faamatalaga a se tasi o tagata atamamai, “Afai e te tuuina atu i se tagata se i’a, o le a mafai e ia ona maua se taumafataga se tasi; afai e te aogaina o ia ina ia iloa fagota, o le a ‘ai i’a o ia i lona olaga atoa.” O le tulaga o le talafaasolopito o loo taua i lalo o loo faamalamalama mai ai lea mataupu faavae autu o le saunia o le tagata lava ia ma le aiga:

O loane, o se tama o se fanau laiti e toalua, e le faigaluega o ia. Na ia maua se galuega ma galue ai mo se taimi puupuu, ona e talu ai e le popole o ia i le galuega, o lea na ia tuua ai le galuega e aunoa ma se

isi galuega e toe faigaluega ai. Ma ua oo nei i le taimi e tatau ona totogi le lisi ma o lona toalua foi o loo ia te ia ni faafitauli o le soifua maloloina ua le mafai ai e ia ona faia ni galuega i fafo o le fale.

O le a se mea e mafai ona faia e lenei aiga ina ia foia ai lenei faafitauli? E mafai faapefea ona fesoasoani le toalua? E mafai faapefea ona fesoasoani le fanau? Afai e faigaluega le tama i se galuega e le fiafia iai, o le a se mea e mafai ona ia faia e saunia ai o ia mo se isi ituaiga o galuega?

Na fautua mai faapea Elder Marvin J. Ashton: “Ia faaaauaina pea aoaoga. Ia faamaeaina lelei aoaoga e mafai ona faia. E aofia ai aoaoga i se tomai faapitoa. E mafai ona avea lena ma tulaga lelei o le teuina ai o tupe. Ia faaoga aoga po ma aoga fetusia'i e saunia atili ai. Ia aoaoina ni tomai faapitoa po o se poto e mafai ona faaogaina i se taimi umi e le faigaluega ai. . . . E le tatau ona tatou faatalitali mo se isi ituaiga galuega, pe a ua le maua sa tatou galuega pe afai o loo i ai se isi galuega o loo avanoa” (“One for the Money,” *Ensign*, July 1975, p. 73).

Aisea e tatau ai ona saunia alii talavou mo se galuega?

FAAOGAINA MA LE ATAMAI O TUPE

Ina ia tatou saunia i mea tau tupe, e tatau ona tatou iloa ola faatatau e tusa ai ma tupe tatou te maua. E manaomia ai foi la le faatulagaina ma le pulea lelei o se paketi. O se paketi faafaigaluega e aofia ai sini o le faasoasoina o ia tupe, se fuafuaga mo le totogiina o sefuluai ma taulaga, ma tupe faaagaga ina ia aloese mai ai le nofo aitalafu. Mo se faaopoopoga i le paketi, o le pulea lelei ma le atamai o a tatou tupe maua e aofia ai le faatauina mai o meaai ma isi mea aoga pe afai ua taugofie, aloese mai ai i le faaaluvaleina po o le faamaimau, ma, afai e mafai, ia teuina se tupe mo faalavelave faafuasei e manaomia ai tupe.

Sa tuuina mai e le aiga o Kay Christensens o le Aai o Kansas i Misuri se fautuaga e faatatau i le puleaina o tupe a le aiga. Na latou faapea mai: “O le tasi o mea e matua le lelei lava, o le manatu lea ‘O la’u tupe lenei, o lea o le a ou faaogaina lava i le tulaga ou te manao iai.’ E tusa lava po o le tane po o le ava na te sailia mai le tupe, o tupe uma lava a i laua uma. E le o iai i le tane po o le ava se aia e alu atu ai ma faaalu ‘ona e faapea o ia e ana ia tupe’” (as quoted by Orson Scott Card, “Family Finances,” *Ensign*, June 1978, p. 13).

E faapefea ona aumaia le filemu i totonu o le aiga i le pulea lelei o tupe? O le a le tulaga saunia lelei o loo iai i tatou i nei vaega autu e ono o le saunia o le tagata lava ia ma le aiga?

Saunia o le Ekalesia

E le gata i le tausia o o tatou manaoga taitoatasi ma manaoga o le aiga, a ua poloaiina foi i tatou e le Alii ia fesoasoani le tasi i le tasi.

Faitau le Mataupu Faavae ma Feagaiga 52:40.

Ina ia lagolagoina i tatou i le fesoasoani atu lea o le tasi i le tasi, o taumafaiga ma mea uma lava e maua mai ai fesoasoani a tagata uma lava o le Ekalesia o loo ua tuufaatasia i se polokalama e taua

o le “Saunia o le Ekalesia.” Afai e manaomia ia taumafaiga ma mea uma a le Ekalesia aoao, e pulea e taitai o le perisitua le faasoasoina o lo latou faaaogaina. O mea o loo taua i lalo o ni faaitaiga ia o ni faalavelave matautia e ono manaomia ai fesoasoani a le Ekalesia i totonu lava o le atunuu ia:

“I se lologa faalafua i le Aai o Rapid i South Dakota, sa lei faatali le Au Paia i lena nofoaga ae tuuina atu loa se fesoasoani i tagata na puapuagatia ona o le lologa. O lavalava, moega, ma meaai mafanafana sa saunia ma tuuina atu e ala i taumafaiga a le faalapopotoga lava a le Ekalesia i totonu o lena nuu. E na o le tasi lava le loli na sau mai le Aai o Sate Leki ma se uta o mea e fesoasoani iai e pei o meaai a pepe, napekini, ma palanikeke [na manaomia e aumai] i totonu o lenei nuu. (Junior Wright Child, “Welfare Is the Church,” *Ensign*, Sept. 1973, p. 71).

Ina ua mavae le mafuie ia Tesema i le tausaga e 1972 i Managua i Nicaragua i Amerika Tutotonu, “e na o le pau lava le mea na tuuina atu i lea Au Paia mai le Aai o Sate Leki o tui ia e puipui mai ai i le fiva taifoio A o isi fesoasoani uma na maua uma lava i totonu o le atunuu lava ia; o le Au Paia i Costa Rica, o loo fuafuaina ia fesoasoani i mea tau sapalai e faauala atu i taitai faalemalo, na latou saunia lea polokalama” (“Welfare Is the Church,” p. 71).

Na faapea mai se faamatalaga a Peresitene Spencer W. Kimball:

“E tele ni tulaga pagatia na tatou maua i le vaitaimi ua tuanai atu. E foliga mai o aso uma lava taitasi po o le lua foi e oo mai ai se mafuie po o se lolo po o se afa po o se tulaga faanoanoa e auala mai ai faafitauli i le tele o tagata. Ou te faafetai ona ua ou iloa ua amata ona maua mai e tagata o le Ekalesia ma taitai le tulaga o le fesoasoani o le tagata ia te ia lava. . . .

“Ou te manatu ua oo mai le taimi o le tele o tulaga faanoanoa, pe afai o le a tele mai afa ma nisi lologa sili atu, . . . o nisi mafuie. . . . Ou te manatu o le a faateleina a o tatou latalata atu i le iuga, o lea e tatau ai ona tatou saunia mo nei mea a oo mai” (in Conference Report, Apr. 1974, pp. 183–84).

E manaomia lo tatou saunia e pei o se Ekalesia e le gata foi i lena ae tatau foi ona tatou saunia le tagata lava ia ma aiga ina ia mafai ona tatou saogalemu mai ai i nei tulaga pagatia. Afai e faatulagaina atoatoa e le Ekalesia i o tatou nofoaga, e mafai ona tatou galulue faatasi e saunia meaai, lavalava, ma mea e faaaogaina e le aiga i le taimi o faalavelave faafuasei. I lea la auala, o i latou e le mafai ona fesoasoani ia i latou lava, ma i latou ua faia e o latou aiga mea uma latou te mafaia, e mafai ona latou maua nei mea. Afai tatou te fesoasoaniai i auala uma tatou te mafaia, o le a tatou agavaa e maua le fesoasoani pe a tatou manaomia.

Faaiuga

A o tatou auai atoatoa i le fuafuaga a le Alii mo le saunia, o le a faateleina lo tatou alolofa i o tatou aiga ma isi, ma o le a tuputupu ae la tatou molimau o le manaomia o le saunia faaletagata lava ia ma le aiga. Faatasi ai ma lena molimau, o le a tatou mananao e fesoasoani atu i isi ina ia saunia.

I le Mataupu Faavae ma Feagaiga o loo taua mai ai faapea, “O mea uma lava e faaleagaga ia ia te au, ma ou te lei tuuina atu ia te outou i soo se aso se tulafono e faaletino” (MFF 29:34). O le faavae o le fuafuaga o le uelefea a le Ekalesia o le alofa faaleuso, auaua atu, ma le agalelei. Na fetalai mai le Faaola e faapea, “Aua na faia e outou i le tasi o e aupito itiiti o o’u uso nei, o a’u lava lea na outou faia i ai” (Mataio 25:40).

Lu’i

1. I le isi a outou afiafi faaleaiga o le a sosoo ai, ia iloiloia ai le tulaga saunia o lo outou aiga. Ia maitauina ni vaega o loo vaivai ai ona faia lea o se fuafuaga e faaleleia ai.
2. I le avefa ma se faiaoga o aiga, ia mataala lelei i le vaaia o manaoga o aiga o loo e asia. Ia uunaia i latou e saunia o latou aiga.

Mau Faapoopo

1 Timoteo 5:8 (e tatau ona tatou saunia mea mo le tausiga o o tatou aiga)

1 Ioane 3:17 (o le taua o le fesoasoani i isi)

Alema 34:28 (o la tatou matafaioi o le tausia o isi)

MFF 56:16–18 (apoapoaiga i e mauoloa ma matitiva)

MFF 68:30–32 (o e paie e faasalaina)

MFF 78:7, 13–14 (o le taua o le saunia)

Sauniuniga a le Faaoga

Ao lei tuuina atu lenei lesona—

1. Ia suesue le *Mataupu Faavae o le Talalelei*, mataupu 27, “Galuega ma Tiutetauave Faaletagata Lava Ia,” ma le mataupu 37, “Tiutetauave o le Aiga.”
2. Ia i ai se laupapa ma se penisina.
3. Ia tofia se tagata o le vasega e tuuina mai se lipoti e faatatau i “Tiutetauave o le Aiga” mai le tusi lesona o *Mataupu Faavae o le Talalelei*.
4. Ia saunia se siata (fesoasoani vaaia 7-a) o loo faaalua ai vaega e ono o le saunia o le tagata lava ia ma le aiga.
5. Fai atu i tagata o le vasega e faitau pe faamatala mai tala ma mau o loo i lenei lesona.

Gafa ma Talafaamaumau o Aiga

Lesona 8

O lenei lesona e tatau ona aoaoina ai i tatou i lo tatou tiutetauave o le aoina ma le faamaopoopoina o tala faamaumau o aiga ma ia mautinoa o loo faataunuaina sauniga faalemalumalu mo o tatou tagata ua maliliu.

Faatomuaga

O tagata uma lava ua i ai i le tulaga e mafai ai ona faamasinoina i ana mea e fai e tatau ona papatisoina ma maua sauniga uma lava o le Ekalesia a o lei oo atu o ia i le malo selesitila. Ae ui i lea, e tele tagata ua ola ma toe maliliu atu ae latou te lei maua le avanoa e faalogo ai i le talalelei po o le mauaina foi o nei sauniga.

Ua faaalua mai e le Alii le auala e mafai ai e nei tagata ona maua le talalelei i le lalolagi o agaga e ala mai i le Perofeta o Iosefa Samita ma isi perofeta o aso e gata ai (tagai i le MFF 138, “Faaaliga o le Togiolaina o e ua Oti”). Ae peitai, e tatau foi ona latou maua sauniga o le faaolataga, lea e na o tagata lava o loo ola e mafai ona faia i ai. O lea la, o lo tatou tiutetauave le sueina po o ai o tatou augatuaa ma ia vaaia ua faataunuaina nei sauniga mo i latou i le malumalusa. E tatou te taua lenei mea o galuega tau gafa.

Na faaali ane e le Alii ia Iosefa Samita o lenei galuega e matuai taua lava.

Faitau le Mataupu Faavae ma Feagaiga 128:15.

A maua uma loa faamatalaga manaomia e uiga i o tatou augatuaa, e mafai loa ona faamauina faatasi augatuaa na i le malumalusa o ni aiga mo le faavavau. A o faamauina atu le isi augatupulaga i le isi, o aiga ua mafai ona soofaatasia mo le faavavau e pei o se filifili tele. Na faamatalaina e Peresitene Iosefa Filitia Samita e faapea:

“O alii ua faaipoipoina o i latou lava ia o ulu. . . o o latou lava aiga. O lea la, o a’u, mo se faaitaiga, o le a ou avea ma ulu o le matou aiga ona o le faamauga lea na faataunuaina mo le taimi nei ma le faavavau, ma o le a fai mo’u la’u fanau. O le a totino au e ou matua i le faalapotopotoga o le la aiga. Ma o le a faapea foi lo’u tama ma ona uso ma ona tuafafine i le faapotopotoga o le aiga o lona tama, ma faapena foi lona tama i lona tama—ua faamau faatasia ai augatupulaga i lea augatupulaga e pei o se filifili” (*Seek Ye Earnestly*, p. 225).

Tusi Faamanatu

O tagata o le Alii e tausia lava e i latou ni tusi faamanatu. Na tausia foi e le fanau a Atamu se tusi faamanatu (tagai i le Mose 6:4–8), ma na poloaiina foi sa Nifae e tausia ni talafaamaumau paia (tagai i le 3 Nifae 23:6–13). O lea lava foi le tiutetauave ua poloaiina ai i tatou i aso nei e faia (tagai i le MFF 128:24).

O se tusi faamanatu o se talafaamaumau a lo tatou aiga. E tatau ona aofia ma maua ai gafa, ma ni pepa taua o loo i ai ni faamatalaga o le aiga ma talafaasolopito o o tatou augatuaa faapea ma i tatou. O se auala lelei mo le amataina o se tusi faamanatu o le faaogaina lea o se atigipusa po o se isi lava mea e mafai ai ona teu ai faamatalaga, e tuu uma lava i ai pepa o loo tusia ai ni talafaamaumau o i tatou ma o tatou augatuaa tatou te maua ae ia tuu lea atigipusa i se nofoaga e saogalemu.

O a la ni talafaamaumau e mafai ona tatou tuuina i totonu o ia atigipusa? (O nisi o nei mea e aofia ai pepa fanau, pepa faamaoni o le papatisoga ma le faauuga, faamanuiaga faapeteriaka, pepa faaipoipo, ata, faamatalaga o mea e tutupu i aso taitasi o le olaga o se tasi, faamatalaga mai le nusipepa, ma talafaamaumau o aoga.)

O le vaega pito sili ona taua o le tusi faamanatu o le talafaasolopito lea o loo tatou teuina e i tatou lava. O lenei talafaasolopito o le tagata lava ia e mafai ona tusia i le faaogaina lea o le faatulagaga o le aoina mai o faamatalaga o loo faamatalaina atu mo na o le aoina mai o faamatalaga e faatatau i o tatou augatuaa. E ala i lo tatou aoina ma faaputupuutuina o talafaamaumau o o tatou lava olaga i se atigipusa ma le talanoa atu i o tatou matua ma isi tagata o o tatou aiga ma uo o e mafai ona tuuina mai ni faamatalaga e uiga ia i tatou lava ia, e mafai loa ona tatou amataina ona ootooina ni mea na tutupu ia i tatou. E masani lava ona faamanatu mai ia i tatou e talafaamaumau ma isi mea ua tatou maua ma aoina mai ia nisi mea na tutupu ma oo ia i tatou.

A uma loa ona tatou aoina mai mea uma lava e mafai ona maua e uiga ia i tatou, ona faatulagaina loa lea o nei mea i lo latou faatulagaga sa'o ma le tatau i le taimi a o avea i tatou ma tamaiti. Ona mafai loa lea ona amata ona tusia tala o o tatou olaga e i tatou lava, po o le tuuina atu i se isi na te tusia po o le pueina lea i se lipine.

O tala o o tatou olaga e tatau ona tuufaatasia i le mea o loo i ai isi pepa taua o mea tau gafa ua faaputupuutuina ma tuufaatasia i totonu o le atigipusa po o se tusi faava o malo. O le amataga lea o la tatou tusi faamanatu, lea e tatau ona aofia ai talafaamaumau paia uma o le aiga.

Tusi o le Talaaga o le Tagata Lava Ia

Faaali atu le fesoasoani vaaia 8-a, “E tatau i tagata uma o le Ekalesia ona tausia se tusi o le talaaga o le tagata lava ia.”

O o tatou talafaamaumau e tatau ona aofia ai ma se tusi o le talaaga o le tagata lava ia po o se faamatalaga tusitusia o mea e tutupu i aso



8-a

taitasi e taua, mafaufauga, ma lagona e oo mai ia i tatou. O lenei la mea e manaomia ai le faaavanoaina o so tatou taimi i aso taitasi po o vaiaso taitasi e tusia ai mea na tutupu ia i tatou. Na tusia e Peresitene Kimball se faamatalaga faapea i le *New Era*:

“Matou te uunaia o tatou . . . tagata ina ia amata nei ona tusia ma tausia talafaamaumau o mea taua uma e tutupu i o latou olaga. . . .

“O le a se isi mea e sili atu ona e faia mo lau fanau ma a latou fanau nai lo le faamaumauina o le tala o lou olaga, o ou tulaga manumalo i le faatoilaloina o le tiapolo, lou faaeaina mai se tulaga toilalo, lou alualu i luma i taimi o faigata, . . . lou olioli pe a e taunuu i le sini?. . .

“Ia avane se tamai tusi, . . . o se tusi o le a tumau e faavavau, ma atonu e mafai e agelu ona faitau mai ai mo le faavavau. Amata nei loa ona tusia ai mea e tutupu ia te oe, o ou lagona loloto, mea na e faataunuuina ma mea e te lei faataunuuina, o au fegalegaleaiga ma mea na e manumalo mai ai, o mea na e faagaetia ai ma au molimau.”

I lea lava tala e tasi, na faapea mai ai le saunoaga a Peresitene Kimball, “Tatou te matua faafetai ina ua tusia e Aperamo le talaaga o lona lava olaga atoa ma se vaega taua o le talafaasolopito o le lalolagi ma ana lava faaaliga, manatu, lagona ma mea taua na oo ia te ia” (“E Mafai e Agelu Ona Faitau Mai ai,” *Liahona*, Iuni 1977, itulau 16–17).

Talafaamaumau o o Tatou Augatuaa

O i tatou uma lava e tofu ma se tofi e mitamita ai. Ua tele mea ua faia e o tatou augatuaa e maua ai e i tatou faamanuiaga o loo ua tatou olioli ai i nei aso, ma e tatau ona tatou alolofa naua foi ia i latou i le manao lea e aumaia o nei faamanuiaga ia i latou o le talalelei. Ina ia mafaia ona tatou aumaia nei faamanuiaga ia i latou, ua toefuataiina mai e le Alii ki o le faaolataga mo e ua maliliu ia Iosefa Samita. Na ia auina mai se avefeau mai le lagi e igoa ia Elia, o le na umia ia ki faapitoa o le perisitua a o avea o se perofeta o anamua, ma na tuuina atu e Elia nei ki i le Perofeta o Iosefa Samita.

Ia tuu atu i se tagata o le vasega e faitau mai le Mataupu Faavae ma Feagaiga e 2 po o le Malaki 4:5–6.

O le a le uiga o le liua o loto o fanau i o latou matua?

A o tatou aoaoina mea uma lava e mafai ona tatou aoaoina e uiga i o tatou augatuaa, o le a iloa le tuputupu ae o lo tatou alofa mo i latou. E liua atu o tatou loto ia i latou. Tatou te moomoo maimau pe ana faapea tatou te iloa lelei i latou, ma tatou manatunatu i o latou olaga. Tatou te mananao ina ia latou olioli i faamanuiaga o le talalelei ma ia avea o se vaega o se aiga e faavavau ma i tatou.

O le toefuataiina atu o ki o le perisitua mo le faaolaina o e ua maliliu, na tuuina atu ai e Elia ia Iosefa Samita le mana e faamauina ai aiga mo

8-a, E tatau i tagata uma o le Ekalesia ona tausia se talaaga o lona lava olaga.



le faavavau. Afai tatou te naunau e faamauina faatasi o tatou aiga i se sootaga e tau lava i tua ia Atamu, ua musuia i tatou e le “Agaga o Elia.” O le “Agaga o Elia” o le naunautaiiga lea tatou te lagonaina ina ia sailia o talafaamaumau o o tatou augatuaa ma faia mea latou te lei mafaia ona faia mo i latou lava.

la faaali atu le fesoasoani vaai 8-e, “O galuega tau gafa o se tiutetauave o se aiga.”

Ina ia amataina lenei galuega, ua talosagaina tagata uma lava o le Ekalesia e o tatou perofeta ina ia faatumuina se “polokalama o le fa augatupulaga.” O le polokalama o le fa augatupulaga e aofia ai le aoina mai o faamatalaga e uiga i lou lava aiga ma faamatalaga e uiga i augatupulaga muamua lava e tolu o o tatou augatuaa ma faamaumuina nei faamatalaga i se pepa faapitoa e taua o *pepa o augatuaa ma pepa o ulugalii ma fanau*. Ina ia faia maea lenei polokalama, o i tatou uma lava taitoatasi e tatau ona faataunuuiina mea nei o loo taua i lalo:

Augatupulaga 1: E tatau ona iai se pepa se tasi o le ulugalii ma le fanau mo i tatou, o a tatou ava, ma a tatou fanau.

Augatupulaga 2: Ni pepa se lua o ulugalii ma fanau, o le tasi o loo faaalii ai o tatou matua o se tane ma se ava a o le tasi e faaalii ai matua o a tatou ava o se tane ma se ava.

Augatupulaga 3: Ni pepa se fa o ulugalii ma fanau, ia tofu matua o o tatou matua ma le pepa faapea foi matua o matua o a tatou ava ma le pepa.

Augatupulaga 4: Ni pepa se valu o ulugalii ma fanau, ia tofu matua o matua o o tatou matua ma le pepa, faapea foi matua o matua o matua o a tatou ava ma le pepa.

la faaali atu i le vasega le pepa o ulugalii ma fanau a lou lava aiga. la faamatala atu i ai pe na faapefea ona e faatumuina ma tuuina atu lau molimau e faatatau i gafa ma talafaamaumau.

E mafai foi ona faaogaina pepa o ulugalii ma fanau e faamaumuina ai faamatalaga e uiga i augatuaa e matutua atu i lo augatupulaga e fa o loo manaomia ina ia tatou sailia. O nei talafaamaumau, faatasi ai ma faamatalaga o le polokalama o le fa augatupulaga e tatau ona tuufaatasia i totonu o la tatou tusi faamanatu.

Sauniga Faalemalumalusa mo le Aiga

Faaali atu le fesoasoani vaai 8-i, “O galuega faalemalumalusa mo e ua malilii e faataunuuiina e i latou o loo ola.”

A o tatou faaputuina talafaamaumau e uiga i lo tatou aiga, e mafai ai ona tatou fuafuaina po o ai so tatou augatuaa e manaomia le faataunuuiina o sauniga faalemalumalusa mo i latou. O igoa o i latou na e lafoina atu pe tuuina atu i le Matagaluega o Talafaasolopito o Aiga, o i latou na o le a latou tagai lelei pe ua faataunuuiina sauniga tatau mo i latou.

8-e, O galuega tau gafa o se tiutetauave faaleaiga



O sauniga uma lava e manaomia e faia i e o loo ola e tatau foi ona faia mo e ua maliliu ina ia tutusa lo latou tufaaga i faamanuiaga o le faaeaina. O nei sauniga o le a faataunuuna i totonu o malumalusa e ala i le mana o le perisitua. I totonu o malumalu, o tagata o le Ekalesia o e agavaa e mafai ona papatisoina, faamauiina, faauuina i le perisitua, ma maua faaeega paia mo e ua maliliu. E mafai foi ona faamauiina i latou i aiga e faavavau mo e ua maliliu.

Na faapea mai Peresitene Wilford Woodruff, “Ou te matua faatauaina lenei vaega o la tatou misiona e pei lava o le taua o le talai atu i e o loo soifua; o e ua maliliu . . . o le a le mafai ona tutu mai i le taeao o le toetutu, sei vagana ua faataunuuna ia sauniga mo i latou, i totonu o malumalu ua saunia ma faapaiaina mo le Atua. E tutusa lelei lava le tele o galuega e faia ina ia faasaoina ai le tagata o loo ola ma le tagata ua maliu” (*Discourses of Wilford Woodruff*, p. 160).

Fesoasoani Mai lo Tatou Tama Faalelagi

Afai tatou te faia le mea sili ina ia faataunuuna ai lo tatou tiutetauave o le perisitua o le faia lea o galuega tau gafa, o le a faapea ona maua e i tatou le fesoasoani mai le Tama Faalelagi pe a oo i le taimi tatou te manaomia ai. E masani lava, o lenei fesoasoani e filemu, ma se musumusuga masani lava. Ae peitai, o nei vavega e maua e na o tagata lava o le Ekalesia e faia lenei galuega. Mo se faataitaiga la o lenei mea, na faamatalaina mai e Elder Melvin J. Ballard:

“Ou te manatua se mea na tupu i lou lava tama. Na maeu lo matou tulimatai atu i le taimi e uma ai le Malumalu o Logan! E toetiti oo i le taimi e faapaiaina ai. Na galue mai ai lava lou tama talu ona amata le fausiaina o lena fale, ma o lau galuega lava sa faia o le avatu lea o lana meaaai mo le taumafataga o le afiafi a o ia aumaia maa mai le mea e vili ai maa. Sa matou matua tepa taulai atu lava i lena mea. Ou te manatua lava i lea vaitaimi sa matua faia e lo’u tama soo se taumafaiga lava ia maua faamatalaga uma lava o aso fanau e mafai ona ia maua o augatuaa. O le autu lava foi lea ma le faamoemoega o ana tatalo i le po ma le taeao ina ia faapea ona tatalaina mai e le Alii le auala e mafai ai e ia ona maua faamatalaga uma lava e mafai ona ia maua e uiga i [ona] tagata ua maliliu.

“I le aso a o lumanai le faapaiaina o le malumalu . . . na savavali ane ai ni toeiaina se toalua i le auala tele o Logan, ma sa laua o ane ma fesili i o’u tuafafine laiti e toalua, ma, o le tamaitai matua la o o’u tuafafine nei na laua tuuina i ai se nusipepa i lona lima ma faapea atu:

“ ‘Ave le nusipepa lena i lou tama. Aua nei tuua lava i se isi. Alu vave nei loa. Aua ne’i leiloa.’

“Sa faapea loa ona faia e lenei teineititi ma ina ua fetau i o ia ma lona tina, sa fai mai le tina e fia vaai o ia i le pepa. Ae sa faapea atu le teineititi, ‘E leai, e tatau ona ou tuuina atu ia tama ae le o se isi lava tagata.’

“Sa alu atu loa lo’u tuafafine lenei i totonu o le potu ma sa ia faia lana faamatalaga. Sa matou matua fiu e sue nei alii matutua e toalua. Sa lei toe vaai i laua. O le nusipepa, “The Newbury Weekly News,” na lomua i le fale tuai o le aiga o lo’u tama i Egelani, i le Aso Tofi, 15 o Me, 1884, ae na matou maua i le aso 18 o Me, 1884, ina ua mavae le tolu o aso talu ona lomua ma faasalalauina. Sa matou matua ofo pe na faapefea ona oo mai lenei nusipepa ia i matou i lea vave, o lea na matua faatuputeleina ai lo matou fia iloa a o matou susesueina lenei nusipepa. Ona matou maua ai lea o se tasi o itulau o lenei pepa, e na o tala lava e faatatau i le tagata lenei na te aoina mai tala o le nusipepa, o le sa . . . asiati atu i se fanua tanu tuai. O faamatalaga faaosofia na taitaiina atu ai o ia e tusia uma i lalo mea na ia mauaina mai maa o nei tuugamau, e aofia ai ma ni fuaiupu. Na ia tusia foi ni igoa, aso fanau, aso na maliu ai, ma isi lava mau faamatalaga faapena, toeitiiti lava a faatumulia ai le itulau e tasi.

“O lea fanua tanu tuai o le nofoaga lea o loo lagomau ai le au aiga o Ballard mo le tele o augatupulaga, ma o le tele o ia tagata na taua o uso ma tuafafine o lo’u tama ma aiga vavalalata ma ana uo mamae.

“Ina ua faailoa atu lea tulaga i le peresitene o le malumalusa o Logan o Peresitene Merrill ae na faapea mai lana tali, ‘Ua faatagaina oe e faia galuega mo na tagata, aua ua e maua e ala i ni avefeau a le Alii.’

“E aunoa ma se masalosalo o tagata ua maliliu o e ua latou taliaina le talalelei i le lalolagi o agaga ua latou musuia lenei alii tusitala o lea nusipepa e tusia nei mea, ma o lea ua saunia ai nei le auala mo lo’u tama e maua ai faamatalaga na ia sailia” (*Three Degrees of Glory*, pp. 23–24).

E tele tagata o le Ekalesia latou te faamatalaina ni tala i le auala na musuia ai i latou po o le taitaiina o i latou a o latou sailia faamatalaga e uiga i o latou augatuaa. A o tatou saili atu mo talafaamaumau e uiga i o tatou augatuaa, e mafai ona tatou mauaina le fesoasoani mai lo tatou Tama Faalelagi e ala i le faatuatua, tatalo, ma le anapogi.

Faaiuga

I le avea ai o i tatou o ni tagata o loo umia le perisitua, o lea ua ia te i tatou se tiutetauave tele o le lagolagoina ma fesoasoani i le faatasia o o tatou aiga mo le faavavau. O a tatou tusi faamanatu e tatau ona tusia ai tala o o tatou lava olaga, faamatalaga ua maua e uiga i o tatou augatuaa, faapea ma isi talafaamaumau paia o o tatou aiga. I lo tatou sailia ma le aoina mai o nei talafaamaumau tau gafa, e mafai ai e i tatou ona tatalaina le auala mo o tatou augatuaa e maua ai sauniga taua o le talalelei. A o tatou faia lenei mea, ua avea ai i tatou o ni “faaola i Mauga o Siona.” Na saunoa mai faapea le Perofeta o Iosefa Samita:

“O ki e tatau ona toe tuuina mai, o le agaga o Elia o le a oo mai . . . ma o le Au Paia o le a o mai o ni faaola i le Mauga o Siona. Ae o le a faapefea la ona avea i latou ma faaola i le Mauga o Siona? I le fausia lea o o latou malumalu . . . ma ia faataunuaina uma sauniga . . . e fai ma sui o o latou tupuaga ua maliliu, ma ia togiola mo i latou ina ia mafai ona latou tutulai mai i le uluai toetu ma ia faaeaina faatasi ma i latou i le nofoalii mamalu; ma o iina o loo iai le filifili o loo fusia ai faatasi loto o matua ma fanau, ma fanau i o latou matua, ma o lena tulaga o le faataunuaina lea o le misiona a Elia.” (*Teachings of the Prophet Joseph Smith*, p. 330).

Lu'i

I le talanoaina o mea tau gafa, ua saunoa mai Peresitene Kimball e faapea: “O le galuega lenei a le Alii, ma ua ia tuuina mai ia i tatou. O lo tatou tiutetauave la, o se mitamitaga ma o se avanoa taua lava lo tatou tauaveina o lea galuega. Ua tatau ai la ona tatou faatulagaina i tatou faatasi ma le galuega ia televave ona alualu i luma. (“O Mea o le Faavavau—Pe Tatou te Tutu ea i Tulaga Pagatia?” *Liahona*, Me 1977, i. 22). la amata nei ona faia le tasi po o le sili atu o mea nei o loo taua i lalo:

1. la filifilia se atigipusa po o se isi mea e tuu ai faamatalaga, ma amata loa ona aoina ma faaputupuutuina mea o le a fesoasoani ia te oe e tusia ai le tala o lou olaga.
2. la maua se tusi o le talaaga o oe lava ia po o se tusi e tusia ai mea e tutupu i aso taitasi ma ia amata loa nei ona tusia ni faamatalaga. la tuu le tusi i se mea e te iloa e mafai ona e vaai i ai i taimi uma. la faia sau sini ina ia tusia lea tusi i aso taitasi po o vaiaso taitasi foi.
3. la amata loa le polokalama o le fa augatupuaga e ala i le saunia lea o se pepa o le ulugalii ma le fanau mo lou lava aiga.
4. Afai ua amataina lau tusi faamanatu, ia filifilia se isi au sini ma ia auai lou aiga i le faataunuaina o lea sini. Atonu o le a e manao e faia sa outou afiafi faaleaiga faapitoa ina ia fesoasoani i lau fanau e amataina a latou lava tusi faamanatu.

Mau Faaopoopo

1 Nifae 5:10–16 (o le gafa na tausia o le aiga o Liae)

MFF 21:1 (e tatau ona tausia se talafaamaumau o le Ekalesia)

MFF 127:9 (talafaamaumau e tatau ona teuina i totonu o le malumalu)

MFF 128:8 (talafaamaumau e teuina i le lagi)

MFF 110:13–16 (o le asiasiga a Elia ia Iosefa Samita)

Sauniuniga a le Faiaoga

A o lei tuuina atu lenei lesona—

1. Faitau muamua le Mataupu Faavae ma Feagaiga 128:15–19, 22–24 ma le Faaaliga na oo ifo ia Iosefa F. Samita “O le Faaaliga o le Togiolaina o e ua Oti” (MFF 138).

-
2. la toe iloiloina le *Mataupu Faavae o le Talalelei*, mataupu 40, "Galuega Faalemalumu ma Gafa."
 3. Afai e i ai se tasi i la outou vaega o loo tausisi pea o ia i le tusia o lana tala o mea e tutupu i aso taitasi, ona fesili atu lea ia te ia na te faamatalaina mai le auala na ia amataina ai ma le auala ua fesoasoani ai ia te ia.
 4. la saunia se pepa o gafa o le tou lava aiga ma ia aumaia i le vasega. Afai e te le iloa ona faia, ona fesili atu lea i ou taitai o le perisitua, e mafai ona fesoasoani ia te oe.
 5. la nofo saunia e fesili atu i le vasega ina ia latou tau maia i le tele latou te mafaia pe latou te manatuaina augatupulaga e fa. E mafai ona e toe iloiloina lou lava gafa a o lei amataina le vasega.
 6. la fesili atu i tagata o le vasega e faitau mai pe faamatala mai tala ma mau o loo i lenei lesona.

O le Tufatufaina Atu o le Talalelei

Lesona 9

O lenei lesona ua fuafuaina e uunaia ai i tatou e tufatufa atu le talalelei i isi tagata i se auala lelei ma le aoga.

Faatomuaga

I le tala o loo taua i lalo, o loo faamatala mai ai e se tamaitai le pogai na ala ai ona liliu mai lona aiga i le Ekalesia:

“I se tasi o aso, ae lei umi ona matou see atu i lo matou tuaoi fou, na ou galue ai i fafo i lo’u togalaau aina ae tei ua foai mai e lo’u tuaoi se luuga tamato tele lava faatoa uma ona tau. Na avea lena ma amataga o se faiga uo e faavavau.

“I masina la na mulimuli mai ai, na faamaonia ai [o o matou tuaoi] o ni uo sili lava . . . ua matou feiloai i ai. Sa lei fefefe i latou e avea o ni uo moni ia i matou ma latou te o mai ma avatu lo matou aiga i lo latou aiga e pei lava i matou o ni tagata moni o lo latou aiga. Matou te fiafia faatasi e ‘ai falaoa e gaosia lava i le fale ma auina mai i vaiaso taitasi uma lava; sa aumai atoa lava se taumafataga i se afiafi a o mai tigaina lava a’u na le mafai ai ona ou alu e fai sa matou meaai; o le faaaliga tausala i le aai o Independence, ma le aiga asikulimi ina ua foi mai i le fale.

“E masani ona valaaulia i matou i gaoioiga a le Ekalesia ae le faamalosia i matou. Afai o le a matou filifili e o atu i ia gaoioiga, ona sau lea o le tama teine amio lelei ma tusaafia a lo matou tuaoi e tausitama—o nisi foi taimi e teena ai se tupe e totogi ai o ia.

“Afai e uma le tele o a’u galuega i le fale, e valaaulia lava a’u e la’u uo ou te alu atu ma te o i le lotu a le Aualofa. O lea la ou te matuai naunau ai lava e fia alu ese atu ma le fale pe a uma galuega i le aiga. Ae i lo’u alu la i ia lotu na ou iloa ai sa le na o se [tafaoga] po o se malologa mai feau a le aiga. O le faafeiloaiga mafana na tuuina mai e tamaitai o le Aualofa ia te a’u pei ai lava a’u o se tasi e auai e le aunoa ma se vaitaimi toetiiti atoa le tausaga a o lei papatisoina i matou. . . .

“Ae ui i lea, ina ua mavae sina taimi, na matou iloa ai i o matou lotu na matou manaomia ai se olaga atoatoa e pei ona ola ai i latou. Na valaauina loa i matou ia auai i sauniga lotu i le Aso Sa, ma amata loa ona matou o i le vasega a tagata fou i le Ekalesia i vaiaso taitasi.

“Ia Mati o le tausaga 1976, na papatisoina ai loa i matou.

“E lei umi ona papaptisoina i matou, ae matou faalogologo i se lauga i le lotu faamanatuga e uiga i se tagata sa musu tele o ia e tufatufa atu

le talalelei ona o lona fefe ina nei maoluma o ia—ma o lea na faatalitali ai lava le aiga lea i tausaga e sefulu ae faatoa toe maua e i latou lea avanoa. Na ou mafaufau lava i le sefulu tausaga lea. Pe o fea na matou i ai i le sefulu tausaga lea pe ana le maua e i matou le Ekalesia i lenei taimi? Sa matuai faatumulia lou agaga i le fiafia ma o lea na ou tau le mafai ai ona faatali i lou fia feiloai atu i lou tuaoi ina ua tuua le sauniga faamanatuga.

“ ‘Faafetai mo le tufatufaina mai o le talalelei ia i matou’ e na o le pau lava ia o upu na mafai ona ou tautala atu ai. Na ou manao e matuai tele lava ni a’u tala e fai, ae sa ou le manaomia. Na maua foi i latou i le loimata maligi, a o matou talatalanoa i upu o le alofa, ma fusi atu le tasi i le tasi, e pei lava ona ou iloa o le a matou faia pea lava, mo le taimi nei ma le faavavau” (Doris E. Heydon, quoted by Jay A. Parry, “Converts Tell . . . What Brought Me In,” *Ensign*, Feb. 1978, p. 43).

O ai e mafai ona e tufatufa atu i ai le talalelei i aso nei? O le a le mea na faia e lea aiga ina ia saunia ai lea aiga ia talia le talalelei? Aisea e tatau ai nei loa ona tatou galulue faatasi ma o tatou tuaoi?

O le Tufatufaina Atu o le Talalelei—O lo Tatou Valaauga Mai le Alii

O loo faatonuina pea lava pea e le Alii i tatou o loo umia le perisitua ina ia talai atu le talalelei ma ia valaauina tagata e le auai i le Ekalesia ia salamo ma papatisoina. A o soifua o ia i le fogaeleele, na faia ai e Iesu le faaitaiga mo i tatou ia tatou mulimuli ai. Na ia valaauina tagata uma lava ina ia talia le talalelei. O le faatonuga mulimuli lava na ia tuuina atu i ona soo o le, “o atu ia . . . i le lalolagi uma, ina talai atu le talalelei i tagata uma lava” (Mareko 16:15). O nisi o i tatou e manatu o le galuega faafaifeautalai e faatatau lava mo na o i latou lava o loo faamisiona mo le lua tausaga po o le tausaga foi ma le afa. Ae peitai, o i tatou uma lava ua uma ona papatisoina ua i ai lea tiutetauave o le valaau atu i isi tagata ia talia faamanuiaga o le talalelei. Ua fetalai mai le Alii:

“O lenei foi ou te fai atu ia te outou, ou te tuuina atu ia te outou le poloaiga, o tagata taitoatasi, e aofia ai toeaina, ositaulaga, ma aoao, atoa foi ma le au uso, ia alu atu ma lona loto atoa, ma le galuega a ona lima, e saunia ma faataunuuna mea ua poloaia.

“Ia faia foi la outou talaiga ma leo o le lapataiga, tagata taitoatasi i lona tuaoi, i le agamalu ma le lotomaulalo” (MFF 38:40–41).

Aisea e finagalo ai lo tatou Tama Faalelagi ina ia tatou tufatufa atu le talalelei i isi? (O loo ia faamoemoe mai ia i tatou ia fetufaai le talalelei ma isi e lei faalogo i ai ina ia mafai e lana fanau uma lava ona fiafia i faamanuiaga o lana talalelei.)

O a faamanuiaga o le talalelei o loo tatou olioli ai, ma tatou te mananao foi i isi latou te maua? (O loo tau mai e le talalelei ia i tatou, o i tatou o fanau a le Tama Faalelagi agalelei o le e mafai ona tatalo atu i ai mo se fesoasoani i o tatou faafitauli. E fesoasoani le talalelei ia i tatou ina ia tatou fiafia i lenei olaga ma ia ola mama ma agavaa ina ia mafai ona tatou toe mafuta ma le Tama Faalelagi i le olaga a sau. Ua avea le talalelei ma mea e mafai ai ona tuufaatasia o tatou aiga mo le faavavau.)

O nisi o a tatou uo ma aiga atonu latou te lei maua lava faamanuiaga o le talalelei seiloga ua tatou alolofa ma naunau atu ia i latou ona faatoa avea lea o i tatou ma ni faifeautalai lelei ma le aoga. Atonu o le a le fesiligia lava i latou ina ia aooina atu i ai le talalelei seiloga lava tatou te talatalanoa atu ia i latou e uiga i le talalelei. E moni lava tatou te talitonu o le avea ma se faataitaiga lelei o se vaega lea o le avea ma faifeautalai, ae tatau foi ona tatou saili ni auala e tau atu ai ia i latou o tatou talitonuga. Ua fetalai mai le Alii: “Aua o i ai lava nisi e toatele i le lalolagi i ituaiga lotu uma, vasega, ekalesia, ua faatauasoina i togafiti faaoleole a tagata, o lea latou te lamalama e faaoleoleina ai, ae taofia mai le upu moni ona ua latou le iloa le mea e maua mai ai” (MFF 123:12).

O leTufatufaina Atu o le Talalelei i se Tulaga Sili Ona Lelei

la faaali atu le fesoasoani vaaia 9-a, “E tatau ona avea tagata uma lava o le Ekalesia o se faifeautalai.”

Ua poloaiina e le Alii e ala mai i ana perofeta tagata uma lava o le Ekalesia ina ia auai i le galuega faafaifeautalai. Ua tuuina mai e Peresitene Spencer W. Kimball nisi o fautuaga e fesoasoani ai ia i tatou i le faataunuaina o lea tiutetauave:

“Tama, o oe lava e tatau ona avea ma taimua. I le galulue faatasi o se aiga o le a tele ai se galuega o le a mafai ona outou faataunuaina. la outou filifili faatasi ma lou aiga ma tuuina atu ni talosaga ina ia maua se aiga se tasi pe toalua foi tou te faauo i ai. la filifili po o ai ou aiga ma au uo o le a e faailoa atu i ai le Ekalesia. Atonu o le a fuafuaina se afiafi faaleaiga ma i latou, i se isi po ae le o le po o le Aso Gafua, po o le auai faatasi i nisi o gaoioiga. Afai loa o le a faaalua mai le fiafia o nei aiga, ona fuafua loa lea e ala atu i taitai o faifeautalai o le tou uarota ma valaaulia i latou ma faifeautalai e o mai i lo outou aiga e faamatala le savali o le Toefuataiga. Afai o le a e mulimuli i lenei faatulagaga faatauavaa, o le a faapea ona mafai ona e aumaia nisi o aiga lelei i totonu o le Ekalesia” (*Sharing the Gospel through Priesthood Missionary Service* [filmstrip, 1975]).

O le tele lava o i tatou e mananao e tufatufa atu le talalelei i isi ona o lo tatou alofa ma le amanaia o i latou. A o nisi o i tatou e le iloa ona tufatufa atu le talalelei mo tagata e le auai i le Ekalesia. Tatou te fefefe ma mumusu e talanoaina le Ekalesia ma isi. O le fuafuaga o loo faamatalaina i lalo, o se tasi lea o auala atonu e mafai ai ona aumaia ai isi i totonu o le Ekalesia.

FILIFILI FAATASI MA LE AGAGA TATALO SE AIGA

la faaali atu le fesoasoani vaaia 9-e, “O le avea ma se faifeautalai lelei o lona uiga o le avea foi lea ma se uo lelei.”

9-a, O tagata uma lava o le Ekalesia o se faifeautalai

9-e, O le avea ma se faifeautalai lelei o lona uiga o le avea foi lea ma se uo lelei





E pei ona saunoa mai Peresitene Kimball, e tatau i le tama ona avea ma taimua. (Afai o le tama ua le o toe i ai i le aiga, ona avea lea o le tina po o isi tagata ua avea ma ulu o le aiga ma taitai o le aiga.) E mafai ona tatou amata i le mafaufauiina lea o ni uo ma aiga e le auai i le Ekalesia.

O ai nisi e te iloa atonu o le a fiafia i le Ekalesia?

la manatunatu i mea nei a o e filifilia se aiga e faauo atu i ai:

- Aiga ua latou maua se suiga i lo latou tulaga. (Tuaoi fou, pepe fou, faaipoipoga fou, se maliu talu ai nei lava i le aiga.)
- Aiga e le o i ai se mea e le o fiafia ai i le Ekalesia. (Aiga ua faatoa uma lava ona asiasi atu i le malumalu po o isi fale o le Ekalesia, na auai i se sauniga lotu o le Ekalesia poo se gaoioiga, na matamata i se polokalama i le televise a le Au Paia o Aso e Gata Ai, po o ni uo a nisi e auai i le Ekalesia, pe na faalogologo foi i le Au Faipese a le Tapeneko.)
- O ni aiga e tausoga i ni tagata o le Ekalesia. (Aiga e i ai nisi e auai i le Ekalesia ae le auai le isi vaega, aiga o tagata e lei leva ona auai i le Ekalesia.)
- Aiga po o tagata taitoatasi o loo fiafia po o sogasoga e fia iloa uiga o le Ekalesia. (Tagata e fesili i le Ekalesia, e talanoa lelei lava e uiga i tagata o le Ekalesia, e latou te faaalua lo latou naunau i talitonuga o le Ekalesia po o aoaoga faavae, ma o loo saili i se isi ekalesia fou.)

Na fautua mai Peresitene George Albert Smith e faapea: “Ia amata i le tagata o loo oulua tuaoi e ala i lou musuia o ia ina ia maua le manatu maumaututu ia te ia lava, e ala i le musuia o le alofa ia te ia mo oe ona o lou amiotonu, ma o lau galuega faafaifeautalai ua amataina” (in Conference Report, Oct. 1916, p. 51).

FAAUO I LE AIGA

O le ulu o le aiga e tatau ona taitaia le aiga i le faauoina o tagata e le auai i le Ekalesia. O tama taitoatasi e ao ina aoaoina lona aiga ia avea ma aiga e faauo atu iai.

E faapefea ona faatupuina atili la tatou faauoga ma se aiga e le auai i le Ekalesia?

E tele lava ni auala e mafai ai ona faaalua ai lo tatou faauo atu i isi. E mafai ona avea i tatou ma ni tagata mata ataata, avea ma se tagata faalogo lelei, manatuaina o latou igoa, faia ni galuega lelei mo i latou, talanoaina ma i latou mea latou te fiafia iai, asiasi atu i o latou aiga, ia o faatasi ma i latou i ni faafiafiaga, ma nisi auala ia faailoa atu ai tatou te alofa ia i latou.

FAAILOA ATU LE AIGA I LE EKALEZIA

Ua fautua mai Peresitene Kimball tatou te filifili se po e ese mai po faatulagaina o afiafi faaleaiga ina ia faia ai se afiafi faaleaiga ma o

tatou tuaoi e le auai i le Ekalesia. O iina e mafai ai ona tatou faailoa atu ia i latou mataupu ma aoaoga o le Ekalesia.

O isi auala e mafai ai ona tatou faailoa atu ia i latou mataupu o le Ekalesia o le tuuina atu lea ia i latou o ni tamai tusi po o ni mekasini a le Ekalesia, tuuina atu ia i latou se Tusi a Mamona, valaaulia i latou ia auai i se sauniga lotu a le Ekalesia, faailoa atu pe tuuina atu lau molimau ia i latou, po o le ave o i latou i gaoioiga a le Ekalesia.

O a nisi o auala e mafai ai ona fesoasoani i tagata e le auai i le Ekalesia ina ia maua e i latou le naunau ma le fiefia i le Ekalesia?

IA VALAAULIA LE AIGA E TALATALANOA MA FAIFEAUTALAI

la faaali atu le fesoasoani vaai 9-i, "O le tufatufaina atu o le talalelei o se aafiaga faatupu fiefia."

O le taimi lava ua saunia ai a tatou uo, ona tataua loa lea ona tatou fesili atu i le Alii ia fesoasoani mai ia i tatou e tau atu ia i latou ia feiloai ma faifeautalai. A oo i le taimi e tataua ai, e tataua ona valaauina i latou i totonu o o tatou aiga ina ia tuuina atu i ai le lesona faaifeautalai.

E faapefea ona tatou valaaulia a tatou uo ia feiloai atu i faifeautalai?

O se tasi o auala e fesiligia ai a tatou uo pe latou te fia iloa mea e uiga i le Ekalesia o le faapea atu lea: "Ua matou fiefia tele ina ua avea lo outou aiga ma o matou tuaoi. Pe fiefia lo outou aiga tatou te auai faatasi i la matou afiafi faaleaiga i le po taeao i le ta o le fitu? O le a auai faatasi ni alii se toalua o la matou Ekalesia la te faamatalaina le amataga mai o le matou Ekalesia."

O se auala lenei e talanoa ai e uiga i le Ekalesia ma tagata atonu e faatasi lava ona tatou feiloai i ai:

la fesili atu: "O le a le Ekalesia e sili lava ona e masani i ai?"

po o le: "O le a le lotu lua te auai ma lou toalua?"

Fai sau faamatalaga: "O a'u o se Mamona."

po o le: "O au ma lo'u toalua ma te auai i le Ekalesia a Iesu Keriso o le Au Paia o Aso e Gata Ai."

po o le: "Ma te auai i le Ekalesia Mamona."

Tau atu ia i latou o lou faatuatuga e taua tele ia te oe: "Ou te manatu o lena Ekalesia o se mea sili lea ona taua i lo'u olaga."

po o le: "E taua lava i lou aiga ona iloa e uiga i le Ekalesia."

la fetufaai atu se tasi o talitonuga faapitoa: "I la matou Ekalesia matou te talitonu. . ."

po o le: "E talitonu lo matou aiga i le. . ."



po o le: “I le ekalesia a lesu Keriso. . . .”

Fesili atu: “O le a se mea e te iloa e uiga i le Ekalesia Mamona? Pe e te toe fia iloa nisi mea e sili atu?”

po o le: “Pe e te fia iloa e uiga i le . . . ?”

po o le: “Pe e te fia auai i se . . . ?”

E tele lava ni auala e valaaulia ai isi e auai e faalogologo i savali o le talalelei. Atonu o le a tatou ta’ua se mea e uiga i le Ekalesia o le a faaosofia ai lo latou fiafia ma le naunau e pei o gafa, o se polokalama a le au talavou, po o le polokalama a le uelefele. Atonu o le a mafai loa ona tatou fesili, atu pe latou te fia iloa atili e uiga i le Ekalesia. E le tatau ona tatou fefefe ina nei o tatou faamanuaina o latou loto po o le faalotovaivaia o i latou pe a le lelei so latou uiga e faaalua mai po o se tali e tuuina mai. O le tele lava o i latou o le a faapea mai ioe, ae afai latou te le talia lau valaaulia, e tatau ona tatou tali atu e pei foi o lea ua latou le talia sau valaaulia mo se taumafataga. E mafai ona tatou tuuina atu se tali faapea, “Ou te malamalama lelei, loane. Atonu o se isi taimi.” O le tuuina atu o le fesili o le a le afaina ai la oulua faiga uo ma o le a fesoasoani mai le Agaga ia tatou iloa po o le fea taimi e tatau ona tatou toe fesili atu ai.

la faitauna le Roma 1:16. Aisea e tatau ai ona tatou le “ma i le talalelei a Keriso?”

I le tala o loo faamatalaina i lalo, o loo taua ai e se uso na liliu mai le auala na mafai ai e le tulaga o le faauo ona maua e ia le fiafia ma le naunau i le Ekalesia.

“O galuega na mafua ai ona masani lelei le tasi i le tasi. Na ou matuai faaaloologia lava o ia. A o ma mauaina se sootaga vavalalata i la ma faiga uo, e ma te talanoa ai e uiga i o maua aiga ma a matou gaoioiga, lea na taitaiina atu ai i le Ekalesia. Na mafai ona ou maitauina o le Ekalesia na ala ai ona ese lava o ia ma lona aiga—i se auala lelei tele—mai le tele o tagata. E lei umi ae talanoaina nisi o mataupu o le Ekalesia, e aunoa ma le uunaiia pe talai mai lenei alii ia te au . . . I se tasi aso i le malologa o le sefululua na ia fesili mai ai ia te a’u pe ou te fia iloa atili. . . . [Na faia a matou lesona e faifeautalai] i lona aiga.

“Ana faapea e leai le naunau moni lava na faaalua mai e le aiga o le au Brookes, ou te manatu e le mafai ona matou auai ma avea o ni tagata o le Ekalesia moni e tasi ma maua le malamalama ma le poto o lo tatou Tama o i le Lagi ma ana fuafuaga mo i tatou” (Keith Knoblich, quoted by Jay A. Parry, “Converts Tell . . . What Brought Me In,” *Ensign*, Feb. 1978, p. 39).

Faaiuga

Ua fetalai mai le Alii, “E tatau foi i tagata ua uma ona lapataiina ona lapatai i lona tuaoi” (MFF 88:81). Afai tatou te faia e pei ona faatonuina

ai i tatou e le Alii, o le a faapea ona tatou fesoasoani i le tele o tagata latou te maua le mea moni po o le upu moni.

O se tasi auala e avea ai ma faifeautalai o le avea lea ma faataitaiga lelei. Afai o loo tatou faia ni faataitaiga lelei, o le a faapea ona le aunoa ona fialia ma naunau i ai tagata, ona e ese lava o tatou olaga.

Ae peitai ua le lava na o faataitaiga e faaosofia ai isi tagata ia fialia ma naunau i le Ekalesia. E tatau ona tatou faia laasaga muamua lava e faafeiloai atu ai i latou i le talalelei. O tagata e le auai i le Ekalesia e mafai ona faaosofia i ni auala eseese: ia aafia pe auai i latou i se talanoaga e uiga i se mataupu o le talalelei, valaaulia e faia se tofiga po o sana vaega i se sauniga lotu, tuuina atu ia i latou lau molimau, tuuina atu ia i latou se Tusi a Mamona po o se mekasini a le Ekalesia, valaaulia i latou ia auai i se afaifi faaleaiga. E i ai foi isi auala. E eseese lava auala e faaaogaina i lea tagata ma lea tagata, o lea e tatau ai ia i tatou ona tatalo mo se fesoasoani ia tatou taumafaiga faafaifeautalai.

A o le mea sili lava, e tatau ona tatou faaali atu lo tatou alofa ma lo tatou naunau mo tagata e le auai i le Ekalesia a o tatou taumafai e atinae ni avanoa po o ni taumafaiga e aoao atu ai le talalelei. O le lagona tatou te tuuina atu ai e sili atu ona aoga nai lo le auala tatou te faaaogaina. E tali mai tagata i le alofa. Na faapea mai se faamatalaga a se tasi uso liliu mai, “E tatau ona tatou faauo atu muamua ao lei faaliliuina mai.” O i latou e auai i le Ekalesia e masani lava ona avea muamua i latou ma ni uo lelei a tagata o le Ekalesia a o lei liliu e auai.

Lu’i

1. Ia faia se faataitaiga lelei mo ou tuaoi ma ia lapataia i latou i le lotu alofa ma le agamalu.
2. Ia filifili ma le agaga tatalo se aiga e le auai i le Ekalesia e aoao atu i ai le talalelei, ona faauo atu lea i ai ma faailoa atu ia i latou le Ekalesia.
3. Ia faaaogaina ia avanoa e faia ai galuega faafaifeautalai faatasi ma tagata e o mai i totonu o le aiga.
4. Ia fetufaai le Tusi a Mamona ma se uo.

Sauniuniga a le Faiaoga

A o lei tuuina atu lenei lesona—

1. Ia tofia se tasi o le vasega e faamatala mai se mea ua na iloa e uiga i le faia o le galuega faafaifeautalai.
2. Ia tofia se tasi o le vasega ina ia faamatalaina mai le tala i lona liliu mai i le Ekalesia.
3. Ia fai atu i tagata o le vasega e faitau po o le tuuina mai o tala o loo tuuina mai i lenei lesona.

O le Faaumea: O se Tiutetauave a le Perisitua

Lesona 10

O lenei lesona e tatau ona uunai ai i tatou o le au perisitua ina ia faamalosia uso o le Ekalesia e faaaumea.

Faatomuaga

Faitau le Mataupu Faavae ma Feagaiga 18:10.

O le a le taua o tagata taitoatasi i le Tama Faalelagi?

E taua i tatou uma lava taitoatasi i le Tama Faalelagi. E tusa lava po o ai i tatou, le nofoaga o loo tatou mau ai, po o le a le gagana o loo tatou tautala ai, po o le a foi le ituaiga tagata e i ai i tatou, o lana galuega ma lona mamalu o le aumaia lea o le tino ola pea ma le ola e faavavau (tagai i le Mose 1:39). Ina ia fesoasoani ia te ia i lea galuega o lea ua toefuataiina ma ua tuuina mai ia i tatou le tiutetauave o le alofa o le tasi i le tasi e pei ona ia alofa mai ia i tatou.

O loo aoao mai foi tusitusiga paia e tatau foi ona tatou maua lea lava lagona e tasi o le naunau mo isi e pei o i tatou lava (tagai i le MFF 38:24). O lo tatou tiutetauave ma se faamanuiaga lo tatou fesoasoani atu i o tatou uso ma tuafafine ia maua faamanuiaga ua saunia e lo tatou Tama Faalelagi mo i latou o e faatuatua ma faamaoni.

“Ua tatou i ai faatasi iinei ina ia fesoasoani le tasi i le tasi ia alualu i luma, ina ia musuia e le tasi le tasi i le alofa ma galuega lelei, ae le o le . . . ina ia faamasinoina. O lo tatou tiutetauave o le tuuina atu lea o le faamalosiaga ia i latou o e le toaaga ma le o tausia tulafono a le Ekalesia. O loo ia i tatou se tiute ia ‘vaai ina ia leai se agasala i le Ekalesia, po o le feitagai o le tasi i le tasi, po o le pepelo, po o le faatuaupua, po o le tautala leaga.’ (MFF 20:54.)” (Delbert L. Stapley, “The Path to Eternal Glory,” *Ensign*, July 1973, p. 100).

Faitau le Luka 22:32.

Na saunoa mai Peresitene Harold B. Lee e faapea: “Ou te talitonu o loo i ai le toatele i le Ekalesia ua latou pule i o latou ola faaleagaga, ma o loo valaau mai nei i latou mo se fesoasoani . . . Ma afai e mafai ona tatou iloa tonu lenei alaga faanoanoa i le taimi e tatau ai, o le a avea i tatou ma ala o le laveaiina o le ola po o agaga o tagata.” (“O le Malosi o le Perisitua,” *Liahona*, Mati 1973, i. 4).

Faaumea i Totonu o le Ekalesia

O le faaaumea o lona uiga o le faamalosia lea ma fesoasoani le tasi i le tasi ina ia maua le olioli i faamanuiaga atoatoa o le talalelei. O le

faaumea o le faaalua lea o le fealofani, fetufaai o manatu, o le faaalua o le auaua atu ma le alofa, loto fesoasoani, ma le faia o mea lelei. Tatou te faaumea i le avea ma se uo lelei ma se tuaoi lelei, ma le faia o isi mea ina ia lagona ai e isi lo latou taua ma lo latou manaomia.

Afai tatou te fetufaai atu o tatou taimi, taleni, ma meatotino ma isi, o le a faapea ona tatou atinae se agaga o le usoga. O lenei usoga sa faamatalaina e Paulo. Na ia faapea o uso fou o le Ekalesia e le o toe avea i latou ma ni tagata ese “ae ua aiga faatasi ma le au paia” (Efeso 2:19).

E ui lava e tatau ona avea i tatou ma ni tagata faauo, fai tuaoi, ma taumafai e faaali atu lo tatou alofa mo tagata uma lava, i le tuuina atu o fesoasoani ma le faauoga i uso fou ma tagata le toaaga o le Ekalesia, o se tiutetauave autu lava lea o le perisitua. E fesoasoani le Ekalesia ia i latou i le faia o lenei galuega i le tele o auala. O loo saunia e le Ekalesia polokalama, e pei o aoaoga i aiga, o loo faamalosi ai i tatou ia auaua atu i o tatou uso ma tuafafine. O loo saunia foi e le Ekalesia ia sauniga ia e mafai ai ona tatou faifaima faatasi. Ma o loo saunia foi e le Ekalesia ia faatonuga i le auala sa’o e faaalua ai le alofa ma naunau.

E tatau ona tatou popole pea e le aunoa i o tatou uso e le auai i le Ekalesia ma tagata ese e faatasi ma i tatou, ae tatau foi ona tatou naunau i aiga o loo faatasi ma i tatou o loo i ai se tama, tina, atalii, po o se afafine e le o se uso o le Ekalesia. O nei aiga o loo latou manaomia i tatou. E ala i le faaumeaina o i latou ma fetufaai atu ia i latou lo tatou malamalama ma le alofa, o le a mafai ona tatou fesoasoani i nei aiga e le auai o latou tagata i le Ekalesia ina ia fusia faatasi i le talalelei.

Ia aoteleina nei manatu e ala lea i le tusia i luga o le laupapa o se lisi o i latou o e manaomia ia tatou faaumea atu i ai.

Auala e Faaumea Ai

O le auala e faaumea ai se tasi e faalagolago lea i lona tulaga ma lo tatou sootaga ma ia. Na faamatalaina e se tasi o aiga le auala na latou faaumeaina ai se tagata ese:

“O le tagata ese sa i o matou tafatafa sa le’i faigofie. Sa tilotilo sao lava i luma ma pei e tau le manava. Sa le ataata foi o ia i le ma fanau laiti e toalua, e masani ona la aumaia ni uo mo matou. Ina ua tuua le lotu na valaaulia ai e lo’u toalua lea alii i lo matou aiga e fai sina vai malulu. Na faaalua lona mata ataata. ‘Na faatoa papatiso au i le vaiaso lea na te’a nei, ae o lea ua matou see mai i la outou uarota,’ o lana faamatalaga lea. Ina ua mavae lona vaiaso sa fai lava ma sau o ia e asiiasi ma i lo matou aiga mo ni nai taimi, ma faaalua lona fiafia i le [faatupulaia o lona malamalama e uiga i le talalelei], ma lona naunau e talanoaina tusitusiga paia, ma mea e tau lava ia te ia. O se fiafiaga sili ia i matou lo matou vaavaai atu o tuputupu ae lea uso. Sa faapea

loa ona le toe avea o ia ma se tagata ese” (Susan Spencer Zmolek, “The Strangers within Our Gates,” *Ensign*, Mar. 1976, p. 49).

Ae ui i lea, o le faaaumea e ese foi le isi auala e fai ai nai lo lea, pe afai o le a aafia ai aoaoga i aiga. Na faamatalaina e se tasi tina le auala na mafai ai ona auai o ia ma lona atalii i gaioioiga a ona faiaoga o aiga:

“Sa ou manao e toe fai se isi amataga fou ina ua mavae se mea tiga, o le tatalaina o la maua faaipoipoga, o lea na ou alu ai ma ave la’u tama talavou i le itu i saute ina ia faauma lona faailoga i le kolisi. Sa manatu i maua o le a vevela le tau, o lea na tuu ai o maua ofu mafanafana ma palanikeke i le mea e teu ai lavalava. Oi se paga, sa matua maalilili i maua i lo maua tamai fale o le taumafanafana i lena taumalulu, ae sa matua fefefe lava i maua e faamumu se afi e maua ai se mafanafana po o le faanoi mai foi o ni palanikeke. Sa ou le masani lava i se tasi. Sa oo mai ia te au le lagona e le talafeagai au ma tagata o le Ekalesia ona ua tatala la’u faaipoipoga, ma sa mautinoa lava lou le manao e faapea se tasi o loo feagai au ma se tulaga pagatia. Sa ou matua fiafia tele ina ua o mai faiaoga o aiga. Sa mananao i laua ia matou faamasani ma faailoa mai o le a le utuva lo laua asiasi mai, e ui lava e leai se ma telefoni ma e tau le maua foi i maua i le fale. E masani lava ona la aveina i maua i gaioioiga o laua aiga. Ma o se mea faiaina lava, na ou le toe ma loa e fesili atu i ni palanikeke mai ia te i laua” (as quoted by Susan Spencer Zmolek, “The Strangers within Our Gates,” pp.47–48).

Tusi i luga o le laupapa ia auala e faaaumea ai, ia o loo faamatalaina atu i le mea na tupu o loo taua i luga.

E mautinoa lava afai tatou te lagona le lelei o le faaauo atu i isi, o a tatou gaioioiga ma galuega o le faaaumeaina e tataua ona faalauteleina atu nai lo na o sauniga o le Aso Sa ae faapea foi ma isi aso ma mea e faia i le gasologa o le vaiaso. O ia gaioioiga e aofia ai le valaauliaina o i latou i o tatou aiga mo ni gaioioiga faapitoa, mea fai a le nuu ma le Ekalesia. O le faaaumea o le faailoga moni lava lea o se Au Paia, lea na faatatau i ai le fetalaiuga a Iesu ina ua ia fetalai mai faapea, “sa fai au ma tagata ese ona outou talia lea o au” (tagai i le Mataio 25:34–36).

O le tala o loo faamatalaina i lalo o loo faamalamalamaina ai se faiga uo lelei a ni alii se toalua:

O se alii talavou sa maua o ia i le lagona o le nofo toatasi ma le faanoanoa. Sa seasea ona auai o ia i sauniga lotu ma o lea sa faigata ai lava ia te ia ona toe faamoemoeina o ia i se tofiga o le Ekalesia. O ni alii se toalua ua maliliu uma o laua faletua, na valaauliaina lenei alii ia latou auai faatasi i sa laua afiafi faaleaiga.

Sa lei umi, ae avea le afiafi o le Aso Gafua ma se taimi pito i sili ona taua o lona vaiaso. O ia la afiafi faaleaiga na faaaluiina ai lona taimi i le tele o faatalanoaga faaletalalelei ma maua ai se faalaeiauga ia amata ona

tatalo ma le filiga. Sa lei umi ae suia lana molimau mai se malamalama mautinoa i se molimau malosi o le upu moni.

Na talia e nei uso e toalua lenei alii ma faaalua atu ia te ia lo laua agaga faauo i se tulaga sili ona moomia na la iloa. E la te nonofo faatasi ma lenei alii i sauniga lotu ma valaaulia foi o ia i o laua aiga mo se taumafataga. E latou te faatasi ma lenei alii e fai ana faatauga ma fesoasoani foi ia te ia e faatulaga lelei lona aiga.

E lei umi ae masani foi o ia i isi tagata, ma ua faamoemoeina foi o ia i tofiga o le Ekalesia. I se tasi aso a o la talanoa ma se tasi na te masani ai e uiga i le olioli ua ia maua i lona olaga, na fesili mai ai faapea le isi alii lea, “O le a sou manatu o le a le mea na mafua ai ona e maua lona tulaga?”

“O le alofa o ni uo se toalua o le vaega aupito sili lona ona taua,” o lana tali atu lea. “Na ou faatuatuaina ma ou lagonaina le saogalemu i lo laua alofa, ma o lona alofa na mafai ai ona ou faataunuuina ia mea ou te lei moemiti i ai e mafai ona faataunuuina” (adapted from *Relief Society Courses of Study, 1977–78*, p. 130).

Faaopoopo atu i le liisi o loo i luga o le laupapa ia auala na faaaogaina e nei uso e toalua e faaumea ai lenei uso o le Ekalesia e mau toatasi.

Na faamatalaina e Brother Ernest Eberhard, Jr. le tala lenei e uiga i le faaumea:

“O Susan Munson o se tuafafine o le Ekalesia o le o loo faatalitali pea ma le onosai i lona toalua e le auai i le lotu ina ia faaalua mai sona naunau po o sona fiafia i le Ekalesia. O le tala lava a lenei alii, ‘Lau pele, ua lelei tele lona mo oe ma tamaiti, ae o au ou te matua le fiafia lava i ai.’

“E i ai se vaega e sa’o o lona faamatalaga. Ae peitai o Siaki e matamuli . . . na iu lava ina talosaga atu Susan ia Brother Caldwell, le taitai misiona a le uarota, pe leai lava se mea e mafai ona faia i lona toalua o Siaki. Na folafola atu e Brother Caldwell ia Susan o le a ia tuuina atu lona mataupu i la latou fonotaga faalevaiaso a faifeautalai.

“Na filifilia e le vaega o le a faia se pati faaletuaoi atonu o se auala sili lea e amata ai. Na talosagaina e le vaega lenei ni aiga lotu se toatolu i lea mea ina ia fuafuaina se pati e faia i tuafale mo aiga o Muson ma Noble, o se aiga o loo sailiili i le talalelei. . . . Na auai uma lava vaega e toatolu i le faaumea.

“O Siaki, na musu lava i le amataga e alu, ae sa tei o ia ma fiafia i le agaga faauo o lenei vaega. A o lei uma le pati o lea afiafi, na faapea ona toe lagolagoina e ia le manatu e toe fai se isi pati, o se tafaoga i le isi lua vaiaso. E leai lava se isi na fai sana faamatalaga e uiga i le o i le lotu, ae peitai o Allen Westover, o le na talanoaina le valiina o le fale o Siaki i le pati, na alu atu o ia i le Aso Toonai ma lana apefai—ma toe

alu atu i afiafi pe a manava e faauma le valiina o le fale o Siaki. Sa fesoasoani atu foi ia Steve Caldwell ma Glen Rivers i nisi taimi.

“I se vaitaimi mulimuli ane o lena masina, ina ua faia se gaoioiga a le korama a toeaina, sa matua naunau ai lava Siaki e fesoasoani ia i latou. . . . A o faagasolo pea i luma vaitaimi o le taumafanafana, sa tele ai lava le taimi o Siaki na faaaluina e faifaimea faatasi ai ma tagata o le Ekalesia. Sa faia ni talanoaga e uiga i ofe fagota ma upufai faalemalo ma le tausia o fanau, e uiga i le faiga o togalaau, faaleleia o faafitauli o va faalelugalii, ma le faafoeina o tulaga tau i galuega. Sa le gata ina talanoa Siaki ae sa faalogologo foi. O afiafi e faia ai ni a latou gaoioiga faatasi ma isi aiga e aofia ai ni afiafi faaleaiga ma ni talanoaga faaleagaga. Na matua olioli naua Susan ina ua tau atu iai e Siaki i se tasi afiafi ua saunia o ia e faataunuuna le isi laasaga o le aoaoina lea o ia e faifeautalai ma . . . auai i le Ekalesia.”

Na toe faaopopo mai Brother Eberhard e faapea: “E leai se isi mea e sili atu ona iloa lelei nai lo o gaoioiga ‘faaaumea’ e i ai lagona o le agaga faauo. O lagona e tatau ona oo mai muamua.” Na ia fautuaina mai foi ia avea i tatou ma ni tagata faalogo lelei, saili e uiga i mea e fialia ma mea e le fialia i ai se tasi, gaoioiga a lona aiga, ma lana pisinisi. Na ia faamamafaina mai le manatu e faapea o i latou o e o loo faaaumeaina e tatau ona latou iloa tatou te amanaia ma naunau ia i latou. (“That Part-Member Family,” *Ensign*, July 1978, pp. 38–39).

O a auala o le faaaumeaina o loo faaaogaina i lenei tala e mafai ona tatou faaopoopoina atu i le lisi o loo i luga o le laupapa?

Ia talanoaina le siata, “Gaoioiga Faaumea” (fesoasoani vaaia 10-a). Faopopo atu i ai isi gaoioiga e fautuaina mai e tagata o le vasega.

Faaiuga

O le faaaumea o se tuteutauave taua o le perisitua. E fesoasoani i uso fou faatoa liliu mai ma isi uso o le Ekalesia ia latou maua le lagona o loo manaomia ma naunau atu ia i latou, ma faamalosi ai i latou ia auai i le Ekalesia. A o tatou talia lea tiutetauave o le fesoasoani i isi ia toaaga i le Ekalesia, o le a faapea ona tatou maua le olioli ma le loto malie. Ua folafolaina mai e le Alii o lena olioli e faavavau.

Faitau le Mataupu Faavae ma Feagaiga 18:15–16.

Ia tuu atu i le tagata o le vasega na tofia e tuuina mai lana molimau pe na faapefea ona fesoasoani le faaaumea ia te ia.

Lu’i

1. Ia vaai se uso fou faatoa liliu mai e faaaumea.
2. Ia faatupu atili lau galuega o le faaaumeaina o aiga o loo avea ai oe ma o latou faiaoga o aiga.
3. Ia filifilia se aiga e le malolosi i le lotu ma ia toe faaaumea mai i latou i gaoioiga a le Ekalesia.

-
4. la faauo atu i tagata uma o le Ekalesia—aemaise lava i latou e te le masani ai pe fou foi.
 5. Afai e i ai se aiga e le auai uma ona tagata i le Ekalesia i le mea o loo outou nonofo ai ona fai lea o se mea e mafai ai ona aofia ma auai uma i latou na e le auai i le lotu i mea e faia a le Ekalesia.
-

Sauniuniga a le Faiaoga

A o lei tuuina atu lenei lesona—

1. la talosagaina se tasi o le vasega e tuuina mai lana molimau i le auala na fesoasoani ai le galuega o le faaaumea ia te ia. Tofia se tagata faatoa liliu mai, o se uso o le Ekalesia ua toe faamalosiā mai i gaoioga a le Ekalesia, po o se tasi na fesoasoani e faaaumea pe faamalosiā mai se tasi.
2. la saunia se siata o gaoioga o le faaaumea (vaai i le fesoasoani vaaiā 10-a).
3. la fai atu i tagata o le vasega e faitau pe faamatala mai mau ma tala o loo maua i le lesona.

GAOIOIGA FAAAUMEA

Gaoioiga i Lou Aiga

Fai se taumafataga o le afiafi

Faalogologo i musika lelei

Fai se gaoioiga faafiafia

Matamata i ni polokalama lelei a le televise

Faaali ata malamalama po o ni ata o le aiga

la faia se tafaoga i tuafale

Fai se pati faasamasamanoa

Talosaga atu ia i latou e fesoasoani mai i sau galuega

Gaoioiga i lo Latou Fale

Avatu i ai se keke po o se isi mea

Fuafua faatasi se pati

Fesoasoani i sa latou galuega o fai:

Asiasi i ai— “ona o outou o a matou uo”

- Toto se togalaau

Vaai po o le tausia o a latou fanau

- Fesoasoani i le tapenaina atu o a latou mea

- Fesoasoani i le toe faaleleia o se mea
-
-
-

Gaoioiga i Totonu o le Nuu

O i se tifaga po o se polokalama faapitoa

la ave i latou i lau taavale pe a e maua atu i le auala o agai atu i ni mea a le aoga

(Fai ni nai meaai mama i lou fale pe a uma)

O i se tafaoga

Auai i gaoioiga faafiafia a se aiga

Auai i se gaoioiga e masani ai tamaiti (e pei o le lakapi, pasiketipolo, ma isi.)

O le Tama i le Avea ai ma Peteriaka

Lesona 11

Ua fuafua lenei lesona ina ia faamalositia ai lo tatou malamalama e uiga i le tiute o le tama i le avea ma peteriaka i totonu o le aiga.

Faatomuaga

Faaali atu le fesoasoani vaaia 11-a, “Ua faamoemoe le Alii ia taitaiina e tama o latou aiga.”

Sa saunoa mai Peresitene Spencer W. Kimball e faapea:

“Sa faatulagaina e le Alii [lana fanau] i le amataga i le i ai lea o se tama e galulue faatasi ma ia i le foafoaina o fanau, saunia mea e tausi ai, ma alofa i ai ma taitaiina i latou, faapea foi ma se tina o le e to ma fanauina ma faafaietele ma fafaga ma aoao fanau o e o le a oo ina alofa, ava, ma maua le agaga faafetai o le tasi mo le tasi. O le aiga o le fuafuaga sili lea o le olaga na saunia ma faatulagaina e lo tatou Tama o i le Lagi. (“The Family Influence,” *Ensign*, July 1973, p.15).

O a ni mea ua ta'u mai e Peresitene Kimball e avea ma tiutetauave o le tama?

“O le igoa *tama* o se mea e paia ma e faavavau. O se mea mataina tele mai le anoanoai o igoa faaloalo ma le mamalu faapea ma le viia ua uma ona faaigoa ai le Silisiliese, peitai ua faatonuina i tatou ina ia tatou taua o ia o le Tama” (*Father, Consider Your Ways* [pamphlet, 1973], p. 2).

Usu pe faitau fuaiupu o le “Lo'u Tama e.” (*Viiga*, i. 154).

I le taimi o le misiona a le Faola i le lalolagi, sa taua ai e ia i le tele o taimi lona Tama ma fetalai e uiga ia te ia i se auala paia. Ua faaalila e tusitusiga paia sa silafia e ia lona Tama, aua sa talanoa ma la ma faia lona finagalo (tagai i le Mataio 26:39). O le faataitaiga a le Faola e uiga i le ava ma le faamamalu i Lona Tama o le faatulagaga lea e tatau ona tatou mulimuli ai ma o le faatulagaga foi lea e tatau ona tatou aoao atu i a tatou fanau ina ia mulimuli ai.

Pe mafai faapefea ona tatou faaalila le ava i lo tatou Tama Faalelagi? Mo o tatou tama faalelalolagi?

E tatau i se tama o loo ia umia le perisitua ona ola agavaa ina ia valaauina e lana fanau i le igoa paia o le *tama*. Afai o le a faia e ia lea mea, o le a saunia mo le avea ma tama e faavavau. Ua i ai ia i tatou uma le mana e fai ai lenei mea, ina ia mafai ai ona mafuta i tatou ma lo tatou aiga ma maua le olioli faatasi ma i latou i le faavavau atoa lava.

O se Tama o se Peteriaka Lea o Lona Aiga

Faitau le Efeso 5:23.

11-a, Ua faamoemoe le Alii ia taitaiina e tama o latou aiga



Ua tofia e le Tama Faalelagi le tane po o le tama e avea ma ulu o lona aiga. O lenei faiga o le avea o le tane po o le tama ma ulu o se aiga o se faiga faapeteriaka. Ua faamanuiaina faapitoa lava i tatou o tagata o le Ekalesia ona ua tatou maua le perisitua e fesoasoani ia i tatou ia avea ma peteriaka lelei.

O aiga taitasi i totonu o le Ekalesia o se malo lava ia. O le tama o le ulu lea o lona malo. O ia o loo i ai le pule sili ona maua i lona aiga, ma e pule faamalumu i gaoioiga uma e fai a lona aiga. (Tagai i le Joseph Smith, *Gospel Doctrine*, pp. 286–88.) Sa tusia e Peresitene Iosefa F. Samita e faataata i lenei mataupu:

“E i ai nisi taimi e valaauina ai toeaia e o mai e faauuina tagata o se aiga. O nisi la o nei toeaia atonu e aofia ai peresitene o siteki, aposetolo, po o uso foi o le au peresitene o le Ekalesia. Ua le talafeagai i nei tulaga le solomuli ese o le tama ae faamoemoe e fai e nei toeaia lenei sauniga taua. O loo i ai le tama. O lana aia ma lona tiutetauave lona pulefaamalumu. E tatau ona ia filifilia le tagata e faauuina i le suauu ma le tagata e faamauiina le faauuga, ma e tatau ona faatonutonuina e ia le faataunuina o lona faamanuiaga o le talalelei i totonu o le aiga” (*Gospel Doctrine*, p. 287).

E finagalo le Alii ina ia faamanuia e le tama lona aiga, e le na o na pule ai. I lona faia o lea mea, e tatau ona ia faaaogaina lona perisitua ma le amiotonu e faamalieina ai tagata taitoatasi o le aiga. Sa faamatala mai e Eldred G. Smith, le Peteriaka faamalolo o le Ekalesia, se tala e uiga i se tamaitai na oo atu ia te ia ona o le fia maua o se faamanuiaga faapitoa a le perisitua. Sa faapea mai o ia:

“Ina ua ou fesiligia o ia pe aisea ua manao ai i se faamanuiaga faapitoa, ae sa ia le ta’uina mai ia te au. Sa ou iloa mai ia te ia o lona tane o se tasi o le Ekalesia ma sa ia umia le Perisitua Mekisateko, ma o le mea lea na ou faaaluina ai sina taimi e taumafai ai e aoao atu ia te ia le mataupu o le faatulagaga o le perisitua, lea e tatau ai i le tama i totonu o le aiga ona faamanuiaina tagata o le aiga. . . . [Sa ou fai atu ia te ia] ina ia alu atu i lona aiga ma faia lona faamanuiaga e lona tane ae le o le faia e a’u.

“Sa toe foi ane lea tamaitai i se taimi mulimuli ane i lo’u ofisa, ma toe faamatala mai ia te au lenei mea na tupu, ma faapea mai na ia tuua lo’u ofisa ma le matua ita tele lava . . .

“Sa fai mai lea tamaitai o le pogai na musu ai e ta’u mai ia te a’u le mafuaaga na manao ai i se faamanuiaga aua sa le lelei lo laua va ma lona toalua, ae tei ua ou auina atu o ia i lona aiga ina ia faamanuiaina e lona tane. O le mea lea sa fai ai sina le fiafia o ia.

“Ona ia faaopoopo mai ai lea, ‘O se tasi lona o mea sili ona lelei ua oo ia te a’u.’ Sa fai mai lea tamaitai na alu atu i lona aiga, sa tatalo e uiga i lea mea, ma mafafau i ai, ona oo ai lea ina lava le lototele na ia

maua e talosagaina ai lana tane mo le faia o lea faamanuiaga. O le mea moni lava na avea lea ma mea na faateia ai o ia, peitai sa onosai pea lea tamaitai. Sa tuuina atu e lenei tamaitai le avanoa i lana tane e mafaufau ai, ma manatunatu loloto e uiga i lea mea, ma tatalo i ai; ma sa oo loa ina ua tuuina atu e ia se faamanuiaga i lona toalua. Ona faaopoopo mai ai lea o lea tamaitai e faapea, 'O le taimi muamua lava lea ua i ai se va lelei tele ia i maua ma lo'u toalua i totonu o lo matou aiga i o ma olaga atoa ma o se va lelei lea na maua e i maua talu mai lea taimi na ia tuuina mai ai ia te au se faamanuiaga' ” (“Family Unity through a Father’s Blessing,” *Improvement Era*, June 1965, p. 534).

O le fale o le nofoaga lea mo le aiga e alualu ai i luma—e le gata i se tuufaatasiga ae faapea foi i le tagata lava ia. Ina ia uunaiina lenei tulaga o le alualu i luma, e tatau i le tama ona pule faamalumalu i lona aiga ma le alofa, faautauta, agamalu, malamalama i lagona, faapea ma le onosai. I le avea ai o ia ma pule aupito sili ona maualuga i totonu o le aiga, e tatau ona avea le tama ma faataitaiga. O tama faamaoni ma usiusitai o e taitaiina o latou aiga i le ola amiotonu i le lalolagi, o le a latou fesoasoani i o latou aiga ina ia agavaa mo le mau faatasi i le faavavau.

I le avea o i tatou ma peteriaka i o tatou aiga, e tatau ona tatou faaali atu ia tatou ava ma a tatou fanau le faaaloalo sili.

Faitau le Efeso 5:25–28.

E faapefea ona tatou tausua a tatou ava?

Faitau le Efeso 6:4.

O le a se fautuaga o loo ta'u mai e lenei mau i tama i le tausiga o a latou fanau?

Faitau le Mataupu Faavae ma Feagaiga 121:41–45.

E mafai faapefea ona fesoasoani lenei mau ia i tatou ia avea ma peteriaka lelei i totonu o o tatou aiga?

O loo i ai i totonu o tusitusiga paia le tele o tala e uiga i ni tama na avea ma ni peteriaka lelei. Sa faapotopoto e Alema le Itiiti ona atalii ma tuuina atu ia i latou taitoatasi lana fautuaga ma le faamanuiaga (tagai Alema 35:16). Sa aoaoina e le Tupu o Peniamina ona atalii ina ia malamalama i tusitusiga paia (tagai Mosaea 1:2). Sa faamanuia e Atamu faapea foi Liae a la fanau taitoatasi a o lei maliliu (tagai MFF 107:53; 2 Nifae 4:1–11). Sa faataunuu e nei perofeta e ala i le mana o le perisitua o latou tiutetauave i le avea ma peteriaka i o latou aiga. O lo tatou foi perisitua, e mafai ona avea ma peteriaka amiotonu i totonu o o tatou aiga.

Faafetaiaia o Manaoga Faavae o le Aiga

I le avea ai ma peteriaka i lona aiga, ua i ai i se tama le tiutetauave o le fesoasoani lea i tagata o le aiga i le faafetaiaia o mea latou te manaomia.

E tofu tagata uma ma manaoga faaletino, e pei o meaai, fale, ma lavalava. O a isi manaoga faavae e manaomia e o tatou aiga? Tusi mea nei i luga o le laupapa pe a ta'ua:

IA MANAOMIA MA ALOFAGIA

E mafai ona tatou faamalieina lea manaoga e ala lea i le faaali atu o le alofa ma le ta'u atu i o tatou aiga tatou te alolofa ia i latou. Ua tuuina mai e Elder Loren C. Dunn ia i tatou se faataitaiga o lenei manaoga:

“Ou te manatua se tala na avea ma se ata tifaga e lei mamao atu. O se tala e uiga i ni matua ma se la tama tama e toatasi, ua foi mai le vaegaau. Sa lei felatai lenei tama ma lona atalii. O le tulaga moni sa i ai, sa taufai alolofa le tama ma le atalii i le tasi, ae sa le mafai ona la iloa ni auala e faailoa atu ai, ma o lea na tupu mai ai le feitagai aua sa la taufai manatu e le fiafia le tasi i le isi. . . .

Sa oo i le vaega sili ona taua o le tala ina ua tuuina atu e le atalii i lona tama se faamatalaga faapea:

“Tama, sa ou le fiafia ia te oe i taimi uma ao avea au ma se tama talavou ona sa le mafai ona e ta'u mai e te alofa ia te au, peitai na oo ina ou iloa ou te lei tauina atu foi ou te alofa ia te oe. O le mea lea, tama, ou te tau atu ia te oe i le taimi nei: ou te alofa ia te oe.’

“I lea lava taimi faagaeetia loto na fusi mai ai e le tama lona atalii ma faapea foi i le atalii i lona tama a o masua mai i fafo le alofa ma le agaga faafetai sa teu loto i le tele o tausaga” (“The Growing Problem of Drug Abuse,” *Improvement Era*, June 1969, pp. 52–53).

Aisea e tatau ai ona tatou ta'uina atu i tagata o o tatou aiga tatou te alolofa ia i latou?

O le a se isi auala e mafai ai ona tatou faaali atu ia i latou e manaomia ma alofagia i latou?

O LE I AI O LE FAAALOALO O LE TAGATA IA TE IA LAVA

E mafai ona tatou fesoasoani i tagata o o tatou aiga i le faatupuina atili o le faaaloalogia e le tagata o ia lava e ala i le faaviivii atu ona o mea ua latou faataunuuina. E mafai ona tatou aoaoina i latou e faapea o i latou o ni fanau a le Atua. E mafai ona tatou fesoasoani i le atinaeina o a latou taleni. O nei mea uma e fesoasoani ia i latou i le faatupuina o le toafilemu, o se lagona lelei e uiga i le tagata lava ia, faapea ma se lagona o le taua o ia lava. E tatau i matua ona saili e le aunoa mo ni auala e viia ai ma uunaiina a latou fanau. E tatau foi la i le fanau ona faaali atu e le aunoa a latou faafetai i o latou matua. Ua faapea mai se tasi tama, “Ou te faaaogaina le taimi e fai ai a matou afiafi faaleaiga e viia ai la'u fanau ae le o le faitioina o i latou. E sili ia te au lo'u ta'u atu ia i latou e faapea o le mea na ou vaai o latou faia o le mea sa'o lea nai lo le faapea atu o le mea na ou vaai o latou faia o se mea sese” (quoted by George Durrant, “A Gift From Heaven,” *Ensign*, Mar. 1971, p. 7).

O LE I AI O SE FAAMOEMOEGA I LE OLAGA

E tatau i tagata uma ona lagona e i ai se uiga o le olaga, ma o loo i ai se faamoemoega i le olaga. E mafai ona tatou fesoasoani i tagata o le aiga i le faataunuuina o lenei tulaga manaomia e ala i le aoaoina atu ia i latou o le talalelei. E tatau i tagata taitoatasi ona iloa, o le olaga i le

lalolagi ua faamoemoe e fesoasoani ia te ia ina ia tuputupu ae ma avea e faapei o le Atua. E tatau ona tatou aoaoina a tatou fanau o le faamoemoega o le lalolagi o le maua ai lea o le filemu ma le fiafia ma saunia ai i tatou lava e toe foi atu i le tatou Tama o i le Lagi.

O LE PULEA E LE TAGATA O IA LAVA MA IA MAFAI ONA GALUE

Sa fesiligia Brother Glenn E. Nielson, le peresitene o se kamupani suauu tele, po o ai le faiaoga na sili ona aoaoina lona olaga. Sa tali mai o ia e faapea: “O lo’u tama. . . . Sa ia aoao mai ia te au le olioli e maua i le galuega e faataunuina lelei. Sa ia aoao a’u i le ala e tele ai vao ou te tuiina i le tui, faapea ma le laa i luma a o o’u asuina atu i totonu o le pusa, ma ia faaopoopo mai, ‘o galuega uma lava e faigofie ma mama pe afai e loto i ai nai lo lo’u faia e aunoa ma le loto’ ” (*Church News*, 25 Mar. 1978, p. 2).

Faaali atu le fesoasoani vaaiia 11-e, “E tatau i tama ona aoaoina a latou fanau ina ia galulue.”


O faamanuiaga o le aoao e galue o loo faamatalaina mai i le tala lenei: “Sa talanoa ni tagata matutua se toalua e tuaoi i se tasi aso e uiga i o laua olaga faapea ma olaga o a laua fanau. Sa faatoa maea mai le aoga a le atalii pito i matua o loane mai le kolisi ma sa i ai le igoa o lea tama i le lisi o tagata e aupito i sili ona maualuluga togi i ana suesuega uma sa fai. O le atalii o Simi ua faatoa faamaonia lana solitulafono matuia i luma o le faamasinoga ma ua i ai nei i le falepuipui. E nonofo vavalalata loane ma Simi ma o ni tuaoi lelei tele talu lava ona laiti mai o laua atalii. Sa taaalo faatasi o laua atalii ma o faatasi i le aoga. I le talanoaina la o le mea na tupu, sa faapea mai ai Simi, ‘O le eseeseega tele i le va o olaga o o taua atalii ona sa e tausua se povi, loane. Ou te manatua pe a taaalo tama, e vave ona alu atu lou atalii e tatau le susu ma fafaga le povi. Ma o lou tausua la o lena povi, na e aoaoina ai lou atalii na te taliaina se tiutetauave’ ” (*1967–68 Priesthood Study Course: Aaronic Priesthood—Adult*, p. 35).

E le maua e i tatou uma ni povi, peitai e mafai ona tatou tuuina atu i a tatou fanau ni galuega e fai. E tatau foi ona tatou tuuina atu ia i latou le saolotoga e foia ai e i latou ni faafitauli e oo mai ona o ia galuega; e le tatau ona tatou faia la tatou galuega mo i latou, peitai e tatau ona tatou fesoasoani atu ia i latou ina ia faataunuina lelei a latou galuega. (Vaai i le lesona 15, “O le Fegalegaleai i Galuega a le Aiga.”)

“A o iloa e se alii o ia o le tama faalelalolagi o se tasi o fanau faaleagaga a le Atua, e vave lava ona iloa e ia lona tiutetauave o le tausua lelei o lena tamaititi faatasi ma le alofa tele” (N. Eldon Tanner, “Fatherhood,” *Ensign*, June 1977, p. 2).

Faafetaiaia o Manaoga Faaleagaga o le Aiga

Ua i ai i tama o loo umia le perisitua le aia tatau ma le tiutetauave e faamanuiaina ai o latou aiga i le taitaiga faaleperisitua ma faia mo i latou sauniga o le perisitua e mafai ona latou faia.



la faaali atu le siata na e saunia pe tusia foi i luga o le laupapa ma talanoaina auala e mafai ai e tama ona taitaiina ma faamanuiaina o latou aiga. (Tagai i "Sauniuniga a le Faiaoga.")

E mafai e tama ona taitaiina ma faamanuiaina o latou aiga i auala nei:

1. la avea ma pule faamalumu i totonu o le aiga.
2. la faia ni faatalanoaga ma tagata taitoatasi o le aiga. (Na saunoa mai Peresitene N. Eldon Tanner e faapea a o avea o ia ma se tama talavou, sa faatalanoa o ia e lona tama. Sa ia saunoa mai, "Sa ta'u mai e lo'u tama ia te au le taua tele o le perisitua faapea ma mea e tatau ona ou fai ina ia ou agavaa ai mo lona perisitua. O ia o le uo sili ona lelei na ou maua. ([*Ensign*, Nov. 1978, p. 41].)
3. Tuuina atu faamanuiaga o le faamafanafanaga i lana ava ma lana fanau.
4. Faauuina o ma'i i totonu o lona aiga (na o i latou o e o loo umia le Perisitua Mekisateko).
5. Maua faaaliga ma musumusuga mo lona aiga.
6. Faia tatalo faaleaiga i le taeao ma le afiafi.
7. Tofi tagata o le aiga e faia tatalo ma faamanuia meaai.
8. Faia afiafi faaleaiga i po o Aso Gafua uma.
9. Uunaiina tagata o le aiga ina ia auai i le galuega faafaifeautalai, sailiga o gafa, ma sauniga i le malumalusa.
10. Avea ma se faataitaiga lelei ma tausia poloaiga.
11. Faatupuina se lagona o le alofa ma le malamalama i totonu o le aiga.

la fai atu i le tagata o loo umia le perisitua na tofia e tuuina atu lana molimau e uiga i le olioli ua ia maua i le avea ma se tasi o se auaiga e vavalalata ma fealofani.

Faaiuga

I le fuafuaga a le Alii, ua avea ai tane ma tama ma ulu o o latou aiga ma o peteriaka foi o o latou aiga. I lea la tulaga, ua tatau ai i se tama ona faatupuina se va lelei ma lana ava ma lana fanau. O lenei va lelei e tatau ona aofia ai le alofa, faalagolagoina, ma le galulue felagolagomai. O le mea lea, i le avea o i tatou ma tama, e tatau ona tatou manatunatu mamafa e uiga i le tulaga manuia o tagata taitoatasi o le aiga. Ia fesili ifo ia i tatou lava i fesili o loo i lalo o le a fesoasoani ai ia i tatou e iloa ai le ala e mafai ona tatou faaleleia ai atili la tatou taitaiga:

1. Pe o o'u faaalaina moni ea se taimi ou te manatunatu mamafa ai i lo'u aiga?
2. Pe ou te faaalaina ea le faaaloalo i lo'u aiga, o a latou meatotino, faapea ma o latou mafauauga?
3. Pe ua ou iloa ea e taua tagata taitoatasi uma o lo'u aiga?

4. Pe ou te tauina atu ea i lo'u aiga ou te alofa ia i latou? Pe ou te faali atu ea lo'u alofa ia i latou e ala i a'u mea e fai?

“Ua avea ma se avanoa ma se faamanuiaga, ma o se tiutetauave mamafa foi, le avea ma tama ma avea foi ma peteriaka e ulu i se aiga, faatasi ma le lui ina ia aoaoina ma saunia ona tagata ina ia toe foi atu i le afioaga o lo latou Tama Faalelagi, o se nofoaga lea o le a mafai ai e le aiga ona faaauau ona maua le olioli faatasi i le ola e faavavau” (N. Eldon Tanner, “Fatherhood,” *Ensign*, June 1977, p.2).

Lu'i

O tane ma tama:

1. la malamalama i lou tiutetauave i le avea ai ma peteriaka i lou aiga.
2. la talanoaina lenei vaega faatasi ma lau ava i le gasologa o le vaiaso. la e maua le lagolago mai i lou faletua e fesoasoani ia te oe i le faataunuuna o ou tiute.
3. la e ava i lou tama. O loo tumau pea ona avea o ia ma ou peteriaka e tusa lava pe ua uma ona e faaipoipo.

O alii talavou e lei faaipoipoina:

1. la e faamamaluina lou perisitua. la saunia e oe lou lava tagata e avea ma se peteriaka amiotonu i lou aiga.
2. la e ava i lou tama. O ia o le peteriaka o lou aiga.

Mau Faapoopo

Teuteronome 6:7 (e tatau i matua ona aoao a latou fanau)

Iosua 24:15 (ina filifilia ia po o ai tou te auauna i ai)

Efeso 5:22–25 (o le faatulagaga e pulea ai aiga)

1 Timoteo 3:4–5 (e tatau i tama ona pule i o latou aiga)

MFF 75:28–29 (o tama e saunia mea e tausi ai o latou aiga)

Sauniuniga a le Faaiga

A o lei tuuina atu lenei lesone—

1. la susesue i le tusi *O Tiute ma Faamanuiaga o le Perisitua, Vaega A*, lesone 12, “O le Tiutetauave o le Tama mo le Manuia o Lona Aiga.”
2. la saunia se laupapa ma se penisina.
3. la saunia se siata e tusia ai mea e sefulu ma le tasi na talanoaina i totonu o le lesone e mafai e tama ona fai e taitaiina ma faamanuiaina ai o latou aiga.
4. la filifili se tasi e umia le perisitua o loo i ai sona aiga vavalalata ma le fealofani. Fai atu i ai e tuuina atu lana molimau i le olioli o loo mauaina i totonu o lona aiga.
5. la fai atu i tagata o le vasega e faitau pe faamatala atu tala ma mau o loo i lenei lesone.

Taitaiina Lelei o le Aiga

Lesona 12

E tatau ona uunaiina i tatou i lenei lesona ina ia saili atu ma mulimuli i le musumusuga a le Agaga Paia i le taitaiga o o tatou aiga.

Faatomuaga

Ua faamatala mai e Elder Bruce R. McConkie le tala lenei i le mafuaaga e tatau ai ona tatou faalogo atu i le Agaga:

“O se tasi o mea ou te manatua pea na ou fialia i ai ao ou tamaititi o le tietie lea i se solofanua i se faatoaga apu. Sa lata le solofanua ma aaoaina lelei, ma sa ou lagona le malupuipua a o ou tietie.

“Ae peitai, sa i ai se tasi aso sa i ai se mea na fefe ai la’u solofanua ina ua ou oso i luga, ma sa oso faafuasei ma momoe saosaoa o ia i le togaapu. Sa ou pa’u ese mai le nofoa agai i lalo o le mea e tuu ai vae, ae o le isi vae ua sulu i totonu o le mea e tuu ai vae. . . . Sa tatau ona motu le fusi lea i lo’u mamafa, peitai e i ai lava se mea na pogai ai ona mau mo sina taimi. Toe tasi pe toe lua ni oso a le solofanua o loo faasiivaelua ona motu loa lea o le fusi pe mamulu foi ma o’u lima ona faatautau ai lea o a’u ma toso faatata seia oo ai lava ina ou manua pe oti ai foi, a o la e mau lo’u vae i totonu o le fusi.

“Sa faafuasei ona tu le solofanua, ma sa oo ina ou iloa atu se tasi o loo ia uuina le faagutu ma taumafai e faafilemu le manu ulavale. I lea lava taimi sa sii a’e ai au i luga i lima o lo’u tama.

“O le a le mea na tupu? O le a le mafuaaga na sau ai lo’u tama e faaolaina au i lea lava taimi a o lei pa’u ifo a’u i lalo ma soli i seevae o la’u solofanua?

“Sa nofonofo lo’u tama i le fale ma faitau le nusipepa ae musumusu atu le Agaga ia te ia, ‘Momoe atu i le togaapu!’

“Sa momoe atu loa lo’u tama e aunoa ma le faatali ma sa lei faatali foi o ia sei iloa tonu le pogai ua ala ai. Ina ua iloa ua oo o ia i le togaapu e aunoa ma le iloa o le mafuaaga ua i ai o ia i lea mea, sa vaai e ia se solofanua o loo faasiivaelua mai ma sa manatu loa lava, *e tatau ona ou taofia lenei solofanua.*

“Na ia faia lenei mea ma sa ia maua ai ma a’u. Ma o le ala lenei na faasaoina mai ai a’u mai le manu’a leaga po o le oo foi i le oti” (“Hearken to the Spirit,” *Friend*, Sept. 1972, p. 10).

O le a le mea na uunaiina ai le tama o Elder McConkie ina ia alu atu i le togaapu? Pe aisea sa taua ai le usiusitai loa lava o lona tama i le Agaga?

la valaaulia le tagata o le vasega na tofia e fetufaai atu se tulaga na oo i ai na fesoasoani ai le Agaga Paia ia te ia i le avea o se tama.

E Mafai e le Agaga Paia Ona Taitaiina le Aiga

O se tasi o o tatou tiutetauave sili ona taua i le lalolagi o le taitaiina lea o o tatou aiga. Sa saunoa mai Peresitene Tavita O. Makei e faapea: "e leai lava se isi faamanuiaga e mafai ona suitulaga ai le toilalo i totonu o le aiga" (quoted from J. E. McCulloch, *Home: The Savior of Civilization* [Washington, D.C.: The Southern Co-operative League, 1924], p.42; in Conference Report, Apr. 1935, p. 116). O lenei tiutetauave e taua pea lava e le aunoa, peitai e oo lava foi ina sili atu ona taua a o faasolo ina amioleaga le lalolagi.

I le feagai ai o i tatou ma le galuega faigata o le avea ma matua i aso nei, atonu e oo ifo ia i tatou le lagona e faapea ua le lava lo tatou faautauta pe le lava foi lo tatou malosi e mafai ai ona sa'o a tatou filifiliga mo o tatou aiga. Ua malamalama lelei le Alii i lenei tulaga ma ua la saunia mo i tatou se auala e maua ai le taitaiga tatou te manaomia. O lenei la taitaiga e maua lea e i tatou e ala i le Agaga Paia.

Ina ia mafai ona maua le fesoasoani a le Agaga Paia, e tatau ona tatou ola i poloaiga, aua o le a le mafuta le Agaga Paia ma le ua manatu mama i poloaiga pe le ususitai foi i ai. Afai tatou te manaomia lana fesoasoani, e tatau ona tatou salamo e le aunoa i mea o loo sese ona tatou fai ma taumafai e fai mea e finagalo le Alii ia i tatou e fai.

"E tatau i le tama ona iloa e le aunoa o le aiga o le mea sili lea ona taua i lona olaga. . . . O totonu lava o le aiga e tuuina atu ai aoaoga sili ona faagaetia loto ma o iina foi e aoaoina lelei ai olaga o a tatou fanau" (N. Eldon Tanner, *Ensign*, July 1973, p. 92).

I le i ai la o lenei ituaiga tiutetauave, e mafai ai e matua ona maua le toafilemu i le iloa lea e mafai ona latou tatalo atu ma taitaiina e le Agaga Paia i le faia o mea sa'o o o latou aiga. Mo se faataitaiga, "ina ua uma ona saili atu se fesoasoani mai le Alii, sa faapotopoto faatasi loa e se tasi tama lona aiga ao lei fuafuaina e ia e talia se tasi o galuega i se tasi aai. Sa fesili atu o ia i le aiga mo ni a latou fautuaga e tusa ma lona faanaunauga i le siitia ese atu lea ma maua ai e i latou le avanoa e o atu ai i le Alii ma maua mai ai se tali mo i latou i le mea e tatau ona latou faia. Ina ua uma ona latou tatalo, sa lagona e i latou le musuia e le Agaga, e pei foi ona sa i ai i le tama, e faapea e tatau ona latou malaga atu i lea mea. O le mea lea, talu ai ona sa tuuina atu e ia le avanoa ia i latou e maua mai ai le tali faaleagaga e pei ona sa maua foi e ia, sa mafai ai e i latou ona talitonu mulimuli i lana fautuaga" (Henry B. Eyring, "Family Followership," *Ensign*, Apr. 1973, p. 32).

Faitau le 2 Nifae 32:5.

Mulimuli i le Taitaiga a le Agaga Paia

E fesoasoani le Agaga Paia ia i tatou i le foiaina o o tatou faafitauli ma tali mai ia tatou fesili i le tele o auala. O le tasi o ia auala o le molimau mai lea e tusa ma tulaga e foia ai faafitauli o loo i ai i tusitusiga paia. Pe a feagai i tatou ma ni faafitauli, e tatau ona tatou suesue i tusitusiga paia, ma saili mo ni tali. A o faia e tatou lea mea, o le a fesoasoani le Agaga Paia e taitaia i tatou i tali ma o le a molimau mai ia i tatou e moni ia tulaga e foia ai faafitauli. E fesoasoani foi le Agaga Paia ia i tatou i le manatua o mea sa tatou aoaoina muamua ae ua galo ia i tatou (tagai i le loane 14:26).

E ui lava ina e mafai ma o le a fesoasoani mai le Agaga Paia ia i tatou i le foiaina o faafitauli, peitai ua na o ia o se fesoasoani. O le a le foia e ia o tatou faafitauli mo i tatou ona ua tatou ole atu ia te ia mo se fesoasoani. I ona popo fou o le Ekalesia, sa iloa ai e Oliva Kaotui e tatau ona tatou faia nisi mea e ese mai i le na ona ole atu mo tali.

Faitau le Mataupu Faavae ma Feagaiga 9:1–9.

O le a se mea ua aoao mai ia i tatou e lenei mau ina ia fai a o lei ole atu i tatou i le Alii e uiga i se faafitauli o loo ia i tatou? Pe o le a faapefea ona tatou iloa pe sa'o pe leai le faaiuga ua tatou fai?

Ua tau mai ia i tatou e lenei mau ia suesue ma mafaufau loloto e uiga i faaiuga e ao ina tatou fai. O le taimi lava tatou te filifili ai se auala o le a uia ai, e tatau ona tatou ole atu i le Alii pe ua sa'o la tatou filifiliga.

O isi auala e fesoasoani mai ai le Agaga Paia ia i tatou i le foiaina o faafitauli o lona faaalai mai lea o tali ia i tatou i se auala tuusa'o ma se leo itiiti (tagai i le 1 Tupu 19:11–13), pe ala mai foi i se fautuaga mai se taitai o le Ekalesia, mai se uo, po o se tusi lelei foi. (Afa'i tatou te maua le tali i a tatou tatalo mai se isi tagata, o le a tuuina mai e le Agaga Paia ia i tatou le lagona e sa'o lea tali.) I nisi taimi, e na ona uunaiina i tatou e le Agaga Paia a o feagai ai ma gaoioiga i lea aso ma lea aso. O ia uunaiga atonu ua na o se lagona e tatau ona tatou faaaluina atili ai se taimi e faatasi ai ma se tasi i totonu o lo tatou aiga po o le faia foi o se mea faapitoa mo ia.

E ui lava ina atonu e oo mai se tali i se tatalo i ni auala eseese se tele, ua saunia e le Alii se auala mo i tatou e iloa ai ma le mautinoa o le tali ua tatou maua e mai ia te ia lea. E ta'u mai e ia ia i tatou pe ua sa'o le filifiliga, o le a maua e i tatou se lagona o le filemu i o tatou loto faapea ma o tatou mafaufau (tagai i le MFF 6:14–16, 22–24).

Atonu tatou te le mananao i ni tali ua tatou maua, pe atonu foi e le oo vave mai i le taimi tatou te mananao e maua mai ai. Peitai e alofa le Alii ia i tatou ma o le a la filifilia ma le potole le mea e sili ona lelei mo i tatou. O le mea lea, e le tatau ona tatou loto vaivai pe afa'i tatou te le maua se tali i se taimi vave lava. E tatau ona tatou faaauau pea ona tatalo e le aunoa, ola amiotonu, suesue, ma saili mo le taitaiga a le Agaga Paia.

Pe a maua e i tatou se tali i a tatou tatalo, e tatau ona tatou faia le mea ua manaomia e le tali ina ia tatou faia. E le mafai ona tatou faamoemoe ia fesoasoani mai pea le Agaga Paia ia i tatou e le aunoa pe afai tatou te le amanaia ana uunaiga. E tusa lava foi po o le tali ua tatou maua e le o le tali lea tatou te manaomia po o le taumafaiga ua ia talosagaina i tatou e fai ua foliga mai ua tele naua, e tatau ona tatou malilie e fai mea ua ia taitaiina ai i tatou. A le o lea, o le a feagai i tatou ma se tulaga lamatia o le ono le maua lea o le fesootaiga ma le Agaga Paia ma le maua ai lona toafilemu faapea ma Lana taitaiga.

E i ai nisi faaiuga ua tuuina mai e le Alii ia i tatou e faia. O nei faaiuga atonu ua na o se tulaga o ni mea tatou te mananao ai ae le o se tulaga o le filifiliga i le va o le mea e sa'o ma le mea e sese. (Tagai i le MFF 60:5; 80:3.) I ia la tulaga, e tatau ona tatou faaaoga filifiliga lelei e faaautu i lo tatou malamalama ma le poto masani.

“O lenei, ou te manatu o le mea pito sili i isi mea uma i le lalolagi, o le tatau lea ia te a'u, ma oe, faapea ma isi tagata uma o le Ekalesia ona saili ina ia taitaiina e le Agaga o le Alii. Afai tatou te maua le taitaiga a le Agaga o le a avea i tatou ma perofeta ia i tatou lava faapea foi ma a tatou lava mea e fai, ma o le a iloa foi e i tatou lava le talafeagai o a tatou mea e fai ma mea na faia e perofeta ua uma ona tuuina atu e le Alii i le Au Peresitene Sili faapea ma le aufono a le Toasefululua” (Joseph Fielding Smith, *Joseph Fielding Smith,—A Prophet among the People*, pp. 24–25).

O le Ala e Mafai Ona Faamanuiaina ai o Tatou Aiga e le Agaga Paia

Pe a taitaiina i tatou e le Agaga Paia, e matua faamanuiaina i tatou ma mafai ai ona tatou faamanuiaina o tatou aiga. Mo se faataitaiga, sa faasaoina Elder McConkie mai le faamanu'aina ona sa faalogo ma gauai lona tama i le Agaga Paia. E mafai ona tatou maua lena ituaiga o puipuiga pe afai e faaavanoaina e i tatou i tatou lava mo le musumusuga mai le Agaga Paia ma faia mea e faatonuina ai tatou e ia e fai.

Ua le gata ina puipuia i tatou i le tulaga i la le tino, ae fesoasoani mai foi le Agaga Paia ina ia tatou aloese ai mai faaosoosoga e faono afaina ai i tatou i la le Agaga. O le Agaga Paia foi e mafai ai ona iloa e i tatou se mea ua sese i totonu o o tatou aiga. Atonu e i ai se tasi o le aiga ua feagai ma se faafitauli faapitoa e manaomia e ia le talanoa i ai. Pe atonu foi o loo i ai ia te ia ni fesili e uiga i le Ekalesia po o le popole foi e uiga i le pogai ua le mafai ai ona ola o ia i poloaiga i le tulaga e tatau ai. O le maua o le fesoasoani a le Agaga Paia, e mafai ai ona tatou fesoasoani i le faamalosiā o o tatou aiga. Atonu e mafai ona tatou faasaoina i latou mai le feagai ai ma le tele o mea tiga ma mea faatiga loto.

E oo lava foi pe a tatou aoaiina a tatou fanau, e tatau ona tatou saili atu mo le taitaiga a le Agaga Paia. Ua aoaoina i tatou e tusitusiga paia ina ia faaoga le aoaiga malosi i a tatou fanau pe afai e uunaiina ai i tatou, ma pe a uma ona aoaiina i latou, ia faaali atu ia i latou le alofa faateleina faapea ma le malamalama. O lenei la faiga, o le a iloa ai e i latou o loo tatou taumafai e fesoasoani ia i latou. (Tagai i le MFF 121:43–44.)

E mafai ona fesoasoani mai le Agaga Paia pe a tatou tuuina atu faamanuiaga a se tama. E mafai ona ia uunaiina i tatou ina ia tuuina atu fautuaga i o tatou aiga, e oo lava foi i fautuaga po o faafitauli atonu latou te le o malamalama i ai. O lea faamanuiaga e mafai ai ona avea ma se malamalamaaga paia mo o tatou aiga.

Faaali atu le fesoasoani vaaia 12-a, “O faamanuiaga a le tama e mafai ona faamalosia ai tagata o le aiga.”

Na faamatala mai e Elder Ezra Taft Benson se tulaga na oo i ai e faapea:

“Sa sau se tasi alii talavou i lo’u ofisa i se taimi e lei mamao atu mo se faamanuiaga. Sa feagai lenei alii ma ni faafitauli . . . ma sa le mautonu o ia; sa popole ma atugalua o ia. O lea sa ma talanoa ai loa mo ni nai minute ma sa ou faapea atu ia te ia, ‘Pe na e talosaga atu ea i lou tama mo se faamanuiaga?’ ‘Oi,’ sa ia tali mai ai, ‘Ou te le iloa e mafai e Tama ona faia se mea faapena. E le toaga tele o ia.’ Sa ou faapea atu, ‘Peitai o ia o lou tama.’ ‘loe.’ ‘Pe o ia te ia le perisitua?’ ‘loe, o ia o se toea ina e le toaga.’ Sa ou faapea atu, ‘E te alofa ia te ia?’ Ma sa ia tali mai, ‘loe, ou te alofa ia te ia. O ia o se alii lelei, e agalelei i le aiga, ma agalelei ia i matou le fanau.’ . . . Sa ou faapea atu, ‘Ua lelei, e te naunau la e te alu atu i le fale ma saili se avanoa, ma talosaga atu i lou tama pe na te tuuina atu ia te oe se faamanuiaga? Ma afai e le manuia lea taumafaiga, ona e toe foi mai lea, ma ou te fiafia lava e fesoasoani ia te oe.’

“Sa alu ese atu loa o ia, ma pe tusa o le tolu aso ae toe foi mai o ia. ‘Brother Benson, o se mea sili lava lenei ona matagofie ua oo i lo matou aiga,’ o lana tala lea. ‘Sa faatasi ai lo’u tina ma tamaiti o lo matou aiga, o o’u uso ma tuafafine laiti, faapea ma lo’u tina sa soloiese loimata mai ona mata. Sa faaalila e ia lona agaga faafetai i le taimi mulimuli ane. Sa tuuina mai e tama ia te au se faamanuiaga matagofie lava.’ Sa ia toe faaopoopo mai, ‘na mafai ona ou iloa na sau mai lona loto.’ ” (*God, Family, Country: Our Three Great Loyalties*, p. 184).

Aisea na aveia ai le tama o lenei alii talavou ma tagata sili ona lelei na te tuuina atu ia te ia se faamanuiaga i lona taimi faapitoa?

Pe mafai faapefea ona tatou iloa o loo taitaina mea tatou te fai e le Agaga Paia?

Faaiuga

Ua tuuina mai e le Alii ia i tatou se meaalofo silisili e fesoasoani ia i tatou i le faia o filifiliga ma le foiaina o faafitauli. O lenei meaalofo o le mafutaga lea ma le Agaga Paia. O le Agaga Paia e mafai ai ona



faalatalata atu atili i tatou i lo tatou Tama o i le Lagi ma maua ai faaaliga e taitaina ai o tatou aiga i le amiotonu. O lenei faaaliga e mafai ona fesoasoani ia i tatou i le tuuina atu ai o le malosi ma le atamai latou te manaomia e faatoilaloina ai o latou faaosoosoga ma faafitauli. E mafai ona tatou lagona le mautinoa o le a fesoasoani mai le Alii ia i tatou pe afai tatou te naunau e faia le mea e sili ona lelei tatou te mafaia. E lua ni mea taua o le a tutupu pe a tatou maua lenei fesoasoani: O le a o mai a tatou fanau ia i tatou mo se faamafanafanaga ma se taitaiga, ma o le a faalatalata atu atili ai foi i tatou i lo tatou Tama o i le Lagi.

Lu'i

1. la suesue i tusitusiga paia ina ia aoao ai i auala eseese e mafai ai ona fesoasoani le Agaga Paia ia te oe.
2. la tausia oe lava ia agavaa mo le taitaiga e le Agaga Paia e ala i le salamo.
3. la mulimuli i uunaiga e te maua mai le Agaga Paia, e tusa lava po o le a le faigata e foliga mai e i ai.

Mau Faapoopo

Luka 12:11–12 (e tau mai e le Agaga Paia ia i tatou mea e tautala atu ai)

Ioane 16:13 (e faaali mai e le Agaga mea o le a oo mai)

3 Nifae 28:11 (e molimau mai le Agaga Paia e uiga i le Tama ma le Alo)

Moronae 10:3–5 (e faaali mai e le Agaga Paia le mea moni ia i tatou)

MFF 39:6 (e aoao mai e le Agaga Paia ia i tatou mea filemu)

Sauniuniga a le Faaoga—

A o lei tuuina atu lenei lesona—

1. la fai atu i se tasi o tama o le vasega e ta'u mai se taimi na fesoasoani ai le Agaga Paia ia te ia.
2. Faitau le *O Tiute ma Faamanuiaga o le Perisitua, Vaega A*, lesona 30, "O le Meaalofa o le Agaga Paia."
3. Faitau le *Mataupu Faavae o le Talalelei*, mataupu 21, "O le Meaalofa o le Agaga Paia."
4. la fai atu i tagata o le vasega e faitau mai pe faamatala mai tala ma mau o loo i ai i lenei lesona.

O le Faamalosia o le Aiga e Ala i Afiafi Faaleaiga

Lesona 13

O lenei lesona e tatau ona aoaoina ai i tatou i le ala e faamalosia ai o tatou aiga e ala i afiafi faaleaiga.

Faatomuaga

E tatau i aiga uma ona faaaluina pe tusa o le tasi le afiafi i vaiaso e faapotopoto faatasi ai i se gaoioiga faaleaiga. Ina ia uunaiina nei afiafi faaleaiga, o le mea lea ua faavanoaina ai e le Ekalesia le afiafi o Aso Gafua mo gaoioiga a le aiga. O le tulaga masani lava, e tatau ona avea le aoao atu faapea ma talanoaga e uiga i le talalelei ma se vaega autu o a tatou afiafi faaleaiga.

Faaali atu le fesoasoani vaai 13-a, “E tatau ona faatasia aiga uma i afiafi faaleaiga e faatasi i le vaiaso,” 13-e, “O le aiga o le iunite sili lea ona taua i le Ekalesia,” 13-i, O le suesueina o le talalelei e tatau ona avea o se vaega o afiafi faaleaiga,” po o le 13-o, “E moomia e fanau le fesoasoani i le atinaeina o se malamalama faaleagaga.”

E le tutusa aiga uma. O nisi aiga e i ai ni matua ma ni fanau; o isi e na o le tasi se matua ma le fanau. O loo i ai lava foi isi aiga ua na o matua e leai ni fanau. O loo toatele foi tagata matutua nofofua o loo nonofo na o i latou pe nonofo faatasi foi. E tusa lava la po o le a le tulaga e i ai, o le afiafi faaleaiga e mo tagata uma lava. E oo lava foi ia i latou o loo nonofo taitoatasi e mafai ona auai i afiafi faaleaiga e ala i le faatasi atu i isi tagata taitoatasi ma fai sa latou lava afiafi faaleaiga. Mo i latou o e ua tuua toatasi, e mafai ona avea lenei mea ma se faamanuiaga faapitoa.

“Ua leai lava se isi nofoaga e sili atu ona talafeagai lelei mo le aoaoina ai o le talalelei nai lo le aiga. Ua na o le aiga lava e mafai ai e le fanau ona aoao i le uiga o le olaga faaleaiga e pei ona faavaeina ai e lo tatou Tama Faalelagi. O le faatasi o le aiga i le po o le Aso Gafua, o le a faatupuina ai se agaga tatau mo isi mea uma e fai e le aiga. O i latou o e o loo i ai i lenei agaga latou te iloa o le mafuaaga lea o lo latou olioli tele” (The First Presidency, *Family Home Evening* [manual, 1971], p. 4).

E le tatau ona tatou loto vaivai pe afai e le faamanuiaina afiafi faaleaiga uma. O se mea taua lo tatou faatasi ma o tatou aiga. Afai tatou te faaauau pea ona taumafai ma faatinoina le onosai ma le alofa, o le a mafai loa ona faatoilaloina faafitauli o loo ia i tatou ma o le a

13-a, E tatau ona faatasia aiga uma i afiafi faaleaiga e faatasi i le vaiaso

13-e, O le aiga o le iunite sili lea ona taua i le Ekalesia

13-i, O le aoaoina o le talalelei e tatau ona avea o se vaega o afiafi faaleaiga









faataunuaina e a tatou afiafi faaleaiga le mea o loo faamoemoe le Alii ina ia faataunuaina.

O le Taitaiga o le Afiafi Faaleaiga

O tama o peteriaaka o o latou aiga ma e tatau ona pule faamalumalu i afiafi faaleaiga. Afai e le o i ai se tane po o se tama, e tatau ona pule faamalumalu le tina po o le ava.

Ua avea ma fuafuaga lelei le faia o se fono puupuu faaleaiga po o se fonotaga foi o fuafuaga a o lei faia le afiafi faaleaiga taitasi ina ia siaki ai gaioiiga ma fuafuaga a tagata o le aiga mo le vaiaso a sau. Ua aoga faapitoa lava lenei faiga pe afai e i ai ni tupulaga e taisefulu ma ona tupu tausaga le matutua i totonu o le aiga.

Sa faapea mai se tasi tama o le faiga o la matou fono faaleaiga “matou te faapotopoto ai i le laulau ‘ai, ma o tama e taitai, ma matou te talanoaina mataupu faaleaiga. . . . Matou te faia soo se faaaliga lava e taua i le aiga ma talanoaina ma faamalo atu i soo se taumafaiga na faia e le fanau i le faagasologa o le vaiaso. A o faalogo tamaiti taitoatasi i le toe faamatalaina atu i le aiga o ana taumafaiga faamanuiaina, e tupu a’e ai ia te ia le mitamita ma o le mea lea, e mafai ona ou toe faopoopo atu, e faapea foi i ona matua” (Glen W. Harper, “Participation—Our Family Home Evening Success Key,” *Ensign*, Dec. 1977, p. 17).

E tatau i matua ona fuafua mamao atu afiafi faaleaiga taitasi ona faia lea o tofiga i tagata o le aiga.

Faaali atu le fesoasoani vaaia 13-e, “O afiafi faaleaiga e tatau ona aofia ai tagata o le aiga.”

E mafai ona aoao atu e le tama le lesona pe tuuina atu foi e faia e le tina po o le fanau. E fiafia faapitoa lava tamaiti laiti i le taitaiina o pese, faitauina o mau, faaaliina atu o ni ata, tatalo, ma le tufa atu o taumafataga mama.

O loo i ai le tele o auala e faia ai se afiafi faaleaiga. O nisi o gaioiiga mo se afiafi faaleaiga e aofia ai le faitauina o tusitusiga paia, talanoaina o le talalelei, fetufaa'i o molimau, faia o se galuega auuina atu, o atu i se tafaoga, po o le faia o se taaloga faaleaiga. E tatau ona aafia i gaioiiga o le afiafi faaleaiga se tatalo.

O loo tuuina atu iinei se faataitaiga po se tasi o auala e faia ai afiafi faaleaiga:

1. Pese amata (taitai e se tasi o le aiga le pese)
2. Tatalo amata (ia faia e se tasi o le aiga le tatalo)
3. Mataupu faaleaiga (taitaiina e le tama)
4. Pese vailauga e saunia e se tasi o le aiga
5. Lesona (tuuina atu e le tagata o le aiga)



6. Talanoaga ma le faia o fuafuaga mo le vaiaso a sau
7. Pese faaiu
8. Tatalo faaiu
9. Gaoioiga e faafiafia ai (taitaiina e se tasi o le aiga)
10. Taumafataga mama (saunia e le tagata o le aiga)

E le tatau ona tatou mumusu e tofi tagata, e oo lava i se tamaititi laititi e fesoasoani i le aoaoina atu o le lesona o le afiafi faaleaiga. Sa tuuina mai e se tasi tagata talavou o le Ekalesia le faamatalaga lenei:

“Ina ua fautua mai e tama o le a auauai tagata uma i totonu o le aiga i le tuuina atu o le lesona o afiafi faaleaiga, sa ou manatu o se mea malie le faapea atu, ‘Tuu atu le avanoa ia Sione na te faia ai le lesona i le vaiaso a sau.’ O Sione e tolu tausaga lona matua. O le mea lea sa tofia ai e tama Sione na te faia le lesona, faatasi ma le fesoasoani i ai o tina, sa tuuina atu ai e Sione se lesona sili ona lelei o le afiafi faaleaiga na maua e i matou, ma o le olioli sa faaalua i mata o lena alii laititi sa sili atu ona taua nai lo le olioli e mafai ona matou toe faaali atu ia te ia” (quoted by Lowell Durham, Jr., “What Makes a Good Family Home Evening,” *New Era*, June 1972, p. 13).

E mafai ona fesoasoani tagata taitoatasi o le aiga i le avea lea o le afiafi faaleaiga ma se taumafaiga faamanuiaina. O le tasi mea e mafai ona tatou faia o le fuafuaina lea o a tatou gaoioiga tau i le tagata lava ia ina ia faasaoina ai le po o le Aso Gafua mo le faia o afiafi faaleaiga. E le gata foi i lea, e mafai ona tofia tagata taitoatasi o le aiga e fesoasoani i le saunia po o le tuuina atu o le lesona o le afiafi faaleaiga po o le gaoioiga. E fiafia tele tamaiti laiti i le faia o mea i ni auala se tele; e fiafia faapitoa lava i latou i le faamatalaina atu o ni tala faigofie e faaoga ai le laupapa ie mamoe. E mafai ona fesoasoani le tina po o se tasi ua matua o le fanau ia i latou i le saunia o nei tofiga po o isi foi tofiga i le faagasologa o le vaiaso. O le a auai tamaiti uma i mea e fai pe afai e faaoga e le tama ma le tina i latou ma onosai i a latou taumafaiga.

Sa iloa e se tasi tama o le afiafi faaleaiga e manaomia ai le alofa ma le onosai. Pe a aunoa ma ia mea, e tusa lava foi pe fuafua lelei, o le a le maunonoa le maua ai o se taimi fiafia mo le aiga:

“Sa ou lagona le itaitagofie i nai tausaga ua mavae i se tasi afiafi o le Aso Gafua. A o amata la matou afiafi faaleaiga, sa taalo la’u fanau ma tui e le tasi le tasi. Sa oo ina ou ita ma ou faapea atu ma le leotele, ‘Ia nonofo sa’o i luga ma ia tuu a outou mea valea na e fai aua a leai o le a outou matua vaai i puapuaga o le a outou feiloai i le po nei.’ Sa mafai ona iloa e la’u fanau i le mumu o o’u mata ua oo ia te au le ita. Sa filemu i latou. Sa faaauau atu la’u faamatalaga i lo’u faapea atu,

'Ua ou le iloa pe aisea e le mafai ai ona outou nonofo filemu mo ni nai minute ma faalogo mai. O lea la, ia aua lava ne'i ou toe faalogo atu i se tasi o outou sei vagana ua uma le lesona. A uma le lesona, o le a ou tuuina atu ni fesili. E tatau ona outou iloa tali i nei fesili.' . . .

"Sa oo loa ina maea la'u tautalaga ma amata ona ou tuuina atu fesili. Sa iloa e i latou tali uma lava. Sa matua lelei lo'u aoaoina atu o i latou. Ona ou fesili atu lea, 'Pe i ai ea ni fesili a outou le fanau?'

"Sa faapea mai lo'u atalii aupito matua i se leoleo mauualalo, 'O loo i ai la'u fesili.' Ona ia fesili mai ai lea, 'Pe mafai ona aoao e tina le lesona i le vaiaso a sau?'

"Sa faailoa mai ia te au i ana upu faapea ma o'u lagona, o lo'u taumafai atu ina ia fai le mea sa'o, ae ua ou faia ai le mea sese. Sa ou aoaoina atu manatu, ae sa ou le aoaoina lo'u aiga. . . .

"Sa ou aoaoina nisi o mea talu mai lenei taimi. O loo tumau pea le tulaga o lo'u le tuuina atu o le avanoa i tamaiti e o mamao ese ai mai le laina—ma e le o foliga mai foi e mananao i latou i lea tulaga—peitai ua ou maua ni auuala e sili atu ona lelei e aoaiina ai i latou. . . .

"E na o le tasi lava le mea na ou faia o le aua lea ne'i toe ita i le taimi e faia ai le afiafi faaleaiga."

Sa faamaea e lenei tama lana faamatalaga e uiga i le tulaga na oo i ai i lona tuuina mai o le fautuaga lenei e faapea:

"Ia e uiga fiafia. Ia faasaoina au amioga sili ona lelei i le agaga lelei mo le aiga

"I totonu o lo matou aiga, e le pei a matou afiafi faaleaiga o vasega e faia i le falelotu. E leai se tulafono o ta'u mai ai e tatau ona matou nonofo i nofoa; e masani lava ona matou nonofo i luga o le fola o le fale ina ia mautinoa ai ua maua e tagata uma le lagona toafilemu. . . .

"E oo i tama le ita ona ua latou manatu e tatau ona latou vaai ua aoaoina atu se lesona ma ia matua faalogologo lelei i ai tagata o le aiga. Ua na o se vaega o lea manatu e sa'o, peitai afai o le a avea le lesona ma se mea e fai faamalosi, e oo ina avea afiafi faaleaiga ma ni mea e le fiafia i ai se aiga" (George D. Durrant, *Love at Home, Starring Father*, pp. 44–46).

E mafai ona tatou faaleleia atili a tatou afiafi faaleaiga e ala i le tatalo atu i lo tatou Tama o i le Lagi mo se fesoasoani a o faia e i tatou fuafuaga mo a tatou afiafi faaleaiga ina ia talafeagai ma tulaga manaomia o o tatou aiga ma ia faapea foi i taimi a o tatou saunia mo o tatou tofiga.

E mafai faapefea ona tatou faaaogaina le tatalo e faaleleia atili ai a tatou afiafi faaleaiga?

O le a le tele o se taimi e tatau ona tatou faaalaina i vaiaso taitasi e saunia ai mo afiafi faaleaiga?

E mafai faapefea ona tatou faaleleia atili a tatou afiafi faaleaiga e ala i le faia o ni fuafuaga sili atu ona lelei?

“Pe o tutusa ea le taimi o e faaaluina i le faaleleia atili o lou aiga ma le taimi o loo alu i le faaleleia o faalapopotoga ma mea tau galuega? Pe o e tuuina atu ea lou malosi sili e faaleleia ai le vaega sili ona taua— o le aiga; pe o avea ea la outou fegalegaleaiga ma lou aiga ua na o se vaega masani ma le le faamanuiaina o le olaga?”

“E tatau i matua ma fanau ona naunau ina ia faamuamua tiutetauave i le aiga ina ia maua ai le faaeaina o le aiga” (The First Presidency, *Family Home Evening* [manual, 1973], p. 4).

O Afiati Faaleaiga e Faamalosia ai le Aiga

Ia uu i lou lima se fusi laau po o ni laau afitusi. Ia ta'u atu i le vasega o nei laau o tagata ia o se aiga. Ia avane se laau e tasi mai le fusi ma gaulua. Ia ta'u atu i le vasega afai o le a tutu na o i latou o le a le tutusa o tatou malosi ma le malosi pe afai e tuuafaatasia lo tatou aiga. Ona avane lea o se manoa po o se pa'u ma fusi ai faatasi. Ia ta'u atu i le vasega o le manoa o le malosi lea e fusia ai faatasi o le talalelei lea. Ia faaali atu le faigata tele ona gagau laau. Ia faamatala atu e sili atu ona maua e i tatou le malosi pe a tuuafaatasia i tatou i le tulaga o se aiga ma taumafai atu faatasi e ola i le talalelei.

O afiafi faaleaiga e fuafuaina lelei ma faia i vaiaso taitasi e mafai ona fesoasoani ia i tatou ia fesoasoani atu i tagata o le aiga ina ia manumalo i faatosinaga a le tiapolo o loo i ai i le lalolagi. O loo osofaia pea e Satani le amiotonu, ma o loo ia faaogaina le anoanoai o faaosoosoga e faatupuina ai atili le agasala ma le amioleaga. O le au talavou o tagata faapitoa ia o loo tulimatai atu i ai ana taumafaiga. Peitai afai tatou te aoao atu ia i latou le talalelei ma faamalosia i latou i le faaleagaga i totonu o le aiga, o le a mafai ona latou tetee atu i faaosoosoga latou te feagai ai i le lalolagi.

“E mafai e i tatou ona faatumulia o tatou agaga i mea a le Atua i afiafi faaleaiga tatou te fai faapea foi ma isi mea lelei e fai e le aiga, ma ua faapea ona le maua ai se avanoa mo le tiapolo e nofo ai i totonu o o tatou loto po o mafaufau” (The First Presidency, *Family Home Evening* [manual, 1972], p. 4).

O a ni faamanuiaga ua oo mai i lou aiga ona o afiafi faaleaiga?

I aso lava la ua leva i le tusa o le 1915, sa tuuina mai ai e le Au Peresitene Sili o le Ekalesia ia i tatou lenei folafolaga:

“Afai e ususitai le Au Paia i lenei fautuaga [o le faia o afiafi faaleaiga] matou te folafola atu o le a maua faamanuiaga sili. O le a faatupulaia le alofa i le aiga faapea ma le ususitai i matua. O le a faatupuina le faatuatua i loto o le autalavou o Isaraelu, ma o le a maua e i latou le mana e tetee atu ai i faatosinaga leaga faapea ma faaosoosoga o loo feagai ma i latou” (“Home Evening,” *Improvement Era*, June 1915, p. 734).

Sa taua mai e Elder Marion D. Hanks, i le taua o le autalavou, na ia faamanino mai ni tulaga se fa latou te moomia. Sa saunoa mai o ia e

faapea, e manaomia e i latou (1) le faatuatua; (2) ia taliaina e pei ona latou aafia ai; (3) ia matuai auai ma le atoatoa, ma ia aafia ai; ma lona (4) ia latou iloa e sili atu lo latou taua nai lo a latou mea sese, ma e le faatuaioia le alofagia o i latou.

Ona ia faamatala mai ai lea e uiga i lona lava afafine e faapea: “Sa matou tootutuli ma lo’u lava aiga, i le faaiuga o se tasi o a matou afiafi faaleaiga matagofie, i le po na sosoo ma le aso e faaipoipo ai lo’u afafine lalelei i le malumalu. Ou te manatu o le a le afaina ia te ia lo’u faamatalaina atu ia te outou e faapea ina ua uma ona matou toe fetagisi ma manatua tulaga sa matou oo i ai, sa talosagaina o ia e faia le tatalo. Ou te le manatua le vaega tele o mea na ia taua i lana tatalo, o loimata faapea foi ma le olioli ma le fiafia, peitai, ou te manatua se tasi o manatu na ia taua i lana tatalo e faapea: sa faafetai atu i le Atua mo le alofa le faatuaioia na ia maua. O lenei olaga e le maua ai e se tasi ni avanoa se tele e lagona ai le olioli ma se lagona o le alualu i luma, peitai sa faatumulia a’u i se lagona matagofie i lena po” (“Love Unconditional,” *Ensign*, Dec. 1971, p. 106).

O le polokalama o afiafi faaleaiga e faatupuina ai atili le alofa ma le filemu i totonu o o tatou aiga. A o faatupulaia pea lenei lagona, o le a mananao o tatou aiga ina ia ola i le talalelei ma o le a aveesea le tele o feupuaiga ma fevaevaeaiga i totonu o o tatou aiga. A o tatalo o tatou aiga, pepese, ma talanoaina faatasi le talalelei, o le a oo mai le Agaga o le Alii i o tatou aiga ma aveesea ai soo se agaga fevaevaeai e maua ai.

Pe mafai faapefea ona avea afiafi faaleaiga e faia pea ma mea e aumaia ai atili le alofa ma le filemu i o tatou aiga?

Pe mafai faapefea ona fesoaosani le faia pea o afiafi faaleaiga i tagata o le aiga ina ia tetee atu ai i faatosinaga a le tiapolo? Ia tusia manatu e ofoina mai i luga o le laupapa.

Ia o ane tagata o le vasega na tofia e tuuina mai ni a latou faamatalaga e uiga i ni tulaga faapitoa na oo i ai afiafi faaleaiga sa latou faia?

Faaiuga

O le afiafi faaleaiga o se vaega lea o le fuafuaga a le Alii e fesoasoani ia i tatou i le toe foi atu ia te ia. O se taimi lea ua fuafuaina mo i tatou e aoaina ai a tatou fanau i mataupu faavae o le talalelei ma fesoasoani ai foi i o tatou aiga ina ia felatai atili ma malamalama le tasi i lagona o le tasi. O nei taimi e faatasitasi ai e mafai ona fesoasoani ia i tatou e faamalosia ai le lotogatasi i o tatou aiga ma aoaina ai i tatou i le ala e ola ai faatasi i le alofa ma le fealofani e sili atu. O le a faapea foi ona sili atu ona mafai e tagata o o tatou aiga ona tetee atu i faatosinaga a le tiapolo o le lalolagi.

“Matou te uunaiina foi matua ina ia faapotopoto i a latou fanau i le alofa ma le onosai ma le malamalama i o latou lagona, ma ia aoaina i latou i le upu moni ma le amiotonu. . . . O le aiga o le nofoaga

muamua lea ma le sili e aoao ai e fanau lesona o le olaga” (The First Presidency, *Family Home Evening* [manual, 1975], p. 3).

Lu’i

1. Afai tou te le o faia afiafi faaleaiga e le aunoa, ia amata i lenei vaiaso ona faia lea mea.
2. Ia fuafua faatasi ma le agaga tatalo a outou afiafi faaleaiga ina ia talafeagai ma tulaga manaomia o lo outou aiga.
3. Ia faaaoga tagata uma o le aiga i afiafi faaleaiga i se mea e sili ona mafai ai.

Mau Faapoopo

MFF 68:25 (e tatau i matua ona aoaoina a latou fanau i mataupu faavae)

Sauniuniga a le Faiaoga

A o lei tuuina atu lenei lesona—

1. Ia saunia se fusi laau po o ni laau afitusi e fai ai le lesona faitino e uiga i le lotogatasi o le aiga e pei ona taua i le lesona.
2. Ia saunia se laupapa ma se penisina.
3. Ia tofi ni tagata o le vasega e faamatala mai e uiga i ni tulaga faapitoa na oo i ai a latou afiafi faaleaiga.
4. Ia fai atu i tagata o le vasega e faitau mai pe faamatala mai foi tala ma mau o loo i lenei lesona.

O le Fiafia Faatasi o Aiga

Lesona 14

Ua fuafua lenei lesona ina ia uunaiina ai i tatou ia faamalosia o tatou aiga e ala i le fiafia faatasi e faamalosia ai aiga.

Faatomuaga

Faaali atu le fesoasoani vaaia 14-a, “O le fiafia faatasi e faamalosia ai aiga.”

Ia o ane tagata e toalua o loo umia le perisitua na tofia e faamatala mai ni tulaga sili ona fiafia na oo i ai a latou afiafi faaleaiga. Ia talanoaina le mea o loo faaalua i le fesoasoani vaaia 14-a. Ia faamalamalama atu e faapea o se vaega taua o le talalelei o le faia faatasi lea o mea, o se aiga.

Sa faamatala mai e Elder Marion D. Hanks le tala lenei:

“E manaomia e tagata talavou ni matua ma se aiga e mafai ona latou mitamita ai. . . . Tatou te maua lelei le ata o se aiga lelei i lenei faamatalaga, e lē o iloa pe o ai na tusia:

“O se aso matagofie tele lea aso i le masina o Oketopa. Sa ma fesoasoani ma lo’u toalua o Art i la ma uo o Don i le tosoina atu o lona vaa i le matafaga. Sa faamatala mai e Art ma le moomoo o lona loto e faapea o le a umi se taimi ona faatoa oo lea i le isi taumafanafana e mafai ai ona matou folau i se vaa. “E tatau ia te outou ona faasee e pei o lo matou aiga ma outou fiafia faatasi i le tausaga atoa,” o le tala lea a Don.

“ ‘ “E le taugata tele lena mea?” o la’u fesili lea.

“ ‘Sa tu a’e i luga Don ma ataata. “O se mea malie tele,” o lana tala lea. “Matou te nonofo i se fale o fausaga anamua— e fai vae o le tapu taele, ma isi lava mea faapena. Ua tele ni tausaga o matou faasaoina se tupe e faamaea ai so matou faletaele. Peitai o aso uma e oo mai ai le taumalulu matou te aumaia ai se tupe mai le faletupe ma matou o atu ai i nisi o malaga faaleaiga mo faaseega. O loo iai nei la ma tama ulumatua i le vaegaau, ma e masani ona taua mai i ana tusi lona fiafia tele i ia malaga o faaseega. E te iloa oe, ou te le mailoa le uiga o lona tusi mai i lo matou aiga ma faapea mai, ‘O le mea moni o loo ia i tatou se faletaele matagofie tele, a ea?’ “ ‘ “ (“Where Art Thou?” *Improvement Era*, June 1968, p. 75).

Na faapefea ona faamalosia e lenei aiga le lotogatasi o lo latou aiga?

O le toatele lava o i tatou e fiafia e faaalu o tatou taimi i le faia o ni mea ua tatou manatu e aoga. O le galuega, faalauteleina o valaauga i le Ekalesia, malolo, faaleleia atili o i tatou lava—o nei uma o ni mea e

14-a, O le fiafia faatasi e faamalosia ai aiga



taua ma e tele lo tatou taimi e alu ai. Ae peitai, atonu o nei mea e le o mea sili ia ona aoga i o tatou olaga. Ia mafaufau e uiga i ni au lava tali i fesili nei:

- O a mea e sili ona taua i lo'u olaga?
- Pe o lava ea le taimi o loo o'u faaluina i le faia o mea e sili ona aoga i lo'u olaga?
- E mafai faapefea ona ou faatulagaina lo'u taimi ina ia ou maua ai atili ni taimi e fai ai mea e sili ona taua?

O le mea aupito sili ona taua i le olaga o le aiga. E i ai nisi taimi e pisi tele ai i galuega faapea ma isi gaoioiga e fai lea ma mea e galo ai ia i tatou le mea e sili ona taua. O nisi taimi, ona o ni tulaga masani e faia i aso taitasi, o mea e fiafia le tagata lava ia i ai, po o le leaga foi o le faiga o fuafuaga, tatou te faatupuina ai ni amioga leaga ma faamaimauina ai le taimi e mafai ona faaluina e faatasi ai ma o tatou aiga.

E mafai ona avea aiga ma ni aiga e faavavau. E tusa lava po o le a le tulaga e i ai i tatou, e tatau ona tatou sailia se taimi e faaluina e faatasi ai ma o tatou aiga ma sailia ni auala e faaleleia ai atili a tatou fegalegaleaiga faaleaiga.

O le a se mea e mafai ai ona felatai ma vavalalata atili se aiga? (O le manatu mamafa, faaalua o le alofa, fetufaai, faapea ma le faia e le tasi o mea lelei mo le isi.)

O Gaoioiga e Faamalosia ai Fegalegaleaiga Faaleaiga

E mafai ona manatua e le toatele o i tatou mai le taimi a o avea i tatou ma ni tamaiti, le olioli o le fetufaai i se aiga. Sa tuuina mai e se tina lenei manatu e faapea:

“Pe a ou toe mafaufau atu i le taimi a o avea a'u ma se teineititi faapea ma lo'u talavou ou te manatua lelei ai ma le agaga maualalo mea fiafia sa faia e i matou le fanau faapea foi ma le tina ma le tama i se tulaga o se aiga. Ou te manatua e le tele ni mea na fai i na aso i totonu o le alalafaga ma o le mea lea sa tatau ai ona matou saili ni mea e faafiafia ai i matou lava i totonu o lo matou aiga. E le mafai ona galo ia te a'u pati a lo matou aiga faapea ma isi faafiafiaga faaleaiga ma e le taitai ona tutusa ma faletifaga o aso nei, o malae o faataavalega polo, ma faleaiga. . . .

“Ua tonu i lo'u loto o le a ou faia mea uma e mafai ona ou fai e fuafua ai gaoioiga mo lo'u aiga ina ia aumaia ai le agaga o le Alii i totonu o lo matou aiga e pei o le tulaga na faatumuina ai e le Agaga le aiga o o'u matua. Ou te manao ina ia maua e la'u fanau faamanuiaga silisili o le manatua pea o mea sili ona pele ia te a'u” (Family Home Evening Manual [1968], pp. 184–85).

E manaomia foi e i tatou, e pei o lenei tina, le saunia o ni mea e le mafai ona galo mo o tatou aiga. Peitai o gaoioiga e ofoina mai e le lalolagi i fafo atu o le aiga e le o lelei i taimi uma; o le tele o ia

gaoioiga e le atinae ai se lotogatasi o le aiga faapea ma le felatai ma lo tatou Tama Faalelagi. O le mea lea ua fautuaina ai i tatou e taitai o le Ekalesia, ina ua latou silafia le faatuputupulaia pea o le tulaga manaomia o le faifaimea faatasi o aiga, o lea ua fautuaina ai i tatou ina ia fuafuaina lelei ni gaoioiga lea o le a uunaiina ai le lotogatasitasi o le aiga. Mo se faataitaiga, sa fautuaina i tatou e Peresitene Tavita O. Makei ina ia avea o tatou fale ma ni fale faatosina loto ma ia sili atu ona tele ni gaoioiga e faia ai. (Tagai i le *Gospel Ideals*, pp. 485–86.) Afai o le a faapea ona tatou fai, o le a fiafia a tatou fanau ma mitamita e aumaia a latou uo i lo tatou aiga, aua o le a avea lo tatou aiga ma se nofoaga mafana, alofa, ma le fiafia.

O a nisi o gaoioiga e mafai ona tatou faia faatasi ma o tatou aiga o le a fesoasoani ia i tatou e malamalama ai atili i o tatou aiga? Ia tusia gaoioiga e ta'u mai i luga o le laupapa. Ia faapoopoo i ai ma soo se gaoioiga o nei gaoioiga i le lisi:

- Tusi se tusi i se tasi o loo i ai i se mea mamao. Ia faifai pea e le aunoa.
- Ia faia se api tusitusi a le aiga.
- Saunia se taaloga ma taaalo ai.
- Saunia ni nai meaai e aai faatasi ai pe a uma se gaoioiga.
- Ia faia se po e usuusu pese ai.
- Faia se po o mea e fiafia ai. Fesoasoani atu i tagata taitoatasi o le aiga i le amataina o se mea e fiafia i ai.
- Ia faia se maua ma faalele.
- Ia filifilia se tusi e fiafia uma lava i ai le aiga. Auauai i le faitauina leotele o le tusi. Ia fuafuaina se taimi masani e faia ai lea mea i le vaiaso.
- Ia faia se galuega fesoasoani e fesoasoani ai i se isi aiga.

Ia maitau mai mea na faia e lenei tama faatasi ma lona aiga:

“Ina ua valaauina au e avea ma se peresitene o se misiona, sa oo ia te au le fefe ina ne'i le lava lo'u taimi e maua e avea ai ma se tama lelei i se vai taimi sili ona faigata i olaga o la'u fanau e toavalu. Sa tonu i lo'u manatu o le avea ma se tama o se valaauga sili atu lea ona taua mai le Aii nai lo le avea ma peresitene. O le uiga o lea mea, e ui lava ina o le a ou tuuina atu lo'u malosi i le misiona, e lelei pe a faaluaina lo'u faamaoni i le avea ai o se tama. Sa ou iloa, ina ia mafai ona ou pule faamalumalu lelei i totonu o le misiona, e tatau ona ou pule faamalumalu lelei muamua i lo'u aiga. Sa tele se taimi na matou faaluina e faatasi ai ma lo'u aiga, ma lo'u iloa o le a na o i latou lava o le a faatasi ma a'u pe a faaiuina la'u misiona. Afai o le a maua e i latou se lagona toafilemu ma le fiafia i aso amata o la matou misiona, o le a siitia le tulaga o mea mai le lelei i le sili atu ona lelei.

“O se tasi o mea muamua lava na matou faia o le togi lea o se maea lapoa i luga o se lala maualuga o se laau lapoa sa tu i luma o le matou fale. [O se faifeautalai] sa a’e i le maea ma nonoa i le lala. Sa faapea ona maua se taupega lelei mo le fale o le misiona. Sa vave ona o mai nisi o uo a la ma fanau laiti ona o lea taupega.

“Ina ua mavae ni nai masina talu ona matou taunuu, sa matou auai i se semina mo peresitene o misiona. Sa lipoti mai e peresitene taitoatasi, ina ua fesiligia po o le a ni o latou manatu sili ona lelei o loo i ai, o ni polokalama latou te manatu e faalauteleina ai le galuega. Ina ua oo mai le faasologa ia te au, sa ou faapea atu, ‘O le mea sili ona lelei ua ou faia e oo mai i le taimi nei, o se taupega lea.’ Sa talie uma tagata. Sa ofo Peresitene S. Dilworth Young ma fesili mai, ‘O le a?’ Sa ou faamatala atu i ai e uiga i le taupega ma sa ou faamatala atu o le sini autu sa i ai ia te au o le avea lea ma se tama lelei Sa avea le taupega ma a’u faailoga e faailoa atu ai lenei faasologa o mea e faamuamua. Sa sosoo ai ma se mama pasiketipolo faapea ma se faupuega oneone. Sa avea lo matou lotoa ma se malae tafao na ou faaluina ai le tele o taimi e faatasi ai ma la’u fanau ma nonofo ai mo le tolu tausaga fiafia. Ou te talitonu o le a manatua pea e i latou e oo i le faavavau le olioli na latou maua i le taimi sa latou nonofo ai i Kentucky ma Tennessee” (George D. Durrant, *Love at Home, Starring Father*, pp. 18–20).

O nisi taimi afai e taaalo faaasi le aiga, e alia’e mai ai ni faafitauli. E mananao le toatele o tagata e manumalo i taaloga ma atonu e oo i ai le ita pe a faiaina; o nisi pe atonu e tauupu pe tauaimisa. O le tasi faafitauli e feagai ma matua i se tasi taimi o le faamamalu tele naua i se taaloga ma tele naua mea latou te faamoemoeina e fai i a latou fanau, po o le le mafai foi ona filifili i ni itu e tutusa lelei ina ia faatupuina ai le fiafia i tagata uma o le aiga. E i ai foi nisi taimi, e faaono faatupuina ai ia i tatou ia faafitauli se lagona e faapea e le tatau ona faia ni gaoioiga. Peitai e le avea lenei mea ma pogai e taofia ai le taaalo faatasi; e mafai ona ola vavalalata lelei aiga a o faatoilaloina i latou ni feeseeseaiga. E tatau ona foia faafitauli i se auala o le a maua ai e tagata uma se lagona lelei e uiga i le faaiuga. E tatau ona tatou manatua le faamoemoeaga moni o soo se gaoioiga e faia i le aiga o le na ona maua ai lea o le fiafia.

O aiga e galulue faatasi i le faia o mea e sili atu ona vavalalata ai i latou. O le taaalo faatasi, o le a faatupuina ai atili e tagata o le aiga le lotogatasi ma le alofa o le tasi i le tasi. A o faasolo ina vavalalata i latou, o le a iloa ai e i latou ona galulue faatasi, talanoaina faatasi faafitauli, ma tatalo faatasi.

Fai atu i se tagata o le vasega e faitau mai le Failauga 3:1–8.

Ua ta’u mai e lenei mau ia te i tatou e faapea “o le mea ma lona tausaga i mea uma, ma ona lava po i mea uma lava i lalo o le lagi,”

e aofia ai ma “ona po e ataata ai.” E tusa po o le a le tele o a tatou mea e fai, e tatau ona tatou faaaogaina le taimi e malolo ma fiafia faatasi ai. E tatau ona faatumulia o tatou aiga i le ataata ma le laufofoga fiafia.

E oo lava foi i le galuega e mafai ona avea ma se mea e olioli ai pe afai e faia i le auala sa’o. Mo se faataitaiga, o aiga e i ai tamaiti laiti, e mafai ona avea le galuega (e pei o le totoina o se togalaau, faamamaina o le fale, po o le fufuluina o ipu) e pei o se taaloga. O lenei faiga o le a faatumauina ai le agaga naunautai ma le fiafia i mea e fai i se tulaga maualuga. O lea auala o le a mafai ona fesoasoani ia i tatou i le taitaiina o o tatou aiga agai atu i ni olaga fiafia e paleni lelei i le va o le galue, malolo, ma taaalo.

O le Fuafuaina o Gaoioiga Faaleaiga

O gaoioiga faamanuiaina a le aiga e masani lava ona fuafuaina mamao.

E mafai faapefea ona tatou fuafuaina ni faafiafiaga e fiafia i ai le aiga?

O fautuaga nei e mafai ona fesoasoani ia i tatou i le fuafuaina o gaoioiga faaleaiga:

- I se afiafi faaleaiga, e faatasi ai tagata uma o le aiga, ia tusia ni gaoioiga e fiafia i ai tagata uma,. O le toatele lava o tagata o le aiga e tatau ona mafai ona auai i nei gaoioiga.
- Ia filifili se gaoioiga mai le lisi ma fuafua se taimi e fai ai.
- Ia filifili se aso mo le gaoioiga. Ia tusia lea gaoioiga i le kalena a le aiga ina ia aloese mai isi tulaga e faaono faalavelaveina ai.
- E tatau ona fesoasoani tagata uma i le fuafuaina o gaoioiga ma maua se tofiga e fesoasoani i le saunia mo lea mea.

E mafai faapefea ona tatou faataunuuna i se tulaga sili ona lelei le gaoioiga na tatou filifilia?

Maufaufau i manatu nei:

- Ia faasalalau atu le gaoioiga i totonu o lou aiga—ia talanoa atu i lea gaoioiga ma le fiafia.
- Afai e manaomia e lea gaoioiga se tupe, ia amata ona faasaoina se tupe mo lea gaoioiga—ma ia tuuina atu le avanoa i tagata uma e fesoasoani mai ai.
- Ia ta’u atu i a outou faiaoga o aiga e uiga i a outou fuafuaga.
- Ia aafia ai tagata uma—ia tuuina atu se tofiga i tagata taitoatasi o le aiga.
- Ia faia!

Pe a uma ona faia se gaoioiga, e tatau ona tatou mafaufau e uiga i se auala e faaleleia ai atili fiafiaga mo lo tatou aiga. E tatau ona tatou fesili ifo ia i tatou lava po o a nisi tulaga sa tatau ona faamanuiaina ai atili le

gaoioiga ma faatupuina ai se vavalalata o i tatou. Afai tatou te faia lenei mea, o le a le toe faia mea sese na tatou faia ma o le a mafai ona tatou fuafua faatasi ina ia sili atu ona lelei le gaoioiga e sosoo ai.

Pe a faia sa tatou gaoioiga, e tatau ona tatou faamaumauina i a tatou talafaamaumau faaleaiga faapea ma tusi o talaaga e uiga i le olaga o le tagata lava ia. E mafai foi ona faopoopo i ai ma ni ata faapea ma ni mea faapitoa e faamanatu ai ia gaoioiga. O le mafai ona toe tepa atu i tua ma manatua le fiafia sa tatou maua faatasi o le a mafai ai le tulaga vavalalata i o tatou aiga ma faamalosi ai lo tatou alofa o le tasi i le isi.

I le fuafuaina o gaoioiga faaleaiga, e tatau foi i tama ona fuafua e faaoga se taimi e talanoa ai i tagata taitoatasi o le aiga e masani lava ona pau lea o le auala e mafai ai e se tama ona faatupuina se tulaga vavalalata ma lana fanau. E lagona e se tamaititi le taua ma le alofagia pe afai e taumafai le tama e faaalu sina taimi e faatasi ai ma ia.

E i ai nisi taimi e sili atu ai ona aoga gaoioiga e le fuafuaina, e pei foi ona aoga o gaoioiga e fuafuaina. O nei la gaoioiga e faia tonu i le taimi e tatau ai po o le faia foi pe a saunia le aiga. E taua tele ia gaoioiga; e le tatau ona tatou manatu mama i ia gaoioiga.

O Aiga e Taaalo Faatasi . . .

O loo faaalua i le talafou o loo i lalo mea e aupito manaomia e fanau mai o latou tama:

Sa faatonuina ni tamaiti aoga e toluselau luasefuluono le aofai ina ia tusia ni faamatalaga e aunoa ma le tusia o o latou igoa e uiga i le tulaga o loo i ai o latou mafaufau e uiga i o latou tama. Sa fuafua e le faiaoga e faitau atu leotele faamatalaga na tusia e nei tamaiti i le aso e sosoo ai. Talu ai ona o le fia iloa po o a mea ua tusia e a latou fanau e uiga ia i latou, o le mea lea na toetoe lava ina a leai se tama e lei auai atu i lea faatasiga.

Sa o mai nei tama i ni taavale e ta'i \$400 ma ni taavale e ta'i \$4,000. Sa i ai ni peresitene o fale tupe, tagata leipa, tagata popoto i galuega, failautusi, tagata faatauolua, faifaatoaga, tagata faioloa, tagata suisui, tagata gaosimea, ma tagata fai konakalate, ma sa tofu lava le tagata ma se tulaga ma'oti e faailoa mai ai o ia lava i le tulaga o mea tau tupe, atamai, ma le amiotonu.

Sa filifilia e le faiaoga ia pepa ma faitauina atu 'Ou te fiafia i lo'u tama,' mai pepa taitasi. Sa tele ni pogai na faaalua: sa fausia e ia lo'u fale taaalo, sa ia aveina a'u e faatietie i le taavale, aoaoina a'u i le ala e faapa ai le fana, fesoasoani mai ia te a'u i a'u meaaoga, aveina atu a'u i le malae taalo, tuuina mai ia te au se fagafao e fagaga ma faatau atu. O le tele lava o mafaufauga o tamaiti sa mafai ona faapuupuua e faapea: "Ou te fiafia i lo'u tama. Ma te taaalo faatasi ma ia."

E leai ma se tamaititi na ia taua mai fale o lona aiga, o taavale, nuu, meaai, po o ni lavalava. Sa o mai tama i lea faatasiga mai le tele o ituai e eseese o tulaga o le olaga. Sa mafai ona faavasegaina i latou i ni vasega se lua e faapea: *o ni faauo i a latou fanau* po o ni *tagata ese i a latou fanau*.

E leai se tagata e faapea ua mauoa tele pe mativa tele ma ua le mafai ai ona taaalo faatasi ma lana fanau. (Na sii mai i se tala na tusia e Bryant S. Hinckley i le tusi o loo taua o le *The Savior, the Priesthood, and You* [Melchizedek Priesthood manual, 1973], p. 226.)

O le taaalo faatasi o se aiga e masani lava ona maua ai e i tatou le avanoa e aoao atu ai mataupu faavae o le talalelei. O le amataina o a tatou gaoioiga i se tatalo faaleaiga, o le a aoaoina ai a tatou fanau i le taua o le tatalo. O le foia o feeseeseaiga e aliai mai pe a tatou taaalo faatasi, o le a aoaoina ai i latou i le ala e fegalegaleai lelei ai ma isi tagata ma manatunatu ma faatauaina lagona o isi tagata. O le fesoasoani o le tasi i le tasi faapea ma le galulue faatasi e pei o se au o le a aoaoina atu ai le tulaga o le faalagolagoina ma le galulue faatasi. O le fiasia faatasi o le a fesoasoani lea i tagata uma o le aiga i le faatupuina o ni lagona lelei ma le fiasia.

I le tele o tausaga ua mavae, sa masani lava ona avea gaoioiga faaleaiga ma ni tu masani a aiga. O ia tu e faamautuina a o faia ma galulue faatasi aiga i le faia o mea. E i ai nisi aiga o loo i ai ni a latou faatasiga faaleaiga; o isi e o atu i malologa, asiasi i le malumalu, pe o atu foi e fagogota pe tuli manu; peitai o loo i ai lava isi aiga o loo faia nisi mea e fusia faatasi ai aiga pe faatupuina ai foi mea e fiasia le aiga e fai. O loo i ai le tele o tu e mafai ona faamautuina e aiga, ma e aoga nei tu uma lava: e fesoasoani nei mea i le fusia faatasi o aiga.

Ia fai atu i le vasega e faamatala mai le auala ua fesoasoani ai le taaalo faatasi i o latou aiga. Ia fesili atu i alii talavou po o le a se mea latou te fia faia faatasi ma o latou tama ma o latou aiga foi.

E i ai nisi o i tatou ua pisi tele naua i galuega ma le lotu ae ua faatuatuanai ai i le aiga. Ua le o se mea malie lea i lo tatou Tama Faalelagi. Sa i ai se tasi o tagata, o le na ia faaaluina se vaega tele o lona olaga e auauna atu ai i le Ekalesia, na ia iloaina i se tasi aso ua se ese lona atalii mai ia te ia. Sa lei faaaluina se taimi tele e faatasi ai ma lona atalii, ma o le mea lea na le vavalalata ai i laua e pei o le tulaga e tatau ona i ai i tama ma o latou atalii. Ina ua taumafai o ia e aoao atu lona atalii ina ia ola i le talalelei, sa tetee mai lona atalii ma oo ina avea ma se tagata e le toaga i le Ekalesia.

Ae peitai sa i ai i lenei tama lelei le faautauta e faavavanoaina ai se taimi mo lona atalii, e pei foi ona sa ia faia i isi o lana fanau ua matutua a o lei oo ina tele naua ana galuega e fai. Sa lei lauga atu o ia i lona atalii; ae sa amata ona taaalo faatasi ma ia. Sa amata ona fai e ia mea sa

fiafia i ai lona atalii. Sa o atu faatasi i laua i taaloga. Sa o atu faatasi foi i laua e tulimanu ma fagogota. La te tolauapi faatasi.

Ina ua mavae le tolu tausaga o galulue faatasi i laua i nei gaoioiga, o le taimi lea sa matuai vavalalata ai lava i laua, sa oo ina toe toaga le atalii i le Ekalesia. Sa talia e ia i se taimi mulimuli ane se valaau e fai se misiona. Sa iloa e lenei tama, se tasi o auala e mafai ai ona faatosinaina se atalii o le galulue faatasi lea ma ia i le faia o mea.

Faiuga

O o tatou aiga o mea sili ia ona taua i o tatou olaga, aua ona pau lava ia o mea e mafai ona mafuta pea ma i tatou e faavavau. O le mea lea ua taua ai lo tatou faia o mea o le a fesoasoani ia i tatou i le avea ma aiga e faavavau. O se tasi o nei gaoioiga o le taaalo lea ma fiafia faatasi ina ia paleni ma le tasi itu o le olaga. O le fuafuaina o ni taimi e taaalo ai faatasi o le a fesoasoani lea ia i tatou e ola ai atili i le talalelei. Ia tuuina atu lau molimau i le taua o le taaalo faatasi ma lou aiga.

Lu'i

1. I le faagasologa o le afiafi faaleaiga, ia faatulagaina ai se gaoioiga faaleaiga o le a fiafia uma ai tagata o le aiga.
2. Ia faatulaga se kalena a le aiga ma ia fuafuaina ni gaoioiga atoa e faia e le aiga i masina taitasi.
3. Ia faia—taaalo faatasi ma lou aiga.

Sauniuniga a le Falaoga

A o lei tuuina atu lenei lesona—

1. Ia fai atu i ni tagata se toalua o loo umia le perisitua, e tasi le tagata matua ma le tagata talavou e toatasi e faamatala mai e uiga i se gaoioiga fiafia a o laua aiga na faia.
2. Ia saunia e tuuina atu lau molimau e uiga i le taua o le taaalo faatasi ma lou aiga.
3. Ia fai atu i tagata o le vasega e faitau pe faamatala mai tala ma mau o loo i lenei lesona.

O le Fegalegaleai i Galuega a le Aiga

Lesona 15

O lenei lesona ua fuafuaina ina ia fesoasoani ia i tatou i le faatupuina o ni lagona lelei e uiga i le galulue faatasi ma tagata o le aiga.

Faatomuaga

“[Sa lomía i se nusipepa] se faatalanoaga sa faia ma se tagata leoleo mamoe ua litaea o le sa tusia tausaga o lona matua e faapea ua 165. O le igoa o lenei tagata o Shirali Mislimov. Sa fanau o ia ma ola i lona olaga atoa i luga o Atumauga o Caucasus . . . i le va o le Sami Uliuli ma le Sami Kasipani. . . .

“O loo galue lava pea Mislimov i le tatuuina o laau. ‘Ua ou talitonu e le umi le olaga o se tagata paie,’ o lana faamatalaga lea i le tagata na faatalanoaina o ia. . . .

Sa taua i lea faamatalaga e faapea ‘o loo eli pea e lenei alii matua ni pu faataamilo i laau i se togalaau, sa tele ni taimi o lona olaga atoa sa toto ma toe toto ai.’

“ ‘O le galue e le aunoa, ea o le atumauga, ma le ai faatatau ua fesoasoani ia te a’u e taunuu atu ai i lenei tulaga o le tele o tausaga o le matua,’ o le tala lea a Mislimov, o le e le inu ava malosí e le ulaula foi” (Wendell J. Ashton, “The Sweetness of Sweat,” *Ensign*, July 1971, p. 35).

Na faamatala mai e Elder Neal A. Maxwell le ala na ia aoaoina ai le taua o le galue a o talavou:

“Sa faamanuiaina au i ni matua o e, na avea ma ni tagata faamaoni o le Ekalesia. Sa aoaoina a’u i le tele o mea e uiga i le talalelei i le amataga lava o lo’u olaga, e aofia ai ma le taua o le talalelei o galuega. Sa avea i laua uma ma ni tagata galulue malosí ma taumafai e faasaoina se tupe sa la maua. . . . Sa faigofie ia te a’u ona aoao ina ia fiafia e galue ona sa ia te a’u ni matua o e sa galulue e aunoa ma le faitio” (“Gospel of Work,” *Friend*, June 1975, p. 6).

Sa saunoa mai Peresitene Tavita O. Makei, “Ia tatou iloa o le avanoa taua e galulue ai o se meaalofa, ma o le malosí e galulue ai o se faamanuiaga, ae o le fiafia e galue o se tulaga o le manumalo” (quoted by Franklin D. Richards, “The Gospel of Work,” *Improvement Era*, Dec. 1969, p. 101).

Aisea e taua tele ai o tatou uiga e faaalía i le galue? E faapefea ona aafia le galuega tatou te faia i o tatou uiga? E mafai faapefea ona avea o tatou uiga e faatatau i le galue ma mea e aafia ai a tatou fanau?



Galuega mo le Aiga Atoa

Faaali atu le fesoasoani vaaia 15-a, "E tatau i tagata uma o le aiga ona fesoasoani i le galuega a le aiga."

E tusa lava po o ai i tatou ae po o fea foi tatou te nonofo ai, e tofu uma lava i tatou ma galuega e fai. O lo'u tama e masani lava ona saunia meaai, lavalava, ma mea e nonofo ai i lo latou aiga. O tina e vaaia le aiga ma aoaoina le fanau. Ua tofu tagata uma o le aiga ma le tiutetauave. E tatau i fanau ona malamalama o i latou o se vaega taua o le aiga ma e manaomia tele la latou fesoasoani.

E mafai faapefea ona tatou avefa galuega masani ma se mea fiafia? O a nisi o galuega i le aiga e tatau ona fai e i tatou ma o tatou atalii? (Toe faafou ma tausia fanua ma fale, tausia manu, tiai le lapisi.)

O a nisi galuega masani e fai i le aiga? (Saunia o meaai, fufuluina o ipu, tausia o tamaiti, suisui, fonofono, faia o faatau, ma le faamamaina o mea.)

E i ai nisi taimi atonu tatou te sailia ai ni galuega mo tamaiti. Ua faamatala mai e Elder Loren C. Dunn le auala na foia ai e lona tama lenei faafitauli:

"A o tutupu a'e i matou i se nuu laititi, sa iloa e lo'u tama le tulaga manaomia o le aoao e i maua ma lo'u uso o le mataupu o le galue. Ona o lea manatu, o lea na ia tuuina atu ai i maua ma te galulue i se faatoaga, e le tele, sa ia ola a'e ai. E pule o ia i le falelomitusi, ma e le tele se taimi e mafai ai ona matou galulue faatasi vagana ai le taeao ma le afiafi. O se tiutetauave taua tele lena tiute mo ni alii talavou se toalua, ma o nisi taimi ma te faia ai ni mea sese.

"Sa siomia si a matou faatoaga laititi, i isi faatoaga, ma o se tasi aso na alu ane ai se tasi faifaatoaga i lo'u tama e faamatala i ai le mea o loo manatu o loo sese ona ma faia. Sa faalogologo atu i ai lo'u tama ma le faaeteete ona ia faapea atu lea i ai, 'Jim, e te le malamalama. Vaai oe, o loo ou tausia ni atalii ae le o ni povi.' Ina ua mavae le maliu o lo'u tama, sa faamatala mai e Jim lana tala. Ou te lagona le fiafia tele ona o se tama sa ia tausia ni atalii ae le o ni povi. E ui lava ina sa ma faia ni mea sese, peitai sa ma iloa lava ona galulue i lena faatoaga faatauavaa, ma ou te manatu e ui lava ina sa le faailoa mai e i laua ia te i maua, sa ma iloa lava sa sili ona taua i maua nai lo povi, ma soo se isi lava mea" (*Ensign*, Nov. 1974, p. 11).

Faatulagaina ma le Tofia o Galuega

E aoga uma i tagata o le aiga galuega e faia i le aiga ma o le mea lea e tatau ai ona fiafia i latou e fai a latou vaega ua tofia ai. E tatau ona tofia tagata taitoatasi o le aiga i tiute e talafeagai ma le mea na te mafai ona fai faapea ma le mea e fiafia e fai. O lena tulaga o le a puipuia ai le paie ma faamaeaina ai galuega uma. E oo lava foi i tamaiti laiti e mafai ona tuuina atu i ai ni galuega faigofie.

15-a, E tatau i tagata uma o le aiga ona fesoasoani i le galuega a le aiga

Afai e faatulaga ma tofia galuega e fai i le aiga, e tatau ona tatou fono faatasi ma o tatou aiga ma avea i latou ma se vaega o le faia o filifiliga. E mafai ona tatou faia lenei mea i le taimi o le afiafi faaleaiga, po o le faia foi o se fonotaga faapitoa. E tusa lava po o le a le auala tatou te faia ai, e tatau ona faaoga tagata uma o le aiga i le faatulagaina o galuega, aua o le a i ai le faamoemoe o le a faia e tagata uma a latou vaega o le galuega.

O le tasi auala e faatulagaina ai galuega e fai i le aiga o le saunia lea o se lisi o galuega uma e tatau ona fai, ma e tusia ai galuega uma i le faasologa o lo latou taua po o le faigata. Ona tusia lea o le igoa o se tagata o le aiga i le pepa e sosoo ma galuega taitasi. A maea le lisi, e tatau ona faapipii i se mea e mafai ona faamanatu atu ai i tagata uma o latou tiute.

la tusia le faasologa faataitai lenei i luga o le laupapa pe faaali atu foi i se pepa lautele.

Tiutetauave o le Aiga

Faamama le fanua Fai faatauga	Tama
Suisui ma fonofono lavalava Saunia meaai	Tina
Tatau le susu o le povi Fafaga lafu manu Tiai le lapisi	Ioane
Fufulu ipu Vaai tamaiti laiti	Mele
Faamama le umukuka La'u mai alala	Sara

Pe a mavae se taimi, atonu e mananao tagata o le aiga ina ia fesui ai tiute. O lenei faiga o le a faia ai e i latou se suiga fou ma eseese ai foi galuega latou te fai. Afai e faia lenei mea, e tatau ona suia le lisi o tofiga i se lisi fou.

O lenei auala o le faatulagaina o galuega a le aiga ua na o se auala lea e mafai ona toe fetuunai ma e mafai ona suia ina ia talafeagai ma tulaga manaomia o tagata taitoatasi o le aiga. E tusa lava la po o le a le auala tatou te faatulagaina ai ma tofia a tatou galuega, e taua lava le tusia o tofiga i se ituaiga o pepa lautele po o se lisi. Afai e le mafai e se tasi o le aiga ona faitau, e mafai ona tusia ni ata e fai ma faailoga o upu ma igoa.

Sa iloa e se tasi o aiga o e na latou faaogaina lenei auala, le avea o lenei faiga ma se auala e aoaoina ai se tasi o a latou fanau i le tiutetauave o le vaaia e le tagata o ia lava. I le taimi na fai ai se tasi o

a latou afiafi faaleaiga, sa saunia e le aiga se lisi o galuega e fai i le fale. Sa malie le tama e ono tausaga le matua na te tausia lelei le fanua i luma o lo latou fale. O le uiga o lenei mea, e tatau ia te ia ona fui laau, vele le vao, ma moa le mutia.

I ni nai aso mulimuli ane, sa vaaia e le tama ni pepa o taatitia solo faapea ma le fanua sa le teuina lelei. Sa manatu o ia o le a ia faia le galuega a le tama. Peitai sa ia iloa afai o le a ia faia, o le a toe aveeseina e ia le tiutetauave na ia tuuina atu. O le mea lea na ia tuu ai le fanua i le tulaga e pei ona sa ia iloa ai.

O le afiafi na sosoo ai na faaoslo ai ina mataga le fanua. Sa lei faia e lona atalii galuega. O le mama mai o fanua o ona tuaoi na foliga mai ai na sili atu ona mataga lo latou fanua. Sa manatu le tama i le tele o le tupe alu i laau pe a mamate. Sa tau manatunatu foi o ia pe ua mamafa naua le galuega ua ia tuuina atu mo lona atalii e ono tausaga le matua. Peitai sa toe manatu ifo e sili atu le taua o lona atalii nai lo le fanua, ma o le mea lea na ia musu ai e fai le galuega mo ia.

Ae peitai, sa talosagaina e le tama lona atalii pe mafai ona o atu i laua e savavali solo i le fanua ma matamata i le tulaga o ia mea. Sa malie le atalii i lea tulaga. Ina ua uma ona la savavali solo i le fanua, sa faapea mai le tama, “Tama, e faigata tele!” Sa faapea atu le tama, “E te manao ia ou fesoasoani atu ia te oe?” “E lelei tele lena!” o le tali lea a lona atalii. “Ia faatali iinei.” Sa momoe atu le tama i totonu o le fale ma aumai taga e lua, ma talosaga atu i lona tama na te faamamaina se vaega o le fanua, ae faamama e ia le isi vaega atoa. Sa maea lea galuega i ni nai minute mulimuli ane. Ma sa ki e le atalii le vai e faasusu ai laau.

E atoa ane le lua vaiaso ua matua mataala lelei le tama e tusa ai ma le vaaiga o le fanua. Sa iloa e ia afai na te le faia lea galuega, e leai se isi o le a ia faia. Sa iloa e ia le faalagolago o lona tama ia te ia ma faatuatua. (Adapted from Stephen Covey, *Spiritual Roots of Human Relations*, pp. 145–46.)

Sa faapefea ona fesoasoani lenei tama i lona atalii i le faataunuuna o lona tiutetauave?

E le gata i le saunia o le fesoasoani mo le tagata lava ia, ae e mafai foi ona tatou tuuina atu ni tau i ititi e uunaiina ai fanau ina ia faamaeaina a latou galuega.

O le tiutetauave o le aoao atu faapea ma le felagolagomai i galuega fai o se mea taua lea. O le faatulagaina o le aiga ina ia i ai i tagata uma ni tiute patino e mafai ona fesoasoani ia i tatou o matua i le faia o lea mea. Ae ui i lea, e le tatau ona galo ia i tatou le faaavanoaina o se taimi e malolo ai. Ua faamanatu mai e Elder Franklin D. Richards ia i tatou ina ia fuafuaina se taimi e malolo ai faapea foi ma se taimi e galue ai: “I le sailia o ni auala e faatupuina ai atili le fiafia e galue, e le tatau ona tatou manatu mama i lea tulaga o le malolo. E ui lava ina e matua taua

lava le galue i le tulaga alualu i luma, e faapea foi ona taua le malolo lelei. [O le mafai ona faapaleni o le tulaga o le galue ma le malolo] o se mea taua lea i le faatupuina o le fiafia e galue. Ua finagalo le Alii ia i tatou taitoatasi ina ia galueaina se tulaga paleni lelei i le va o le galue ma le malolo atoa foi ma tulaga faaletino ma le faaleagaga o le olaga” (“The Gospel of Work,” *Improvement Era*, Dec. 1969, p. 103).

O le Taua o le Galulue Faatasi

O le a le taua o le galulue faatasi o se aiga? Ia lisi i luga o le laupapa fautuaga a le vasega.

A o galulue faatasi i tatou ma o tatou aiga, o le a maua e i tatou le olioli i le vaai atu i taunuuga o a tatou taumafaiga tuufaatasi. O le a maua e i tatou le lagona o le vavalalata ma o tatou aiga, ma o le a iloa e a tatou fanau ona felagolagomai ma fesoasoani le tasi i le tasi i tiutetauave. O le a maua e i tatou le olioli i le avea ai ma matua ona o lo tatou usiusitai i le finagalo o le Alii, ma o le a aoga foi i tagata taitoatasi o le aiga le faagaoioia o le tino.

“I se tasi o aiga o le Au Paia o Aso e Gata Ai, sa avea ai le tama ma se fomai, sa manatu mamafa ia matua i le aoaoina o la laua fanau i le taua o le galue. Sa iloa e i laua lo la tuueseina atu o se avanoa e alualu ai i luma la laua fanau i lo la faafaigaluegaina o se tagata e faamamaina le ofisa.

“Sa tauaveina e le fanau, o e sa fiafia i le avanoa e maua ai sina tupe i taimi masani, e tauaveina le galuega o le faamamaina o le ofisa i taeao taitasi. Sa avea le galulue faatasi ma se mea taua. E faamama e teine o le aiga le ofisa i se tasi taeao ae nonofo tama i le fale e fesoasoani i tiute o le aiga; e fesuisui ai o latou tiute i le taeao e sosoo ai. . . .

“O le taunuuga la na oo i ai lenei galuega: (1) sa malamalama le fanau i le galuega a lo latou tama. . . . (2) Sa lagona e le fanau o i latou o se vaega o le pisinisi a lo latou tama, ma sa lagona e i latou le mitamita i lana galuega. (3) sa i ai i le fanau se galuega masani latou te faia faatasi ma galuega latou te faia i aso taitasi faapea ma se lagona o le i ai o se tiutetauave i le vaai ua faamaeaina le galuega. (4) Sa atinae e tamaiti le tulaga o le galulue faatasi. . . . (5) Sa maua pea e tamaiti se tupe maua mai” (Elwood R. Peterson, “Family Work Projects for Fun and Profit,” *Ensign*, June 1972, p. 8).

O le a le tulafono o le seleselega? (“Tatou te selesele mea tatou te lulu.”) Ia tusi lenei tulafono i luga o le laupapa.

O galuega uma tatou te faia e i ai sona lava tau. A o toto e i tatou togalaau ma tausia lelei, tatou te olioli i fua o a tatou galuega i le taimi o seleselega. A o fausia ma toe faafouina e i tatou o tatou fale, e faasolo ina maua atili e i tatou le toafilemu ma le saogalemua. A o tausia e tatou o tatou lava lavalava ia mama ma matagofie, o le a maua e i tatou le olioli i se tulaga sili atu ona toafilemu ma faia ai se faaitaiga lelei o le mama. A o saunia e i tatou meaai sili atu ona aoga

ma tausia ia mama mea e faaaoga i meaai, o le a maua e i tatou le olioli i se tulaga sili atu o le soifua maloloina lelei.

O se tasi o sini o le galulue o le aiga o le faatupuina lea o se uiga lelei ma ia aoao ina ia galue. E avea tagata ma ni tagata faalagolagoina a o tauaveina e i latou tiutetauave ma maua le fiafia i le lotomalie ona o se galuega ua faataunuua lelei. Sa saunoa mai Peresitene Spencer W. Kimball e faapea:

“Ou te faamoemoe ua tatou malamalama, a o i ai so tatou togalaau aina, mo se faaitaitaiga, e masani lava ona aoga tele i le faaititia ai o tupe e alu i meaai ma mafai ai foi ona maua fualaau aina ma fualaau faisua e matagofie i le taumafa, peitai e i ai se isi tulaga e sili atu nai lo lenei tulaga. O ai ea e mafai ona iloa le taua ma le aoga o lena talanoaga faapitoa i le va o le afafine ma le tama a o vele e i laua vao ma fui le togalaau aina? Pe faapefea ona tatou iloiloina le tulaga lelei e maua mai i lesona o le totoina, atinaeina, faapea ma le tulafono e faavavau o le seleselega? Ae pe faapefea ea ona tatou fuaina le tulaga o le galulue faatasi o le aiga faapea ma le felagolagomai e tatau ona i ai i tulaga faamanuiaina o le tuuapaina o meaai? loe, o loo tatou teuina mea e maua mai ai le fesoasoani, peitai atonu o le tulaga e sili atu ona lelei o loo i ai lea i lesona o le olaga tatou te aoaoina a o tatou *ola fuafua lelei* ma tuuina atu ia tatou fanau lo latou tofi faapaionia” (“Welfare Service: the Gospel in Action,” *Ensign*, Nov. 1977, p. 778).

O loo ta’u mai i le tala lenei le ala na aoaoina ai e se tasi tagata o se aiga le taua o le galulue faatasi ma lona aiga:

“I le faagasologa o masina o le vaeluaga o le taumafanafana, sa i ai le tele o eka o laau e fai ai le suka sa tatau ona tasei nisi laau e faavalavala. O le uiga o lea mea o le tatau lea ia i matou ona eli ese nisi o laau ina ia lava le avanoa e lapopoa ai i’o suamalie o laau sa matou taseiina, peitai sa lagona e i matou le vaivai tele i le punou i le aso atoa i le seiina o ia laau. Sa ou taumafai i se tasi aso ina ia ou nofo i le fale ae aua nei o’u alu atu i na laina uumi o laau e fai ai le suka i o’u lima ma o’u tulivae. Sa ou fai i lo’u tama ua tiga lo’u ulu—ma o se tulaga sa mautinoa lava—peitai sa ia le tuuina mai ia te a’u se faatagaga e malolo ai. O le mea lea sa matou savavali uma atu ai i le fanua ma amata ona galulue.

“Ina ua mavae sina taimi, sa ou toe fai atu i lo’u tama ua tiga lo’u ulu. Sa foliga manino mai sa le talitonu lo’u tama ia te au aua sa ia le tuliina a’u i le fale. Sa ou faitio ma saga faitio e uiga i le tiga o lo’u ulu. . . . Sa oo lava ina faapea mai lo’u tama, ‘Ua lelei, ia e alu atu i le fale ma fai i lou tina e sau e sui oe i le seiina o laau e fai ai le suka.’ Sa avea lea mea ma mea na ou fefe ai—sa lei i ai ia te au le manatu e sau lo’u tina i le fanua e fai la’u galuega. Sa ou fai atu i lo’u tama e sili ia te a’u lo’u nofo ma galue’ a o ou galue, sa te’a le tiga o lo’u ulu ma sa ou le toe faitio.”

O le a se mea na aoaoina e lenei teineitiiti mai le tulaga na oo i ai? (Atonu e aofia i tali le taua o le galue, le faia o lana vaega, ma le faaaloalo i ona matua.)

Faaiuga

Sa saunoa mai Elder Neal A. Maxwell e faapea:

“Ou te le talitonu e mafai ona maua e tagata le fiafia sei vagana ua latou maua se galuega e fai. E mafai ona matua avea se tasi ma se pologa i le nofonofo nai lo le pologa i le galue. O le galue foi e faatumauina ai ia i tatou le lotomauualalo ma faamanatu mai ai ia i tatou le ala e oo mai ai o tatou faamanuiaga uma mai lo tatou Tama Faalelagi. . . .

“O le talalelei o galuega o se aoaoga taua tele lea i le Ekalesia. Afai tatou te aoao ina ia galulue i le amataga lava o le olaga, o le a avea i tatou ma ni tagata taitoatasi sili atu ona lelei, avea ma ni tagata sili atu ona lelei o aiga, o ni tuaoi sili atu ona lelei, faapea ma ni soo sili atu ona lelei o Iesu Keriso, o le na aoao foi ia galue e avea ma se kamuta” (“Gospel of Work,” *Friend*, June 1975, p. 7).

Lu'i

1. Ia fiafia ma ia aua ne'i faitio e uiga i lau galuega.
2. Fuafua, faatulaga, ma saunia se faasologa o taimi mo galuega a le aiga i lenei vaiaso e faailoa atu ai i tagata o le aiga o latou tiute.

Mau Faapoopo

Faataoto 6:6–11 (faataitaiga a le loi)

Efeso 4:28 (o le fautuaga ina ia faalagolago le tagata ia te ia lava ma ia agaalofa)

1 Tesalonia 4:9–12 (ia galulue le Au Paia i o latou lava lima)

2 Nifae 5:17 {Ua uunaiina sa Nifae ina ia galulue malosi)

MFF 42:42 (Ia le 'ai le paie i le areto a le galue)

Talafaasolopito o Iosefa Samita 2:55 (Sa galue Iosefa Samita)

Sauniuniga a le Faiaoga

A o lei tuuina atu lenei lesona—

1. Faitau i le tusi *O Mataupu Faavae o le Talalelei*, mataupu 27, “Galuega ma Tiutetauave Faaletagata Lava Ia.”
2. Iloilo *Tiute ma Faamanuiaga o le Perisitua, Vaega A*, mataupu 23 “O le Faatupuina Atili Faapea ma le Faaleleia o Tomai i Mea Tau Galuega.”

O le Faia o Togalaau i le Aiga

Lesona 16

O lenei lesona e tatau ona uunaiina ai i tatou ina ia faaleleia atili o tatou atamai i le totoina o togalaau aina a le aiga.

Faatomuaga

Sa saunoa mai Peresitene Kimball e faapea: “Matou te uunaiia outou ina ia toto meaai uma e mafai ona toto i o outou lava fanua totino. Ia toto fualaau aina uma e mafai ona ola i lo outou atunuu. Toto fualaau faisua ma faaoga mai a outou lava togalaau. E oo lava ia i latou o loo nonofo i fale mautotogi e mafai foi ona toto nai laau i pusa. Suesue i faiga sili mo le saunia o a outou lava mea taumafa. Ia faamatagofie togalaau ma teuteu ina ia fua lelei mai. Afai e i ai ni fanau i totonu o o outou aiga, faaoga i latou i le tuu atu i ai o ni tiute e fai” (“Saunia o Aiga,” *Liahona*, Oketopa 1976, i. 123.)

Sa fetalai mai le Faaola, “Se a ea le mea e taua ai a’u e outou, Le Alii e, le Alii e, ae tou te le faia mea ou te fai atu ai?” (Luka 6:46). Afai tatou te talitonu moni i upu a lo tatou Faaola, o le a tatou usiusitai i le fautuaga a lana perofeta.

O Tau i le Faia o Togalaau i le Aiga

E tele mafuaaga lelei e tatau ai ona i ai ni togalaau aina:

LOTOGATASI O LE AIGA

O aiga e galulue faatasi i so latou togalaau aina e atinae ai le lotogatasi i le aiga aua e tasi se faamoemoega e i ai ia i latou uma. Sa saunoa mai Peresitene Kimball e faapea: “Matou te faamoemoe o loo outou avefa lenei galuega o le faia o togalaau aina ma se galuega faaleaiga, e tofia ai tagata uma, e oo lava i tamaiti laiti, i se mea e fai. O loo i ai le tele o mea e aoaoina ma seleseleina mai ia outou togalaau aina, o ni mea ia e sili atu lo latou taua nai lo le na o ni fua e maua mai ai” (*Ensign*, May 1978, p. 79).

MAUA O LE AGAGA FAAFETA I MO GALUEGA

O le i ai o se togalaau aina o le aiga o le a fesoasoani lea i le fanau i le aoaoina o le aoga o le galue. Pe a uma ona fesoasoani i latou i le aiga i le totoina o se togalaau faapea ma le tausia, o le a maua ai e i latou le olioli i le vaai atu i fua vaai.

LAVA O MEA E TAUSI AI LE TAGATA LAVA IA

O le totoina o se togalaau aina e fesoasoani lea ia i tatou i le faatupuina atili o le toafilemu a o faasolo ina saunia atili i tatou mo le faatauina o o tatou lava tulaga manaomia. Ua tatou iloa afai e oo mai faafitauli e mafai ona tatou foia—aua ua tatou faasaoina ni fualaaui aina, totoina se togalaau, ma toto laau e fua mai i fuata. O loo i ai foi ma se isi faamanuiaga o le iloa lea e mafai foi ona tatou fesoasoani atu ia i latou o loo manaomia le fesoasoani.

AOAOGA MA LE FIAFIA

O le i ai o se togalaau e faamanatu mai ai ia i tatou mea matagofie o lenei lalolagi na foafoaina e lo tatou Tama Faalelagi mo i tatou. E mafai ona tuuina mai e se togalaau ia i tatou le tele o itula o aoaoga ma le fiafia a o tatou molimauina le vavega o le tutupu a'e o mea. Ua faamatala mai e Peresitene Spencer W. Kimball ia i tatou e faapea o le i ai o se togalaau o le “a faamanatu mai ai ia i tatou tulafono uma o le seleselega. . . E moni tatou te selesele i mea tatou te luluina, e tusa lava foi pe o le vaega elelee o loo e faatoaina, totoina, ma seleseleina o se elelee laititi, e mafai ai ona felatai le natura faaletagata ma le natura e pei o le tulaga lava sa i ai i le amataga i o tatou uluai matua” (*Ensign*, May 1978, pp. 77–78).

SOIFUA MALOLOINA

E alofa le Alii ia i tatou ma e finagalo ina ia maua e i tatou le ola maloloina lelei. O le totoina o a tatou lava fualaaui faisua ma fualaaui aina o le a fesoasoani ia i tatou ia soifua maloloina. O le tulaga masani lava, o meaai tatou te faatauina e le fou e pei o meaai mai o tatou lava togalaau aina.

FAAITIITIA TUPE ALU

O le faia o togalaau aina o le aiga e masani lava ona faaitiitia ai tau o le soifuaga. O le taumafalia o fualaaui aina ma fualaaui faisua mai o tatou lava togalaau o le a mafai ai e i tatou ona faasaoina ia tupe semanu tatou te faaluina i meaai mai isi tagata.

Ia Amata i se Fuafuaga

A o lei faatinoina le totoina o a tatou togalaau, e tatau ona tatou faia ni filifiliga.

O FEA TATOU TE TOTOINA AI?

Faaali atu le fesoasoani vaaia 16-a, “E mafai e se togalaau aina o le aiga ona maua mai ai ni ituaiga meaai eseese,” 16-e, “O togalaau e mafai ona totoina i soo se mea,” ma le 16-i, “E mafai ona toto fualaaui faisua i ni paelo pe afai e le maua se fanua.”

16-a, E mafai e se togalaau aina o le aiga ona maua mai ai ni ituaiga meaai eseese

16-e, O togalaau e mafai ona totoina i soo se mea

16-i, E mafai ona toto fualaaui faisua i ni paelo pe afai e le maua se fanua







E manaomia e se togalaau aina se fasi laufanua e sili ona lelei e mafai ona maua, aua o le a avea ma se fasi laueleele aoga. E sili lava ona lelei se fasi laueleele e susulu pea i ai le la mo le tusa o le ono itula.

Afai e mafai, e tatau ona latalata i le fale le togalaau aina. Afai e leai, e tatau ona lava lona latalata ane ina ia faigofie ai ona oo atu i ai. E le tatau ona malifa tele ina nei tafe ese atu le vai ma aveese atu ai le elelee ma fatu. Afai o le a tatau ona faia se togalaau aina i se vaega malifa, e tatau ona faataamilo ia le faiga o moega ae le o le faatutu i luga ma lalo.

E taua foi le elelee. Afai o le a tele naua le oneone, o le a le mafai ona nofo ai le vai. Afai foi o le a tele naua le ele, o le a to'a i luga le vai ma tuai ona mitiia e le elelee. E mafai ona foia faafitauli uma e lua e ala i le faapoopo i ai ma le oneone pe afai e tele naua le ele po o le faapoopo foi i ai o le ele pe afai e tele naua le oneone faapea ma elelee e faapala. Afai e le lava le timu i lea nofoaga, o le a manaomia le vai mo le faasusuina o le elelee.

O i latou o e e nonofo i fale maototogi e feagai ma ni faafitauli faapitoa ona o le lava o avanoa. E mafai ona faia ni togalaau o nei tagata i totonu o ni apa ma mea e toto ai laau toto, po o le faaoga foi pe lisi se laueleele o se isi tagata. O le mea lenei na fai e ni aiga se lua i Siamani ina ia maua ai se togalaau aina. Sa tusi mai nei aiga ia Peresitene Spencer W. Kimball i le mea na latou oo i ai e faapea:

“O i matou o ni aiga se lua i le Misiona a Frankfurt, ma ua matou [tusi atu ina ia] faamatala atu ia te oe e uiga i la matou togalaau aina.

“Sa le faigofie ona maua se fasi elelee i totonu o se aai tele e pei o Frankfurt—o se togalaau laititi lava—ma ina ua matou lisiina lea fasi elelee, sa foliga mai o se vaomatua, e i ai sona pa ua malepe, o se fale malepe, faapea, ma ni mutia. Sa lei faavaivaiina ai i matou.

“Sa muamua lava ona matou faia se pa, toe faafou le fale, ma eli le togalaau aina. Sa matou totoina ni fualaau faisua i le taimi o le tautotogo ma sa ta'u mai e tuaoi ia i matou o le a ola le togalaau. O loo i ai se vaitafe itiiti e mafai ona matou o atu i ai i a matou uila [ma ave ni a matou apa] ma o le auala lena sa asu mai ai vai. Sa matou tatalo i le Alii ina ia faamanuia i la matou togalaau aina. Sa tali mai le Alii i a matou tatalo. Sa oo mai ituaiga eseese o fualaau faisua. O se mea matua matagofie lava le vaai atu o tutupu a'e laau” (as quoted by Spencer W. Kimball, *Ensign*, Nov. 1976, p. 5).

O A MEA TATOU TE TOTOINA?

O le filifiliga lona lua o le tatau lea ona tatou filifilia po o a mea e tatau ona toto. O nisi elelee o togalaau aina e tele se avanoa; o isi e na o sina vaega itiiti lava. Afai e le lava le avanoa, e tatau ona tatou filifili laau e tutupu agai i luga e pei o pi, o tamato e faasosolo agai i laau .

E mafai foi ona faasaoina avanoa i le totoina o fatu e fua tele mai, e pei o melo, ma tamato, ae le o le totoina o fatu e na o le tasi le fua toe tasi le i'o e maua mai ai i le mea e tasi, e pei o le lakisi.

E ui lava ina atonu e tatau ona tatou faasaoina avanoa, ae tatau foi ona tatou filifili meaai e maua ai e o tatou aiga mea aoga mo le tino latou te manaomia. E tatau foi ona totoina na o meaai latou te fiafia i ai ma o le a latou faaaogaina. O meaai e i ai le pi ma lama e fesoasoani i le toe faaleleia o aano o le tino. O fualaau aina ma fualaau faisua e puipuia i tatou mai faamai. O laau e faaoga o latou i'o e maua ai le malosi. O laau e faaoga o latou fatu e maua ai foi le malosi pe afai e lava se avanoa e toto ai. O le mea moni, i le faia o a tatou filifiliga, e tatau ona tatou filifilia na o meaai e ola lelei i lo tatou tau ma le eleele.

la faaali atu se siata pe tusia foi i luga o le laupapa lisi patino o fua o fualaau aina, fualaau faisua, laau e sosolo, o laau e aoga o latou i'o, ma laau e aoga o latou fatu e mafai ona ola i lo outou atunuu.

O le fea o a tatou laau toto e sili ona tele meaai e maua mai ai ae aupito laititi le vaega eleele e alu ai?

O se manatu lelei le tusia o se faafanua o a tatou togalaau i tausaga taitasi a o tatou fuafuaina a tatou mea e toto. E le tatau ona toto le ituaiga laau e tasi i le nofoaga sa totoina ai i le tausaga ua mavae. Afai e le fesuisuiai laau e totoina i lea nofoaga ma lea nofoaga, o le a faasolo ina le ola lelei.

Faaali atu le fesoasoani vaaia 16-o, "O se ata faataitai o se togalaau aina."

O LE A LE TAIMI TATOU TE TOTOINA AI?

O le tasi filifiliga e tatau ona tatou faia o le taimi lea e totoina ai. E eseese lava meaai ma tulaga sili ona lelei e ola ai. O nisi laau toto e sili atu ona ola lelei i se vaitaimi matutu, a o isi e sili ona ola lelei i le vaitaimi o le susu o le eleele. O nisi laau toto e sili ona ola lelei i tau e sili atu ona malulu, e pei o beets, kapisi, karoti, latisi, aniani, pi, ma spinach. O isi e ola lelei tele i le tau mafanafana e pei o pi, sana, meleni, melo, ma tamato. E tatau ona tatou iloa po o a meaai e mafai ona tatou totoina ae po o le a foi le taimi e tatau ona toto ai.

la faaali atu se siata e faailoa atu ai taimi e toto ai nisi o laau e patino i lo outou nofoaga.

Sauniaina o le Nofoga e Fai ai le Togalaau Aina

I le fa i le ono vaiaso a o lei oo i le taimi e toto ai se togalaau aina, e tatau ona faamama le nofoaga o le a faia ai mai vao, tagutu laau, maa, otaota, ma fasi laau. E tatau ona faamalu le eleele i se suo ina ia faigofie ona mitiia le vai e le eleele. O le a lelei le eleele mo le totoina o mea pe afai e malu lelei, ae le o le patupatu.

E mafai ona faaleleia atili le tele o eleele. O eleele faapala, e afia ai laau ma otaota o manu ua pala lelei, o le a faaleleia atili ai le lelei o eleele e tele i le oneone ma eleele e tele i le ele. E fesoasoani tele foi eleele faapala i le maua ai o fua e sili atu ona tele ma sili atu ona lelei



aua e faapoopoina ai mea aoga i laau mai le eleele. Ae ui i lea, o eleele faapala e saunia lelei, e le mafai ona faia ma faapoopoina i le eleele i le aso lava e tasi. E masani lava ona alu le fa i le ono masina o faapala ni eleele fou. Ona o lenei tulaga, ua saunia ai e nisi tagata se faaputuga otaota e faapala i tausaga uma ma faapoopo i a latou togalaau aina i le tausaga e sosoo ai.

E le faigata ona faia se faapalaga o eleele fou. Muamua, e tatau ona sailia se nofoaga mo le faapalaga. O lenei la nofoaga, atonu o se nofoaga avanoa e mamao ese mai le vaiinu, o se lua, po o se pusa foi e tolu ona itu e faia i laupapa pe puipui foi i ni uaea e tuu i luga o le eleele. O le mea e sosoo ai, e fola i luga o lea nofoaga ni otaota e ono inisi le mafiafia (e pei o lau laau, o le uso o le sana e tipitipi pe a uma ona ai, vaovao, pa'u o laau aina po o fualaau faisua, po o meaai e totoe), ma ia faateete ina ia aua nei i ai ni atigiapa, fasiuamea, ponaivi, ga'o, faapea ma isi mea e le pala vave. Ia faapoopo i lenei vaega o otaota o manu po o moa. O otaota o povi, moa, mamoe, 'oti, solofanua, ma puaa, e lelei tele i le faia o faapalaga o eleele fou. E le tatau lava ona faaaogaina otaota o tagata po o manu e aai i aano o isi manu: o nei otaota e faaleagaina ai le eleele.

Faaali atu le fesoasoani vaaia, 16-u, "O le faapalaga o eleele fou."

Ia faamaea le faaputuga o eleele fou e ala i le ufiufi o ia mea uma i se eleele e 2" le mafiafia. Ia faaomo le pito i luga o le faaputuga ina ia tafe i ai le vai. A o aoaoina mai nisi otaota, e ufiufi le ono inisi o otaota i le lua inisi o le palapala. E faasusu vaega taitasi a o faapoopoina i le faaputuga.

E tatau ona faasusu pea le faaputuga e le aunoa, ae le o le faasusu tele, ma ia feliiui i vaiaso uma i se tui ina ia alu se ea i le ogatotonu. O le a atili ona vave pala le faaputuga pe afai e oo le vevela o le ogatotonu i le 71 tikeri senitikereti. Afai ua le toe manogi le faaputuga, o lona uiga ua tatau ona faapoopo atu le eleele faapala i le eleele tuai.

Ia fai atu i nisi e faamatatala mai a latou lava faiga e fai ai a latou lava faapalaga o eleele fou.

O le Totoina o le Togalaau Aina

I nofoaga e puupuu ai le vaiataimi e ola ai laau, e mafai ona amataina se togalaau aina i totonu o le fale i ni eleele e tuu i ni apa. Afai e amata se togalaau aina i fafo, e tatau ona toto fatu i ni laina sasao ina ia mafai ai ona iloa laau toto laiti mai vao. O le a fesoasoani le faaaogaina o se manoa i le faasa'oina o laina.

E avea pea lava ma se manatu lelei le totoina o laina o le laau toto e tasi, e pei o le sana, i vaiaso uma mo se faasologa o ni vaiaso se tele ina ia le matua faatasi laau toto uma. E eseese fatu i lo latou lapopoa, o le mea lea e le mafai ai ona totoina i le loloto e tasi. O le tulaga



masani lava e tatau ona totoina fatu ia le sili atu le loloto nai lo le faatoluina o lo latou fua faalava i le ogatotonu. E tatau ona omiomi faatau lelei le eleele i luga o fatu, ma ia lava se avanoa i le va o laina o fatu e faatatau i le toe faamapuepueina o le eleele faataamilo i laau toto a o tutupu a'e. E tatau foi ona i ai se avanoa i le va o fatu.

A uma ona toto fatu, e tatau ona faasusu i taimi uma le eleele. Afai e mago le eleele, o le a le mafai ona tutupu a'e fatu.

O le Tausiga o le Togalaau Aina

E leai se aoga tele o fuafuaga uma, sauniuniga, ma le totoina o laau toto pe afai e le tausiga lelei le togalaau aina pe a mavae lea taimi. O lea la tausiga e aofia ai mea nei:

FUI VAI

E tatau ona matua fui lelei le togalaau aina pe tusa o le faatasi i le vaiaso pe afai e le lava le timu. E tatau ona susu le eleele i le fitu inisi le loloto i le taimi e uma ai ona fui. E sili lava ona lelei pe a le fuiina le togalaau a o vevela le la ina ia puipuia ai le eleele mai le malo.

FAATO'A

O le i ai o vao e aveesea ai faamalosi le vai ma meaaoga mai laau toto. E tatau ona vele ese vao pe eli ese foi. E mafai ona avea le tanu o le eleele i ni otaota ma mea e puipuia ai mai le ola a'e o le vao, peitai e tatau lava ona saeu i se itu e tasi pe tusa o vaiaso uma ina ia mafai ai ona faamaluina le eleele ona toe ufiufi lea.

OTAOTA E UFIUFI AI LE ELEELE

Afai o le a maualuluga laau toto i ni inisi se tele, e tatau ona vele ese ni vao e i ai, ma ia faataamilo i laau taitasi ni penuili, nusipepa ua saesae ninii, mutia, laulaau, po o ni vaovao ia tusa o le lua i le tolu inisi le mafiafia ma ia faapena foi i le va o laina. E fesoasoani le otaota i le puipuia o le eleele mai le mago po o le vevela tele. O le toatele o tagata o e e faaaogaina otaota e ufiufi ai le eleele ua latou iloa le itiiti o le vao latou te veleina.

IA TAOFIOFI LE FAALEAGAINA O LE TOGALAAU AINA E INISETI

E faaleaga e iniseti laau toto ma e mafai foi ona faaleagaina ai le togalaau aina atoa. E mafai ona aveesea i le lima iniseti, fufulu ese, pe fasi mateina i se vailaau. Afai e faaaoga se vailaau, e tatau ona faamama lelei meaa i a lei faaaogaina.

SELESELE FUA O LAAU TOTO

O le a sili ona lelei le tofo ma sili ona maualuga mea aoga i le tino e maua i fualaau aina ma fualaau faisua e tau mai i le taimi e faaaoga ai i le kuka, meaa, po o le faasaoina. O nisi o laau toto, e pei o kukama,



e sili atu ona tele fua e maua mai ai pe afai e tau soo. O nei laau e le tatau ona faatagaina e matua tele, vaivai i le la, pe mago. E tatau ona seleseleina laau e aina o latou lau a o laiti ma mu'amua.

Faaali atu le fesoasoani vaai 16-f, "O se seleselega lelei o le taunuuga lea o le faia lelei o togalaau aina."

Faaiuga

E mafai ona tatou faaali atu tatou te alofofa i le Alii ma e faatuatua e i tatou o la e ala i le faia o mea ua ta'u mai e Ana perofeta ia i tatou. O se tasi o mea ua talosagaina ai i tatou e perofeta e fai o le totoina lea o se togalaau aina. Afai o le a fuafua e i tatou taitoatasi, saunia, ma tausia lelei le togalaau aina, ma tausia ia faatulagaina lelei ma fua tele mai, o le a faamanuiaina i tatou i le tele o auala.

O le a le mea e tupu i se togalaau aina pe afai tatou te fuafua, saunia, ma toto ae tatou te le tausia lelei?

Ua fautuaina i tatou e Peresitene Kimball e faapea: "Teuteu lelei o outou lotoa ma togalaau. E tusa lava po o le a le tulaga o loo outou i ai, ia atagia mai i o outou fale ma aiga, faatulaga lelei o mea uma, matagofie, ma le fiafia. Fuafua lelei ma faataunuu ia fuafuaga i se tulaga ma se faasologa faatulagaina" ("Saunia o Aiga," *Liahona*, Oketopa 1976, i. 123.)

Lu'i

la galulue faatasi ma tagata o lou aiga i le totoina ma le tausia o se togalaau aina matagofie ma fua tele mai.

Mau Faaopopo

MFF 59: 16–19 (o mea lelei o le lalolagi ua saunia mo le tagata)

Sauniuniga a le Faiaoga

A o lei tuuina atu lenei lesona—

1. la aoao mai lo outou faletusi, o fautua o mea taufaatoaga i le alalafaga, po o tagata ua i ai le poto masani i le faiga o togalaau—
Po o a laau toto e sili ona fua lelei i se togalaau aina o se aiga.
Aso e toto ai ituaiga taitasi o laau toto.
Le auala e faia ai se faapalaga faamanuiaina o otaota i se togalaau o se aiga.
O le auala e fui ai, vele ai, ufiufi ai le eleele i le otaota, faato'a, ma pulea le faaleagaina e iniseti o se togalaau i se aiga.
2. la saunia se siata pe fuafua foi e tusi i luga o le laupapa le faamatalaga e faaogaina i le lesona.
3. Tofi se tagata o le vasega na te faamatalaina se taumafaiga faamanuiaina na oo i ai i le totoina o se togalaau aina.
4. la fai atu i tagata o le vasega e faitau pe faamatala mai tala ma mau o loo i lenei lesona.

16-f, O se seleselega lelei o le taunuuga lea o le faia lelei o togalaau aina

Sini a le Tagata ia ma le Aiga

Lesona 17

Ua fuafuaina lenei lesona ina ia fesoasoani ia i tatou mo le faatutuina ma le faataunuaina o sini a le aiga faapea ma sini a le tagata lava ia.

Faatomuaga

Ina ua sefulufa tausaga o le soifua o Peresitene Spencer W. Kimball, sa asiasi atu se taitai o le Ekalesia i le konafesi a le latou siteki. Sa faatonuina e lenei taitai le faapotopotoga e tatau ona latou faitau i tusitusiga paia. I le toe faamanatuina la o lea tulaga na oo i ai, sa saunoa mai ai Peresitene Kimball e faapea:

“Sa ou iloa ou te lei faitau lava i le Tusi Paia, [o lea] i lenei lava aso ina ua maea lenei lauga, sa ou savali atu ai loa i lo'u aiga ma ou alu a'e i lo'u potu itiiti i le pito i luga o le fale ma tutu se tamai moli sa i ai i luga o se laulau itiiti, ma sa ou faitauina ai loa uluai mataupu o le Kenese. Sa ou tapunia le Tusi Paia i se tausaga mulimuli ane ina ua uma ona ou faitauina mataupu uma lava o loo i ai i lenei tusi tele ma le matagofie. . . .

“Sa ou iloa e i ai nisi o vaega faapitoa sa faigata e se tamaititi ua sefulufa tausaga le matua ona malamalama i ai. Sa i ai ni itulau ou te le'i fiafia tele i ai, peitai ina ua uma ona ou faitauina le tusi atoa, sa ou maua le loto fiafia ona sa ou faia se sini sa mafai ona ou faataunuaina” (*Ensign*, May 1974, p. 88).

O se sini o se mea lea ua tatou mananao ina ia maua. I lo tatou muai olaga, ina o avea ma fanau faaleagaga a le Tama Faalelagi, sa tatou iloa ai o lenei olaga o le a avea ma se taimi e alualu ai i luma i le agai atu i le avea e faapei o lo tatou Tama Faalelagi. E tatau ona avea lea ma a tatou sini autu i le olaga. Ina ia taunuu atu i lenei sini, e tatau ona tatou faatutuina ma faataunuaina ni sini e lagolago i ai. O le faatutuina o ia sini o le a fesoasoani foi ia i tatou ia ola ai i se olaga atoatoa ma le tamaoaga.

O le Filifilia o Sini a le Tagata Lava ia ma Sini a le Aiga

O le laasaga muamua lava i le filifilia o sini o le mafaufau lea e uiga i le auala o loo tatou ola ai ma filifili i se auala e faaleleia ai atili. Ona mafai ai lea e i tatou ona filifili ni sini a le tagata lava ia po o sini a le aiga e fesoasoani ia i tatou ina ia alualu i luma. Afai ua tatou mananao ina ia malolosi i le faaleagaga, mo se faataitaiga, e tatau ona tatou iloiloina le tulaga o lo tatou malosi faaleagaga, ma faatutuina ni sini e

tatau ai mo le faaleleia atili. I le faia o lea mea, e tatau ona tatou iloiloina fesili nei:

- Pe o o'u tatalo ea e le aunoa e pei ona tatau ai?
- Pe o agavaa ea a'u mo le mauaina o tali i a'u tatalo?
- Pe o o'u iloa ea le mea o loo saunoa mai ai le perofeta, ae pe o o'u mulimuli ea i lana fautuaga?
- Pe o o'u faitauina ea tusitusiga paia e le aunoa?
- Pe o o'u faataunuaina ea ma le faamaoni o'u tofiga o le perisitua?
- Pe o o'u faamaoni ea i le totojiina o le sefuluai ma taulaga?
- Pe o o'u mafaufau ea i ni mafaufauga mama i taimi uma?
- Pe o faia ea e lo matou aiga ni afiafi faaleaiga i vaiaso uma?
- Pe ua faamauina ea lo matou aiga i totonu o le malumalu?
- Pe o saunia ea e lo matou aiga isi tagata mo le taliaina o le talalelei?

E tele se taimi ma ni taumafaiga e alu ai i le faia o nei mea. E tatau ona tatou amata ona galulue ai e ala i le filifilia na o se mea e tasi po o le lua foi e galue muamua ai. A o faaleleia atili e i tatou se mea e tasi, e mafai ona tatou taumafai atu mo le isi. O le atoatoa o se mea tatou te galulue agai i ai i lea laasaga ma lea laasaga i o tatou olaga uma; e le tupu mai lea tulaga ona ua tatou fautuina e aveva ma a tatou sini.

E tatau foi ona tatou iloiloina le tulaga o le alualu i luma ua tatou faamoemoe tatou te faia i a tatou aoga, i a tatou galuega, faapea ma isi vaega. A o iloiloina e i tatou vaega taitasi o o tatou olaga, e tatau ona tatou filifili i se auala e faaleleia ai atili. Ona tatau ai lea ia i tatou ona faatutuina ni sini e fesoasoani ia i tatou i le faia o lea mea. E tatau ona tulaga faigata sini taitasi tatou te faatutuina, peitai ia aveva ma se mea e mafai ona tatou fai.

Ia fai i le vasega e tusia se lisi o sini e talafeagai lelei mo vaega nei: tatalo, susesue i tusitusiga paia, afiafi faaleaiga, faaipopoga i le malumalusa, gafa, asiasiga i aiga, galuega faafaifeautalai, sefuluai, mafaufau i mafaufauga mama, aoga, po o galuega.

Ina ia faatutuina ni sini a le tagata lava ia, e tatau ona tatou iloiloina o tatou manaoga ma mea e mafai ona tatou fai ma ia tatalo atu mo se musumusuga mai le Alii. Atonu foi e mananao i tatou e talosaga atu i se matua, taitai o le Ekalesia, po o se uo faalagolagoina mo se fautuaga i le faatutuina o sini. E tatau ona tatou filifili po o le a le mea e tatou te mananao e fai, le ala ua tatou mananao e fai ai, faapea ma le taimi tatou te mananao e faauma ai.

Sa faamatala mai e Peresitene N. Eldon Tanner se tulaga sa oo i ai se tasi o ona atalii na fautuina se sini mo ia lava e faapea:

Sa faapea mai le atalii o lo'u atalii, " 'Tama matua, sa selau pasene lo'u auai i sauniga talu mai lava le taimi na faauu ai a'u e aveva ma tiakono

i le tasi tausaga ua mavae. . . . Ou te lei misia se sauniga faamanatuga, Aoga Sa, po o se sauniga perisitua.'

"Sa ou faamalo atu ia te ia ma faapea atu, 'loane, afai o le a faaauau pea ona avea oe ma se tagata e selau pasene le auai i sauniga seia oo ina lava lou matua e te alu atu ai ma fai se misiona, o le a ou totagiina tupe mo lau misiona.' Sa ataata o ia ma faapea mai, 'O le a ou faia lava lea mea.'

"Sa ou manatu ua matua saogalemu lava a'u, peitai sa oo lava ina selau pasene le auai a lea alii i sauniga. Ou te manatua ni taimi se lua na pulea ai e ia o ia lava ina ia faataunuaina ai le sini sa taumafai i ai. Sa valaauina o ia e le uso o lona tama i se tasi taimi latou te o atu i se malaga faatasi ma ia ma lana fanau tama ma o se malaga lea o le a alu ai ma le Aso Sa. Sa faapea atu loane, 'Pe i ai ea se nofoaga e mafai ona ou auai i sauniga i le Aso Sa?' ma a o ta'u mai ia te ia e leai se nofoaga, sa ia faapea atu, 'E leai la, e le mafai ona ou alu.' Ma sa faapea ona le alu lenei alii i lea malaga matagofie i le sami faapea ma se motu sa fuafua latou te tafafao ai.

"Sa gau le vae o lenei alii i se tasi taimi e latalata i le faaiuga o le vaiaso. O le mea muamua lava na fesili ai o ia i lona fomai, 'Pe o le a mafai ea ona ou auai i le lotu i le Aso Sa? E tatau ona selau pasene lo'u auai i sauniga. Ma o le mea moni, sa sau o ia i le lotu i ni tootoo.

"Ina ua sefuluiva tausaga o lona matua, sa ia faapea mai, 'Tama matua, ua selau pasene lo'u auai talu mai le taimi na ta osia ai lona feagaiga.' Sa ou matua fiafia lava e totogi tupe mo le tausiga o lana misiona. Sa avea lenei sini na faataunuaina ma se faatosinaga tele i lona olaga" (*Ensign*, May 1975, p. 77).

O le a le umi na galue ai loane ina ia ausia lana sini? (Ono tausaga.)

O le a sou manatu o le a se lagona na oo ia te ia ina ua ausia lana sini?

Ina ia faatuina se sini faaleaiga, e tatau i aiga ona talanoaina o latou manaoga ma lagona. E tatau i tagata taitoatasi ona auai i le faamautuina o le sini, ma e taitai le tama i le talanoaga. O le a fesoasoani le tatalo i le faatuina o le sini.

Sa faamatala mai e Elder J. Thomas Fyans le auala na filifilia ai e se tasi o aiga a latou sini:

"I le tolu afe maila mai le [Aai o Sate Leki] o loo nonofo ai se aiga o e o le a latou toe faia foi se mea faapitoa lava pe a maea lenei konafesi. Afai e taunuu atu le mekasini a le Ekalesia i lea aiga faatasi ma lauga o le konafesi, o le taimi lava lea e faitau ai e le aiga ia savali o lea konafesi, ma e tuuina mai e fanau matutua ni lipoti e uiga i lauga filifilia.

"Peitai latou te faia foi nisi mea e ese mai le na ona faitau. O afiafi faaleaiga latou te filifili ai i ni sini mo le aiga faapea ma sini mo le tagata lava ia e faavae mai savali o le konafesi. O sini na latou faatutuina o ni

sini e mafai ona faataunuuna: 'Ia manatua tina matua i a tatou tatalo i aso taitasi, tauloto se viiga a le Ekalesia, iloilo le tulaga o le saunia o lo tatou aiga, ia faia mea a le Alii i lana lava ala—ae le o o tatou ala, aumai se tagata lotu ese i le lotu.' O le a latou talanoaina a latou sini, tatalo e uiga i ia sini, ma iloiloaina e le aunoa. E leitioa ona faapea mai le tama: 'E taua i lo matou aiga le konafesi aoao o se lisi o mea e tatau ona matou manatu mamafa i ai. Ua i ai sona uiga taua e sili atu ia i maua ma la ma fanau nai lo se tulaga e mafai ona faamatalaina i upu' "(Ensign, Nov. 1974, p. 65).

O le a le mea na faia e lenei aiga ina ia filifilia ai ni a latou sini?

O Sini e Fesoasoani i Lo Tatou Alualu i Luma e Faavavau

Ia fai atu i tagata o le vasega e mafaufau mo sina taimi e uiga i a latou sini e faavavau. Ia valaauina i latou e faamatala mai nisi o a latou sini i le vasega. Ia tusia nei sini i luga o le laupapa:

E tofu lava i tatou uma ma ni sini. Mo se faataitaiga, sa fetalai atu le Faaola i sa Nifae, "Ou te loto ina ia atoatoa ona lelei la outou amio, e pei o a'u ma lo outou Tama o i le Lagi, e atoatoa ona lelei" (3 Nifae 12:48). O le atoatoa ma le mau faatasi e faavavau ma o tatou aiga o sini sili ia ona taua e mafai ona tatou faataunuuna. Sa saunoa mai Peresitene Iosefa Filitia Samita e faapea:

"O le faaolataga e le faapea e oo mai i le taimi e tasi; ua poloaiina i tatou ina ia atoatoa e pei o lo tatou Tama o i le Lagi e atoatoa ona lelei o ia. . . .

"O le a le oo mai lea mea i se taimi e tasi. . . . O le a tatau foi ia i tatou ona tatou o atu i le olaga i tua atu o le tuugamau a o lei faataunuuna e i tatou lena atoatoa ma o le a avea e pei o le Atua.

Ae peitai, o iinei [i le lalolagi] tatou te faataatia ai le faavae. O iinei lava e aoaoina ai i tatou i nei mea moni faigofie o le talalelei a lesu Keriso, i lenei olaga faataitai, e saunia ai i tatou mo lena tulaga atoatoa. Ua avea ma o tatou tiute le sili atu ona lelei o i tatou i le aso nei nai lo le tulaga sa tatou i ai ananafi, ma ia sili atu foi ona lelei a taeao nai lo le tulaga o loo tatou i ai i le aso nei" (*Doctrines of Salvation*, 2:18).

Faaali atu fesoasoani vaaia 17-a, "O suesuega i tusitusiga paia a le aiga e tele tau i maua ai," 17-e, "O le tatalo e mafai ona fusia faatasi ai aiga," ma le 17-i, "E mafai ona atinae i le faaleagaga i le faia o afiafi faaleaiga."

O le atoatoa e le o se sini lea e mafai ona tatou ausia i se aso e tasi. E tatau ona tatou filifili ma faataunuuna nisi sini o le a fesoasoani ia i tatou i le faataunuuna faasolosolo o le tulaga atoatoa. Mo se faataitaiga, atonu tatou te faatutuina ni sini o le faitauina o tusitusiga paia i aso taitasi po o le faia faatasi foi o tatalo faaleaiga. O nei sini o le a fesoasoani ia i tatou e faalatalata atu ai atili i lo tatou Tama

17-a, O suesuega i tusitusiga paia a le aiga e tele tau i maua ai
17-e, O le tatalo e mafai ona fusia faatasi ai aiga







Faalelagi ma fesoasoani ia i tatou a o tatou galulue ina ia avea ma ni tagata atoatoa.

O a nisi sini e mafai ona fesoasoani ia i tatou e maua ai le ola e faavavau? (O le faaipoipoga faalemalumalusa o se tasi lea o sini taua; a aunoa ma lea, e le mafai ona avea i tatou e faapei o lo tatou Tama Faalelagi.)

O loo faamalamalamaina e le tala o loo faamatalaina i lalo le ala e fesoasoani ai sini ia i tatou ina ia alualu i luma agai atu i le ola e faavavau:

I le taimi muamua lava na uluai feiloai ai Jerry ma faifeautalai, sa luasefulu ma le fa tausaga o lona matua, ma sa matua faanoanoa lava. Sa aoaoina o ia e avea o se faiaoga, ae sa le galue i se galuega faaiaoga. Sa lei faaipoipo o ia ma sa lei sona faamoemoega tonu i le olaga. E fesili ifo lava o ia i lea taeao ma lea taeao ia te ia lava, "Aisea e ola ai i se isi aso?"

Sa valaauina o ia i se tasi aso e se tasi o ana uo ua leva o le na auai i le Ekalesia ina ia feiloai ma faifeautalai. Sa tuuina atu e faifeautalai ia te ia se lui ina ia faitau ma tatalo e uiga i le Tusi a Mamona. A o suesue o ia i le talalelei a Iesu Keriso, sa lagona e Jerry e i ai moni lava se faamoemoega o le olaga. A o tatalo o ia, sa lei pine ae iloa e moni le Tusi a Mamona ma sa manao mulimuli i le Faaola. Talu ai ona sa manao o ia ina ia papatisoina, o le mea lea na suia ai lona olaga ma amata ona ola i le talalelei.

Ina ua uma ona papatisoia o ia, sa talia e Jerry se valaauga mai le epikopo ma sa matua faamaoni atoatoa i ona tiute faaleperisitua. Sa lagona e ia le agaga naunautai e fesoasoani atu i isi, ma sa lei pine ae maua e ia se galuega e avea ai ma se faiaoga o ni tamaiti laiti. Ona feiloai ai lea o ia ma faaipoipo ma se tamaitai talavou lalelei lava, o se tamaitai foi e lei leva ona liliu mai i le Ekalesia. Sa faatuina e i laua se sini ina ia o atu i le malumalu, ma sa oo ina faamauina faatasi i laua mo le faavavau. Talu mai lena taimi, sa maua e i laua le fiafiaga sili i le mulimuli i le fuafuaga a le Alii.

Ausia o a Tatou Sini

Ia faitau e tagata o le vasega le 2 Nifae 32:9.

Ua tau mai e Nifae ia i tatou ina ia tatalo ae tatou te lei taumafai e faatauina se mea. O se tasi o vaega sili ona taua o le faatuina o se sini, o le faia lea o se tautinoga e i tatou ia i tatou lava o le a tatou faatauina lena sini. A o tatou tatalo i lo tatou Tama Faalelagi, e tatau ona tatou ole atu mo lana fesoasoani. E tatau ona tatou folafola atu o le a tatou faia mea uma e mafai ona tatou fai e ausia ai a tatou sini.

O le a se mea e mafai ona tatou faia ina ia faamanatu mai ai ia i tatou a tatou sini?

Ina ia avea ma se faamanatu, ua avea ma se manatu lelei le tusia o a tatou sini i totonu o se tusi o talaaga o o tatou olaga. E mafai foi ona tatou tusia ia sini i se pepa malo laititi po o le tusia foi o se pepa ma tuu i se mea e mafai ona tatou iloa atu ai i aso uma. E mafai ona tatou talanoaina a tatou sini e le aunoa i o tatou aiga. E mafai ona tatou faia ni taumafaiga faapitoa e fesoasoani ai i tagata o le aiga i le ausiaina o a latou sini taitoatasi. Ina ia ausia sini faaleaiga e tatau ona tatou galulue faatasi. O afiafi faaleaiga o ni taimi lelei ia e faia ai lenei mea.

O ni manaoga ma ni sini amiotonu uma atonu o loo ia i tatou o le a le fesoasoani lea ia i tatou sei vagana ua tatou galulue e faataunuuina ia sini. Ua fetalai mai le Alii, "E aumaia ia te outou le manumalo ma le mamalu uma i lo outou filifiliga, faamaoni, ma talosaga i le faatuatua" (MFF 103:36). A o tatou galulue ma le agaga naunautai, usiusitai i poloaiga, ma tatalo, e mafai ona tatou ausia a tatou sini amiotonu. O aso taitasi o se avanoa lea tatou te latalata atu ai atili i le ausiaina o a tatou sini.

E masani lava e tatau ia i tatou ona tuuese mea tatou te loto i ai ina ia ausia ai se sini. Sa faamatala mai e Peresitene Spencer W. Kimball i se tasi taimi le ala na mafai ai ona ausia se tasi o ana sini:

"Ina ua uma la'u misiona, sa ou manao ina ia ou auai i le kolisi, peitai sa le mafai ona maua e lo'u aiga se tupe e auina atu ai a'u i le aoga. O le mea lea na ou faigaluega ai loa i le lotoa o Nofoaafi a le Pasefika i Saute i Los Angeles ina ia maua ai se tupe mo le aiga. Sa ou faigaluega i le 14 itula i le aso i le lauina o uta i le va o fale teuoloa ma nofoaafi ma sa la'u ia mea i luga o se taavale e lua ni uili e tulei i lima. E masani lava ona oo i le afe pauna le mamafa o uta e aveina i loli nei e tosoina i lima. Ma ou te mautinoa e mafai ona outou malamalama i le mafuaaga ou te vaivai ai i le faaiuga o le aso.

"Sa matou nonofo ma lo'u tuafafine pe tusa ma le lua i le tolu malla le mamao ese. O le tau o le pasese o le pasi e sefulu sene, ma sa ou savalia lea mamao atoa i le alu ma le toe foi mai ina ia faasaoina ai le luasefulu sene i le aso. Sa ou manao tele ia ou aoga i le kolisi, ma sa avea lo'u savali i lea mea mamao ma mea na latalata atu ai a'u i la'u sini. . . . [O le faia o lea mea] na mafai ai ona ou faasaoina ni tupe e lava lelei ai lo'u toe foi atu i la'u setete o Arisona ma auai i le lunivesite o Arisona" ("Decisions: Why It's Important to Make Some Now," *New Era*, Apr. 1971, pp. 2-3).

Faiuga

Sa saunoa mai Elder O. Leslie Stone e faapea:

"E tatau ia i tatou uma lava ona iloiloina lo tatou alualu i luma e le aunoa. Ina ia ola i ni olaga amiotonu, ma faataunuuina faamoemoega na foafoaina ai i tatou, e tatau ona tatou iloiloina e le aunoa le taimi ua

tuana'i, fuafuaina lo tatou tulaga o loo i ai nei, ma faatutuina ni sini mo le lumanai. Pe a aunoa ma lenei faasologa, o le a itiiti se avanoa e mafai ai e se tasi ona taunuu atu i ona sini" (*Ensign*, May 1978, p. 57).

O le faatutuina o sini, faia o fuafuaga ma le galulue mo le ausiaina o ia sini, iloiloina o lo tatou tulaga alualu i luma, ona toe faatutuina ai lea o ni sini fou, o le faasologa lea o mea e fai e faalatalata atu ai atili i latou i le tulaga atoatoa. E matua fiafia lava lo tatou Tama Faalelagi pe a tatou faatutuina sini ma o le a fesoasoani mai o ia ia i tatou i le faatutuina o ia sini.

Lu'i

1. la filifili faatasi ma le agaga tatalo se sini a le tagata lava ia. Atonu e te manao e faatuina se sini e faatatau i mea nei:

Tatalo

Suesue i tusitusiga paia

Afiafi faaleaiga

Faaiipoipoga i le malumalu

Gafa

Galuega faafaifeautalai

Sefuluai

Maufaufau i mafauauga mama

Aoaoga i aiga

la tusia lau sini i se tusi o talaaga o le olaga po o se pepa e mafai ona e vaai atu i ai.

la faia sau tautinoga ia te oe lava o le a e ausia le sini. la tatalo mo se fesoasoani ma folafola atu i le Alii o le a e faia le mea sili e te mafaia.

2. la talanoaina faatasi ma lou aiga mea e manaomia e lou aiga i le olaga. la faatuina se sini faaleaiga e faatatau i se tasi o mea o loo tusia i luga ma ia fesoasoani atu i lou aiga i le ausiaina o lea sini.

Sauniuniga a le Faiaoga

A o lei tuuina atu lenei lesona—

1. la fuafua ina ia i ai se laupapa ma se penisina.
2. Fai atu i tagata o le vasega e faitau pe faamatala mai tala ma mau o loo i lenei lesona.

Atinaeina ma le Aoaoina o le Pulea e le Tagata o ia Lava

Lesona 18

O le faamoemoega o lenei lesona o le fia fesoasoani lea ia i tatou ina ia faatupuina atili le pulea e le tagata o ia lava ma ia aoaoina i tatou i le ala e faatupuina ai atili lenei malosi i a tatou fanau

Faatomuaga

O loo i ai se tala e uiga i le ala e filifilia ai ma aoaoina solofanua a tagata Arapi. Talu ai ona e faaaogaina nei solofanua i galuega taua lava, o le mea lea e tatau ai ona matua le masalomia lo latou usiusitai i o latou matai. E aoaoina i latou i le amataga lava ina vave ona tali mai faatonuga a o latou matai. Ona tuuina atu ai lea o se tofotofoga ia i latou e iloa ai po o le a le tulaga e i ai pe a feagai ma ni faatosinaga. E tuu pea i latou mo se taimi umi lava i se lotoa ia le mafai ona maua se vai sa tuu i fafo o le faitotoa. Pe a mavae se vaitaimi umi, e tatalaina le faitotoa, ma tamomoe atu solofanua mo se vai, ae ui i lea, o le taimi foi lea e ili ai e le matai se faaili ma tuuina atu se faatonuga. Talu ai ona o lo latou fia feinu, o le mea lea e le usiusitai ai nisi o solofanua. Peitai o isi solofanua e liliu vave loa lava ma o atu i lo latou matai. O nei solofanua usiusitai ua latou aoaoina le amio pulea ma e talia mo galuega sili ona taua. O isi solofanua e faaaoga i galuega e itiiti le taua. (Adapted from Sterling W. Sill, *Leadership*, 1:62.)

Ua faatusaina o tatou manaoga i nei solofanua tiotio ma le malolosi. Afai o le a faatagaina e i latou le soona taufetuli, e aunoa ma le faia o se faagutu, ma le mafai ona taofi, atonu o le a le mafai ona pulea e i tatou i tatou lava ma oo atu ai i ni faafitauli faaleagaga. Ona o lona silafia o lenei tulaga, ua tuuina mai ai e le Alii se fesoasoani ia i tatou. E pei lava ona sa uunaiina solofanua i faailoga mai lo latou matai, ua faapea foi ona uunaiina i tatou i faailoga mai lo tatou matai o Iesu Keriso, ina ia o atu ia te ia.

Ua tuuina mai e le Alii ia i tatou le filifiliga saoloto. O le mea lea, ua saoloto i tatou e faia filifiliga. O nei filifiliga e iloa ai le tulaga o lo tatou lumanai: A o filifilia e i tatou le amiotonu, e faamaonia e i tatou lava le agavaa e galulue ai i le malo o le Atua. Peitai, ina ia sa'o la tatou filifiliga, e manaomia foi e i tatou, e pei foi o solofanua, se aoaoga faapea ma le puleaina. O lenei la puleaina e aoaoina ai i tatou ina ia pulea o tatou manaoga. E aoaoina ai i tatou ina ia mulimuli i musumusuga a lo tatou Matai, e oo lava i taimi e faaosoosoina ai i tatou.

Faitau le Faataoto 16:32.

O le Puleaina o le Tagata Lava Ia e Manaomia mo le Alualu i Luma e Faavavau

O le pulea e le tagata o ia lava o le malosi lea ua i ai i totonu o i tatou e pulea ai o tatou manaoga, mea e fai, ma amioga. O lea malosi e tatau lava ona maua pe afai tatou te toe fia foi atu e mau faatasi ma lo tatou Tama Faalelagi. E manaomia ai le taumafai e le aunoa o i tatou, peitai a o tatou faatupuina atili le pulea e le tagata o ia lava, o le a sili atu ona saunia lelei i tatou i le faia o filifiliga sa'o i le taimi tonu e tatau ai.

O le pulea e le tagata o ia lava e faapitoa lava lona taua mo i tatou o loo umia le perisitua. E le mafai ona tatou fautuaina lelei ma auuina atu i isi tagata sei vagana ua tatou aoao ina ia pulea e i tatou i tatou lava. O le taimi lava e faatupuina ai atili e i tatou pe pulea e le tagata o ia lava, o le a mafai ai foi ona fesoasoani atu i a tatou fanau atoa ma isi i le faatinoina o le pulea e le tagata o ia lava.

Ina ua papatisoina i tatou, sa tatou amataina se olaga fou e faaautu i le mulimuli i le Faaola i le ala e tau atu i le ola e faavavau. Peitai, ina ia mulimuli atu ia te ia, e tatau lava ona tatou manumalo i le pupu o o tatou loto i mea o le lalolagi, vaivaiga, ma mea le atoatoa. Sa aoao mai le Faaola, "Ai se tasi e fia mulimuli mai ia te a'u, aua ne'i ususitai o ia ia te ia, a ia ave e ia lona satauro, i le mulimuli mai ai ia te au" (Mataio 16:24). Sa aoao mai foi o ia e faapea: "Ia outou ulu atu i le faitotoa vaapiapi; aua e va tele le faitotoa, e lautele foi le ala e tau atu i le malaia, e toatele foi i latou o e ui atu ai. Aua e vaapiapi le faitotoa, e lauitiiti foi le ala e tau atu i le ola, e toaitiiti foi i latou o e maua" (Mataio 7:13-14).

O le ulu atu i le faitotoa vaapiapi e manaomia ai le pulea e le tagata o ia lava ma le pulea lelei o ona lava manaoga. O lona uiga o le faatoilaloina o faasoosoga. Peitai ua folafola mai e le Alii o le a ia tauia i tatou mo le faafitia e i tatou o i tatou lava. Ua ia folafola mai e faapea o le iloa o le upu moni ma ola ai, o le a faasaolotoina ai i tatou mai noataga o le agasala faapea ma taunuuga o le faia o filifiliga sese.

O le Pulea e le Tagata o ia Lava e Faasaolotoina ai i Tatou

Ua tuuina mai e le Tama Faalelagi ia i tatou ia poloaiga ona o lona alofa ia i tatou ma e finagalo ina ia puipuia i tatou mai le faanoanoa. Ua ia finagalo ina ia fesoasoani mai ia i tatou ina ia maua le tulaga o le pulea e le tagata o ia lava ina ia mafai ai ona faamanuiaina i tatou.

Pe faapefea ona avea le ususitai i mataupu faavae o le talalelei ma mea e faamanuiaina ai i tatou ma faasaolotoina ai i tatou? Ia faamatala atu mataupu faavae o loo i lalo ma talanoaina auale e avea ai le ususitai i ia mataupu faavae e ala i le pulea o le tagata o ia lava ma mea e aumaia ai ia i tatou le saolotoga.

O LE TULAFONO O LE SEFULUAI

Afai tatou te ususitai i le tulafono o le sefuluai, e mafai ona tatou aoao ina ia faatoilaloina o tatou manaoga manatu faapito.

O LE UPU O LE POTO

O le ola i lenei mataupu e mafai ai ona saoloto i tatou mai aafiaga leaga o le tapaa, ava malosī, ma fualaau oona.

O LE TULAFONO O LE LEGAVIA

Tatou te aoao ina ia pulea o tatou manaoga faaletino ma le mafaufau ina ia faatumauina pea i totonu o tuaoi ua uma ona faatulagaina e le Alii. O lenei tulaga o le a fesoasoani ia i tatou ina ia saoloto mai le faanoanoa ma le faavauvau.

Pe a maua e i tatou le pulea e le tagata o ia lava, e mafai ona tatou faatupuina ni amioga lelei, e pei o le ala po, suesue i tusitusiga paia i aso taitasi, faapea ma le faataunuuna vave o o tatou tofiga i taimi e tatau ai. O ia amioga e mafai ona faasaolotoina ai i tatou mai le faaletonu.

E Mafai Faapefea ona Tatou Maua le Pulea e le Tagata o Ia Lava?

Faitau le Alema 37:32–37.

O le a se mea o loo aoao mai ai i tatou e lenei mau e uiga i le maua o le pulea e le tagata o ia lava? (E tatau ona tatou maua le lagona inoino ma le faanoanoa mo le agasala ma le amioleaga, ia salamo, faatuatua ia Keriso, ia lotomauualalo, ia taumafai e tetee atu i faaososoga uma, ia le vaivai i le faia o galuega lelei, aoao le poto, tausia poloaiga a le Atua, tatalo ma talia fautuaga mai le Alii i mea uma tatou te fai.)

O le puleaina e le tagata o ia lava, o se taumafaiga lea o le olaga atoa. E manaomia ai se malamalamaaga e uiga ia i tatou lava atoa ma mataupu faavae o le talalelei e tatau ona tatou ola ai. O le uiga o lea mea o le faatutuina lea o ni sini e ola ai i mataupu faavae ma faalagolago i le Alii mo le malosī ma le fesoasoani a o tatou taumafai e faatutuina ia sini.

Ia tusi i luga o le laupapa po o le faaali atu foi o se pepa lautele o loo lisiina atu ai vaega nei:

1. Ia iloa oe lava
2. Faatutu ni sini amiotonu
3. Faalagolago i le Alii e ala i le Tatalo ma Suesuega i Tusitusiga Paia

IA ILOA OE LAVA

A o maua e i tatou le poto masani ma aoao atili e uiga i le talalelei, e oo ina tatou iloa mea tatou te malolosi ai ma mea tatou te vaivai ai. I le iloa la o lenei tulaga, e tatau ona maua ai le agaga naunautai ina ia manumalo i amioga ma lagona leaga ma ia faamalosi amioga ma lagona lelei. O le iai o se a ituaiga manao o le a uunaiina ai i tatou ina ia faaleleia atili e i tatou i tatou lava.

Sa saunoa mai Peresitene Tavita O. Makei e faapea, o nisi o mea leaga tatou te maua i totonu o i tatou lava o le loto leaga, inoino ma le mataua. Sa ia saunoa mai e uiga i ia mea e faapea, “O nei mea leaga uma e tatau ona faatolaloina i lau lava pule. O le tulaga tonu lava lenei

e faaoga i ai lau pule. Ia aveese lena lagona ita! O nei mea uma e leaga ai le agaga” (*Gospie Ideals*, p. 356).

O le faatoilaloina o nei lagona e le o se mea faigofie. E manaomia le taimi e suia ai; peitai a o tatou faia lea taumafaiga, o le a faatupuina ia i tatou le onosai ma le lototele e faatoilaloina ai mea leaga tatou te maua i totonu ia i tatou lava.

FAATUTU NI SINI AMIOTONU

O se auala lelei e faatupuina ai atili le pulea e le tagata o ia lava o le faatutuina lea o sini ma faia mea uma e mafai ona faataunuuna ai. Afai o le a i ai ia i tatou se sini ua faamautuina lelei i o tatou mafaufau, maua le lagona o le faatuatuaina o a tatou sini, o le a maua e i tatou le tulaga o le pulea e le tagata o ia lava e pei ona o loo tatou sailia. O lenei la faasologa o mea e fai, e manaomia ai le tumau pea ma le onosai. Peitai ua ta’u mai e le Alii ia i tatou e tatau ona tatou tumau seia oo i le iuga i le ola amiotonu ina ia tatou maua ai le sini o le faaeaina, po ole ola e faavavau (tagai i le MFF 14:7).

O le a le sini o loo e galue agai i ai i le taimi nei?

FAALAGOLAGO I LE ALII E ALA I LE TATALO MA LE SUESUE I TUSITUSIGA PAIA

E manaomia le faatuatua ia Iesu Keriso ina ia faatoilaloina ai o tatou faasoosoga ma maua ai le faataunuuna o a tatou sini e faavavau. O le tatalo e le aunoa faapea ma le faitau i tusitusiga paia e faatupuina ai lenei faatuatua ma fesoasoani ia i tatou ina ia maua ai le malosi e manumalo ai i o tatou faafitauli. E le gata foi i lea, o loo aumaia foi i olaga o auauna a le Alii o loo faamatalaina auilili i tusitusiga paia ni faataitaiga mo i tatou e mulimuli ai: E fesoasoani ia faataitaiga ia i tatou e iloa ai, afai ua maua e isi tagata le pulea e i latou o i latou lava, e mafai foi ona pulea e i tatou i tatou lava.

Ia valaauina tagata o le vasega e faamatala mai se auala na latou manumalo ai i faafitauli e ala i le faitau i tusitusiga paia ma le tatalo.

Fesoasoani Atu i Fanau ina ia Faatupuina le Pulea e le Tagata o la Lava

Faaali atu le fesoasoani vaai 18-a, “O matua popoto latou te aoaoina a latou fanau i le pulea e le tagata o ia lava.”

E tatau ona avea o tatou aiga ma ni nofoaga e aoao ai e a tatou fanau le pulea e le tagata o ia lava. O lenei la tulaga e manaomia ai lo tatou faia o ni faataitaiga e tatau ai mo a tatou fanau e mulimuli ai. Afai o le a le mafai ona tatou pulea o tatou manaoga, e le mafai ona tatou faamoemoe e pulea e a tatou fanau o latou manaoga.

Ua avea ma se mea tatau lo tatou mulimuli i se faasologa faatulagaina lelei pe a tatou aoaoina a tatou fanau i le pulea e le tagata o ia lava. Afai o le a tatou aoaoina lelei i latou, po o le afai foi ua tatou soona



pulea malosi i latou, o le a le mafai ona latou aoao i le ala e pulea ai i latou lava. O le faaaogaina o mataupu e fa o loo i lalo e mafai ona fesoasoani ia i tatou i le aoaiina o a tatou fanau i le tulaga e tatau ai.

Tusi i luga o le laupapa pe faaali atu foi se pepa lautele o loo tusia ai mea nei:

1. Faatuina Tulafono
2. Aoao Fanau ina ia Faatinoia Mataupu Faavae o le Talalelei
3. Tuuina atu i Fanau Tiutetauave
4. Ia Aoao ma le Alofa

FAATUINA TULAFONO

Sa aoao mai e Peresitene Tavita O. Makei e faapea e tatau i se tamaititi ona ia aoao le usiusitai i le amataga lava o lona olaga. Afai e le aoaoina atu e matua a latou fanau ia usiusitai i le amataga lava, atonu o le a faigata ia i latou ona faia lea mea i se taimi mulimuli ane. Sa faamamafa mai e ia faapea e tatau ona tatou tuuina atu le avanoa i le tamaititi e saoloto ai i le atinaeina o ia lava; peitai afai o le a sopo ese atu le tamaititi mai tulafono ua faavaeina, e tatau ona tatou maua le agaga alofa, ae peitai ia maua pea le agaga maumaututu i la tatou aoaiga. (Tagai i *Stepping Stones to Abundant Life*, p. 38)

AOAO FANAU INA IA FAATINOINA MATAUPU FAVAE O LE TALALELEI

Sa saunoa mai Peresitene N. Eldon Tanner e faapea: “E tatau foi i matua ona aoaoina a latou fanau i le amataga lava o o latou olaga e uiga i le mataupu matagofie ma le mea moni e faapea o i latou o le fanau faaleagaga a le Atua, ma o le filifili e mulimuli i aoaoga a Iesu Keriso ona pau lava lea o le auala e maua ai le alualu i luma ma le fiafia i lenei olaga faapea ma le olaga a sau. E tatau ona aoaoina i latou ina ia latou iloa o loo i ai moni lava se tagata e igoa ia Satani ma o le a ia faaaogaina faiga uma lava e faaosoosoina ai i latou ina ia faia le mea sese, ma taumafai ai e taitaiseseina i latou, ma avea ai i latou ma ana pologa, ma puipuia i latou mai le maua o le fiafiaga sili ma le faaeaina semanu latou te maua pe ana usiusitai ia Iesu Keriso.”

Sa saunoa mai foi Peresitene Tanner e faapea: “E le mafai e fanau ona aoao e i latou lava le ala e iloa ai le mea e sa’o mai le mea sese. E tatau i matua ona iloa le taimi e saunia ai le tamaititi i le tauaveina o tiutetauave faapea foi ma le taimi e mafai ai e ia ona faia ni filifiliga lelei, iloilo ni mea se lua. A o tatou aoaoina i latou, ua i ai ia i tatou le tiutetauave o le aoaoina o i latou ma vaai ua faia e i latou le mea sa’o. Afai o le a eleelea se tamaititi, tatou te le faatali sei tupu a’e o ia ma matua ona filifili lea pe taele pe leai. Tatou te le tuuina atu i latou e faatali sei filifili pe inu le vai pe leai pe a oo ina ma’i, pe alu atu foi i le aoga pe leai po o le lotu” (*Seek Ye First The Kingdom of God*, p. 87).

TUUINA ATU I FANAU LE TIUTETAUAVE

Sa saunoa mai Elder L. Tom Perry e faapea: “E tatau lava ona tatou mautinoa . . . ua lava a tatou aoaoga e tuuina atu ma ua tatou totoina se fatu o le faatuatua ma faalagolago i le Alii i olaga o a tatou fanau. E tatau ona tatou mautinoa ua aoaoina lelei i latou, ma a o tuputupu a’e ma avea ma tagata matua i le faaleagaga, e tatau ona tatou tuuina atu ia i latou avanoa e faaalai ai le malosi ma le tuputupu a’e i totonu o i latou. E tatau ona tatou tuuina atu ia i latou lo tatou faatuatuaga ma le faalagolagomaga ona tuuina atu ai lea ia i latou o tiutetauave” (in Conference Report, Sao Paulo Area Conference 1975, p. 12).

E tele auala e aoaoina ai fanau i le pulea e le tagata o ia lava. O se tasi o ia auala sa faamatala mai e Elder F. Enzio Busche:

“Tatou te taumafai e taitaiina a tatou fanau ina ia maua le tulaga o le faatuatuaina e le tagata o ia lava . . . ma e matele lava ina tatou tuuina atu ia i latou e faamasino e i latou i latou lava. Ua tatou iloa le mea moni e faapea e le avea se tasi ma se faiaoga lelei pe afai o le a faasino atu e ia mea sese. . . . ma e le tusa o ia ma le e fesoasoani atu i se tamaititi ina ia iloa e ia lava le mea sese ua ia fai. Afai o le a mafai ona iloa e se tamaititi ana lava mea sese, o lona uiga ua uia e ia le laasaga muamua e suia ai lona olaga.

“Ou te manatua i se tasi taimi na ma faatonuina ai le ma tama tama, ina ua uma ona faia e ia se mea sese, ina ia fuafua e ia lona lava faasalaga. Sa tonu i le filifiliga a lenei alii e le tatau ona faatagaina o ia e matamata i le televise mo se masina atoa e tasi. Sa foliga mai ia i maua o se faasalaga mamafa tele lea, peitai sa matua fiafia lava i maua ina ua ma faalogo i se tala mai lona tina matua e faapea, a o asiasi atu ia te ia lenei alii, sa finau ane le alii ia te ia e uiga i le sese o tina matua ona o lona uunaiina o ia e matamata i se tasi o polokalama faapitoa i le televise, e ui lava o le a le iloa e ona matua. Ou te le manatu e i ai se isi olioli e sili atu mo matua nai lo le vaai atu i se tamaititi o mafai ona pulea e ia o ia lava i se tulaga faigata faapea” (“Provoke Not Your Children,” *Ensign*, Mar. 1976, p. 42).

O le a le mea na faia e Elder Busche e fesoasoani ai i lana fanau i le faatupuina atili o le pulea e le tagata o ia lava? (Na ia fesoasoani ia i latou ina ia maua le faatuatuaina e le tagata o ia lava e ala i le iloa e i latou o a latou lava mea sese. E uunaiina e ia i latou ina ia faasalaina e i latou i latou lava.)

IA AOAI MA LE ALOFA

E manaomia le avea o o tatou aiga ma ni nofoaga o le fiafia e maua ai e a tatou fanau le lagona saogalemu, tofilemu, ma le alofagia. Afai e le maua e i latou le fiafia i le ola i le talalelei i le aiga, o le a saili atu i latou mo le fiafia i fafo atu o le talalelei. O le mea lea, e taua lava lo tatou tuuina atu i se tamaititi o le alofa faateleina pe a uma ona tatou aoaiina o ia ona o le le usiusitai.

Faitau le MFF 121:43–44. Aisea e tatau ai ona tatou faaalai le alofa faateleina i se tamaititi pe a uma ona aoaiina? (Ina ia le manatu o ia o i tatou o lona fili. O le a le manao o ia e faatasi ma i tatou pe afai e manatu o i tatou o ona fili.)

Ia talanoaina faaitaiga nei ma le vasega. Ia faamamafa atu e faapea o le tulaga e foia ai ia tulaga, e manaomia ai le pulea e le tagata o ia lava. Atonu e te manao e faaoga ni a oe lava faaitaiga mai tagata o le vasega ae le o faaitaiga nei.

1. E i ai se fanau talavou e toatolu a Seve ma Ina e finau lava ma tau upu i taimi uma. E mafai faapefea ona fesoasoani i laua i le la fanau i le faatupuina o le pulea e le tagata o ia lava ma taofia le tauaimisa?
2. E mananao loane ma Elesi ina ia fai ni a latou tatalo faaleaiga i lo latou aiga i aso uma. Peitai o le faasologa o taimi o galuega, faasologa o taimi o aoga, faapea ma isi tiute ua faalavelaveina ai lea tulaga. Ua manatu tagata o le aiga e le mafai ona faatasia i latou mo se lotu faaleaiga. O le a se mea e mafai e loane ma Elesi ona fai e fesoasoani ai i le aiga i le faatupuina o le pulea e le tagata o ia lava ina ia faia ai ni lotu faaleaiga?
3. Sa talosagaina le aiga o Toma e lo latou epikopo ina ia tuuina atu se tupe e fesoasoani ai i le fausia o se malumalu fou. Sa le talia e lenei aiga lea tulaga ona sa foliga mai e le mafai lava ona lava a latou tupe maua e totogi ai a latou pili. Ae ui i lea, e foliga mai i taimi uma e lava a latou tupe mo faafiaga, lavalava fou, ma mea e le taua pe a oo ina latou manaomia. Pe mafai faapefea e lenei aiga ona faatupuina atili le pulea e le tagata o ia lava ina ia tuuina atu se tupe mo le malumalu?

O a ni mea e fai e se tagata o le ua mafai ona ia pulea ia lava i isi tagata i totonu o lona aiga?

Faaiuga

E tatau ia i tatou, e pei foi o solofanua Arapi na taua i le tala a Elder Sill, ona faatupuina le pulea e le tagata o ia lava. O le faia o lea mea, o le a mafai ai ona saunia e i tatou i tatou lava faapea ma o tatou aiga ina ia faafetaiaia tulaga faigata o lo tatou lalolagi. E tatau ona tatou faatupuina atili le malosi e faia ai filifiliga tatau ma pulea o tatou lava manaoga ma lagona pe afai tatou te fia maua le tulaga alualu i luma i lenei olaga ma toe foi atu i lo tatou Tama o i le Lagi.

Ia tuuina atu lau molimau a o faatupuina atili ma le malamalama e tagata o le aiga le pulea e le tagata o ia lava, o le a mafai ona latou manumalo i le tele o faafitauli i o latou olaga.

Usu le viiga “Filifili Tau o Mea Tonu,” *Viiga*, nu. 149.

Lu’i

1. Ia filifili se faafitauli i lou olaga po o totonu o lou aiga. Ia mulimuli i laasaga o loo ootooina i totonu o le lesona e maua ai le pulea e le tagata o ia lava mai faafitauli.

Filifili Tau O Mea Tonu

Sagisagi ♩ = 84-96

1. Fi - li - fi - li tau o me - a to - nu, Ta - 'u
 2. Fi - li - fi - li tau o me - a to - nu, 'A - ua
 3. Fi - li - fi - li tau o me - a to - nu, E te

mai e le A - ga - ga Sa. Lo - na su - lu e
 e te fa - 'a - va - i - vai. E i ai se -
 fi - le - mu ma to - 'a ai. Fai mea to - nu i mea

te i - lo - a a - i, I lo - u lo - to o le mea e fai.
 se i me - a u - ma; Le A - ga - ga fa - 'a - logo i ai. I - a fai,
 u - ma e te fa - ia, O le A - tu - a lou fa' - a - moe - moe lea.

i - a fai, mea to - nu ma le po - to e tu - mau.

Lo - na su - lu, ia fai ai. E te ma - nu - i - a ai e fa' - a - va - vau.

Upu: Joseph L. Townsend, 1849-1942
 Fati: Henry A. Tuckett, 1852-1918

Morona'e 7:16-17
 2 Nefai 2:27-28

2. la faitau i tusitusiga paia mo ni faataitaiga e talafeagai lelei e tatau ona mulimuli ai i le faatupuina o le pulea e le tagata o ia lava faapea ma le onosai.
3. la faia tatalo faaleaiga i aso taitasi.

Mau Faapoopo

Faataoto 25:28 (ia pulea lou lava agaga)

Alema 38 (o le fautuaga a Alema ia Sepulona ina ia agamalu ma ia pulea e ia o ia lava)

2 Timoteo 2:3–5 (tauivi ina ia manumalo)

Sauniuniga a le Faiaoga

A o lei tuuina atu lenei lesona—

1. Suesue le tusi lesona *O Mataupu Faavae o le Talalelei*, mataupu 4, “Saolotoga e Filifili ai.”
2. la saunia ia siata o loo taua i totonu o le lesona, pe fuafua foi ina ia tusia faamatalaga i luga o le laupapa.
3. la saunia e usu le pese o loo i le faaiuga o le lesona “Filifili Tau o Mea Tonu” (*Viiga*, nu. 149, fesoasoani vaaia 18-e).
4. Fai atu i tagata o le vasega e faitau pe faamatala mai tala ma mau o loo i lenei lesona.

Atinaeina o a Tatou Taleni

Lesona 19

O lenei lesona e tatau ona uunaiina ai i tatou ina ia faaleleia atili a tatou taleni ma uunaiina ai tagata o o tatou aiga ina ia faapea foi ona latou faia.

Faatomuaga

Ua tuuina mai e lo tatou Tama Faalelagi ia i tatou taitoatasi ni taleni, ma ua finagalo o la ina ia tatou faaaogaina. I se faataoto o loo tusia i le Mataio, na faamatala mai ai e le Alii se tagata o le na fuafua o le a alu malaga i se mea mamao. A o lei malaga ese atu o ia, sa valaauiina ana auauna e faatasi mai ma tuuina atu ana oloa ia i latou. Sa ia tuuina atu i se tasi auauna ni taleni se lima (i lenei faataoto, o loo faaaogaina le upu taleni o tupe), tuuina atu i le isi le tasi. Sa tuuina atu e ia i nei tagata taitoatasi ni taleni e tusa ma le mea e mafai ona ia faia.

A o malaga ese atu le matai, sa faaaoga e le auauna o le na i ai taleni e lima ma ua faaopoopoina i ai isi taleni se lima. O le auauna sa i ai taleni e lua sa faaaogaina e ia ina ia maua mai foi se isi lua. Ae peitai, o le auauna sa i ai le taleni e tasi na alu atu ma natia i le elelee.

Sa foi mai le matai i se taimi mulimuli ane ma fai atu i ana auauna e lipoti mai ma a latou taleni. Sa faapea atu o ia i ana auauna o e na faaluaaina a latou taleni, “Ua lelei ia, le auauna lelei e, ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale maia i le fiafia o lou Alii” (Mataio 25:21). Ae o le auauna lea sa ia natia lana taleni na taua e le matai e “leaga ma paie.” Sa faapea atu le matai o le a ia aveeseina le taleni mai ia te ia ma tuuina i le auauna sa iai ana taleni e sefulu. (Tagai i le Mataio 25:14–30 mo le faataoto atoa.)

Sa faaaoga e le Alii lenei faataoto e aoao atu ai le taua o le faaaogaina ma le poto o o tatou atamai po o taleni. Sa sili atu ona tele taleni sa faamoemoe e maua mai i e na tuuina atu i ai taleni e tele nai lo le tagata na tuuina atu i ai taleni itiiti, ae peitai, sa faamoemoeina i latou uma ina ia faaopoopoina ia taleni e pei ona sa tuuina atu ia i latou. E oo lava foi i le tagata sa i ai le taleni e tasi sa ia faamoemoeina e na te faaaoga ma le poto lea taleni.

Ua Iai i Tagata Uma ni Taleni ma ni Tomai

Sa saunoa mai Peresitene Spencer W. Kimball e faapea: “Ua faaeina mai e le Atua ia i tatou taleni ma le taimi, ma ua i ai faatasi ma atamai, faapea ma avanoa e faaaoga ai ma atinae ai nei taleni i lana galuega.

O le mea lea ua faamoemoe ai o ia e tele mea e tatau ona tatou faia, i tatou o lana fanau faamanuiaina” (*O le Vavega o le Faamagalō Atu*, i. 100)

Ua faamanuiaina i tatou i ni taleni. Talu ai ona o a tatou taleni e mai le Atua ia, o le mea lea ua taua ai i nisi taimi o meaalofa. O nei meaalofa ua faamoemoe ina ia faatupuina ai le fiafia ia i tatou faapea foi ma isi.

Ia fai atu i le vasega e vaavaai lelei i le lisi o taleni o loo i lalo. Ia sailia e tagata taitoatasi o le vasega se taleni mai lea lisi o loo ia te ia po o se taleni foi e le o tusia i le lisi.

O taleni ua tuuina mai ia i tatou atonu o ni taleni tau i le tagata lava ia, taleni tau i le poto aoaoina, po o taleni e atinae. O loo tusia nisi o na taleni i lalo:

FAATATAU I LE TAGATA LAVA IA

Pulea e le tagata o ia lava	Loto faamagalō
Onosai	Faatupuina o le toafilemu i isi
Lototele	Mata fiafia ma tausaaafia
Agalelei	Faatuatua
Uiga fiafia	Alofa i isi
Faalogologo lelei	O se molimau malosi
Iloa o mea lelei i isi	Galue malosi i le Ekalesia
Faafiafiaina o isi tagata	Lagolagoina o taitai o le Ekalesia

FAATATAU I LE POTO AOAIONA MA LE TALENIA

Pese	Vali ata
Siva	Vaneina o faatagata
Faamatalaina o tala	Gaosia o mea i le omea
Faatinoina o se mea	Taina o faatagata
Tomai i mea fai faaili	Faiga o keke
Tomai i mea tau afeleti	Faitogalaau
Suisui	Tusitusi
Lalaga	Fatupese

Na fetalai atu le Alii ia Iosefa Samita e faapea: “Aua e le tuuina atu meaalofa uma ia te i latou taitoatasi, aua e i ai meaalofa e tele, ae tuuina atu e le Agaga o le Atua se meaalofa i tagata taitoatasi. Ua tuuina atu i nisi le tasi, a o nisi ua tuuina atu i ai se isi, ina ia manuia ai i latou uma” (MFF 46:11–12). Ua faatatau tonu lava lenei mau i meaalofa faaleagaga ua tuuina mai ia i tatou e le Alii; peitai o le uiga foi o lenei mau o le maua lea e i tatou uma o ni taleni ua tuuina mai ma le faamoemoe e fesoasoani atu ai i isi.

O le Galulue ina ia Iloa a Tatou Taleni

Sa tau atu e le Aposetolo o Paulo i lana uo talavou o Timoteo e faapea: “Aua nei faatalale i le meaalofa na tuuina atu ia te oe” (1 Timoteo 4:14). Afai la e le tatau foi ia i tatou ona tatou faatalale i a tatou meaalofa, e tatau ona tatou sailia muamua po o a ia meaalofa.

E mafai faapefea ona tatou iloaina taleni ma atamai ua ia te i tatou?

A o tatou saili mo taleni o loo ia i tatou taitoatasi, e tatau ona tatou tatalo mo le taitaiga a lo tatou Tama Faalelagi, ma ole atu mo se fesoasoani faapitoa e iloa ai nei taleni.

O le tasi auala e iloa ai a tatou taleni o le maua lea o se *faamanuiaga faapeteriaka* (tagai i *Tiute ma Faamanuiaga o le Perisitua, Vaega A*, mataupu 10). E masani lava ona faaalua mai i nei faamanuiaga ia meaalofa ma taleni faapitoa. O lona uiga la, e mafai ona taitaina i tatou e faamanuiaga faapeteriaka i le sailia ma le atinaeina o a tatou taleni. Sa saunoa mai Peresitene Spencer W. Kimball e faapea, “Ua avea ma o tatou faamoemoega maua lea le tuuina atu o le avanoa i tagata uma, e aofia ai ma le autalavou, e maua ai se faamanuiaga faapeteriaka” (*Church News*, 8 Oct. 1977, p. 3). E ui lava ina e na o siteki faatulagaina e i ai peteriaka, peitai e mafai e se tagata agavaa i se nofoaga tau atinae o le Ekalesia ona maua se faamanuiaga faapeteriaka mai le peteriaka o le siteki o loo sili ona latalata atu i ai.

E mafai foi ona tatou iloa a tatou taleni e ala i isi tagata o e e fesoasoani mai ia i tatou ina ia iloa o loo ia i tatou se taleni i se vaega faapitoa. O le tala o loo i lalo e pei ona sa faamatalaina e Elder Franklin D. Richards, o loo faaalua ai le ala na fesoasoani ai Peresitene Spencer W. Kimball i se tagata ina ia iloa se tasi o ana taleni:

“I ni tausaga ua mavae, sa ma i ai ma Peresitene Kimball i le aai e taua o Cuzco i Peru, i se Aso Sa ma sa ma auai i le Aoga Sa a le paranesi. Sa ta e se faifeautalai mai Amerika i Matu le piano. Ina ua mavae le sauniga, sa fesili atu Peresitene Kimball pe i ai se tasi o le au paia i le alalafaga e mafai ona taina le piano. Sa ta’u atu e le peresitene o le paranesi ia te ia e mafai e se tasi o ona fesoasoani ona ta ni viiga se lua. Ona fai atu lea o Peresitene Kimball ina ia taina e le tagata lena ia viiga e lua mo le sauniga faamanatuga, ma sa ia faia lava. Ina ua maea, sa fautuaina e Peresitene Kimball ina ia faaaauu pea ona atinae lana taleni i mea tau musika ma ia taina le piano mo sauniga uma a le Ekalesia” (in Conference Report, Sao Paulo Area Conference 1975, p. 24).

Atonu sa le iloa e le alii o loo taua i le tala e i ai sana taleni. Sa manaomia se tasi na te faasino atu ia te ia lana taleni a o lei toe amataina ona atinae.

O le tasi auala e mafai ona tatou iloa ai a tatou taleni o le *auauna atu lea i le Ekalesia*. A o saili atu i tatou mo le fesoasoani a le Alii i o tatou

valaauga, o le a ia taitaiina i tatou ma fesoasoani mai ia iloa taleni tatou te manaomia mo le faataunuaina o o tatou tiutetauave. Sa saunua mai Elder Franklin D. Richards e faapea: “o le tulaga masani lava e mafua i le faapea mai tagata e talosagaina e talia se tofiga i le Ekalesia, ‘O, e le mafai ona ou faia lena mea. E le tele se poto masani o i ai ia te au po o se aoaoga foi e pei ona i ai i se tasi tagata atonu na galue ai.’ Peitai, o le faatuatua, suesue, galue, ma le tatalo, o le a saunia ai e le Alii se auala e mafai ai e i tatou ona faataunuaina mea ua foliga mai e le mafai ona fai” (in Conference Report, Sao Paulo Area Conference 1975, p. 23).

Atinaeina o a Tatou Taleni

Pe a uma ona tatou iloa a tatou taleni, e faapefea ona tatou atinaeina?

O nisi o i tatou, o le faafitauli e le o le le iloa o a tatou taleni, ae o le faatoilaloina o le fefe i le faaogaina o ia taleni. Na fetalai mai le Alii: “Ae ou te le fiafia i nisi, aua . . . e natia e i latou taleni ua ou tuuina atu ia te i latou, ona o le matatau i tagata. . . . O le a faapea foi ona oo mai, afai latou te le faamaoni atili ia te a’u, o le a aveesea lava mea o ia i latou” (MFF 60:2–3).

O se tasi auala e mafai ai ona tatou atinaeina ai a tatou taleni o le *faatoilaloina lea o lo tatou fefe*. E le o se mea faigofie ona fai lena mea, peitai ua tuuina mai e le Alii ia i tatou se fautuaga e mafai ona fesoasoani i lea tulaga e faapea: “Afai ua saunia outou,” o lana fetalaiga lea ia i tatou, “o le a outou le matatau ai lava” (MFF 38:30). Afai o le a saunia i tatou, o le a maua e i tatou le lagona toafilemu e faapea e mafai ona tatou faia le mea ua saunia ai e i tatou i tatou lava ina ia fai. O lea la toafilemu o le a aveeseina ai le fefe.

O se tasi o vaega taua o le sauniuniga o le suesue lea. Ua fautuaina i tatou ina ia “saili i le aoao, e faapea foi i le suesue ma le faatuatua” (MFF 88:118). O le suesue o le a maua ai e i tatou le toafilemu, o le a fesoasoani lena faiga i le uunaiina o i tatou ina ia atinae a tatou taleni.

O le tasi auala e atinae ai a tatou taleni o le galue ai lea. E tusa lava pe tatou te manatu e itiiti a tatou taleni, e mafai pea lava ona tatou faaopoopoina atili. Afai o le a malosi lo tatou manao, e mafai ona faamalosi atili taleni vaivai e ala i le faatino ma le aoaoina.

“O lo tatou avanoa sili e faalauteleina ai ma atinae i tatou e maua lea i le vaega o a tatou taleni, o tatou malosiaga, ma o tatou atamai. . . .

“Afai e te naunau e maua se papatua malosi, e na o le tasi lava le mea e te faia o le amoina lea o ni avega mamafa. O le tulaga lava foi lea e tasi, e mafai ona tatou faalauteleina ai le tele o mea e mafai ona tatou faia i soo se tulaga lava

“Ua tuuina mai e le Alii ia i tatou a tatou taleni ma atamai i se tulaga o ni mea e nonoina mai ma o se tulaga lea e mafai ai ona ia toe aveeseina

mea uma e le faaaogaina. O tulaga lava foi ia e tasi na ia tuuina mai ai le manai i le fanauga a Israelu i le vao. Sa ufitia le eleele i le anoanoai o le manai i aso taitasi ma sa faaputu e tagata manai latou te manaomia, ae o mea sa le faaaogaina, sa faaleagaina. E faapea foi i o tatou atamai. O le toatele o i tatou e le mafai lava ona maua ni tua malolosi pe maua foi ni mafaufau maoae ona o avega ua tatou tuuina atu ia i latou e tauaveina ae lei lava lo latou mamafa. O malosiaga uma e i ai ia i tatou e le faaogaina, e aveesea lea” (Sterling W. Sill, “A Hundred-Hundred Marriage,” *Ensign*, Mar. Pp. 34–35).

O nisi taimi tatou te vaai atu i taleni a isi tagata ma tatou manatu na maua e i latou ia taleni i nai taumafaiga iti na latou fai. Ua tatou le iloa, ua tele naua taumafaiga sa latou tuuina atu i le atinaeina o a latou taleni. O se tasi o tagata sa galue malosi i le atinaeina o ana taleni o Peresitene Heber J. Grant lea. A o ia faamatala mai le ala na ia atinaeina ai ia taleni, sa faapea mai o ia i se tasi taimi:

“Sa le mafai ona ou togiina le polo mai le tasi tulaga i le isi, ma . . . sa lei ia te au le malosi e tamoe ai pe ta ai foi le polo. Afai ou te maua le polo, e masani lava ona tauvalaau mai tamaiti ia te au, ‘Togi mai iinei teine!’ Sa tele ina ula mai tagata ia te au ona sa le mafai ona ou togiina le polo ma o le mea lea na matuai tautino ifo ai e a’u i lo’u lava loto o le a ou taalo i le au peisipolo muamua e manumalo i le siamupini a le setete o luta. . . . Na ou faasaoina se tala, ma amata ai ona ou togitogiina auauai le tau o se polo peisipolo, ma sa ou faaluina le tele o itula i le togiina atu o le polo i le pa o le fanua o Epikopo Edwin D. Woolley. . . . Sa masani lava ona tiga lo’u lima ma o le mea lea sa faigata ai ona ou moe i le po, ae sa faaauau pea ona faataitai la’u togi ma oo ai lava ina faamanuiaina au i lo’u lavea ai i le ‘au [lona lua] a la matou kalapu. Mulimuli ane, sa ou auai i se kalapu sili atu ona lelei ma oo ai ina ou taalo i le [au muamua] na manumalo i le siamupini i Kalefonia, Colorado, ma Wyoming, ma sa faapea ona faataunuuina ai la’u folafolaga na fai ia te a’u lava ma ou litaea ai mai le taaloga peisipolo.”

Sa galue foi Peresitene Grant i lana taleni o le tusitusi teuteu. Sa faia e ia “se tautinoga o le a i ai se aso e avea ai o ia ma se tagata tausitusi i le faletupe na taua o le Wells Fargo ma le Kamupani.” O se tagata tausitusi lelei e tataua ona lelei lana tusitusi; o le mea lea na amata ai loa ona galue o ia e avea ma se tagata tusitusi lelei. Sa tusia e se tasi tusitala se faamatalaga faapea:

“Sa matua leaga lava lana tusitusi i le amataga ma o le mea lea ina ua vaai i ai nisi o ana uo e toalua sa faapea ane le tasi i le tasi, ‘Ua pei lava o ni saeuga moa lena ituaiga tusitusi.’ ‘E leai,’ sa faapea mai ai le isi, ‘e foliga mai na ta’e le fagu vaitusi ina ua pa iai se faititili.’ Sa avea lenei faamatalaga ma mea na afaina ai le finagalo mitamita o Heber,



ma ia tatu'ina le kesi i lana moto, ma ia faapea mai, 'E i ai se aso o le a mafai ai ona ou tuuina atu ia te outou na ni lesona i mea tau tusitusi'; ma sa faapea lava ona ia fai. Sa faataitai ma saga faataitai lana tusitusi seia oo lava ina matua faatauaina lana tusitusi e i latou uma lava o e na iloa o ia. Sa oo foi ina maua e ia ni tupe e ala lea i lona tusiaina o ni pepa faamanuia o le Kerisimasi."

E fiafia tele Peresitene Grant e faapea mai, "O le mea tatou te faia pea lava pea, e faasolo ina sili atu ona faigofie ona fai; e le ona ua suia le natura o lea mea, ae ona ua faateleina lo tatou atamai e faia ai" (Tagai ia Leon R. Hartshorn, *Classic Stories from the Lives of Our Prophets*, pp. 194–95, 196, 207.)

Ia alu ane le tagata o le vasega na tofiaina e faamatala mai le ala na ia iloa ai ma atinae se tasi o ana taleni.

Fesoasoani Atu i o Tatou Aiga ina ia Atinae a Latou Taleni

Faaali atu le fesoasoani vaaia 19-a, "E tatau i matua ona faafailleina taleni a a latou fanau." E mafai faapefea ona tatou fesoasoani i tagata o o tatou aiga i le atinaeina o a latou taleni?

E tatau ona tatou fesoasoani i o tatou aiga ina ia iloa ma atinae taleni o ia i latou, ma fesoasoani ia i latou ia malamalama, e tatau ona latou faaagaina a latou taleni e auuuna ai i le Alii.

Faaaoga le siata "Fesoasoani i Tagata o le Aiga e Atinae a Latou Taleni" (tagai i lalo o "Sauniuniga a le Faiaoga").

O nisi nei o auala e mafai ai ona tatou fesoasoani i o tatou aiga e atinaeina a latou taleni.

1. IA UUNAIINA TAGATA TAITOATASI O LE AIGA INA IA MAUA SE FAAMANUIAGA A LE TAMA PO O SE FAAMANUIAGA FAAPETERIAKA

Faaali atu le fesoasoani vaaia 2-i, "E mafai ona maua e tagata uma o le aiga faamanuiaga a le perisitua," po o le 12-a, "E mafai ona faamalositia tagata o le aiga i faamanuiaga a le tama o le aiga."

E mafai e tama ona tuuina atu i tagata o lona aiga faamanuiaga e fesoasoani ia i latou i le faatupuina o le agaga naunautai faapea ma le atamai e atinae ai a latou taleni. Afai e le mafai e se tagata ona maua se faamanuiaga a se tama, e mafai ona ia maua se faamanuiaga a le perisitua mo lea lava faamoemoe mai se tasi o faiaoga o aiga po o se taitai o le perisitua.

2. IA FAATUINA LAGONA LELEI O LE AIGA E UIGA I TALENI

E tatau ona tatou aoao atu ma faaali atu e ala i a tatou faataitaiga, o se mea lelei le atinae o taleni. E tatau foi ona tatou viia o tatou taitoalua ma fanau pe a latou ausia ma faamafanafana ia i latou pe a le faamanuiaina. E le tatau i alii talavou ona faitio, ae tatau ona latou faamalo atu i o latou matua, uso, ma tuafafine.

3. IA FESOASOANI ATU I TAGATA O LE AIGA I LE FILIFILIA O TALANI E ATINAE

Ia otootoina faatasi ma tagata o le aiga se polokalama olaola o le atinaeina o taleni, ona tuuina atu lea ia i latou se taimi e faaaoao ai nei taleni. O se taimi lelei mo i latou e faataitai ai o le taimi lea o afiafi faaleaiga.

4. IA UUNAIINA TAGATA O LE AIGA IA TATALO MO LE MALOSI, LOTOTELE, MA LE UUNAIIGA I LE ATINAE O A LATOU TALANI

Afai tatou te ole atu i le Alii i a tatou tatalo faaleaiga e fesoasoani mai i tagata o le aiga i le atinaeina ma le faaaogaina o a latou taleni, o le a faapea foi ona uunaiina i latou ina ia tatalo mo lenei faamanuiaga.

“Saili atu i meaalofa sili, ia manatua pea lava pe na tuuina atu i se a ia mea; aua e moni ou te fai ia te outou, ua tuuina atu ia mea mo le lelei o e alofofa mai ia te au ma tausi a’u poloaiga uma, ma le tausisi e faia faapea” (MFF 46:8-9).

Faaiuga

Ua tuuina mai e le Atua ia i tatou taitoatasi meaalofa, taleni, ma atamai. I le maua la e i tatou o le agaga talisapaia faapea foi ma le poloaiina o i tatou, o le mea lea e tatau ai ona tatou iloa ma atinae nei meaalofa. E finagalo le Tama Faalelagi ia tatou faaaoga ma le poto ia meaalofa e fesoasoani atu ai i isi. O le mea moni, o se tasi o faamoemoega o le Ekalesia o le fesoasoani lea ia i tatou i le faaaogaina ma le atinaeina o a tatou meaalofa ma taleni na tuuina mai e le Atua e ala i le tuuina mai lea ia i tatou o avanoa e auauna ai le tasi i le tasi.

Lu’i

1. Ia faatuina se lagona lelei o le aiga e uiga i le atinae ma le faaaogaina o taleni.
2. Ia tusia otooto se fuafuaga mo le atinaeina o se tasi o au taleni.
3. Afai o oe o se tama o loo umia le Perisitua Mekisateko, ia tuuina atu i tagata taitoatasi o lou aiga se faamanuiaga e fesoasoani ai ia i latou ia iloa a latou taleni.
4. Ia fesoasoani atu i tagata o le aiga i le filifilia o se taleni e tasi po o le lua foi latou te fia atinaeina.
5. Ia uunaiina tagata o le aiga ia tatalo mo le malos, lototele, ma le uunaiga i le atinaeina o a latou taleni.

Mau Faapoopo

Luka 12:47–48 (e tele mea e manaomia mai ia i latou o e na tuuina atu i ai mea e tele)

Eteru 12:35 (e aveesea taleni pe afai e le fetufaafia)

Sauniuniga a le Faiaoga

A o lei tuuina atu lenei lesona—

1. Faitau le *Mataupu Faavae o le Talalelei*, mataupu 34, “O le Atinae o a Tatou Taleni.”
2. Ia fai atu i se tagata o le vasega e faamatala mai le ala na ia iloa ai ma atinae se tasi o ana taleni.
3. Ia saunia le siata lenei e faatatau i le ala e mafai ai ona tatou fesoasoani i tagata o o tatou aiga i le atinaeina o a latou taleni, po o le tusia foi o nei faamatalaga i luga o le laupapa.

Fesoasoani Atu i Tagata o le Aiga i le Atinaeina o a Latou Taleni

1. Ia uunaiina tagata taitoatasi o le aiga ina ia maua se faamanuiaga a le tama o le aiga po o se faamanuiaga faapeteriaka.
 2. Ia faatuina ni lagona lelei o le aiga e uiga i taleni.
 3. Fesoasoani i tagata o le aiga i le filifilia o taleni e atinae.
 4. Ia uunaiina tagata o le aiga ina ia tatalo mo le malosī, lototele, ma le uunaiga.
4. Ia fai atu i tagata o le vasega e faitau pe faamatala mai tala ma mau o loo i lenei lesona.

Atinaeina o le Atamai i le Avea ai ma Taitai

Lesona 20

Ua fuafuaina lenei lesona e fesoasoani ia i tatou ina ia malamalama ai i mataupu faavae tau i le taitaiga.

Faatomuaga

E manaomia e le Ekalesia ni taitai lelei: O ni alii ma ni tamaitai o e e mafai ona taitaiina le faitau aofai o loo vave faatupulaia o tagata o le Ekalesia , o ni alii ia ma ni tamaitai o e e mafai ona taitaiina mataupu ma faatumauiina le faatulagaga o le Ekalesia e pei ona sa faavae ai e le Alii, o ni alii ma ni tamaitai o e e mafai ona fesoasoani i tagata o le Ekalesia ina ia tausua poloaiga, o ni alii ma ni tamaitai o e o le a tutu malolosi mo le galuega o le upu moni i le lalolagi atoa.

O taitai o le Ekalesia o e e taumafai ina ia faaleleia atili le lalolagi e ala i le ola ai ma aoao atu mataupu faavae o le talalelei, e mafai ona latou maua le malamalama ma musumusuga. Pe a oo ina taitaiina i tatou e ia taitai, o le a faapea ona faamalositia o tatou aiga, alalafaga, ma malo. O lo tatou tiute le avea ina ia faapei o nei ituaiga o taitai musuia, aua atonu e avea la tatou taitaiga ma mea e suia ai isi tagata i o latou olaga atoa.

Sa faaalai e Epikopo Victor L. Brown le agaga faafetai mo taitai i lona olaga i le amataga. Sa ia saunoa mai e faapea:

“Ou te manatua lelei lava le fiafia na ou maua i le tufaina o le faamanatuga a o avea a’u ma se tiakono i le uarota Lua a Cardston, i le Siteki a Alberta i Kanada

“Ou te manatua le avea ma se faamamaluga maualuga ia te au o le auai i le faataunuaina o lea galuega paia. Ou te manatua lelei lava le aoaoina o au e o’u matua e uiga i le tatau ona mama o’u lima ma lo’u loto ina ia ou agavaa ai i le faia o lenei sauniga.

“O le lesona aupito sili ona taua o lesona uma o le faataitaiga lea na faia e lo’u tama ma lo’u tina mo a’u. O le isi e sosoo ai o le faataitaiga lea a lo’u fautua o le korama a tiakono, ma o ia foi lea na avea ma o’u taitai sikauti. Sa avea o ia ma se faataitaiga e tatau ona i ai taitai o tama. Sa lagona e tama uma sa i ai i lalo o lana taitaiga lona alofa tele. Sa lei gata i lana faatosinaga i le taeao o le Aso Sa po o le Aso Lua; ae sa faalogoina e tama i le vaiaso atoa lava. O le a i ai pea ia te a’u le agaga faafetai mo lo’u fautua o tiakono mo lesona o le olaga na ia aoaoina ai a’u a o avea a’u ma se tiakono e sefululua tausaga le matua, o ni lesona ia na fesoasoani ia te a’u e amata mai i lena aso

seia oo mai i le taimi nei” (“The Aaronic Priesthood—A Sure Foundation,” *Ensign*, July 1972, pp. 89–90).

O ai taitai sa maua e Epikopo Brown le agaga faafetai i ai?

Ina ia avea ma se taitai lelei, e tatau ona tatou malamalama i le talalelei ma ola ai. O le tele o lo tatou malamalama ma ola i le talalelei, o le sili atu foi lea ona saunia o i tatou mo valaauga i le tulaga taitai i le Ekalesia. E manaomia e le Ekalesia ma le lalolagi ni tagata faamaoni o e o le a tumau ma faamaoni pe a fetaii ma faafitauli. E tatau ona avea i tatou faapei o nei alii.

Ia mafaufau i fesili nei:

- O le a se mea o loo ou faia e saunia ai mo valaauga faataitai?
- O le a se ituaiga taitai o loo i ai nei a'u?
- O le a se ituaiga faatosinaga o o'u faia i isi tagata?
- O le a le mea e tau o le tulaga taitai? (O le mafai lea ona fesoasoani i isi ina ia faataunuaina ni mea. Ia tuuina atu i le vasega ni nai minute e tali mai ai i lenei fesili.)

O le a le Taitai?

Faaali atu le fesoasoani vaaia 20-a, “O taitai o le Ekalesia o leoleo mamoe lelei ia a le Alii.”

Sa saunoa mai Elder Bruce R. McConkie e faapea:

“O le aiga o Isaraelu o le lafu mamoe filifilia lea a le Alii, ma o i latou o e e tofia e vaaia le lafu mamoe , o leoleo mamoe ia a le Alii. O le mea lea soo se tasi lava e i ai i soo se tofiga i le Ekalesia ma o se tofiga lea o loo avea ai ma ona tiute le vaaia o le tulaga manuia faaleagaga po o le faaletino o se tasi o le fanau a le Alii o ia lava lea o se leoleo mamoe i na mamoe. E faamasinoina e le Alii ana leoleo mamoe mo le saogalemu (faaolataga) o ana mamoe. (Esekielu 34)” (*Mormon Doctrine*, p. 710).

O se leoleo mamoe moni e taitai i ana mamoe. E muamua atu o ia ia i latou, ma tuuina atu faatonuga. E iloa e i latou lona leo ma e mulimuli atu foi ia te ia. E iloa foi e le leoleo mamoe ma alofa i ana mamoe taitoatasi. E vaavaai o ia mo ni tulaga matautia e faaono oo mai faapea foi ma le puipua o ana mamoe mai ia tulaga matautia. (Tagai ia James E. Talmage, *Jesus the Christ*, p. 417.)

O se taitai o se tasi lea e mulimuli ai isi e pei foi o le tulaga i se leoleo mamoe faamaoni. E muamua atu o ia i luma e faasino le auala. O le uiga o lenei mea e le gata ina ola i mataupu faavae o loo ia aoaoina atu, ae e malamalama foi o ia ma fesoasoani atu i tulaga manaomia o isi. E mafai ona ia iloa atu le mea e tatau ona fai mo le foia o se faafitauli. E faatutuina e ia ni sini ma fuafua se auala e faataunuaina ai. E uunaiina e ia isi ina ia faia la latou vaega i le faataunuaina o sini. E iloiloina e ia ana lava mea e fai faapea foi ma mea e fai e tagata o loo ia taitai ai ma fautua atu ni auala e faaleleia ai atili.

O se taitai lelei na te uunaiina tagata ina ia faia la latou vaega. E talia e ia ma faaaloaloga i latou. E faalogo atu o ia i a latou fautuaga. E uunaiina



foi e ia i latou ina ia auai i mea e fai. I lalo la o lenei ituaiga o taitai, e uunaiina ai isi tagata ina ia galulue ma faataunuuina o latou tofiga.

Sa faamatala mai Peresitene Harold B. Lee le mea moni e ta'u o le taitai. A o saunoa o ia e uiga i le taimi e tofia ai e avea ma Peresitene o le Ekalesia, sa saunoa mai Peresitene Lee e faapea: "O lea ua oo mai ai se lagona ia te a'u e faapea, pau lava faamaumauga o le a manatua ai pea a 'u galuega e tusa ai ma lo'u valaauga fou o mea ia o le a ou tuuina atu i loto ma olaga o i latou ou te auuina atu i ai i totonu ma fafo atu o le Ekalesia" (" 'May the Kingdom of God Go Forth,' " *Ensign*, Jan. 1973, p. 24).

Uiga Maoae o se Taitai Lelei

Pe a tatou taliaina valaauga i le tulaga taitai i totonu o le Ekalesia, o lona uiga ua tatou fesoasoani atu i le Atua ma lana galuega. O le mea lea, e tatau ona tatou latalata atu ia te ia. Afai tatou te usiusitai ma auuina atu ia te ia ma le mafafau ma le loto naunautai (tagai i le MFF 64:29–34), o le a fesoasoani mai le Alii ia i tatou ina ia tatou alualu i luma i o tatou valaauga.

Ua faaalua mai e le Alii i tusitusiga paia uiga maoae e avea ai se tasi ma se taitai lelei.

Fai atu i se tasi o le vasega e faitau le Mataupu Faavae ma Feagaiga 121:41–45.

O a ni uiga lelei e faatatau i le avea ma taitai o loo ta'u mai e le Alii i lenei mau? (Ia lisi i luga o le laupapa tali e tuuina mai.)

E pei lava ona faaalua mai lenei mau, e tatau i taitai ona maua uiga lelei nei:

FAATAUANAU

O le tauanau atu o le taumafai lea e faatalitoni isi ina ia faia se mea. O le faafeagai lea o le faatonu po o le faamalosi. Sa faaalua le tauanau atu e se tasi o taitai o le perisitua o le na feagai ma se tulaga faigata i le uunaiina o se faiaoga o aiga ina ia faataunuuina lona tofiga. Sa valaauina e le taitai le faiaoga o aiga lenei ina ia oo mai i lona ofisa ma sa faalogologo atu i ona faafitauli. Ona faamatala lemu atu lea e le taitai e faapea e lima ni aiga na matua motusia la latou fesootaiga ma le epikopo ona sa lei faia e le faiaoga o aiga lona tiute. Sa ta'u atu e lea taitai i le uso lea afai e le manao e fai lona tofiga, e mafai ona valaauina se tasi tagata e sui ia te ia. Ae ui i lea, sa faamamafa atu e le taitai e faapea e manao o ia ina ia fai e lea lava uso le tofiga. Sa tali mai le faiaoga o aiga i lenei faatauina sa matua faaleleia ai atili lana galuega.

FAAPALEPALE

O le a faaoga e se taitai le onosai pe a galue ma isi tagata. Mo se faaitaiga, sa faamatala mai e se epikopo talu ai nei e faapea sa

manao e faamalolo se tasi tamaitai mai lona valaauga ona o le leaga o lana galuega. Ae ui i lea, sa le faamaloloina e ia lea tamaitai, ae sa valaauina o ia e sau i lona ofisa, sa talanoa ma ia, ma iloa ai e lei iloa e lea tamaitai le mea e tatau ona fai. Ina ua iloa e lenei tamaitai lana galuega, sa talia loa e ia ona tiutetauave ma faaleleia atili lana galuega.

FILEMU

O le filemu o le manatunatu lea i le manuia o isi. O se tulaga lea o le faaeteete i lagona o isi tagata. O le alofa lava lea.

AGAMALU

O le agamalu o le uiga lelei lea o le fautuaina ma le faaavanoaina o lona mafaufau mo fautuaga a isi. O i latou o e agamalu o i latou ia e naunau ina ia alualu i luma. Talu ai ona o le naunau o i latou e fia aoao, o le mea lea e mafai ai ona alofagia ma fiafia mai isi ia i latou. E saili atu i latou mo le taitaiga ma le fesoasoani a le Atua.

ALOFA FAAMAONI

O le alofa faamaoni o le alofa lea ma le loto atoa. O le manatu mamafa moni lea i le manuia o isi. E faaalua lea alofa i faaupuga e pei o nei: “Ou te matua manatu mamafa lava i le lagona e oo ia te oe.” “Ou te malamalama i ou lagona.” “O le a se mea e mafai ona ou fai e fesoasoani atu ai?”

AGALELEI

O se taitai agalelei o se tasi lea na te tausia faalelei tagata ma le faaaloalo. E na te taumafai ina ia malamalama lelei ia i latou ma nofouta mo o latou manaoga. Afai na te fautuaina i latou o loo ia auaua atu i ai, na te faaaluina se taimi e faagauai mai ai i latou taitoatasi ina ia mafai e ia ona talatalanoa atu i tagata taitoatasi e le mafaaalia (i nisi tulaga o le a moomia ai le fetuunai). O le agalelei o se faailoga lea o le alofa ma le faamaoni e faailoa atu ai e te manatu popole mo i latou.

ALOFA MAMA

E tatau i se taitai ona i ai le agalelei, le alofa mama o Keriso, mo tagata *uma*. O lenei alofa e aofia ai le tuu o mea e loto i ai ae fai mea e tatau ona fai mo le lelei o isi tagata.

la valaauina se tasi o le vasega e faitau mai le Moronae 7:44–48.

O a ni uiga lelei tau i le tulaga taitai e mafai ona e maua mai i lenei mau? (Ia faaopoopo atu i ai i le lisi o loo i le laupapa.)

O se tasi tama, sa ia aoaoina ona atalii ina ia avea ma ni taitai lelei, sa ia faapea mai:

“Ia aoao i le ala e taitai ai mai perofeta ma le Alii o le Filemu, ma ia amataina ia te outou lava. Ia aua nei faalagolago i isi. Ia maumaututu.

la faaea i luga o outou ulu e pei outou o atalii o le Atua, ma o outou lava o ni atalii o le Atua. la outou savavali faatasi ma tagata i lo outou tauaveina lea o mana e sili atu nai lo outou, lea o loo ia te outou e ala mai i le perisitua. la outou galulue i le lalolagi lelei ia pei outou o ni tagata e galulue faatasi ma le Alii i le fesoasoani atu i le aumaia o le tino ola pea ma le ola e faavavau i le tagata, ma e moni lava o se tulaga lea o loo outou i ai. la outou savavali ma le filemu, . . . ae ia savavali e aunoa ma le fefe, i le faatuatua. la aua nei faatagaina manatu sese e faaseseina ai outou. la outou savavali e pei o taitai e i ai le perisitua i le malo o le Atua. la savavali ma lima e saunia e fesoasoani atu, faatasi ma loto ua faatumulia i le alofa mo o outou uso a tagata. Peitai ia savavali ma le Agaga maumaututu i le amiotonu” (Wendell J. Ashton, “Unchanging Principles of Leadership,” *Ensign*, June 1971, p. 58).

Tiutetauave Faaletaitai

Afai e fia avea i tatou ma ni taitai lelei, e tatau ona tatou faia mea nei:

1. AOA O TATOU TIUTE

Ua uma ona faatonuina e le Alii i tatou o e o loo umia le perisitua ina ia aoao i tiute o o tatou valaauga. Ona ia faatonuina ai lea o i tatou ina ia faataunuina e i tatou tiute o o tatou tofiga. (Tagai i le MFF 107:99.) E mafai ona tatou aoao i o tatou tiute e ala i le suesue i tusitusiga paia faapea ma tusi taiala, tusi taulima, ma tusi lesona ua saunia e le Ekalesia. E mafai ona tatou talanoa ma isi o e o loo galulue i le tofiga e tasi e pei ona tatou umia, po o le talanoa foi ma i latou o e na galulue muamua i lea tofiga. E tatau foi ona tatou auai i fonotaga uma faaleautaitai atoa ma faatalanoaga. E tatau ona tatou tatalo ma ia anapogi i nisi taimi mo se fesoasoani i le aoaoina o o tatou tiute.

2. FAATAUNUU O TATOU TIUTE

E lua ni vaega o le tiutetauave—o le *faasafua atu* o le pule, ma le *toe lipoti mai*.

a. Faasafua atu o le pule

I le avea ai ma taitai, e tatau ona tatou aoao i le faasafua atu o le pule i isi. O le uiga o lenei mea, afai tatou te tuuina atu i se tasi le tiutetauave e faia ai se galuega i lalo o la tatou taitaiga, tatou te tuuina atu ia te ia le avanoa e faia ai le galuega ae le o le faia e i tatou mo ia.

Na saunoa mai Peresitene Harold B. Lee e faapea: “Ia faia e i latou mea uma i lo latou malosi, a ia e tu atu i o latou tua ma aoao atu i latou i le auala e fai ai. Ou te manatu o iina o loo i ai le mea lilo e tuputupu ae ai ma alualu ai i luma le tagata, o le saunia lea o tiutetauave ona aoaoina ai lea o o tatou tagata i le auala e faataunuina ai lena tiutetauave” (quoted by N. Eldon Tanner, “Leading As the Savior Led,” *New Era*, June 1977, p. 6).

O se taitai e fesoasoani atu ia i latou o loo i lalo o lana taitaiga ina ia iloa le taua o o latou valaauga. O le tulaga taitai e le o le pule; o le tuuina atu lea o le fesoasoani ma le taitaiga; o se tulaga lea o le musuia ma le uunaiina o i latou ua tuuina mai i la tatou vaaiga. (Tagai i le Mataio 23:11.)

e. *Toe lipoti mai*

Ua fetalai mai le Alii, “E sueina e le Alii ni pule o mea taitoatasi, e faia se tali auiliili i lana tausiga o mea ua pule ai ia, i le olaga nei atoa ma le faavavau” (MFF 72:3). Pe afai tatou te tuuina atu se tofiga i se tasi, e tatau ona tatou faamanino atu ia te ia le tiutetauave o lea tofiga, ma tuua ai o ia ia saoloto i le taimi mulimuli ane mo le faataunuaina o le tofiga e tusa ma le mea sili na te mafaia. E ui i lea, e tatau ona tuuina atu ia te ia se taimi patino e toe lipoti mai ai ia i tatou e tusa ma lona alualu i luma.

O lenei ituaiga lipoti, e tatau ona tuuina atu i taimi uma i le taitai o le tagata. I totonu o le Ekalesia, ua faia lenei mea e ala i faatalanoaga e fai. I le taimi o le faatalanoaga, e mafai ona tuuina atu ai e taitai se fautuaga ma iloiloina po o le a le lelei na faataunuaina ai lea galuega. Ae ui i lea, i le faa o lea mea, e tatau i le taitai ona tumau i se lagona lelei ma le agaga fesoasoani. O se taimi lelei lea mo ia e tuuina atu ai le fesoasoani ma le faamalo.

O lona uiga la, o le auala lenei tatou te faataunuaina ai tiutetauave: (1) tatou te tuuina atu se tofiga; (2) tatou te tuuina atu le avanoa i le tagata e faataunuaina ai lea tofiga; (3) tatou te tuuina atu le fesoasoani; (4) tatou te mauaina se lipoti; ma le (5) tatou te iloiloina ma tuuina atu le faamalo i le tagata mo lana galuega.

3. IA AVEA MA TAMA LELEI

O lo tatou tiute sili ona taua i le avea ma taitai, o le avea lea ma tama. I le aoaoina o tama i le ala e taitaiina lelei ai o latou aiga, sa saunoa mai ai Elder Joseph Fielding Smith e faapea:

“Tama e, afai tou te mananao i a outou fanau ina ia . . . fiafia i le upu moni ma malamalama i ai, afai tou te mananao ina ia usiusitai i latou ma lotogatasi ma outou, ia outou alolofa ia i latou! Ma ia faamaonia atu ia i latou e te alofa moni ia i latou e ala i au upu uma ma au mea uma e te fai. . . . Pe a e tautala atu ia i latou, ia aua nei faia i le ita; ia aua nei faia ma le leoleoa, ia le faia foi ma se agaga fetuu. Ia tautala atu ia i latou ma le agalelei. . . . Ia faamaluluina o latou loto; ia faatupuina ia i latou se lagona fiafia ia te oe. Ia aua nei faaaogaina upu faatiga po o upu faavevesi, a ia fesoasoani atu ia i latou e ala i le faamatala atu, faatauanao atu, faapea ma le alofa e le mavae” (*Liahona: The Elders’ Journal*, Oct. 1911, 1:260–61).

4. LAGOLAGOINA O TATOU TAITAI

O se vaega o le avea ma se taitai lelei o le avea lea ma se tagata mulimuli lelei. O taitai lelei uma lava latou te aoao ina ia mulimuli ia i latou o e o loo taitai ia i latou. E galulue tagata e lelei i le mulimuli i faatonuga ina ia faatuatua ina i latou e o latou taitai faapea ma i latou o e o loo latou taitai ai. E tatau ia i tatou uma ona lagolagoina o tatou taitai e ala i le talia ma le faataunuaina o tofiga latou te tuuina mai ia i tatou.

O ai o tatou taitai? (Tama, faiaoga, taitai o vaega ma korama, epikopo po o le peresitene o le paranesi, peresitene o le siteki po o le misiona, ma le Au Pulega Aoao o le Ekalesia.

Ia tuuina atu lau molimau e uiga i se tasi e te lagonaina o se taitai maoae.

Faaiuga

E tatau ona tatou atinaeina o tatou tomai faaletaitai pe afai tatou te mananao e faalateleina o tatou valaauga i le perisitua. E i ai nisi taimi tatou te vaai atu ai i o tatou taitai ma manatu na fananau mai i latou ma le atamai e avea ai ma taitai, peitai e tatau ona tatou iloa sa tatau ia i latou ona latou atinae a latou taleni i le auala lava e tasi e tatau ona tatou faia ai. O le usiusitai i poloaiga a le Atua, ma gauai i fautuaga a o tatou taitai, ma auauna atu ma le faamaoni i o tatou valaauga, o le a fesoasoani lea i le atinaeina o nei atamai tau i le avea ma taitai.

O lo tatou umia o le perisitua, o le a avea ai pea lava i tatou e le aunoa ma ni taitai. Ua moni faapitoa lava lenei tulaga i tama uma o e o loo umia le perisitua: o le a i ai pea ia te ia se tofiga taitai i le Ekalesia i le avea lea ma peteriaka i lona aiga. O tama o e ua faamauni i totonu o le malumalu o le a latou umia lenei tofiga e faavavau pe afai latou te tausia a latou feagaiga.

Lu'i

Ia mafaufau ma le faaeteete i uiga lelei o le avea ma taitai e pei ona tuuina atu i le lesona. Ia galue ina ia atinae ia uiga lelei i lou olaga. Ia galue ma le faamaoni i valaauga uma ma tofiga. O lenei faiga o le a fesoasoani ia te oe i le atinaeina o uiga lelei e te manaomia i le faataunuaina o soo se valaauga i le Ekalesia.

Mau Faapoopo

2 Timoteo 1:7 (ua tuuina mai e le Atua le agaga o le alofa)

1 Nifae 3:7 (o le a fesoasoani mai le Atua ia i tatou i le faataunuaina o a tatou galuega)

Mosaea 18:8–11 (e tatau i e faatuatua ona fesoasoani atu i isi)

Alema 38:11–12 (o auala e taitaia ai ma auauna atu)

Aperaamo 1:2 (Aperaamo, o se tagata amiotonu)

Sauniuniga a le Faiaoga

A o lei tuuina atu lenei lesona—

1. la saunia e tuuina atu lau molimau e uiga i se tasi o le Au Pulega Aoao po o se taitai ua e iloa.
2. la saunia se laupapa ma se penisina.
3. la fai atu i tagata o le vasega e faitau pe faamatala mai tala ma mau o loo i lenei lesona.

O le Tulaga Taitai: O le Faia o Faaiuga Musuia

Lesona 21

Ua fuafuaina lenei lesona ina ia fesoasoani ia i tatou i le faaleleia atili o lo tatou atamai i le faia o faaiuga musuia.

Faatomuaga

I le avea ai o i tatou ma fanau a le Atua, o le a manaomia e i tatou uma ma maua le aia e faia ai faaiuga. Ae ui i lea, o le faia o faaiuga o se mea faigata. E masani lava ona manatu popole i tatou e uiga i le faia o faaiuga sa'o ma faaletonu o tatou mafaufau i le mea e mafai ona tatou o atu i ai mo le maua mai ai o le fesoasoani i le faia o ia faaiuga.

Ae peitai, o loo mafai lava ona maua le fesoasoani. Ua uma ona tau mai e le Alii ia i tatou o ia o le puna o le upu moni, ma o ia e mafai ai e i tatou ona iloa le moni o mea uma lava. O i tatou o lana fanau, ma ua le tuua e ia i tatou e aunoa ma se malosi e feagai ai ma lui o le olaga.

Sa saunoa mai Elder Boyd K. Packer e faapea:

“E matua taua tele lava lou malamalama ma e iloa le mea sao mai le mea sese, ma na e fanau mai e te matua lelei lava. Pe a e faapea mai, ‘E le mafai ona ou faia! E le mafai ona ou foia faafitauli!’ Ou te fia faapea atu ma le leotele: ‘Pe e te le iloa ea o ai oe? Pe e te le iloa ea o oe o se atalii po o se afafine o le Atua Silisiliese? Pe e te le iloa ea o loo i ai ni fesoasoani malolosi na maua mai ia te ia e mafai ona e talosaga atu i ai ina ia tuuina mai ia te oe le toafilemu ma le lototele faapea ma le mama sili?’ ” (“Self-Reliance,” *Ensign*, Aug. 1975, p. 88).

Fesoasoani mai le Alii

Ina ua tatou tuua le afioaga o lo tatou Tama o i le Lagi, sa faamanuia e ia i tatou uma taitoatasi i le Agaga o Keriso. Ua faaalua mai e tusitusiga paia e faapea o le Agaga o Keriso, lea e taua i nisi taimi o le “malamalama o Keriso,” “e faamalamalamaina ai tagata uma lava e o mai i le lalolagi” (tagai i le loane 1:6–9). O lenei malamalama e maua ai e i tatou se malamalamaaga autu e uiga i le mea e sa'o ma le mea e sese. O le mulimuli i lea malamalama o le a taitaiina ai i tatou e fai mea lelei ma malamalama i le upu moni.

Ua le gata i le malamalama o Keriso, a ua tuuina mai foi ia i tatou se isi puna o le upu moni pe a oo ina faamauiina lo tatou papatisoga. O lenei la mea o le meaalofa o le Agaga Paia, ua tuuina mai e “faali ia i [tatou] mea uma e tatau ona [tatou] faia” (2 Nifae 32:5).

Fai atu i se tagata o le vasega e faitau leotele mai le 2 Nifae 32:3.

O a "afioga a Keriso?"

E oo mai ia i tatou afioga a Keriso i ni auala eseese. Atonu tatou te maua e ala i tusitusiga paia, e ala i saunoaga a o tatou perofeta soifua (tagai i le MFF 1:37–38; 68:2–4), faapea ma musumusuga a le Agaga Paia.

O le a le uiga o le "fiafia i afioga a Keriso?"

Ole uiga o le upu *fiafia* o le olioli i se mea fou. O lea olioli e maua e i latou o e saili ma le loto faamaoni i le Agaga Paia, manatunatu loloto i tusitusiga paia, ma suesue i saunoaga a perofeta.

E mafai faapefea e lo tatou fiafia i afioga a Keriso ona fesoasoani ia i tatou i le faia o faaiuga musuia?

A o fiafia i tatou i afioga a Keriso, o le a sili atu ona tatou iloa lelei le mea e tatau ona fai i vaega uma o o tatou olaga. O taitai o le Ekalesia o e fiafia i afioga a Keriso mo se faataitaiga, e sili atu ona latou iloa mea e tatau ona tautala atu ai, mea e tatau ona aoao atu, tagata e tatau ona valaauina i tofiga, faapea ma le auala e faia ai isi faaiuga e tusa ai ma o latou valaauga.

O le Auala e Faia ai Faaiuga

A o lei amataina le vasega, ia tusi i luga o le laupapa po o se pepa lautele e avea ma siata mea nei:

Faia o Faaiuga Musuia

1. Saili le faafitauli po o le faaiuga.
2. Ia tatalo mo se taitaiga faapea ma le agaga e iloa ai le mea e tatau ona fai.
3. Ia suesue i ai i le mafaufau.
4. Filifili le mea e tatau ona fai po o le faia o le faaiuga.
5. Ia tatalo mo le faamautuina o le faaiuga.
6. Ia galue—*ma faia loa*.

MFF 8:1–3

MFF 9:7–9

E pei lava ona fesoasoani mai lo tatou Tama Faalelagi ia i tatou i auala eseese, ua faapea foi ona eseese auala e faia ai faaiuga musuia. O laasaga ua fautuaina atu i lalo e tusa ai ma le faia o faaiuga musuia ua na ona tuuina atu e avea ma ni taiala lautele.

1. SAILI IA ILOA LE FAAFITAU LI PO O LE FAAIUGA

O le sailia o le faafitauli o le faavae lava lea e faaautu i ai a tatou faaiuga e fai. E tatau ona tatou malamalama lelei po o le a le faafitauli a o lei mafai ona tatou foia. E i ai nisi taimi e aoga ai le tusia o le faafitauli i se fasipepa.

Faaali atu le fesoasoani vaaiia 21-a, "E taua tele le tatalo i le faia o faaiuga sa'o."



2. TATALO MO SE TAITAIGA FAAPEA MA LE AGAGA E ILOA AI LE MEA E TATAU ONA FAI

A o amata ona tatou foiaina lo tatou faafitauli, o le a tatou mananao ina ia saili atu mo le fesoasoani a lo tatou Tama Faalelagi. O lenei fesoasoani e masani lava ona oo mai e ala i se tasi o meaalofa a le Agaga—o le agaga lea e iloa ai le mea e tatau ona fai. O lenei meaalofa e pei ona maua e i latou o e o loo tatalo atu ai, e fesoasoani ia i tatou ina ia iloa le upu moni ma faia fetuunaiga e tatau ai (tagai i le Moronae 10:5; Ioane 16:13).

3. SUESUE I AI I LOU MAFAUFAU

O le ole atu i le Alii mo se fesoasoani ua na o se vaega lea o le faasologa o mea e fai. Ua manatu nisi tagata e faapea, ona e talu ai sa fetalai mai le Alii, “Ia outou ole atu, ona foiaina mai ai lea ia te outou” (Mataio 7:7), ua tatau ai i se tasi ona ole atu mo le maua o le tali a le Alii. Peitai e le o le tulaga lea e i ai. Ua faatonuina i tatou e le Alii ina ia suesue i le faafitauli i o tatou mafaufau (tagai i le MFF 9:8). A o lei musuia i tatou e le Alii, ua finagalo ina ia tatou sailia faamatalaga uma o loo mafai ona maua e uiga i le faafitauli ma saili atu mo se fautuuga mai tagata e tatau ai ma tagata faatuatua. Mo se faaitaiga, e mafai ona saili atu taitai mo se fautuuga mai o latou fesoasoani, e mafai e tane ona talanoa atu i a latou ava, ma e mafai e atalii ona talosaga atu i matua mo se fautuuga. E tatau foi ona tatou saili ane i faaiuga e mafai ona maua mo le foia ai o le faafitauli ma ia mafaufau i le tulaga e i ai ia faaiuga taitasi.

Pe a faia ni faaiuga, e tatau ona tatou aoina mai ia lava ni faamatalaga faalagolagoina mo le faia o se faaiuga potu. O faaiuga e faia i ni faamatalaga itiiti po o ni faamatalaga le faalagolagoina e masani lava ona sese ma aumaia ai le faanoanoa ma le le fiafia.

4. FAI LE FAAIUGA

Pe a uma ona tatou suesue i le faafitauli, ona mafai ai lea ona tatou filifili i le faaiuga e sili ona lelei e mafai ona tatou faia. (O nisi taimi o le faaiuga e tatau ona fai, e le o le tulaga lea i va o le lelei ma le leaga, ae po o le a le mea e sili atu ona lelei e tatau ona fai i lea taimi.) Tatou te faia le faaiuga e faavae i luga o le mea ua tatou lagona e sili ona lelei ona fai pe a uma ona tatou iloilo ina maea faamatalaga ua tatou aoina mai.

5. TATALO MO LE FAAMAUTUINA O LE FAAIUGA

Pe a uma ona faia le filifiliga, tatou te ole atu i le Alii i le tatalo ma fesili atu pe ua sa’o le faaiuga. Afai ua sa’o le faaiuga, o le a faamautuina e le Agaga Paia le faaiuga e ala lea i lona tuuina mai ia i tatou o se

lagona filemu ma le mautinoa e faailoa mai ai ua sa'o la tatou filifiliga (tagai i le MFF 6:22–23). O nisi foi o taimi o le a maua foi e i tatou le tulaga o le “mu o o tatou loto” (tagai i le MFF 9:8).

Afai e i ai se pogai ua le sao ai la tatou filifiliga, o le a faaalua mai e le Alii e faapea ua sese la tatou faaiuga e ala i lona tuuina mai o se lagona le mautonu po o le masalosalo. Ua taua i tusitusiga paia lea tulaga o se “pogisa o le mafaufau” (MFF 9:9). Pe afai e oo i lea tulaga, e tatau ona tatou maua le lotomauualalo e toe amata ai ni faasologa o mea e fai i le faia o faaiuga.

O le tulaga masani lava, e maua e i tatou le faamautuina e le Agaga Paia o la tatou faaiuga a o tatou tatalo atu ai. Peitai, e i ai le taimi, atonu e le mautinoa ai e i tatou le mea o loo finagalo le Alii tatou te fai ma e tatau ona tatou amataina ona fai lea mea a o lei maua e i tatou se tulaga faamautuina mai le Agaga.

Sa saunoa mai Elder Hartman Rector, Jr., e faapea e finagalo le Alii ina ia tatou tootutuli ma fesootai atu ma ia. Ia ta'u atu ia te ia le mea o le a tatou faia—ia faia ni tautinoga ia te ia—otootoo atu la tatou polokalama—ona tatou tutu lea i luga ma o atu ma faia tonu lava le mea na tatou ta'u atu ia te ia o le a tatou faia. I le faia la o le mea ua uma ona tatou ta'uina atu i le Alii o le a tatou faia, o le a faapea ona oo mai ai le Agaga” (“You Shall Receive the Spirit,” *Ensign*, Jan. 1974, p. 107).

O le tulaga masani lava, atonu tatou te faia se faaiuga e foliga mai ua faigata naua. Atonu e oo ia i tatou le manatu ua leai se isi tali. Afai e oo i lea tulaga, e tatau ona tatou manatua le tulaga na oo ia Peresitene Marion G. Romney e faapea:

“Sa feagai a'u ma faafitauli sa foliga mai e le mafai ona ou foia, ma sa ou matua mafatia i le feagai ma ia faafitauli seia oo ina foliga mai ua leai se isi mea e sili atu ou te mafaia pe afai ou te le faia se faaiuga i ia faafitauli. Ina ua uma ona ou tatalo ma anapogi i le tele o taimi mo se aso atoa i vaiaso taitasi mo ni vai taimi uumi, sa faaalua mai ni tali i lo'u mafaufau i ni fuaiupu atoatoa lelei. Sa ou faalogo ina le siufofoga o le Atua i lo'u mafaufau ma ua ou iloa lelei ana afioga” (*Look to God and Live: Discourses of Marion G. Romney*, p. 45).

E i ai nisi taimi e tatau ai ona tatou anapopogi ma faapea foi ona suesue ma tatalo i le foia o faafitauli faigata. O le tulaga masani lava, e tusa lava foi pe ua uma ona suesue, tatalo ma anapogi, faia se faaiuga, ma faatinoina lea faaiuga, atonu e lei maua lava e i tatou se tulaga o le faamautuina o lea faaiuga. I ia la taimi faapea, e tatau ai ona tatou faia la tatou lava faaiuga e sili atu, ma onosai i le faatuatua o le a ia i se aso e oo mai ai le faamautuina. E tatau lava pea ona tatou manatua e tali mai e le Atua a tatou tatalo, i lana lava faaiuga, e sili atu ona lelei mo i tatou pe a mauaina se tali.

6. FAATINOGA—IA FAIA

Ae peitai, afai e faamautuina mai e le Alii la tatou faaiuga ua sa’o, o le a amata atu i lea taimi ona ia te i tatou le tiutetauave o le faia o le mea na tonu tatou te fai. O le mea lea, e tatau ona tatou faia i taimi uma se tautinoga ina ia galulue i a tatou faaiuga na fai.

O Peresitene Spencer W. Kimball o se faataitaiga lelei lea o le ua tuuina atu lona loto atoa i le faia o le mea ua faatonuina o ia e le Alii ia faia: “O loo faaalua lelei lava i luga o le kesi a Peresitene Kimball se faaupuga ua faitauina faapenei, ‘IA FAIA.’ O lenei taitai musuia, na te faalona lua mea mo lona lava lelei. Na te faia mea uma ina ia faamalieina ai le finagalo o le Alii. Ua avea lana faataitaiga o le galue ma se talatuu ma ua faamautuina ai se faataitaiga mo i tatou uma e mulimuli ai” (Robert L. Simpson, *Ensign*, No. 1975, p. 13).

O nisi o laasaga o loo taua i luga mo le faia o faaiuga o loo faamalamalamaina lea i se tulaga na tupu i le amataga o le talafaasolopito o le tatou Ekalesia. Sa faaliliu e Iosefa Samita le Tusi a Mamonā ae sa avea Oliva Kaotui ma failautusi. Ina ua mavae se taimi, sa manao Oliva e fai e ia lava sina faaliliuga. Sa faaalua e le Alii ia Oliva lona finagalo e tusa ai ma lea tulaga. O loo faamaumauina i le Mataupu Faavae ma Feagaiga, vaega 9, ma o loo faamatala mai ai le taumafai o Oliva e faaliliu ae sa le faamanuiaina ana taumafaiga.

Fai atu i se tagata o le vasega e faitau leotele le Mataupu Faavae ma Feagaiga 9:7–9.

E tusa lava pe o i ai ia i tatou i le taimi nei se tofiga i le Ekalesia pe leai, a ua avea lava i tatou uma ma ni taitai i mea o lona lava olaga ma e tatau ona aoao le ala e fai ai faaiuga musuia.

O le Faatinoia o le Faia o Faaiuga

la galulue tagata o le vasega i le foiaina o le faafitauli lenei.

Faafitauli: E faapefea ona tatou fesoasoani atu i se tagata le toaga i le lotu ina ia toe foi mai i le Ekalesia?

LAASAGA 1: SAILI IA ILOA LE FAAFITAILI

la sailia e tagata o le vasega le faafitauli.

O le toatele lava o taitai e auauna atu i tagata o e le toaga i le Ekalesia. O le toe aumaia o nei tagata ina ia toaaga atoatoa e manaomia ai le agaga naunautai faapea ma le alofa (tagai i le MFF 81:5).

I le galulue ai i tagata e le toaaga, e tatau i taitai o le perisitua ona muamua saunia se lisi e le faalauaitelina o i latou e le o toaaga atoatoa i le Ekalesia. Afai e tele naua igoa e i ai i le lisi, e tatau ona filifili e ia tagata na te lagona e sili ona gauai mai i le faaumeaina. Ona taumafai malosi ai lea e fesoasoani atu ia i latou ia. Pe a oo ina faatoagaina i latou, e mafai ona fesoasoani ia tagata ia te ia i le faatoagaina mai o isi tagata le toaaga.

O le Uso o Jones o se tasi lea o le toatele o tagata le toaaga i le Ekalesia.

Faitau leotele atu le faamatalaga lenei e uiga i le Uso o Jones.

Na auai le Uso o Jones i le Ekalesia i le lima tausaga talu ai ma sa faauuina i le perisitua. Talu ai ona o se suiga i le taimi o lana galuega, na le mafai ai e ia ona auai i soo se sauniga a le Ekalesia faapea ma gaoioiga talu mai le taimi ae lei umi talu ona papatisoina o ia. O loo feagai o ia ma se faafitauli i le usitaia o le Upu o le Poto ma e le o fiafia tele i ona faiaoga o aiga. Ua toatolu lana fanau o loo i ai faapea ma lona toalua lelei. O le Uso o Jones o se kamuta atamai e mitamita tele i lana galuega.

LAASAGA 2: TATALO MO LE AGAGA E ILOA AI LE MEA E TATAU ONA FAI

Afai ua tatou iloa le faafitauli, o fea tatou te o atu i ai mo se fesoasoani i le filifilia o le ala e foia ai le faafitauli?

Aisea e tatau ai ona tatou faaoga le faautauta i le faia o le filifiliga pe a tatou feagai ma se tagata e pei o le Uso o Jones?

O faafitauli e pei o le le toaga i le Ekalesia o loo i ai ni lu'i faapitoa e feagai ai. A o lei mafai e i tatou ona faia soo se faaiuga e tusa ai ma se tagata e le toaga, e tatau ona tatou maua le Agaga e fesoasoani ia i tatou i le iloa o le mea moni mai le mea sese faapea ma le iloa o le tulaga manaomia moni mai tulaga manaomia e le moni (tagai i le MFF 46:27).

LAASAGA 3: SUESUE I LE FAAFITAULI

O a faamatalaga o le a fesoasoani i le filifilia po o le a le mea e tatau ona fai e uiga i se tagata e le toaga?

A o tatou suesue i le faafitauli, e tatau ona tatou manatunatu i mea nei:

- O ai ona faiaoga o aiga? E mafai faapefea ona tatou faaogaina faiaoga o aiga i se tulaga sili atu ona lelei e fesoasoani ai i le tagata ina ia toe foi mai ma toaga? Pe tatau ea ona tatou tofia ni taitai faapitoa o le perisitua e fesoasoani i lenei aiga?
- E mafai faapefea ona tatou fesootai ma le tagata e le o toaga o loo tatou manaomia o ia?
- E mafai faapefea ona ia iloa o loo ia manaomia le talalelei?
- O a ni ana taleni ma ni mea e fiafia i ai? O ai ana uo e sili ona latou vavalalata?
- E mafai faapefea ona tatou faaogaina ana taleni ina ia maua ai e ia le lagona o le manaomia ma lona faatauaina?
- O a ni gaoioiga tatou te mafai ona faa-aafia ai o ia e le faatiga ai ia te ia?
- E mafai faapefea ona tatou talosaga atu ia te ia mo lana fesoasoani?
- E mafai faapefea ona tatou ofo atu e fesoasoani ia te ia?

O a nisi mea atonu tatou te manatu e tatau ona fai?

O le a se fuafuaga o le a tatou mulimuli ai ina ia toe faafoisia mai tagata le toaaga i le Ekalesia?

LAASAGA 4: IA FAIA SE FAAIUGA

A o tatou suesue i le faafitauli, e tatau ona tatou faia se fuafuaga e fesoasoani atu ai i le tagata ua le toaga ma faaalua atu i ai lo tatou alofa ia te ia. O le taimi lea mo i tatou e filifili ai le mea e tatau ona fai.

LAASAGA 5: IA TATALO MO LE FAAMAUTUINA O LE FAAIUGA

O le a le isi laasaga e sosoo ai pe a uma ona tatou faia se faaiuga o le mea o le a fai?

Pe a maea ona tatou faia se faaiuga, e tatau ona tatou ole atu i le Alii e uiga i lea faaiuga. O le a ta'u mai e le Agaga ia i tatou pe sao pe sese foi le mea ua tatou fuafuaina.

LAASAGA 6: FAATINO

O le a le laasaga mulimuli?

O le taimi lava e maua ai e i tatou le faamautuina o le faaiuga, e tatau loa ona tatou mulimuli i le faataitaiga a Peresitene Spencer W. Kimball ma faatinoina loa la tatou fuafuaga. E tatau ona tatou "Faia loa." A o tatou mulimuli i la tatou fuafuaga, o le a pai atu le Agaga i le loto o le tagata le toaga. I lea lava taimi e tuuina atu ai la tatou faaaumea, atonu o le a manao ina ia toe foi mai i le toaga atoatoa i le Ekalesia.

O le faatupuina o le atamai i le faia o faaiuga lelei e mafai ona avea ma se mea fiafia. Peitai o le mea e sili atu ona taua, o lo tatou faia lea o le faaiuga e sili ona lelei. Ona mafai lea ona tatou mautinoa o le a lagolagoina e le Alii i tatou a o tatou faatinoina a tatou faaiuga.

Faaiuga

O i tatou o fanau a lo tatou Tama Faalelagi, ma ua ia auina mai i tatou i le lalolagi ina ia maua ai e i tatou le poto masani. O le pogai lenei ua tuuina mai ai e le Alii ia i tatou galuega e auaina ai ina ia fesoasoani ia te ia i le faia o lana galuega i le lalolagi. Peitai afai e le saunia i tatou pe agavaa foi mo le mafutaga a le Agaga Paia, e le mafai ona tatou faataunuuna lelei valaauga a le Alii pe alualu foi i luma i le mea sili tatou te mafai.

Ina ia mafai ona lelei le auunaga ma faia faaiuga musuia, o le mea lea e tatau ai ona tatou ola agavaa mo le mafuta mai a le Agaga Paia ma ia faatuatua ia lesu Keriso. E tatau foi ona tatou faatuatua ia i tatou lava i le faataunuuna lea o a tatou faaiuga. E moomia ai le lototele ma le tuu atoa ma le loto i ai. Afai tatou te faia ma le amiotonu le mea ua tatou tautino atu e fai, o le a faamanuiaina i tatou e le Alii i lona Agaga.

O le mulimuli i le faasologa sa'o o mea e fai i le faia o faaiuga sa'o, tausia o poloaiga, faapea ma le sili atu mo le faamautuina e le Agaga Paia, o le a mafai ai e i tatou ona faia atili ni faaiuga musuia ma o le a faatupulaia a tatou faatosinaga mo le lelei.

Lu'i

I lenei vaiaso pe a tatou faia se faaiuga, ia mulimuli i laasaga o loo ootooina i lenei lesona. Ia faaaauau pea ona faatino lenei faasologa o mea e fai seia oo ina avea ma se vaega o lou olaga.

Mau Faaopoopo

1 Tupu 3:5–15 (ua ole atu Solomona mo se loto malamalama)

Ioane 7:17 (o le ala e iloa ai pe o se mea ua faia o le finagalo lea o le Atua)

1 Nifae 3:7 (o le a fesoasoani le Alii ia i tatou i le faia o mea na te faatonuina ai i tatou e fai)

MFF 11:12–14 (ia e faalagolago i le Agaga)

Sauniuniga a le Faaoga

A o lei tuuina atu lenei lesona—

1. Toe faamantu le lesona 12 o lenei tusi lesona.
2. Ia saunia se siata e ootoo atu ai laasaga mo le faia o faaiuga musuia, po o le fuafua foi e tusia se lisi o laasaga i luga o le laupapa.
3. Ia fai atu i tagata o le vasega e faitau pe faamatala mai tala ma mau o loo i lenei lesona.

Tiutetauave ma le Faasafua atu o le Pule

Lesona 22

Ua fuafuaina lenei lesona ina ia fesoasoani ia i tatou ia malamalama ma faaaoga mataupu faavae o le tiutetauave ma le faasafua atu o le pule.

Faatomuaga

Sa avea Mose ma se taitai tautaua, peitai ina ua uma ona taitaiina ese mai e ia le fanauga a Isaraelu mai Aikupito, sa ia iloa ai le faigata tele ona foia na o ia ia faafitauli o tagata uma. O aso uma, e amata mai le taeao seia oo i le po, e nofo ai o ia i luma o tagata ma tali atu i a latou fesili ma foia tulaga faigata na feagai ma i latou. Peitai sa tele naua lea galuega mo se tagata e toatasi. Ina ua uma ona maua e ia se fautuaga mai ia letero, le tama o lona toalua ma o se tasi foi o taitai perisitua amiotonu, sa vaevaeina ai loa e Mose tagata i ni vaega taitoasefulu, taitoalimasefulu, taitoaselau, ma le taiafe. Ona tofia ai lea e ia se tagata agavaa na te taitaiina vaega taitasi. Sa amata mai lea taimi, i lona tulaga o le perofeta o Isaraelu, ona faaaogaina e Mose lona taimi e aoao ai tagata i poloaiga ma foia le tele o o latou faafitauli faigata. Sa taulimaina isi faafitauli e taitai na ia valaauina. (Tagai i le Esoto 18:13–26.)

Sa avea Mose ma se taitai sili ona lelei e ala i lona faatulagaina o tagata na ia auauna atu i ai. O lona faaaogaina o mataupu faavae o le tiutetauave ma le faasafuaina atu o le pule na fesoasoani lea ia Mose i le faamautuina o le faatulagaga lelei o tagata o Isaraelu ma pulea lelei ai i latou.

O le a le Tiutetauave?

O se tagata ua tuuina atu i ai le matafaioi o le vaaia o isi tagata po o se mea e patino i se isi tagata ua taua lea o se tiutetauave. Sa faamatalaina mai e Peresitene Spencer W. Kimball e faapea “i totonu o le Ekalesia, o le mea e ta’u o le tiutetauave o se mea paia lea faaleagaga po o se mea faaletino ua tuuina atu i le vaaiga se tagata” (“Welfare Services: the Gospel in Action,” *Ensign*, Nov. 1977, p. 78).

Tuu le siata o “Mataupu Faavae Autu o le Tiutetauave” i luma o le vasega, pe tusia foi faamatalaga i luga o le laupapa (tagai i le “Sauniuniga a le Faiaoga”).

O le tiutetauave i totonu o le Ekalesia e aofia ai ni mataupu faavae se tolu (tagai i le MFF 104:11–17).

1. O SE TIUTETAUAVE E TUUINA ATU FAATASI MA SE MEA E A LE ALII IA
Sa fetalai mai le Alii, “O au, le Alii, na faamafolafolaina le lagi, ma atinae le lalolagi, o la’u lava galuega taua; o mea uma foi o i ai e

a a'u ia" (MFF 104:14–15). O le lalolagi atoa lava o a le Alii lava lea. O le mea moni, o mea o loo ia i tatou na tuuina mai ia i tatou e le Alii. O o tatou tino, o a tatou taleni ma atamai, faapea ma o tatou aiga na tuuina mai e ia mo la tatou tausiga. O le Ekalesia e a la lava lea, ma e maua e i tatou se tiutetauave faaleagaga pe a maua e i tatou le perisitua po o se valaauga i le Ekalesia.

O a nisi o tiutetauave ua e mauaina mai le Alii?

Ua finagalo le Alii ina ia tatou faatuatua ma faamaoni i o tatou tiutetauave. E tatau i taitai ona malamalama, afai latou te valaauina se tasi i se tofiga i le Ekalesia, pe tuuina atu foi se tofiga i le perisitua, o lona uiga o loo latou tuuina atu se tiutetauave.

2. O SE TAGATA TAUSI MEA NA TE FAAOGAINA LE FILIFILIGA SAOLOTO I LE VAAIGA O LONA TIUTETAUAVE

I le avea ai ma fanau a lo tatou Tama Faalelagi, ua ia i tatou le filifiliga saoloto e galulue ai e tusa ma la tatou lava filifiliga. O le mea lea, pe a maua e i tatou se tiutetauave, e saoloto i tatou i le vaaia o lea tiute i le auala ua tatou filifilia. E saoloto i tatou i le faatuatua, i le agaga naunautai, faapea ma le ususitai; peitai ua saoloto foi i tatou i le paie ma le le ususitai. Ua fetalai mai le Alii, "Ua tuuina atu i le fanau a tagata latou te fai ma a latou lava taitai" (MFF 104:17). O le a le faamalositia e ia i tatou ina ia avea ma ni tausimefa faatuatua, ae o le a ia faamasinoia i tatou i le tulaga na tatou tausia ai o tatou tiutetauave.

3. O SE TAUSIMEA E IA TE IA LE VAAIGA O LONA TIUTETAUAVE

O le a faamasinoia e le Alii i tatou i le taimi o le faamasinoga mo o tatou tiutetauave. Ae ui i lea, a o lei oo mai lena aso, e tatau foi ona tatou tuuina atu se lipoti i sui o le Alii—o o tatou taitai perisitua ia. I totonu o le Ekalesia, tatou te lipoti atu o tatou tiutetauave i faatalanoaga a le perisitua. "E sueina e le Alii, i pule o mea taitasi, e faia se tali auiliili i lana tausiga o mea ua pule ai ia, i le olaga nei atoa ma le faavava. Aua o le faamaoni ma faautauta i lenei olaga ua faitaulia e tatau ona maotofi i maota o lo'u Tama ua saunia mo ia" (MFF 72:3–4).

O le a se lagona e te manatu o le a oo i se tagata i le taimi o le faamasinoga pe afai e mafai ona ia lipoti mai na faamaoni i ona tiutetauave uma?

O le a le Faasafuaina Atu o le Pule

Sa avea Mose ma se taitai lelei ona sa faaoga e ia mataupu faavae o le tiutetauave ma le faasafuaina atu o le pule. E mafai foi e taitai i le Ekalesia ona sili atu ona lelei la latou taitaiga e ala i le faaogaina o nei mataupu faavae. O le faasafua atu o le pule o lona uiga o le tuuina atu lea i se isi tagata o le tiutetauave ma le pule e faataunuuna ai se galuega patino ua tuuina mai i lau vaaiga. Ona avea ai lea o lea galuega ua tofiaina mai ia te oe ma se tiutetauave.

O le atinaeina o le malo o le Atua i le lalolagi o se galuega mamalu, ae leai se tasi e mafai ona ia faia na o ia. O le mea lea, pe a valaauina i tatou e taitai, e tatau ona tatou faaaogaina isi tagata. O se taitai e galue malosi o le a ia faamanuiaina olaga o le toatele o isi tagata. Peitai o se taitai o le na te faasafua lelei atu le pule ma uunaiina isi tagata ina ia galulue malolosi o le a faapea ona faamanuiaina ai olaga o isi tagata e sili atu ona toatele.

O le lelei o le faasafuaina atu o le pule e manaomia ai le faaaogaina ma le poto o mataupu faavae o le tiutetauave. O laasaga o le faasafuaina atu o le pule e faapenei—

- Filifili le tagata sa'o.
- Tofi atu i ai le tiutetauave.
- Ia tuuina atu i le tagata na te pulea ia lava.
- Ia faamasinoina le tagata mo lona tiutetauave.

FILIFILI LE TAGATA SA'O

Pe afai e i ai ia i tatou se galuega e tatau ona faataunuaina, e tatau ona tatou filifili faatasi ma le agaga tatalo le tagata e tatau ona tofia (tagai i le lesona 21 i lenei tusi lesona).

TOFI ATU I AI LE TIUTETAUAVE

Pe a uma ona filifilia le tagata sa'o, e tatau ona tatou tofi atu i ai le tiutetauave. O le auala tatau e tuuina atu ai se valaauga i le Ekalesia o le faia lea o se faatalanoaga ma le tagata. E masani lava ona talafeagai i taimi uma le valaauina o le tane po o le ava a se tagata ua faaipoipo ina ia faatasi ai i le faatalanoaga. O tofiga e pei o galuega o le uelefea, faamanuiaina ma le tufatufaina o le faamanatuga, po o isi tofiga faapea, e mafai ona faia i le fesootaiga ma le tagata i se fonotaga po o se faatalanoaga.

Pe a maua se valaauga po o se tofiga fou, o le a se mea e te fia iloa e uiga i lou tiutetauave?

E tatau ona fesoasoani le taitai i le tagata ua valaauina ina ia malamalama i le faamoemoega o le faalapotopotoga po o le galuega atoa ma taunuuga patino o le a faamoemoe e faataunuaina e le tagata. Pe a uma ona faamatalaina lelei tiute o lea tofiga, e tatau ona fuafua se taimi mo le tagata e lipoti mai ai lona tiutetauave.

IA TUUINA ATU I LE TAGATA NA TE PULEAINA IA LAVA

E tatau ona tuuina atu i tagata taitoatasi le avanoa e faaoga ai lana lava filifiliga saoloto i le vaai o lona tiutetauave. O se taitai poto o le a ia ofoina atu lana fesoasoani i le tagata ua tofia, peitai o le a le mafai lava ona ia faia se faaiuga mo ia. O le a ia lagolago atu ma uunaiina o ia, peitai ia tuuina atu le avanoa ia te ia e le aunoa e faaoga ai lana filifiliga saoloto.

Ina ua fesiligia pe faapefea ona ia pulea lelei tagata o le Ekalesia, sa saunoa atu Iosefa Samita, "Ou te aoao atu ia i latou mataupu faavae sa'o, ona tuuina atu ai lea e pulea e i latou i latou lava" (*Millennial Star*, 15 Nov. 1851, p. 339).

Sa tusia e Peresitene N. Eldon Tanner e faapea:

"E le tatau i se taitai ona taumafai e fai le galuega a le ua ia tofia. . . . la tuuina atu ia i latou le saolotoga e fai ai a latou galuega. Ia aua ne'i faitioina i latou, a ia via lo latou alualu i luma, ma ia uunaiina ina ia taumafai atili. . . . O i tatou taitai . . . e tatau ona tatou tuuina atu o tatou loto atoa mo le alualu i luma o tagata taitoatasi e ala i le aoao atu o mataupu sa'o ma taumafai ina ia taitai na tagata ina ia saunia e i latou i latou lava mo le tino ola pea ma le ola e faavavau. O lenei mea e tatau ona tatou faia atoa ma mataupu tatou te aoaoina atu ona saunia ai lea e fesoasoani atu ma lagolago atu i a latou taumafaiga ae tatau ona tatou tuuina atu i latou ina ia faia e i latou a latou lava filifiliga ma pulea e i latou i latou lava e tusa ma le filifiliga saoloto o loo ua avea ma a latou meaalofo" ("Leading As the Savior Led," *New Era*, June 1977, p. 6).

IA FAAMASINOINA LE TAGATA MO LONA TIUTETAUAVE

E tatau i le taitai mai lea taimi i lea taimi ona faatalanoaina le tagata ua tofia ma maua se lipoti e uiga i lona tiutetauave. I le faagasologa o lea faatalanoaga e tatau i le taitai ona fesoasoani atu i le tagata i le iloiloina o lana galuega ma tuuina atu ia te ia le fesoasoani ma le faalaeia. E tatau foi ona faali atu ai e ia le agaga faafetai mo ana taumafaiga. O le faamalo atu ma le loto faamaoni e faatupuina ai atili le faatuatua ma le molimau.

Sa tusia e Peresitene Tanner se faamatalaga e faapea: "E tatau lava ona tuuina atu se lipoti i le taitai, ma e tatau ona malamalama o ia i lea mea. I le taitaiga o le Ekalesia, o le auupega autu mo le tuuina atu o lipoti o le faatalanoaga lea. . . . O le a avea lea faatalanoaga ma se taimi taua ma le aoga mo i laua uma, aua e maua ai le avanoa e tuuina atu ai se iloiloiga o le tagata lava ia, ma e tatau ona tatalaina ai le fesootaiga i le va o i laua. O se taimi lelei tele lea mo le tuuina atu ma le taliaina o le fesoasoani" ("Leading As the Savior Led," p. 6).

Ia iloiloina le tulaga lea o loo mulimuli mai. Ia ta'u mai e tagata o le vasega le ala na mulimuli ai le peresitene o le paranesi i mataupu faavae o le faasafua atu o le pule.

Sa manaomia e Peresitene Olson ona valaauina se faiaoga mo tagata o le Perisitua Arona i totonu o lana paranesi. Ina ua uma ona tatalo o ia ma manatunatu loloto, sa lagona le uunaiina o ia ina ia valaauina le Uso o Johnson, o se tagata fou faatoa liliu mai i le Ekalesia. Ina ua feiloai i laua ma le Uso o Johnson i le sauniga perisitua, sa faia loa e ia se fuafuaga mo se faatalanoaga mo le Uso o Johnson ma lona faletua i le 6:30 i lona lava afiafi i le faletotu.

Ina ua taunuu atu le ulugalii o Johnson, sa valaaulia e Peresitene Olson le Uso o Johnson e susu atu i lona ofisa mo se faatalanoaga puupuu e uiga i lona ola agavaa; ona ia valaauina lea o Sis. Johnson e faatasi atu. Ina ua uma ona latou talanoa mo sina taimi, sa faia e Peresitene Olson se tatalo. Ina ua uma le tatalo, sa ia faapea atu loa, "Ua ou valaauilaina oulua ina ia oulua susu mai i lenei afiafi ona o le fia tuuina atu o se valaauga i le Uso o Johnson. Sa ou tatalo e uiga i lenei tulaga ma lagona ai le musuia o au ina ia valaauina oe le Uso Johnson e te faiaoga i le vasega o le Perisitua Arona i la tatou paranesi. Ua ou matua talitonu o le a avea oe ma se faiaoga lelei tele, aua ua ou iloa ua finagalo le Alii ina ia e galue i lenei tofiga." Sa faaauau le faamatalaga a Peresitene Olson i lona faamatalaina atu auilili o tiute o se faiaoga o le vasega o le perisitua. Sa ia tusia nei tiute i se fasi pepa mo le Uso o Johnson e alu ma ia. Sa ia ta'u atu i le Uso o Johnson le taua tele o uso o loo i ai i lana vasega i lo tatou Tama Faalelagi.

Ina ua mautinoa ua iloa lelei e le Uso o Johnson le mea e manaomia na te faia, sa fesili atu loa i ai Peresitene Olson pe talia e ia le valaauga. Sa faapea mai le Uso o Johnson, "Ua ou matua lagona lava le lotomaulalalo ina ua talosagaina e talia lenei tiutetauave, peitai ua ou faatuatua o le a fesoasoani mai le Alii ia te a'u i le faia lelei o lea galuega. O le a ou talia lenei valaauga ma faia le mea sili ou te mafai."

Ona fesili atu lea o Peresitene Olson i le faletua Johnson pe na te lagolagoina lana tane i lenei valaauga. Sa faapea mai le tamaitai e matua mitamita tele o ia i lana tane ma o le a ia lagolagoina o ia ma lona loto atoa. Sa faaalua e Peresitene Olson lona agaga faafetai i le Uso o Johnson ma lona faletua. Ona tuupoina ai lea e ia se taimi e toe feiloai ai ma le Uso o Johnson i le lua vaiaso o loo lumanai ai ina ia maua mai ai se lipoti e uiga i lona valaauga.

Ina ua oo mai le Uso o Johnson mo lona faatalanoaga, sa tuuina mai e ia se lipoti lelei tele e uiga i lona alualu i luma. Sa faapea mai ua ia aoaoina ni mea se tele e uiga i le avea ai ma faiaoga ma sa taumafai o ia e avea ma se faiaoga lelei. Peitai sa faapea mai o loo i ai pea le tele o mea e tatau ona ia aoaoina. Sa matua fiafia lava Peresitene Olson. Sa viia e ia le Uso o Johnson ma faapea atu o loo faia e ia se galuega lelei tele. Sa ia uunaiina le Uso o Johnson ina ia faaauau pea ona faaleleia lana galuega, ma sa talanoa e uiga i le aoao atu e ala i le mana o le Agaga Paia. Sa talanoaina e i laua ni auala e mafai ona fesoasoani atu ai le Uso o Johnson i se tagata le toaga o le vasega. A o fuafuaina e i laua se isi taimi e toe lipoti mai ai, sa faaalua e Peresitene Olson ma le Uso o Johnson le faafetai o le tasi i le tasi. Sa i ai ia i laua uma le talitonuga e faapea o le a avea le Uso o Johnson ma se faiaoga alualu i luma.

O le a le mea na faia e Peresitene Olson na fesoasoani ai i le Uso o Johnson ina ia alualu i luma i lona valaauga?

Faataunuina o le Galuega a le Alii

Afai tatou te fia maua le faamaoni i o tatou tiutetauave, e tatau ona lelei lo tatou faasafuaina atu o le pule ma fesoasoani atu i isi ina ia lelei i o latou tiutetauave. A o tatou faia lea mea, o le a alualu i luma le galuega a le Alii. O le auala lenei na fesoasoani ai Alema i le faatupuolaina o le Ekalesia i ona aso.

Faitau le Mosaea 25:19–24.

Faaiuga

O le tiutetauave ma le faasafuaina atu o le pule e fesoasoani lea ia i tatou i le faataunuina o le galuega a le Alii i se tulaga sili atu ona lelei. Pe a maua e i tatou se valaauga i le Ekalesia, e tuuina mai ia i tatou ni tiutetauave patino i le malo o le Atua. O nei tiute ua taua o se tiutetauave, o le a faamasinoina ai i tatou e le Alii. Ua saoloto i tatou e faataunuina o tatou tiutetauave ma le agaga naunautai po o le faia foi ma le musua, peitai o le a oo lava ina talosagaina i tatou e tuuina atu se lipoti o ia tiutetauave.

O le lelei o le faasafuaina atu o le pule e aofia ai mataupu faavae o tiutetauave. E manaomia ai lo tatou tofia atu o se tiutetauave, aoao atu mataupu faavae sa’o, tuuina atu le avanoa i le tagata e pulea ai e ia o ia lava, ma faamasinoina o ia e tusa ai ma ia tiutetauave. O le mea moni, o se galuega e faataunuina lelei e masani lava ona manaomia ai le faamalo atu ma le loto faamaoni.

Lu’i

1. Ia saili tiutetauave ua tuuina mai e le Alii ia te oe. Ia filifili se tasi o ia tiutetauave e mafai ona faaleleia atili ma ia faatuina se sini o le a fesoasoani ai ia te oe i le faia o lea mea.
2. O se isi taimi o le a tatau ai ia te oe ona faia le tofiga i totonu o lou aiga po o lou valaauga i le Ekalesia, ia mulimuli i mataupu faavae o tiutetauave. Ia faasafua atu le pule ma ia vaai pe ua faataunuina tofiga.

Mau Faapoopo

Salamo 24:1 (o mea uma lava o a leova ia)

Mataio 25:14–30 (o tiutetauave e tuuina atu faatasi ma taleni)

Luka 16:10–13 (e tatau ona i ai le faamaoni i tiutetauave faalelalolagi)

Luka 19:11–27 (o tausimea ia avea ma pule lelei)

MFF 59:16–21 (ua faia mea uma lava mo le faaaogaina e le tagata)

MFF 70: 4 (o le faamasinoina i le aso o le faamasinoga)

Sauniunga a le Faiaoga

A o lei tuuina atu lenei lesona—

1. Ia saunia le siata lenei pe saunia foi e tusia i luga o le laupapa:

Mataupu Faavae Autu o le Tiutetauave i le Malo o le Alii

1. O se tiutetauave e tuuina atu lea faatasi ma se mea e a le Alii ia.
2. O se tagata tausii mea na te faaaogaina le filifiliga saoloto i le vaaia o lona tiutetauave.
3. O se tausii mea e ia te ia le vaaiga o lona tiutetauave.
2. Fai atu i tagata o le vasega e faitau pe faamatala mai tala ma mau o loo i lenei lesona.

O le Faia o Faatalanoaga ma le Taitaiga o Fonotaga

Lesona 23

O le faamoemoega o lenei lesona ina ia fesoasoani lea ia i tatou mo le faia o faatalanoaga ma le taitaiga o fonotaga.

Faatomuaga

I le avea ai o i tatou ma tagata o le Ekalesia, tatou te auai atu i le tele o sauniga; ma o soo se sauniga lava e tatau ona saunia mamao atu a o lei oo i le taimi e faia ai.

O a sauniga tatou te auai atu i ai i le Ekalesia?

Pe o nei ea sauniga e te'i lava ua tupu? O le a sou lagona i le fesoasoani atu o le fuafuaina lelei, faatulagaina, ma le tatalo i le faamanuaina o nei sauniga?

O le Faamoemoega o Sauniga

Na tauina mai e Nifae ia i tatou e faapea ina ua mavae le asiasiga a Keriso i Amerika, “sa le toe savavali loa sa Nifae e tusa ma faatonuga ma sauniga o le tulafono a Mose, ae ua latou savavali e tusa ma poloaiga na latou maua mai i lo latou Alii, ma lo latou Atua, ua tutumu i le anapogi ma le tatalo, ma ua faapotopoto soo e tatalo ma faalogologo i le afioga a le Atua” (4 Nifae 1:12).

Aisea tatou te faia ai sauniga?

E tele mafuaaga e faia ai nei sauniga po o fonotaga. O nisi ua latou aoao atu ai mataupu faavae o le talalelei; o isi e maua ai le avanoa e faataunuaina ai sauniga, e musuia ai i tatou e faia mea lelei, po o le fesoasoani foi ia i tatou e foia ai ni faafitauli patino. O nisi o mafuaaga e faia ai sauniga po o fonotaga.

Ia faaali atu i luma o le vasega le siata ua uma ona saunia, po o le tusi foi i luga o le laupapa vaega nei:

Mafuaaga o Sauniga po o Fonotaga

1. E fesoasoani ai ia i tatou ina ia tausia poloaiga a le Atua.
2. E faatupuina ai molimau.
3. Ina ia aoaoina ai aoaoga faavae ma mataupu faavae o le talalelei.
4. Ina ia tuuina mai ai ia i tatou fautuaga a perofeta.
5. Ina ia fausia ai le malo o le Atua i le lalolagi.
6. Ina ia lagolagoina ai o tatou taitai.
7. Ina ia aoaoina atu ma fetufaai ai le talalelei ma isi tagata.
8. Ina ia aai ai i le faamanatuga.
9. Ina ia fetufaai ai faamatalaga ma tuufaatasia galuega a le Ekalesia.
10. Ina ia foia ai ni faafitauli.
11. Ina ia musuia ma faamalosia.
12. Ina ia faataunuaina ai sauniga o le talalelei e pei o papatisoga.

Talu ai ona o le tele o mafuaaga ma faamoemoega e ala ai ona faia fonotaga o lea ua tatau ai lava ona mautinoa lelei auala ma le taitaiga e taitaiina ai soo se ituaiga fonotaga. O lo tatou faia la o lenei tulaga, ua tatau ai ona tatou malamalama i le aoga moni o nei fonotaga.

Taitaiga o Fonotaga Aoga

Ina ia avea ma fonotaga aoga, e tatau ona i ai ni o latou faamoemoega taua, ma o i latou uma lava la o e e taitaina nei fonotaga e tatau lava ona fuafua ina ia faataunuaina le faamoemoega o nei fonotaga. O taitai e tatau ona latou taitaiina nei fonotaga i le amio mamalu ma uiga aloaia, atoa ma le mautinoa lelei o loo naunau e o loo auai i lenei lava fonotaga, ma maua ai ni mea aoga ma latou mulimuli ai.

FUAFUAGA

O le a avea o se fonotaga ma se mea aoga pe afai o le faamoemoega na faia ai lea fonotaga ia ausia. O le uiga o lenei mea o le tatau lea ona saunia mamao atu ma faia fuafuaga uma a o lei oo i le taimi atofaina o le sauniga.

O se fesoasoani taua lava i le fuafuaina o se fonotaga, o le i ai lea o se faasologa o mataupu e talanoaina. O mataupu e talanoaina e aofia ai ma i latou e auai i le fonotaga e tusitusia uma lava. O le a iloa ai le faamoemoega e pei ona saunia ai lea fonotaga faapea ma mataupu uma e faia ai. O le faia o se lisi o mataupu e talanoaina, e tatau ona tatou manatunatu i mea e tatau ona faataunuaina. O le a faamanatuina mai ai foi ia te i tatou ia mea e tatau ona tatou faia mo lea fonotaga. Pe afai la o mea mo lenei fonotaga ua matua saunia lelei, o le a mafai loa ona faia o lenei fonotaga ma le fiefia atoa ma le naunautai i lona faataunuaina. O mataupu e i ai i totonu o le lisi o mataupu o le fonotaga e tatau lava ona faavasegaina lelei i le tulaga taua ina ia mafai ona talanoaina muamua mataupu taua.

O a mea e mafai ona aofia ai i le lisi o mataupu e talanoaina i le fonotaga? (Ia faaaoga afiafi faaleaiga e avea ma se faataitaiga.) Ia lisi i luga o le laupapa ia fautuaga. (O se faataitaiga o se lisi o mea e talanoaina mo le afiafi faaleaiga o loo i le faaiuga o lenei lesone.)

FAATULAGAGA MA LE MAMALU

A tatou taitaiina a tatou fonotaga, e tatau lava ona tatou faia se faataitaiga lelei i le tumama ma teuteuina lelei o le tino ma faia faalelei lavalava, pe afai tatou te taitaiina ni fonotaga. Ia tatou taumafai e teena faamatalaga le aoga ae ia faamamalu le fonotaga. O nisi fonotaga e manaomia ai sina sauniuniga puupuu. (O lenei fonotaga e faia a o le'i amataina le fonotaga na fuafuaina. O lea fono e iloiloaina ai mataupu o le a talanoaina i le fonotaga ma i latou foi o le a auai, ma faia ai se tatalo ina ia ole atu ai mo le taitaiga a le Agaga o le Alii.)

Ua fetalai mai le Alii ia te i tatou, "Na tuuina atu pea lava i toeiina o lau Ekalesia talu mai le amataga, ma e faapena lava, ia faia lotu uma

e pei ona faatonuina ma taitaiina ai i latou e le Agaga Paia” (MFF 46:2). O le a amataina e le Agaga Paia se lagona faaleagaga ma fesoasoani ia i tatou ina ia faataunuina ai le faamoemoega o le fonotaga. Sa tusia e Moronae e faapenei, “Ua faia foi a latou lotu e le Ekalesia e tusa ma galuega a le Agaga ma le mana o le Agaga Paia; aua e pei ona taitaiina i latou i le mana o le Agaga Paia i luga, pe apoapoai atu, pe tatalo, pe aioi atu, pe pese, ua faapea lava ona fai” (Moronae 6:9).

AUAI

O se fonotaga aoga ma le lelei e faalagolago lea i lagona naunautai ma le saunia o tagata e auai. Talu ai ona o i tatou o tagata o le Ekalesia e tatau lava ona saunia i tatou uma taitoatasi pe a tatou auai atu i se fonotaga. E tatau ona tatou ole atu i le Alii ina ia fesoasoani mai ia i tatou e talia aloaia ai faatonuga, aoaoga, ma mataupu o le fonotaga. E tatau ona tatou o atu ma le agaga fia auai moni ma aoaoina ai ni mea aoga. E tatau ona tatou saunia e auai ma faalagolago i musumusuga a le Agaga Paia.

“O se tasi tamaitai o le Ekalesia e matuai tutuli lava o ia ma sa fesiligia o ia pe faapefea ona malaga mai o ia i sauniga faamanatuga i Aso Sa taitasi, ma sa foliga mai sa matua fiala lava o ia i le mea ua talanoaina nei, ma e sa matua fafaguina ai lava le toatele o i latou o i ai i lenei uarota, ma pei o se mea ua fai ma faalavelave ia i latou. O lana tali na tuuina mai e pei o se faatonuga: ‘Ou te tulimatai atu lava e faatasi i la le tino ma i latou ou te alofa i ai ma alolofa i le talalelei. E mafai ona matou fetufaai i o latou agaga e aunoa ma le lagonaina o se upu, ma afai ou te mauaina le Agaga, o le a musumusu mai le Alii ia te au’ ” (Robert K. Thomas, “Listening with the Spirit,” *Ensign*, Jan. 1978, p. 40).

ILOILOGA MA TOE TULITATAO

Afai tatou te faavaeina le faamoemoega mo le fonotaga, e tatau ona tatou fuafua e iloilo ona taunuuga mulimuli ane ai. Ma o la tatou iloiloiga la e mafai ona aofia ai fesili e pei o nei:

- Pe na ausia le faamoemoega o le fonotaga?
- Pe na mafai ona tatou faia nisi sauniuniga sili atu?
- Pe na talanoaina mea uma sa i ai i le faasologa o mataupu e talanoaina? Afai e leai, o le a le mafuaaga?
- Pe sa logoleleia ea ia i latou sa auai?
- Pe sa i ai se agaga lelei i le fonotaga? Afai e leai, e mafai faapefea ona tatou faaleleia?
- Pe na malamalama ea i latou sa auai i o latou tofiga?





O le Faia o Faatalanoaga Aoga

Faaali atu le fesoasoani vaaia 23-a, “O faatalanoaga a le perisitua e faamalosia ai fesootaiga lelei,” po o le 23-e, “O faatalanoaga aoga e siitia ai le galuega a le Alii.”

O se tasi o fonotaga e manaomia ai se sauniuniga faapitoa o le faatalanoaga lea. O se faatalanoaga e mafai ona faataunuaina ai ni faamoemoega se tele. E mafai ona faaaogaina e (1) maua mai ai faamatalaga, (2) e tuuina atu ai faamatalaga, (3) fautua atu ai ma uunaiina ai isi, (4) valaauina ai tagata i tofiga, (5) maua mai ai lipoti o tiutetauave, (6) aoao atu ai mataupu ma aoaoga faavae, po o le (7) fuafua ai le agavaa. Talu ai ona o taitai e latou te faatalanoaina isi tagata mo le tele o mafuaaga, o le mea lea e tatau ai ona latou iloa le faavae aoaoina e faia ai faatalanoaga:

- la faaalua lou agaga naunautai i le tagata.
- la faailoa atu ia te ia o loo avanoa i tatou mo se fesoasoani.
- Fesoasoani atu ia te ia ina ia maua le lagona mafana ma faigofie e ala i lou faauo atu.
- la fuafua a tatou faatalanoaga mo ni taimi faapitoa.
- *la aua ne'i faalauaiteleina atu ni faamatalaga e patino i le tagata lava ia.*
- la faia le faatalanoaga i se nofoaga e mafai ai ona na o oe ma lē ua faatalanoaina.
- la avea ma se tagata faalogo lelei. O le uiga o lenei mea o le faalogo lea i faafitauli a se tasi ma fesoasoani ina ia oo ai o ia i se faaiuga na te lagonaina ai o ia lava e tatau ona faia lea tulaga. E tatau lava ona ioe muamua o ia; ona mafai lea ona suia o ia i le auala tonu.

“O se mea taua ia i latou o loo tatou faatalanoaina lo latou iloa lea o i latou o *fanau faaleagaga a le Atua ma tatou te alolofa ia i latou*, ma *faailoa atu ia i latou tatou te alolofa ia i latou* ma tatou te fialia i lo latou ola lelei ma le fesoasoani ia i latou ina ia faamanuiaina i le olaga. . . .

“Ia manatua, e faavae le faatalanoaga i luga o manatunatuga ma filifiliga, i luga o le alofa ma le lagona ootia. E taua tele lenei mea. Ia iloa e tagata tatou te alolofa ia i latou ma o lea tatou te fesoasoani ia i latou” (N. Eldon Tanner, *Ensign*, Nov. 19778, pp. 41–42).

Mo nisi faamatalaga faaopoopo i le aoga o faatalanoaga, ia tagai i le lesona faaopoopo. Pe afai e lava se taimi faatagaina, ona faia lea o se faataitaiga o se faatalanoaga a ia aofia ai ma tulafono e pei ona taua. Pe a uma le faataitaiga, ona talanoaina lea e le vasega ni mea na sa'o ona fai.

Faaiuga

O le faamoemoega o le Ekalesia o le faasaoina lea o agaga, ma o fonotaga o se auala lea e fesoasoani ai mo i tatou mo le faia

o lenei mea. O fonotaga uma lava e maua ai mea lelei ma mea aoga, ae le te'i lava ua tupu. E tatau ona fuafuaina lelei nei fonotaga, ma lelei foi ona taitaiina, faatasi ai ma le iloiloga tatau i le faamoemoega na faia ai. Ua fetalai mai le Alii:

“O lenei foi, faauta, ou te tuuina atu ia te outou le poloaiga, pe a outou faapotopoto faatasi ia outou aoao atu ma fefaamalamalamaai le tasi i le tasi, ina ia outou iloa ai le mea e tatau ona outou faia e taitai ai la'u Ekalesia, atoa ma le ala e tausi ai vaega o la'u tulafono ma poloaiga, ua ou tuuina atu.

“O le a faapea lava ona aoaoina outou i le tulafono o la'u Ekalesia, ma faapaiaina i na mea ua outou maua, matou te fusia outou lava ia faia mea uma i le paia atoatoa i o'u luma—

“Afai o le a outou faia lenei mea, o le a faapoopoina atu le mamalu i le malo ua outou maua, afai tou te le faia lenei mea, o le a aveeseina ai, e oo lava i mea ua outou maua” (MFF 43:8–10).

O le lelei o la tatou fuafuaga, faatulaga, ma faafoeina fonotaga ma faatalanoaga, o le a tele tagata o le a musuia e ola i tulafono ma poloaiga a le Atua.

Lu'i

Tama: la fuafuaina ma faatulagaina se faasologa o mataupu e talanoaina mo le isi afiafi faaleaiga e sosoo ai. Taumafai ina ia taitaiina lea sauniga ma le lagona naunautai ina ia aoaoina atu ai le talalelei i lou aiga.

Taitai o le perisitua: la mulimuli i fautuaga o loo i ai i lenei lesona pe a tuuina atu le avanoa e te taitai ai i soo se fonotaga.

Mau Faapoopo

Moronaē 6:5–6 (sa masani lava ona faapotopoto faatasi sa Nifae)

MFF 20:45 (fonotaga e pei ona taitaiina ai e le Agaga Paia)

MFF 46:28 (o le e ole atu o ia i le Agaga e maua e ia i le Agaga)

MFF 59:9 (ia ulu atu i le faletatalo)

Faapoopoga

FAASOLOGA FAATAITAI O MATAUPU MO AFIAFI FALEAIGA

1. Pese amata (igoa o le tagata o le aiga o le a avea ma taitai pese).
2. Tatalo amata (igoa o le tagata o le aiga o le a saunia le tatalo).
3. Mataupu e talanoaina (e taitaiina e le tama).
4. Pese mai se tasi o le aiga.
5. Lesona (e tuuina atu e se tasi o le aiga mai le tusi lesona
O Mataupu Faavae o le Talalelei).

6. Talanoaga ma fuafuaga mo le vaiaso a sau.
7. Pese faaiu.
8. Tatalo faaiu.
9. Gaoioiga faafiafia (taitaiina e se tasi o le aiga).
10. Sina taumafataga mama (igoa o le tagata o le aiga na tofia).

FAATALANOAGA AOGA

1. la manino i le mafaufau le faamoemoega ma le sini:
 - a. Ina ia maua mai ni faamatalaga.
 - e. Ina ia tuuina atu ni faamatalaga.
 - i. Ina ia faavaeina se sootaga vavalalata.
 - o. Ina ia iloiloina le agavaa o le tagata mo polokalama eseese o le Ekalesia (e pei o se pepa faataga o le malumalu, valaauina i se tofiga, siitaga o le perisitua, misiona).
 - u. Tuuina atu fautuaga e uiga i faafitauli o le olaga.
2. la maua se nofoaga po o se potu e sili o avanoa. O nei potu e tatau ona —
 - a. Leai se pisa.
 - e. Toafilemu, leai se faalavelave.
 - i. Lelei ai le faalogona (siaki le ea, meaafale, moli).
3. la faia ni fesootaiga muamua ma ia lava le taimi e faia ai.
4. Mulimuli i mataupu faavae sao o faatalanoaga:
 - a. la e aloaia le tagata ma ia maua e ia le lagona toafilemu.
 - e. la faamalalamaina le faamoemoega ma le autu o le faatalanoaga.
 - i. la faaalua lo oulua vavalalata ma le tagata lea a'o lei see ese atu le lua faatalanoaga i nisi vaega ogaoga.
 - o. la tuu atu le avanoa e saunoa mai ai le tagata. Aua nei popole pe a le tautala mai o ia a o mafaufau pea. la e faafofoga lelei i le mea o loo fai mai ai o ia atoa ma ona manatu uma.
 - u. la e maitauina ana gaoioiga uma lava e faia (o lana tautala, popole, ita). O mea nei e mafai ona faailoa mai ai ona lagona.
 - f. la faaali le lagona mautinoa e ala i ou uiga:
 - (1) la lotomauualalo ma faaleagaga. (E te matuai manaomia le fesoasoani a le Alii.)
 - (2) la to'a lelei ma le gaoia.
 - (3) la faaoga le leo malu ma le mauualalo ma pulea lelei lou siufofoga.

-
- (4) Aua e te te'i i le mea e te faalogo i ai pe e te faitioina foi le tagata.
 - (5) Ia e taliaina o ia ma fesootai lelei pea ma ia e tusa lava pe e te le taliaina ona uiga.
 - (6) Aua e te faapuina ni fesili i se auala e faamalosia ai o ia e tuuina mai se tali o loo e manao iai.
 - (7) Aua e te faaumaina ni ana fuaiupu po o ni ona lava manatu. Atonu e sese ai lau mate.
 - (8) Aua ne'i e tautala faasausili po o le fuafuaina lea e sili atu oe nai lo le tagata lea.
 - (9) Aua ne'i e fefe i lagona ma uiga faaalua o le tagata.
5. Ia tumau pea i le mataupu atu o le faatalanoaga. Ia lava se taimi mulimuli ane mo nisi mataupu.
 6. Afai ua maua loa le atu o le faatalanoaga, ona faamuta loa lea, ae aua nei faaselemutuina:
 - a. Ao uma ese pepa o loo i luga o lau laulau, po o le
 - e. Tu i luga, po o le
 - i. Fai loa se gaioiga e pei o le a e tu i luga.
 - o. Faafetai iai mo le latou affio mai.
 - u. Toe fuafua se isi taimi mo se isi faatalanoaga pe afai e talafeagai ai.
 7. Afai e talafeagai, ia faamautinoa atu i le tagata le le faalauaitelina o faamatalaga na oulua talanoaina.
 8. Ia faafesootai lou taitai perisitua pe afai ua leai se isi mea e mafai ona e toe faia i lenei tagata. Atonu o le a ia mafai ona fuafuaina se fesoasoani faaopoopo i lenei lava tulaga. (Tagai i *Counseling and Interviewing Guide for Bishops*, [Salt Lake City: the Presiding Bishopric, n. d.], pp. 12–14).

Sauniuniga a le Faaiga

A o lei tuuina atu lenei lesona—

1. Ia saunia se siata o mafuaaga e ala ai ona faia fonotaga, po o le saunia foi e tusi i luga o le laupapa.
2. Afai e lava le taimi, ona fuafua lea e faia se faataitaiga lea e faaalua mai ai taiala e pei ona ototoina atu i le lesona. Faaoga tagata o le vasega i lea faataitaiga.
3. Ia fai atu i tagata o le vasega e faitau ma tuuina mai tala ma mau o loo i lenei lesona.

O le Faatumauina o le Soifua Maloloina Lelei o le Tino

Lesona 24

O lenei lesona o loo aoaoina mai ai i tatou pe faapefea ona maua le soifua maloloina lelei ma teena ai soo se gasegase.

Faatomuaga

E matua lava lo tatou soifua maloloina i le tino, aua o le soifua maloloina lelei e fai lea ma mea e faafaigofieina ai ona faataunuaina o tatou sini o le olaga. Ma o lenei la mafuaaga o lea ua tatau ai lava ona tatou malamalama, i le mea o loo tatou manaomia ina ia tausia ai pea i tatou ma a tatou fanau pele i le soifua maloloina. E ui lava ina atonu tatou te le mauaina le soifua maloloina atoatoa, ae ua faamoemoeina i tatou e le Alii ina ia tatou ola maloloina i le mea e mafai ai.

O le tala lenei o loo faamatalaina mai ai se faafitauli taatele o le soifua maloloina o loo faafeagai ma le tele o aiga:

E valu loa masina o Mata Molina ae maua loa o ia i se ma'i. I le taimi puupuu lava na ma'i ai lenei teineititi, sa matua alu lava lona tino. Sa mago lona fofoga; ma ua sesega ona mata; ma o le vaega vaivai i le tumua'i o lona ulu ua matuai omo lava i lalo. Ua leiloa se mea a fai, sa taumafai le aiga i fofo faanuupo ina ia mafai ai ona toe malosi o ia, ae sa matua leai lava ma se tali mai o nei fofo. (Tagai i le *Teaching Personal and Family Preparedness*, lesona 22, "Disease Prevention and Good Health.")

Sa ma'i Mata Molina e pei o le tele o isi tagata o le lalolagi i ni mafuaaga e le iloa e lona aiga. Ae le gata foi i lea, sa le malamalama i latou pe faapefea ona puipuia lenei faamai ae pe faapefea foi ona togafitia. Ae le o se mea fou lenei. E ui ina le aoga—ma tiga—ia fofo faanuupo ae sa masani lava ona faaaoga ma taumafai ai e puipuia pe foia ai foi ia faama'i. O nisi o nei fofo e aliaie mai ai nisi o faafitauli ogaoga.

Mafuaaga o Faama'i

O a pogai o gasegase?

I le tele o tausaga ua mavae, sa le iloa e tagata le mafuaaga o gasegase. O nisi sa talitonu o faama'i e mafua mai lo latou le faia o osigataulaga e tatau ai. O nisi sa manatu i latou sa mafua mai ona o upu e i ai mana faataulaitu a o latou fili. A o ona po nei la, o saienitisi ma fomai ua latou iloa mea e mafua mai ai le tele o faafitauli o le soifua maloloina. O le tele o le malamalama na maua mai ina ua toefuataina le talalelei i le lalolagi i le tausaga e 1830. E pei ona ua tuuina atu le

Agaga o le Alii i le lalolagi, o lea ua matua tele ai lava mea fou e oo mai e fesoasoani ia i tatou e faaleleia atili ai le tulaga o le soifua maloloina. Ua tatou iloa i aso nei, o le tele lava o faama'i e mafua mai lea i siama. O siama o ni meaaola ninii o loo solo i o tatou tafatafa. E matuai ninii lava e le mafai e mata ona vaai iai. O nisi o siama e feavaeaiina e le ea; o isi e pipisi mai le tasi tagata i le isi; o isi foi e pipisi mai meaaola ma manu fetolofi i le tagata. Ona o lenei la mafuaaga, e tatau ai ia i tatou ona faia ni taumafaiga e tetee ese ai manu fetolofi ma meaola, e pei la o isumu ma iole mai o tatou aiga.

Ae le gata i lea, o otaota uma o meaola ma tagata e tatau lava ona saunia lelei ni mea e tanumia ai. O otaota o tagata faapea ma meaola o loo i ai ni siama e matua afaina ai lava le soifua aemaise lava la pe a faapea o ni otaota o ni tagata mamai po o ni meaaola foi o loo i ai i lea tulaga e tasi. Afai la o le a taatitia ai nei otaota i luga o le elelee ma pala ai, o le a tosina atu loa i ai lagoon, o isi iniseti, ma isumu. A o fetolofai ai nei iniseti i luga o nei otaota, o le a pipii ai loa ma siama o faama'i i o latou tino. O siama o loo pipii i nei mea o le a avea lea ma mafuaaga tatou te mamai ai.

E mafai ona mafua soo se ituaiga faamai mai siama pe a ulu i o tatou tino. Afai tatou te mananao e teena faama'i, o lea la e tatau ai ona tatou teena ia siama lea e mafua mai ai faama'i. (Adapted from *Teaching Personal and Family Preparedness*, lessons 23, "Cause of Infectious Disease," and 25, "Waste Disposal.")

Taofia o le Faasalalauina o Siama

O auala nei e mafai ai ona faaititia pe teena faamai e mafua mai i siama:

- la faamamaina le fale e le aunoa, aemaise lava o vaega e mafai ona ola ai siama.
- la puipuia meaai mai le oo atu i ai o iniseti ma siama. Pe afai e talafeagai, o meaai uma lava e vave ona pala e tatau ona tuu i le pusa aisa.
- la fufulu mama meaai ina ia aveeseina uma ai ni siama o loo pipii ai.
- la fufulu mama lelei ia lima a o lei aai, faapea foi pe a uma ona faaogaina le faleese.
- la fufulu mama nifo pe a uma ona taumafa ina ia teena ai le pala faapea ma isi faafitauli tau nifo.
- la ufiufi le gutu pe a tale po o le mafatua foi. O le a fesoasoani lea i le taofia o le pipisi atu o siama.
- la faaoga seevae, see tosotoso, po o se mea e ufitia malu ai ia vae ina ia aua nei pipii atu ai ni siama mai le elelee.
- la 'ai lelei ma ia malolo. O le taumafa i mea taumafa tatau ma le lava o le malolo e mafai ona fesoasoani e teena ma faatolaloina ai

faamai. E faigata i siama ona latou faavaivaia se tino e matua malosi ma maloloina lelei.

A o tatou taumafai e faatumauiina le soifua maloloina lelei, o le a tatou teenaina pe foiaina le tele o faama'i. O le a avea foi i tatou ma faaitaiga i a tatou fanau, i le fesoasoani lea i ai ina ia atinaeina ni uiga lelei faasoifua maloloina.

Puipuia lo Tatou Soifua Maloloina

Ua faatonuina i tatou e fomai e faapea, e le gata i le atinae ma le faia o faaitaiga lelei mo le soifua maloloina, ae e tatau foi ia i tatou ona puipuia i tatou lava i le faia lea o tui puipui. Mo se faaitaiga, o le ma'i pipili, o le faamai lenei e le gata ina toatele tagata ua feoti ai ae ua pipili ai foi ma isi. I nai tausaga ua mavae, sa mauaina ai e se fomai-saienitisi le togafiti e puipuia mai ai tagata mai lea faamai matautia e ala lea i tui puipui. Pe a fai o tatou tui puipuia, e masani lava ona tuuina se vailaau i o tatou tino e ala lea i le tuuina i le lima. O nisi faamai, e na o le tasi lava se tui tatou te moomia. O nisi faamai tatou te moomia ai ni tui mai lea taimi i lea taimi.

I le tele o vaega o le lalolagi, e mafai ona tatou mauaina mai nei tui mai falemai po o fomai foi. E mafai ona faia o tatou tui puipui mo faamai e i ai le misela, mami, misela siamani, lipi, tale vivini, fiva taifofo, tanesusu, pipili, fulu, ma le 'ona.

E le gata la i nei tui puipui, ae ua i ai foi vailaau ua aumaia i ni vai, o fualaau, ma isi mea malo ua gaosia ina ia fesoaosani i le puipuia ma le togafitia o faamai. O nei vailaau e tatau ona faaogaina ma le faaeteete e tusa ai ma faatonuga na tuuina mai e fomai ma teine tausimai. E le tatau ona tatou faaogaina ni vailaau na tusia mai e le fomai mo se isi tagata.

O se tasi auala lelei e puipuia ai mai ma'i o le faia lea o se suesuega e le fomai po o se tagata tomai faapitoa e faatasi i le tausaga pe afai e talafeagai ai. O uluai faailoga lava o nei ma'i ma faama'i e mafai ona iloa i nei suesuega. Talu ai ona o alii talavou e tatau ona faia o latou suesuega faafomai pe a valaauina e alu i se misiona, o le faia la o ia suesuega e le aunoa o se tasi lea o auala e mafai ai ona saunia i latou mo misiona.

O le Mea e Fai pe a Tupu mai se Ma'i

Afai ua tulai mai se ma'i faigata tele, o le fesoasoani faafomai sili lava e masani ona maua mai lea i se fomai. E le faapea na o le manao i se fesoasoani mai le fomai, ae tatau ona tatou faatagisia i latou ina ia latou aoaoina mai i tatou mo le tulaga o le soifua maloloina.

Ae peitai ane, o loo i ai nisi tagata e faapea a alu e vaai le fomai o lona uiga ua le lava le faatuatua. Ua faamoeme le Alii tatou te faaoga le faatuatua ma le mana o le perisitua pe a mamai, ae ua ia

faamoemoeina foi i tatou ina ia tatou sailia ia fesoasoaniga ma le tomai faafomai o loo avanoa.

A o lei avea Peresitene Kimball ma Peresitene o le Ekalesia, sa maua lona soifua i ni faafitauli sa aafia ai lona soifua maloloina. Ona o le manao ina ia maua se soifua maloloina sili atu, o lea na laua feutagai ai loa ma se fomai. Sa ta'u atu e le fomai ia te ia e manaomia le faia o sona taotoga faigata mo se faafitauli i le fatu. Sa matua faatuatua lava e Peresitene Kimball lana fomai ma sa faia ai loa lona taotoga.

Ma o le aso tonu lava la na faauuina ai o ia ma faamanuiaina e avea ma Peresitene o le Ekalesia, na ia mauaina ai se tusi mai le alii fomai o Russell M. Nelson e uiga i lona soifua maloloina. Na iloa e le alii fomai o Nelson o le a i ai ni fesili a Peresitene Kimball e uiga i lona soifua maloloina. I totonu o lana tusi, na faamanino atu ai e le alii fomai o Nelson e faapea ua maea ona faataunuaina se suesuega maeaea i le tino o Peresitene Kimball ma ua faailoa mai ai ua toe foi lona tino i se tulaga atoatoa. Na faapea mai le tusi, "E manao lou fomai na faia le taotoga ina ia e iloa o loo matuai malosi lava lou tino; o lou fatu ua matuai sili atu nai lo le tele o tausaga ua tuanai; ma e faatasi ai ma lo matou naunautai ina ia faailoa atu o lenei tofiga fou o le a feagai ma oe o le a leai lava se mea e te toe popole ai i lou soifua maloloina."

Sa faaauau pea le tusi a le alii fomai o Nelson: "I le gasologa o le faiga o le taotoga lea na faia i le aso 12 o Aperila i le 1972, . . . sa ou malamalama lelei lava i lou valaauga faaaposetolo, ma sa ou iloa lelei foi lava lo'u le agavaa i lo'u mafaufau atu i lena taotoga faigata. Ma o lenei la taotoga sa sologa lelei lava mea uma, ma sa ou iloa ai ma le agaga faafetai le fesoasoani mai a le Alii. Ma o le mea moni pito sili lava na oo mai ia te a'u ina ua toetiiti lava maea le taotoga, sa matua faaalua mai ai ia te a'u o le a iai se aso e avea ai oe e fai ma Peresitene o le Ekalesia." (See Edward L Kimball and Andrew E. Kimball, Jr., *Spencer W. Kimball*, p.8.)

Talu ai ona o le faatuatua o Peresitene Kimball i le Alii atoa ma lona talitonuina o lana fomai, o lea ua maua ai nei le soifua maloloina lelei ma faataunuaina ai ona tiutetauave i le avea ai o ia ma Perofeta a le Alii.

E mafai foi ona tatou iloa le soifua maloloina pe afai tatou te tausua lelei o tatou tino i taimi tatou te mamai ai ma tatou iloa faailoga e mafua ai faamai. O le tele o nei faamai e mafai lava ona togafitia e aunoa ma le faaletonu pe afai e vave ona tuuina atu i ai ni togafitiga.

O a ni faailoga e faailoa mai ai ua tatau ona vaaia se fomai?

Ia taua ia faailoga taitasi nei ona taitasi lea ona talanoaina faailoga uma:

- Toto e sau mai le tino ae le mafai ona iloa ma isi mea e aliae mai i le tino
- O manu'a e le mafai ona te'a

- Tale umi po o le faigata ona manava
- Maualuga le fiva
- Faamaalili
- Mamau le manava
- Unooa pe papala le tino
- Le mailoa le faifai malie atu o le tino
- Tiga faaumiumi
- Puai faalausosoo po o le manava tata
- Pogisa mata ma niniva
- Faigata ona pupula mata po o le nenefu o le vaai
- Ni mu matautia o le tino po o se vaega foi o le tino
- Tino gagase po o le fulafula
- Matapogia
- O ni fesuaiga e le masani ai i se tino o se tasi, po o ua le gaoioi lelei lona tino

(Tagai i *Teaching Personal and Family Preparedness*, lessons 26, “Immunizations,” and 27, “Preventing Serious Disease.”)

Afai ae tulai mai ni faailoga faapea, e tatau loa ona vave faafesootai se fomai, falemai, po o se tasi e galue i le falemai. O le tele lava o nisi o taimi tatou te faatalitali ai mo ni togafitiga faafomai tonu lava. Ae peitai, o lo tatou faia o nei tulaga e oo atu ai i se taunuuga matautia lava o le faaleagaina lea o se vaega o le tino po o le mafaufau foi, po o le maua foi i se mai e umi ona taoto ai, po o le oo lava foi ina maliu ai.

E tatau lava ona tatou vaia lelei le soifua maloloina o o tatou tino, aua o o tatou tino o le malumalu lea o o tatou agaga. O se tino vaivai, maua i ni ma'i, ma le le faagaoioia lelei o le a taofia ai lo tatou mafai lea ona maua o se olaga fiafia.

Faaiuga

O loo ua tatou i ai iinei ina ia tatou maua ai lo tatou faaolataga faapea ma le faaolataga o isi. I le faia la o lenei tulaga, o lea e manaomia ai ni tino malolosi ma ni mafaufau malolosi. O lea e moomia ai e matua le tausia lelei o o latou soifua maloloina, ae tatau foi ona faaaogaina le faautauta ma le faaiuga tonu e tausia ai a latou fanau ma aoao atu ia te i latou mataupu faavae o le soifua maloloina ma le aoaoina o togafitiga faafomai.

E tele mea e maua mai ai fesoasoani ua faatatauina lea e mafai ai ona tatou faaleleia atili pea le soifua maloloina. O le mea lea, o le tele lava o faama'i ma ma'i e mafai ona togafitia po o le puipuia. O loo finagalo le Alii ia i tatou ina ia tatou faaaogaina nei fesoasoani e puipuia ma

togafitia ai faama'i. Ma o loo ia finagalo foi ia i tatou ina ia tatou faia le mea sili tatou te mafaia mo e e mamai. O loo manaomia la i lenei tulaga lo tatou faaogaina o togafiti faafomai faanei ona po ma ia faaalai ai lo tatou faatuatua, tatalo, atoa ma le mana o le perisitua. Afai tatou te faia nei mea uma, ma o le finagalo foi lea o le Atua, o le a mafai ona faamaloloina ai le mai.

Sa faapea mai le aoaoga a le alii Peresitene o Polika laga: "Ia tatou taumafai e faateleina lo tatou ola o loo i ai nei i le mea e sili ona mafaia, i lo tatou tausia lea o tulafono uma o le soifua maloloina, atoa ma le faatutusaina lea o lau gaoioi i le faiga o au galuega, po o suesuega, o le malolo, o taaloga, atoa ma le saunia lelei mo se olaga lelei. Ia tatou aoaoina atu la nei faavae uma i a tatou fanau" (*Discourses of Brigham Young*, p. 186).

Lu'i

1. Ia faia uma tui puipuia o tagata o lou aiga pe afai e talafeagai ai. Ia aoao ma faia faataitaiga i lau fanau o togafiti mo le soifua maloloina.
2. Ia fuafuaina lelei tulaga o o outou olaga. Ia faia sauniuniga uma e faamamaina ai nofoaga uma e faaono tutupu ma faasalalauina ai ni siama.

Mau Faapoopo

MFF 89 (o le tulafono a le Atua mo le soifua maloloina—o le Upu o le Poto)

Sauniuniga a le Faiaoga

A o lei tuuina atu lenei lesona—

1. Ia faafesoatai se falemai latalata ane po o se tasi e faigaluega ai. Ia saili po o a ni fesoasoani o loo i ai mo lo outou itumalo, e pei o mea nei—
 - Falemai
 - Tui puipuia ma le auala e mafai ona maua mai ai.
 - Falemai mo tina ma fanauIa saunia ina ia aofia ai lenei faamatalaga i le lesona i se taimi e talafeagai ai.
2. Ia fesoasoani i tama ma tama talavou ina ia latou malamalama e tatau ona latou maua se togafitiga sili o le soifua maloloina, ina ia mafai ona taunuu i se tulaga e gata ai ona mafaia.
3. Ia fesoasoani i uso o le vasega ina ia latou malamalama i tulaga e afaina ai i latou i mea o loo siomia ai o latou aiga.

Ola i le Upu o le Poto

Lesona 25

O le faamoemoega o lenei lesona e fesoasoani ai mo i tatou ina ia tatou malamalama atili ma ola i le tulafono a le Alii o le soifua maloloina.

Faatomuaga

“Ina ua talosagaina ia Paul C. Kimball, o se tamaititi aoga o le Au Paia o Aso e Gata ai i le lunivesite o Oxford i Egelani na te aoaina se au alovaa talavou ma le le lava o le tomai, sa ia lagonaina lona le mautonu. Ou te lei faia lava ni aoaoga faapea muamua.’

“Ae ui i lea, sa ia taliaina lava le talosaga, sei vagana ai le aiaiga e tasi: ‘Afa i le a avea au ma o outou faiaoga,’ o lana tala lea i le au alovaa, ‘O le a ou aoaina outou e tusa ai ma a’u tulafono.’ O ana tulafono e aofia ai le faasaina o le tapaa, ava malosi, lauti ma le kofe. E tusa ma le vaiaso o tau mafaufau tamaiti pe latou te taliaina ia aiaiga.

“Faatasi ai ma lo latou maliliega ua mausali, sa avea loa Kimball ma o latou faiaoga ma . . . galulue ma i latou i aoauli uma mo le taitolu itula seia oo ia Fepuari.’ O le masina lena na faaulu atu ai le latou ‘au i tauvaga ma isi kolisi i Oxford. ‘Sa tauva la’u auvaa ma ni auvaa o ni tagata na alovaa mai lava o laiti i latou,’ o le tala lea a Kimball. ‘O lenei au alovaa sa ia te au o ni alii e lei lava lo latou malamalama. Ae sa latou koloni malosi, ma e leai ma se isi o i latou, i lo’u malamalama, na faaaogaina se sikaleti i lenei vaitaimi atoa, po o le inuina o se lauti po o se ipu kofe, po o le inuina o soo se ituaiga ava malosi.’

“E oo lava i le aso o le tuuga, e leai lava ma se tasi e mafaufau i le ‘au lenei ona o le le lava o le tomai o le auvaa ma e leai se avanoa e mafai ai ona manumalo. Ina ua pa le fana, e amataina ai le tuuga e maila ma le afa i le Vaitafe o Thames, sa faamoemoeina e le umi se taimi e pa’u atu agai i tua le auvaa laiti lenei. Ae e oo mai i le taimi ua taunuu mai ai le tuuga i le vaega e vaelua ai, o loo tamoe atu pea Kimball i luga o le auvai ma tauvalaau atu ni faatonuga i lana auvaa i le faaaogaina lea o se mea faaleotele leo, ma ia iloaina ai o loo tauva pea lana auvaa ma nisi foi o auvaa o le tauvaga.

“Na tauvalaau atu Kimball i lana fautuaga mulimuli: ‘Feeli!’ Sa matuai matagofie lo latou alo saosaoa atu i luma ma pe toe minute loa ae latou taunuu loa i le tini ae pe tusa ma le selau futu na latou muamua ai i le isi auvaa na lona lua atu. Sa faigofie lava ona latou manumalo i le tauvaga.

“O aso uma lava taitasi o aso e ono o le tuuga, sa faamoemoe ai o le a faaimana ai le ‘au a Kimball. Ae o aso uma lava taitasi, i lo latou mulimulitai i le fuafuaga lava e tasi, e faigofie ai lava ona latou manumalo. ‘Ina ua fesili mai tagata ia te au pe na faapefea ona ou mauaina lea tulaga manumalo ma le maualuga, sa ou tali atu i ai, “Na ou faaliliuina na alii talavou ina ia ola sa’o,” ’ o lana tala lea. ‘Ina ua latalata mai i le tini ma feeli mai, sa mama o latou mama; o o latou totoga sa mama; o o latou tino sa mama, ma sa matuai malolosi foi o latou neura’ ” (Joseph Walker, “Victory on the Thames,” *Church News*, 20 Feb. 1983, p. 20).

O le Tulafono a le Alii o le Soifua Maloloina

O a tulafono a le Alii o le soifua maloloina? (O le Upu o le Poto [e aofia ai le taumafa tatau], lava le malolo o le tino, ma faamalositino.)

I le olaga lenei, o o tatou tino o malumalu ia o o tatou agaga e faavavau. Ma o le a i ai foi i lea lava tulaga i le faavavau pe afai e toetutu ma toe faatasia o tatou tino ma o tatou agaga. O o tatou tino e matua taua lava ma ia taua i latou o malumalu o le Atua (tagai i le 1 Korinito 3:17). O mea uma lava e oo ia i tatou i lenei lalolagi o le a faaalua lea i o tatou tino ma o tatou agaga. O le mea lea, e tatau ai lava ona tatou faaeteete, ina ia tausia mama o tatou tino ma ia ola maloloina.

O le tulafono a le Alii o le soifua maloloina o lona uiga o le faatumauiina lea o o tatou mafaufauga ma lagona o le loto. O loo silafia lelei lava e le Alii afai tatou te malolosi, maua lagona o le mafaufau, ma lagona lelei o le soifua maloloina, o le a mafai ona tatou auai i soo se gaoioiga lava e atinae ai i tatou faaleagaga ma fesoasoani ai e faamanuia atu i isi. E tatou te maua le fiafia ma mafai ai ona tatou lagolagoina o tatou aiga, ma fesoasoani atu ai i o tatou tuaoi, ma tatou fesoasoani atu ai foi i le Tama o i le Lagi mo le faatuina o lona malo.

O le tele lava o tulafono o le soifua maloloina a le Alii o loo maua lea i le MFF 89. I lenei vaega, ua taua o le Upu o le Poto, o loo tau mai ai mea e tatau ona tatou ‘aina ma mea foi e le tatau mo i tatou. I mea uma la ua faatulafonoina o loo aofia ai ma le lapataiga e uiga i mea inu malolosi, mea inu vevela, ma le tapaa.

MEA INU MALOLOSI

O mea inu malolosi o le ava malosia lea, e pei o le pia ma le uaina. O le ava malosia e le faaaogaina o se mea inu, ae peitai mo le faamamaina o le tino i ni mea ua faaletonu ai (tagai i le MFF 89:5, 7).

MEA INU VEVELA

O mea inu vevela e i ai le kofe ma le lauti. O lea ua lapataina ai i tatou e taitai o le Ekalesia e aua le inuina se tasi o nei mea atonu ina nei fai ma amioga e masani ai.

TAPAA

O le tapaa e le tatau lava ona taumafaina e le tagata i soo se auala lava. Aua ua saunia le tapaa mo faiga o manua ma maosiosia ma povi mamai. E oo lava foi i lenei, e tatau lava ona faaaogaina i le fuafua lelei a le tagata ma le poto aoaoina. (Tagai i le MFF 89:8.)

E tatau lava ona tatou matua faaeteete i soo se meaai lava ma mea inu e faapea o le a mafua ona maua ai se manao e le masani ai, po o le a maua ai foi se faaletonu faalenatura o gaioiga o o tatou tino. Ua lapataiina mai i tatou e Peresitene Spencer W. Kimball o lo tatou faaaogaina o fualaau oona o le a maua ai i tatou i ni tulaga e le manuia ai, ma avea ai lea ma mafuaaga e maua ai i tatou i ni tulaga matuia faaletagata (tagai i le *Ensign*, May 1978, p. 78).

Afai tatou te masalosalo i se mea o nei mea, e tatau la ona tatou mulimuli i le lapataiga a Iosefa Filitia Samita: “Pe afai tou te faaletonu i se tasi o nei meaai po o meainu foi, pe mata e lelei pe e talafeagai e tatau lava ona aua nei tagofia, ae suesue seia oo ina ua e iloina e lelei lea mea. Afai e foaiina atu nisi o nei mea ona o se amioga, tatou te matua saogalemu lava pea tatou le tagofiaina ia mea o loo i ai mea oona e aafia ai le tino ma e tatau ai lava la ona teena” (“The Word of Wisdom,” *Improvement Era*, Feb. 1956, p. 79).

Ua fautua mai foi e le Upu o le Poto ia i tatou nisi meaai e lelei ona tausia ai o tatou tino. Ma o meaai nei e aofia ai fualaau taumafa mata ma fualaau aina (tagai i le MFF 89:10–11; ma le MFF 49:19). E mafai foi ona tatou faaaogaina ia aano o manu fasi ma manu felelei ma faaaogaina pa’u o nei manu e fai ma o tatou lavalava (tagai i le MFF 89:12–13 ma le 49:18–19). Ae peitai, ua lapataiina mai i tatou e le Alii ina ia aua ne’i o tatou soona faasaunoa i manu e pei o ni meataalo, po o se amioga foi e fiafia i ai ae faaleaogaina ai le aano o nei lava manu (tagai i le MFF 49:21). Ua taua foi e le Upu o le Poto e faapea, o le saitō e aoga lea mo le tagata faapea foi ma meaola. O le saitō o se mea lelei tele lea mo le tagata. O ni mea inu vaivai e mafai ona faia mai lea i le saitō pe afai e manaomia ai. (Tagai i le MFF 89:14–17.)

E ui lava ina tatau ona tatou matua taumafai e sailia po o fea tonu ia ituaiga o meaai e aoga mo o tatou tino, ma e tatau lava ona tatou matua faaeteete ina ia aua nei naunau i meaai. O loo i ai nisi o e e le o manatu tele i latou e tusa i a latou aoaoga i meaai taua e aoga i o tatou tino. O le soona taumafa po o le faasa i se taimi umi e le tatau la i le tulafono o le Upu o le Poto.

Ina ia siitia i luga lo tatou soifua maloloina ma le fiafia, o lea na saunia ai e le Alii mea uma lava i luga o le fogaelele mo le lelei ma le faaaogaina e le tagata. O nei mea uma lava o le a “faafiafiaina ai mata ma le agaga; loe, o mea uma e maua mai i le elele, i lona lava tau,

ua faia mo le lelei ma le aoga i tagata, ina ia fiafia ai mata ma faaolioliina ai le loto” (MFF 59:18–19).

Faitau le Mataupu Faavae ma Feagaiga 59:20.

O le a le uiga o lea fuaiupu?

O loo i ai isi mau e ese mai nai lo le Mataupu Faavae ma Feagaiga e 89 lea o loo talanoaina ai foi le tulafono a le Alii o le soifua maloloina. O se tasi o nei mau e faitauina faapea: “ia tuu le paie; ia tuu le le tu mama; ia tuu le fai pona o le tasi i le tasi, ia tuu le moe loa e sili atu i lo lona aoga; ia vave momoe ina ia outou le vaivai; ia alapo, ina ia faaouina o outou tino ma o outou mafaufau” (MFF 88:124). Ua poloaiina foi i tatou ia galulue, ae aua le sili atu i lo le malosi o loo tatou maua (tagai i le MFF 10:4).

E faapefea ona aafia le soifua maloloina lelei i le lapataiga a le Alii, “ia tuu le paie.” (O gaoiiga e faamalosia ai ai maso, fatu, ma mama.)

E faapefea ona faatatau le lapataiga a le Alii, “ia tuu le fai pona o le tasi i le tasi” i lo tatou soifua maloloina lelei? (O le saili o sese o isi e tupu ai lagona o le faanoanoa, ma o le maloloina lelei o lagona e moomia lea mo lo tatou fiafia faapea o tatou olaga faaleagaga.)

O tulafono a le Alii mo le soifua maloloina e aafia uma ai lava soo se vaega o o tatou olaga. Afai e tatou te ola i nei tulafono, o le a tatou mauaina foi le ola maloloina, maua lagona lelei, atoa ma lagona faaleagaga.

Tulafono ma Folafolaga

Faitau le Mataupu Faavae ma Feagaiga 89:18–21.

O a folafolaga na tuuina atu i e latou te tausia tulafono a le Alii e uiga i le soifua maloloina?

Na folafola mai e le Alii ia te i tatou e faapea, afai tatou te usiusitai ma tausia ana tulafono e uiga i le soifua maloloina ma tausia uma ana poloaiga, o le a tatou maua le soifua maloloina—tatou te “taufetuli foi ae le vaivai . . . ma savavali ae le matapogia” (tagai i le MFF 89:18, 20). Na ia folafola mai foi o le agelu o le faafanoga o le a laaloa lea ia i tatou (tagai i le MFF 89:21). Sa saunoa mai foi Peresitene Spencer W. Kimball e faapea, “O le tausia o le Upu o le Poto, o lona tau i le ola lea, e le gata i le umi o le ola i le olaga faaletino, ae ua faapea foi i le ola e faavavau” (*O le Vavega o le Faamagalo Atu*, itulau 212).

O se tasi o tau i sili mo le usiusitai i tulafono a le Alii o le soifua maloloina “o le a maua foi le poto ma oa sili o le malamalama e oo lava i ‘oa natia” (MFF 89:19).

O le a le poto? (O le faaaogaina ma le faautauta lea o le atamai.)

Afai e tatou te iloa le tulafono a le Atua o le soifua maloloina, o le a le tele o lo tatou atamai pe afai tatou tele usitaia nei tulafono?

Afai tatou te usiusitai i tulafono o le soifua maloloina, o le a faamalamalamaina o tatou mafaufau ma o le a mafai ona

25-a, Ua faamanuiaina Tanielu ona o le tausia o le tulafono o le soifua maloloina a le Alii



malamalama atili i le atamai o le tagata ma le Atua. O le a maua foi e tatou mafauauga ma lagona o le soifua maloloina sili e pei ona faamatalaina mai e lenei tala.

Faaali atu le fesoasoani vaaia 25-a, "Sa faamanuiaina Tanielu i le tausia lelei o tulafono a le Alii o le soifua maloloina."

O Tanielu o se tagata e mama ma malamalama. Ina ua mavae ona faatoilaloina Ierusalem, sa manaomia e le Tupu o Nepukanesa ni taulelea talavou mai e na aumaia faatagataotauaina, ia latou aoaoina lana gagana, ina ia mafai ai ona avea i latou ma auuuna i lona maota. Ae peitai, o le uiga o lenei mea, e latou te aai ma feinu i mea ua aoaoina i latou e aua le aai pe feinu ai foi.

O Tanielu la o se tasi lea o taulealea o e na filifilia. Ae peitai sa le pei o ia o isi, aua sa le mafaia e Tanielu ona inuina le uaina ma ai i meaai e le tatau ai mo ia e pei ona ofoina atu. O lea la sa ia faanoi atu ai pe mafai ona faatagaina o ia e tausia pea tulafono a le Alii e uiga i le soifua maloloina, ma ia faaogaina ia meaai ua ia iloa e aoga lelei mo ia. Ma sa talia lenei manao, e avea o se faataitaiga. Ae mulimuli ane, o i latou o e sa inu uaina ma ai meaai e le talafeagai ai ua faatusatusaina nei i latou ia Tanielu. Talu ai la ona o lona usiusitai, o lea sa matua maua ai e Tanielu le tino malosi ma le soifua maloloina lelei nai lo isi, ma sa ia mauaina foi le atamai, ma le poto, atoa ma le poto aoaoina, faapea ma faaaliga. (Tagai i le Tanielu 1:3–6, 8, 12–19.)

Afai o le a tatou usiusitai i tulafono o le soifua maloloina, o le a faapei lava i tatou o Tanielu, ma o le a faamanuiaina foi i tatou i nei lava faamanuiaga, e le gata la i lenei olaga ae oo lava foi i le ola e faavavau. O nei folafolaga e matua faamaoni lava—pe a tatou mulimuli i fautuaga a le Alii. Aua ua ta'uina mai e le Alii ia te i tatou e faapea "pe a tatou maua foi soo se faamanuiaga mai le Atua, e maua ai i le usiusitai i le tulafono lea e autu ai" (MFF 130:21). Na ia fetalai mai foi, "Ua noatia a'u le Alii pe a outou faia le mea ou te fai atu ai, ae a outou le faia le mea ua ou fai atu ai, e leai so outou folafolaga" (MFF 82:10).

Toe faitau le Mataupu Faavae ma Feagaiga 89:19.

O ai lea e mafai ona fesoasoani mai ina ia tatou mauaina ai nei faamanuiaga e pei ona taua i lenei fuaiupu? (O le Alii.)

Afai tatou te usiusitai i tulafono a le Alii e uiga i le soifua maloloina, o le a mafai ona tatou mauaina le poto ma oa silisili o le atamai. E oo mai lea i le malamalama o Keriso. Faatasi ai ma isi mea e tele, o le malamalama o Keriso e fesoasoani lea ia i tatou e iloa ai le mea moni ma atinae ai le poto. (Tagai i le MFF 88:11–12). O le malamalama o Keriso o loo avanoa mo soo se tasi, ae peitai, afai tatou te mauaina le meaalofo o le Agaga Paia, o lo tatou mauaina foi lea o le fesoasoani faaopoopo. O le Agaga Paia e mafai ona aoaoina i tatou pe faapefea

ona tatou faaaogaina lenei malamalama ma le mea moni i o tatou olaga ina ia tatou toe foi atu ai i le Atua (tagai i le MFF 84:45–47).

E tatou te maua foi 'oa natia e ala lea i lo tatou usiusitai i tulafono a le Alii o le soifua maloloina. O nei la 'oa lilo o ni mea sili ia ona matua'i paia ma loloto i le Atua. E faaalua mai foi ia i tatou e le Agaga Paia: "Aua ua faaali mai ia mea e le Atua ia te i matou e lona Agaga; a ua suesue ifo le agaga i mea uma, o mea loloto foi a le Atua . . . o ia mea foi matou te tautala atu ai i upu e aoaoina mai e le Agaga Paia, ae le o upu e aoaoina ai i le poto o tagata" (1 Korinito 2:10, 13). O lenei meaalofo e le mafaatusalia lona tau.

O mea paia ma loloto na tatou aoaoina o le a i ai pea lava lea ia i tatou, pe afai tatou te usiusitai i tulafono uma a le Atua. Ua folafola mai e le Atua e faapea: "O soo se mataupu faavae o le malamalama tatou te maua i lenei olaga, o le a toetutu mai faatasi ma i tatou i le toetutu. Afai foi e maua e se tasi le malamalama ma le faautauta e sili atu i lo isi i lenei olaga ona o lona filiga ma usiusitai o le a faapea ona sili atu ona avanoa i le olaga a sau" (MFF 130:18–19).

A o tatou mauaina le poto, atamai ma le malamalama, o le a avea ai i tatou e faapei o lo tatou Tama o i le Lagi. O le a avea i tatou ma ni atalii lelei, tama lelei, tane lelei. O le a aoaoina e tagata o le aiga e mafai ona latou o mai ia te i tatou ma maua atu ai le taitaiga ma faamanuiaga. O le a avea i tatou ma nisi e sili atu ona amiotonu atoa ma le mautinoa lelei o le perisitua o loo tatou ofuina, ma maua ai le poto ma le atamai mo o tatou lava valaauga i le Ekalesia.

O loo tele pea lava faamanuiaga o loo i ai mo i tatou e auala mai lea i le usiusitai i tulafono a le Alii e uiga i le soifua maloloina. O le a matua faateleina lo tatou iloa i a tatou mea e faia i galuega, ma o se faataitaiga lea, talu ai o le a tatou mauaina le malosia ma le poto tatou te fesoasoani malosia atu ai i e ona galuega o loo tatou galulue ai. O le faateleina o lo tatou poto ma le atamai o le a fesoasani foi lea mo i tatou e mafaufau loloto ai mo isi tagata, e aofia ai lea ma i latou o e e le o tausia tulafono a le Alii e uiga i le soifua maloloina .

Faaiuga

O le tulafono a le Alii o le soifua maloloina na tuuina mai ina ia faamanuiaina ai lo tatou malosia faaletino, o tatou mafaufauga, o lagona o le loto ma le faaleagaga. O le ola ai la i nei tulafono, o le a tatou maua ai le soifua maloloina. Ae le gata i lea sa folafolaina mai foi o le a faateleina le poto ma le atamai e faataitau lea i mea paia tau i le Atua. I lenei tulaga faaleagaga atoa ma lo tatou malosia faaletino o le a fesoasoani lea e faamalosi ai o tatou aiga ma fanau, ma auauna atu ai foi i le Atua ma le naunautai, ma faateleina ai lo tatou iloa i galuega o loo tatou faia.

Lu'i

Ia tautino nei e oe o le a e usiusitai nei i tulafono a le Alii o le soifua maloloina i soo se taimi ma soo se tulaga foi e oo i ai.

I se lauga i se konafesi aoao, sa saunoa mai ai faapea Peresitene Ezra Taft Benson:

“Na muai vaaia e le Alii le tulaga o aso nei o le a gauai atu ai tagata i le tupe ma uunaiina ai tagata ina ia faaososoina isi e tuuina ni mea oona i o latou tino. O faasalalaluga e faalauiloa mai ai le pia, o uaina, ava malosi, kofe, tapaa, ma isi mea oona, o faataitaiga na o mea na muai vaaia e le Alii. Ae o se faataitaiga sili ona matautia i o tatou nei taimi, o i latou ia o loo latou faatosinaina tagata talavou i le faaaogaina o fualaau oona.

“O'u uso e ma tuafafine talavou, i le alofa faamaoni, matou te lapatai atu ai ia te outou, o Satani ma ana aumea o loo latou taumafai malosi ina ia faa-aafia outou i nei mea oona, aua ua latou iloa lelei afai tou te faaaogaina, o le a faaititia o outou mana faaleagaga ma o le a latou puleaina loa ma oe. “Aloese mai na nofoaga poo tagata faapena, o e o le a latou faatosinaina oe ina ia e solia poloaiga a le Atua. Tausi poloaiga a le Atua, ma o le a e maua ai le poto e te iloa ai ma malamalama ai i mea a le tiapolo.” (in Conference Report, Apr. 1983, p. 72; po o le *Ensign*, May 1983, pp. 54–55.)

Sauniuniga a le Faiaoga

A o lei tuuina atu lenei lesona—

1. Iloiloina Mataupu Faavae o le Talalelei, mataupu 29, “O le Tulafono a le Alii mo le Soifua Maloloina.”
2. Ia saunia e faamalosi atu le faaleagaga e pei foi o le faamanuiaga o le tino malosi e oo mai lea i le ola i tulafono a le Alii mo le soifua maloloina.
3. Fai atu i tagata o le vasega e faitau po o le faamatala mai foi ni tala ma ni mau o loo ia i i lenei lesona.

O lenei lesona ua fuafuaina e faamalosia ai i tatou ina ia sailia le atamai.

Faatomuaga

Ona e pei lava foi o le tulaga e masani ai i le faalenatura o tamaiti le mananao ia pei o o latou matua, o le mea lea o se mea masani ia i tatou matua pe afai e toe fanaufouina i tatou o ni “fanau a Keriso” (tagai i le Mosaea 5:1–7), ma ia mananao e avea faapei o ia. O le mea moni lava, o loo finagalo le Faaola ina ia avea i tatou faapei o ia: Na ia poloaiina i tatou ina ia tatou atoatoa e pei o ia, ma pei foi o lo tatou Tama o loo i le Lagi. Ina ia tatou atoatoa e pei foi ona atoatoa i laua, o lea e tatau ai ona tatou aoao ma tutupu i le atamai o le upu moni. Pe a tatou faia nei mea, o le a tatou aoaoina ai pe faapefea ona avea i tatou e pei o i laua, ma pe faapefea foi ona tatou fai le galuega o loo laua faia.

O le Poloaiga Ina ia Sailia le Poto

I le Mataupu Faavae ma Feagaiga na poloaiina ai i tatou e le Alii ina ia tatou sailia le poto.

Faitau le Mataupu Faavae ma Feagaiga 88:78.

E tusa ai ma lenei fuaiupu, o le a le mea o loo finagalo le Alii ina ia tatou aoaoina? (O mataupu, aoaoga, atoa ma tulafono o le talalelei.)

O atamai uma lava e mafai ona tatou mauaina, ae o le mea sili ona taua o se molimau lea ia lesu Keriso, i lana misiona paia, ma lana talalelei. E tatau ona tatou suesue pea lava pea i tusitusiga paia, ma sailia le malamalama loloto o le talalelei e auala atu lea i le tatalo ma ole i le amiotonu. O le a leai lava se aoga o aoaoga uma tatou te maua, sei vagana ai ua tatou malamalama ma usiusitai i aoaoga faaola o le talalelei.

Faitau le Mataupu Faavae ma Feagaiga 88:79.

E le gata i le talalelei, o a nisi mea o loo finagalo le Alii ina ia tatou aoaoina? Ia lisi tali i luga o le laupapa. (O le lalolagi, o le lagi, talafaasolopito, o mea e tutupu mai, valoaga mo le lumanai, o lo tatou lava atunuu, ma isi atunuu.)

Sa faapea mai Peresitene N. Eldon Tanner, “O loo faatauina mai pea i tatou e le Ekalesia ina ia maua ni aoaoga lelei ma ia aoaoina ai mea uma lava tatou te mafaia e uiga ia i tatou lava, talafaasolopito, tala i le lalolagi, mataupu faasaienisi, o le lalolagi, aemaise lava o le talalelei a lesu Keriso” (Regional Representatives’ Seminar, April 1971).

Talu mai lava le taimi o le toefuataiina o le talalelei, ua uunaia pea e le Ekalesia ia ona tagata ina ia latou mauaina ni aoaoga lelei. E oo lava foi i ona po ua leva o le Ekalesia a o tele le mau faafitauli, o lea sa faatonuina ai Iosefa Samita e le Alii ina ia faatuina ni aoga mo tagata matutua faapea foi ma tamaiti. E le gata la i suesuega faaletalalelei, ae sa ofoina atu ai foi ma ni vasega o le talafaasolopito, o gagana eseese, o le gagana aoaoina, o numera, atoa ma isi lava mataupu. O le vaitaimi nei, o loo faaauauina ai pea lava e le Ekalesia le faaaluina lea o taimi e tele, ma taumafaiga, atoa ma tupe mo le lagolagoina lea o tulaga tau aoaoga. O loo aofia ai la i nei taumafaiga le Ofisa o Aoga a le Ekalesia, lea na faavaeina ina ia fesoasoani e faafetaiaia manaoga tau le aoaoga.

Faitau le Mataupu Faavae ma Feagaiga 88:80.

O le a le faamoemoega o le mauaina o le atamai?

O le silafia o tagata atoa ma le lalolagi o loo siomia ai i tatou e mafai ona fesoasani ia i tatou i le fausiaina o le malo o le Atua. E mafai ona fesoasoani ia i tatou e sailia ni auala lelei e aoaoina atu ai le talalelei i nisi tagata se toatele. I le faaopoopo atu i ai, a o avea tagata o le Au Paia o Aso e Gata Ai ma ni tagata faaloologia i a latou galuega, e tusa pe avea ma fomai po o ni kamuta sili ona atamamai, ae e avea lava i latou ma ni faataitaiga lea e mafai ai ona aafia ai isi tagata ina ia latou aoao atili e uiga i le Ekalesia.

O le aoaoga o se mea taua tele e le gata ina avea o se mea faigaluega faafaifeautalā a o se tasi foi o mea e maua mai ai fesoasoani i vaega uma o le olaga. Sa faapea mai foi ia Peresitene Tavita O. Makei: “O aoaoga moni lava o loo aofia ai e le gata i le manaomia o ni nai mea moni mo le faasaienisi, talafaasolopito, tusitala po o le tusiata, ae peitai mo le atinae lava o le tagata ia O le aoaoga moni e aoaoina ai le le manatu tetee ma le pulea e le tagata o ia lava. O aoaoga moni e faatonutonuina ai le ita, ma pulea ai le loto malosi ae usiusitai i tulafono o le vafealoai ma tausia tulafono o le ola mama o se mataupu faavae taiala lea o le olaga. . . .

“O le faamoemoega o aoaoga o le atianaeina ai lea o tulaga o mea e maua ai fesoasoani eseese mo le tagata aoga ma o le a avea lea ma sao e faaopoopo i lona olaga sologa lelei i le umi o lona olaga” (*Secrets of a Happy Life*, pp. 46–47).

O le mauaina o le atamai o le a fesoasoani foi lea mo i tatou e auaina atu ai i tagata. E mafai ona tatou fesoasoani i tagata ina ia latou puipua faamai ma mea e mafatia ai, sailia ni auala ina ia faamanuiaina ai le olaga, ma maua ai meaai moomia, o lavalava, ma fale mo o tatou aiga. Ae o le mea sili i nei mea uma, o le mafai lea ona tatou aoao ma fetufaai ma isi i mataupu faavae ma tulafono e tataua ona tatou iloa ina ia avea ai i tatou e faapei o le Tama oi le Lagi.

Ae peitai, o nisi taimi, pe afai e maua e tagata le atamai faalelalolagi, ona maua ai lea e i latou le mitamita vale ona o lo latou poto. Ua latou lagona e latou te le manaomia lapataiga a le Alii ma ana perofeta. Ua lapataiina i tatou e le Alii i tusitusiga paia: O se mea lelei lo tatou aoaoina, ua faapea mai o ia, *pe afai tatou te faalogo i lana lapataiiga*. Aua nei o tatou faaagogaseseina lo tatou aoaoina. (Tagai i le 2 Nifae 9:28–29.)

O le Tauga o le Alu i le Aoga

Aisea e tauga ai le alu i le aoga? O a mea e mafai ona tatou aoaoina pe a auai i le aoga?

O le tele o lo tatou aoaoina e maua mai lea i le aoga. Tatou te aoaoina i le aoga le auala e faitau ai, tusitusi ai, ma le faia o numera faavae. Tatou te aoaoina ai e uiga i le talafaasolopito, tala i le lalolagi, ma le saienisi. Ua tatou suesue foi i le ala e gaioi ai le tino o le tagata, o le fegasoloai o fetu, atoa ma le matagofie ma le faamoemoega o laau uma ma meaola. A o faalateleina lo tatou malamalamaaga e uiga i le lalolagi, o le a mafai ona tatou tuuina atu ni sao sili mo o tatou aiga, o le Ekalesia, ma lo tatou nuu.

O nisi taimi e faigata ai ona maua se aoga. Atonu tatou te popole i le tulaga tau tupe, o le taimi, po o taumafaiga e manaomia ai. Ae o loo finagalo le Alii ina ia aoaoina lelei i tatou. O le a ia fesoasoani ia i tatou ina ia ausia lea sini pe afai tatou te sailia lana fesoasoani ma faia a tatou taumafaiga sili tatou te mafaia. A'o faateleina le tomai o lo tatou lalolagi i fale gaosimea, tomai, ma le saienisi, ua faateleina lava le tauga o le aoaoina. E moomia le aoaoina o i tatou ina ia lagolagoina ai o tatou aiga ma e manaomia foi le atamai e faaleleia ai o tatou nuu.

O tagata o le Ekalesia, aemaise ai lava le autalavou, e masani ona lapataiina pea i latou ina ia sailia ni faiga talafeagai lelei e mafai ona maua ai ni aoaoga. O loo aofia ai la i lenei tulaga ni aoaoga e talafeagai lelei mo se galuega. I nofoaga e leai ni aoga aloaia o i ai, e mafai ona fesoasoani o tatou tama ma tina o loo nonofo latalata ane ina ia tatou maua aoaoga tatou te manaomia.

E Faaauuina Pea Aoaoga i o Tatou Olaga Atoa

Faaali atu le fesoasoani vaaia 26-a, "E tauga aoaoga mo tagata talavou."

Afai e talafeagai ai, e tatau lava ona faaauuina pea a tatou aoaoga pea uma le aoga maualuga. E mafai ona faia lea mea e ala lea i le auai atu i se iunivesite, o se aoga o matata eseese po o se aoga o tomai faapitoa, po o se aoaoga e maua mai i se galuega.

Faaali atu le fesoasoani vaaia 26-e, "O aoaoga e tatau ona faaauuina pea i le olaga atoa o se tagata."

E tusa pe ua tatou matutua, e mafai lava ona tatou auai i vasega mo mataupu eseese. E mafai ona tatou auai i vasega mo tagata matutua

26-a, E tauga aoaoga mo tagata talavou

26-e, O aoaoga e tatau ona faaauuina pea i le olaga atoa o se tagata





po o vasega e ofoina atu e nisi aoga e auala atu lea i le meli. Afai e le talafeagai le aoaoina aloaia, e mafai ona sailii atu mo se fesoasoani mai e o loo latalata mai o loo i ai lo latou atamai po o le poto aoaoina. Ma o ia tagata o loo masani ona fesoasoani mai mo i tatou pe afai latou te iloaina o loo tatou naunau e fia aoaoina.

Talu ai ona ua fautuaina i tatou e le Alii ina ia tatou aoao, o lea ua i ai se mafuaaga faaopoopo tatou te faia ai le taumafaiga sili e aoao ai i o tatou olaga atoa. E pei la ona mafai ona tatou faitau, suesue, ma aoao, e tatau ona tatou ole atu i le Alii e fesoasoani mai ia i tatou ina ia tatou malamalama ma manatua mea uma ua tatou aoaoina.

E le gata i tusitusiga paia, ae e tatau ona tatou sailia ni aoaoga mai “tusi sili ona lelei” (MFF 88:118). O lenei la tulaga o loo manaomia ai lo tatou faautauta i le iloiloia lea o tusi tatou te faitauina. O nisi tusi ma mekasini e aveia ai i tatou ma ni tagata lelei. Aua o loo aoaoina mai ai i tatou i nei tusi e uiga i le lelei ma le matagofie. Ae o le tele lava foi o isi tusi, e matua siitia ai le amioleaga.

Na lapataiina i tatou e Peresitene Spencer W. Kimball e faapea “e tele . . . o faatosinaga a le tiapolo e oo sa’o atu lava i totonu o le aiga—e auala mai i le televise, leitio, mekasini, nusipepa, atoa ma isi lava ituaiga o tusitusiga” (*Ensign*, May 1978, p. 45). O a tatou aoaoga e tatau ona uunaiina ese ai faatosinaga leaga ae faatumuina o tatou mafaufau i mea lelei e manatunatu i ai.

I le faaopoopo atu i ai i le faitauina o tusi, mekasini, ma nusipepa sili ona lelei, e mafai foi ona tatou auai atu i tala faatino e aoaoina ai le fesoasoani atu, faamafanafanaga, ma le malamalama i isi tagata ma a latou aganuu. E mafai ona tatou auai atu i konaseti ma asiasi atu i fale mataaga ina ia faateleina ai lo tatou alofa i le matagofie. E mafai ona tatou talanoaina mea na tatou aoaoina ma nisi tagata.

O Le Aoaoina e Ala i le Faia

Na tuuina mai i tatou e lo tatou Tama Faalelagi i lenei lalolagi ina ia tatou aoao ma maua le malamalama. O le tele o mea e mafai ona tatou aoaoina e mafai ona aoaoina lea i le faatinoia. E le taitai ona lava pe afai na o lo tatou suesue i ai. Na tusia e le tusitala o le tusi o Failauga e faapea: “O lenei foi lo’u atalii e, ia aoaoina oe e i latou: e leai se iuga i tusi o tusi e tele; o le suesue tele foi i upu e vaivai ai le tino. . . .Aua e faamasinoia e le Atua galuega uma, atoa ma mea lilo uma lava, o mea lelei atoa ma mea leaga” (Failauga 12:12, 14). Na talosaga mai le Alii ia i tatou ina ia tatou fuafua lo tatou manaomia lo tatou galulue faamaoni: “O lea ia taitoatasi ai le tagata ma aoaoina lana tiute, ma galue i le tofi ua tofia ai o ia, i le maelega atoatoa” (MFF 107:99).

O le faataunuaina o tiute ua tuuina mai ia i tatou, a o tatou galulue ai i se tofiga po o se valaauga, e tuuina mai ai ia i tatou le malamalama e aoao mai ai. Afai o le a tatou aafia i le faia o ia mea, o le a tatou faia

ai i nisi taimi ni mea sese. O lea malamalamaaga e maua ai e i tatou le avanoa e aoao ai, suia ai, ma faateleina ai mea tatou te mafaia. Ao tatou faaleleia atili i mea ma faaalualuina i luma, o le tele o mea sa faafaigata o le a faigofie. E le gata la ina tatou faataunuuina nei tiute mo i tatou lava, ae ua mafai foi ona tatou fesoasoani atu i isi.

Ua saunia e le Alii le anoanoai o avanoa o le auauna atu ma le taitaiga i totonu o le Ekalesia, lea afai tatou te taliaina ma tatou faia le mea silisili ma le agaga tatalo, o le a fesoasoani ai ia i tatou ina ia atinaeina ma aoaoina.

O le tele o aoaoga le aloaia e mafai ona faataunuuina lea i se aiga. E mafai e aiga ona asiasi atu i nofoaga o loo gaosia mai ai musika po o le asiasi faatasi atu foi i se fale mataaga. E mafai ona latou faia faatasi ni mea. E mafai ona latou avea ni tafaoga, tolauapiga, evaga, e oo foi i se savalivaliga, o ni mea e mafai ona aoaoina mai ai le aiga. O se tasi aiga na latou auauai i le faitauina leotele lea mai se tusi lelei ona latou talanoaina lea o manatu taua sa latou faitau i ai.

O le aoaoina e ala lea i faatinoina o se mea lea e mafai e i tatou uma ona faia, e tusa lava pe tatou te lei aooga. O se tasi tamaitai, mo se faataitaiga, sa faitio o ia ia Dr. Louis Agassiz, o se saienitisi iloga, e faapea o ia sa le maua lava se avanoa e aoga ai. Sa fai atu lenei tamaitai i le alii saienitisi e faapea o ia ma lona uso sa laua pulea se faletalimalo ma o le ala lea sa le maua ai e ia se avanoa mo se isi lava mea. Sa fesili atu le alii iai po o le a le ituaiga galuega na ia faia, ae tali mai o ia:

“O le fisi pateta ma le tipi aniani.:

Sa toe fesili le alii, “O fea e te nofo ai ao e faia lena mea?”

“O sitepu pito i lalo o le faasitepu o le umukuka.”

“O fea e tuu ai ou vae?”

“I luga o le piliki ele.”

“O le a le piliki ele?”

“Ou te le iloa, alii e.”

“O le a le umi talu ona e faia lena galuega?”

“Sefululima tausaga.”

“Tamaitai e, o lo’u tuatusi lenei,” sa fai atu ai Dr. Agassiz. “E mafai ona e tusi maia se tusi e taua mai ai ia te au le natura o le piliki ele?”

Sa naunautai lava le tamaitai ma lana fesili i le alii. Sa sueina e le tamaitai le upu “piliki” i le lomifefiloi, ae peitai sa ia lagona ua faigofie tele lenei uiga ma e le talafeagai ona auina atu i se saienitisi ua lauiloa. Sa toe suesue o ia i le encyclopedia. A o faitauina la e le tamaitai lenei tusi, sa ia maua ai ni upu e le malamalama ai o ia. O le mea lea, sa ia sailia ai loa nei upu. Talu ai ona ua fiafia tele o ia i le mea sa ia aoaoina,

o lea sa ia asiasi atu ai i falemataaga ma nofoaga o loo gaosia ai le piliki. Ina ua maea nei suesuega a le tamaitai, sa tusia loa e ia se tusi e 36 laupepa sa ia faamatalaina atu ai i le alii o Agassiz le mataupu e uiga i piliki ele.

Sa tali mai Agassiz i se tusi e ta'u mai ai i le tamaitai sa na o ni nai suiga laiti lava o lana tusi sa ia faia ona ave ai loa lea ua faasalalauina, ma sa auina mai e le alii se \$250 i le tamaitai. I le faaiuga la o le tusi sa faapea mai ai le alii, "O le a le mea o loo i lalo ifo o na piliki?"

Sa vaavaai o ia. Sa ia vaايا le anoano o loi i lalo ifo o nei piliki. Sa amata foi loa ona suesue le tamaitai i loi. Ma o lea sa maua ai e le tamaitai lenei e i le va o le 1800 ma le 2500 ia ituaiga loi. Sa avea lenei tamaitai ma se tasi e fiafia tele i ituaiga eseese o mea fetolofi ma mea ola foi. Ina ua maea ona fai suesuega a le tamaitai i nei mea uma, ona tusia foi lea e ia o le tasi tusi e 360 laupepa i le alii o Agassiz e uiga foi i lenei mataupu. Sa faasalalauina loa foi e le alii nei laupepa e pei o se tusi, ma sa ia toe auina foi ia le tasi vaega tupe tele i le tamaitai.

Ina ua maua e lenei tamaitai le tupe sa auina atu mo ia, o lea sa malaga taamilo ai loa o ia i nuu uma lava sa ia moe miti i ai. (Adapted from Marion D. Hanks, *The Gift of Self*, pp. 151–53.)

E ese mai ai i lo tupe sa mauaina e lenei tamaitai, sa faapefea ona faatamaoagaina lona soifuaga? (Ina ua faateleina le atamai atoa ma mea fou e tele o le lalolagi sa siomia ai o ia.)

E mafai foi ona tatou aoaoina o mea e tele pe a faafiafiaina i tatou i mea o le lalolagi atoa ma tagata o loo siomia ai i tatou. E mafai ona faafaigofie ona tatou aoao mea e tele pea tatou faaaogaina le poto masani ua tatou maua, ma tatou taumafai e malamalama i nei mea uma e auala mai lea i suesuega atoa ma le faamoemoeina o o tatou loto ma manatu. E pei la ona tatou faia nei tulaga, suesue, galulue, ma mafaufau loloto, o le a tatou aoaoina ai le tele o mea aoga ma aoaoina ai foi pe faapefea ona aafia nei mea i o tatou olaga i aso taitasi.

O loo i ai ni mea e mafai ona tatou tuuina atu mo isi tagata, o loo i ai foi mea e le mafai ona tatou tuuina atu, ae sei vagana ai ua ia taumafai e pai mai lava e aveina atu ai, ma avea ai o ia e fai ma totogi mo nei lava mea ua ia maua. O lenei la mataupu o loo faatatau tonu lea i le suesue, e atinae taleni, mauaina o le atamai, ma maua ai foi le poto aoaoina, atoa ma le aoaoina lea o lesona uma lava e maua i le olaga" (Richard L. Evans, *Richard Evans' Quote Book*, p. 74).

Ia talanoaina lenei manatu na tuuina mai e Elder Evans.

O a ni avanoa o loo i ai i o tatou nofoaga mo le faateleina o lo tatou atamai ma le poto masani?

Faaiuga

Ua poloaiina i tatou e le Alii ina ia tatou maua le atamai e uiga i le talalelei ma le lalolagi. E mafai ona tatou faia lenei tulaga i le auai lea i aoga, o suesuega faaleaoaoga a le tagata lava ia, po o le naunau e

suesueina mea o loo siomia ai i tatou, ma le taumafai ina ia malamalama i o tatou lava poto masani. E pei ona tatou mauaina le atamai, o le a aoaoina i tatou ina ia talisapaia le lalolagi ma mea o loo i ai e pei ona sa fuafuaina ai e le Alii mo i tatou. O le faateleina o le atamai ma tulaga o aoaoga o le a fesoasoani foi lea mo i tatou e lagolagoina ai o tatou aiga, o le faatuina o le malo o le Atua, avea ma tagatanuu lelei, ma avea ai i tatou e pei o lo tatou Tama o i le Lagi.

Lu'i

Tama: la uunaiina a outou fanau ina ia maua ni aoaoga lelei. la faataatia se faataitaiga o suesuega mo i latou e mulimuli i ai. la fuafuaina ni gaoioiga mo le aiga o le a fesoasoani ai mo tagata taitoatasi ina ia latou aoao faatasi.

Tagata talavou o loo umia le perisitua: la faia fuafuaga tatau e maua ai se aoaoga lelei.

Sauniuniga a le Faiaoga

A o lei tuuina atu lenei lesona—

1. la faamasani i avanoa faaleaoaoga i lo outou atunuu ma le nuu.
2. la talosaga atu i tagata o le vasega e faitau pe tuuina mai tala ma mau o loo tuuina atu i lenei lesona.

O Iesu Keriso, O Lo Tatou Faavae Mautu

Lesona 27

O lenei lesona e tatau ona fesoasoani ia i tatou e fuafua ina ia avea Iesu Keriso ma faavae mautu o o tatou olaga.

Faatomuaga

Ia faaali atu i luma o le vasega le ata lanu o Iesu o loo i tua o lenei tusi lesona. Fai i le vasega e tilotilo i le ata ona moeini lea o o latou mata mo le tolusefulu sekone. Ia vaai faalemafaufau o loo latou faatasi ma le Faaola. Ia faamatala atu o le tala o loo mulimuli mai o le a fesoasoani lea ia i latou ina ia malamalama atili i lo tatou Faaola o Iesu Keriso. (Taumafai e faatupuina se tulaga faaleagaga a o lei tuuina atu lenei mea na tupu i le vasega.)

O Elder Melvin J. Ballard sa avea ma se faifeautalai i se tasi taimi i tagata Initia i Amerika i Matu. A o i ai o ia i lana misiona, sa moomia e ia se molimau e faapea o loo faia e ia le finagalo o le Alii. Ina ua fesili o ia i le Alii mo se faamaoniga, fai mai o ia na fai lana miti ma na oo ai i totonu o le malumalu. I lana miti, sa ulufale atu o ia i se tasi potu i le malumalu.

“A o o’u ulu atu i le faitotoa,” o le tala lea a Elder Ballard, “Sa ou vaايا ai o nofo mai i luga o se tulaga matietie, se Tagata aupito sili ona mamalu e lei vaai lava i ai o’u mata, pe faapea sa i ai o ia i lalolagi uma e faavavau. Ina ua ou latalata atu e faafeiloai ia te ia, sa tulai o ia ma savali mai agai ia te au ma ona lima o loo faaloaloa mai, ma ‘ata mai ma musumusumu mai e ia lo’u igoa. Afai ou te ola mo se miliona tausaga, o le a le galo ia te au lea ‘ata’ata. Na ia fusi ia te a’u ma sogi mai ia te a’u, ma faapipii atu i lona fatafata, ma faamanuia ia te a’u, seia oo ina foliga mai ua liusuavaia uma mea lololo o o’u ponaivi! Ina ua maea lea, sa ou faapa’u i ona aao, ma, a o o’u mulumuluina ona aao i o’u loimata ma sogi atu i ai, sa ou vaايا ai tulaga o fao i aao o le Togiola o le lalolagi. O le lagona na ia te a’u a o ou i ai i luma o le o loo i ona aao mea uma, ia ou maua Lona alofa, Lona faapalepale ma Lana faamanuiaga, afai ou te maua e pei ona ou moomoo i ai, ou te avatu mea uma o loo ia te a’u, mea uma ou te faamoemoe ou te fia oo i ai, ina ia ou maua lava lea lagona e pei ona ou faalogoina!” (*Sermons and Missionary Service of Melvin J. Ballard, p. 156*).

O lo Tatou Manaomia o se Faaola

A o lei o mai i tatou i le lalolagi, sa tatou nonofo faatasi ma lo tatou Tama o i le Lagi. A o tatou i ai iina, sa tuuina mai ia i tatou le ata o le faaolataga. Sa tatou fiafia tele i lena fuafuaga ma ua tatou taliaina ma le alaga tele ma le fiafia (tagai i le lopu 38:1–7).

O le ata o le faaolataga ua manaomia ai ina ia tatou o ese mai luma o lo tatou Tama Faalelagi ma o mai i le lalolagi e avea ma tagata faitino. O iinei, o le a vavaeeseina ai i tatou e le gata i le faaletino ae faapea foi i le faaleagaga mai lo tatou Tama Faalelagi. O le a tuuina mai ia i tatou le saolotoga tatou te faia ai le filifiliga mo i tatou lava pe usiusitai pe le usiusitai foi i poloaiga a le Atua.

Afai tatou te filifili e fai le agasala, o lona uiga o le a avea i tatou ma tagata le mama. O le uiga o lenei mea e tatau la i se tasi e leai se agasala ona faia se taulaga mo a tatou agasala, ona e le mafai ona ulufale atu se mea eleelea i le malo o le lagi (tagai i le 1 Nifae 15:34.)

Ina ia fesoasoani ia i tatou e toe foi atu i lona afioaga, o lea na filifilia ai e lo tatou Tama Faalelagi se Faaola na te faaolaina i tatou. O le Faaola lenei o lo tatou uso aupito matua faaleagaga lea, o Iesu Keriso, o le na ofo e afio mai i le lalolagi e avea ma o tatou Faaola. I le faia o lana ofo na ia faapea mai ai o le mamalu mo lo tatou faaolataga o le a i ai pea lea i le Tama o i le Lagi. (Tagai i le Aperaaamo 3:27; Mose 4:2.) O Lusifelo o le tasi lea o tatou uso faaleagaga, sa manao foi o ia e avea ma o tatou Faaola. Ae peitai, sa manao o ia e faamalosia le laveaiina o i tatou ma tuu pea le mamalu mo ia. (Tagai i le Mose 4:1). Sa teena e lo tatou Tama Faalelagi lenei ofo ma ua muai faauuina ai Iesu e avea ma o tatou Faaola (tagai i le 1 Peteru 1:18–20). I le faia o lea tulaga, ua ia faasaoina ai lo tatou saolotoga.

O Iesu Keriso o lo Tatou Faavae Mautu

O le a le faavae mautu?

O se faavae mautu o se faavae lea e mausali. O se faavae malosi. E le mafai ona aveeseina pe faaleagaina. O se faavae mautu na te mafai ona tauaveina soo se mea e faalagolago atu ia te ia. A tatou fausia se fale, mo se faataitaiga, e tatau ona tatou faateete ina ia faia se faavae e matua mautu ina ia mafai ai ona tumau lea fale. I lea lava faiga e tasi, e tatau ona tatou fausia o tatou olaga i luga o se faavae mautu ina ia mafai ai ona tatou tumau ma foia faaososoga o lenei olaga.

O lo tatou Faaola o Iesu Keriso, ua na o le pau lea o le faavae mautu e mafai ona tatou fausia ai o tatou olaga. Fai mai le perofeta o Helamana:

“E ao ina atiae lo oulua faavae i luga o le papa o lo tatou Togiola, o le Keriso lea, o le Alo o le Atua. Pe a faaoo mai e le tiapolo ana matagi tetele, o ana u fanafana i le asiosio, ioe, pe pesi mai ia te oulua lana uato’a uma lava ma ana afa, e le malo ai ia te oulua . . . ona o le papa ua atiae ai oulua, o le faavae mau lea, o le faavae foi lea, afai e atiae tagata i ona luma, e le mafai lava ona pau i latou” (Helamana 5:12).

O Iesu o lo tatou faavae mautu aua na muai faauuina o ia e le Atua e avea ma o tatou Togiola. Sa faapea mai Nifae, “e leai se tasi igoa i lalo o le lagi, ua na o lenei, o Iesu Keriso. . . e mafai ona faaolaina

ai tagata” (2 Nifae 25:20). Ua na o le togiola lava ma le taulaga a lesu Keriso e mafai ai ona faamagaloina a tatou agasala ma maua ai le ola e faavavau. E le mafai ona tatou faia e i tatou lava ia mea. Ua na o lesu ua i ai lenei mana.

E mafai e le Faaola ona fesoasoani ia i tatou, ae peitai, e tatau ona tatou avea muamua o ia ma o tatou faavae mautu. Afai tatou te faia, o le a fesoasoani mai o ia ia te i tatou e faafetaiaia o tatou lu’i ma faateleina lo tatou agavaa e tauaveina ai a tatou avega mamafa. Ona o ia, e mafai ai ona tatou maua le malosi ma faataunuuina galuega faigata uma. O le a ave a o ia ma uo e mafai ona tatou faalagolago i ai. O le a mafai ona tatou fetufaai mea tatou te olioli ma faanoanoa ai faatasi ma ia ma tatou lagona ai le pai mai o lona alofa ma le finagalo naunau ua ia te ia mo i tatou.

Atiae i Luga o Keriso

Ina ia mafai ona atiae o tatou olaga i luga o se faavae mautu, o lo tatou Faaola lea, e ao ia i tatou ona tatou iloa o ia. Fai mai tusitusiga paia o le iloa o Keriso o le tausia lea o ana poloaiga (tagai i le 1 loane 2:3). A o tatou tausia ana poloaiga, o le a faasolosolo lava ina ave a i tatou e pei o ia seia oo lava ina matua faatagaina atoatoa i tatou i lona afoaga (tagai i le Joseph Fielding Smith, Doctrines of Salvation, 2:7).

E mafai faapefea ona tatou faavae i luga o Keriso? (Ia faaali atu le siata, “O le Ala e Atiae ai i Luga o Keriso, le faavae mautu,” po o le tusi foi o le faamatalaga i luga o le laupapa.)

E mafai ona tatou atiae i luga o Keriso i auala nei:

SUESUE I TUSITUSIGA PAIA

Ua faaalua mai e tusitusiga paia ia i tatou le tala i le soifuaga o le Faaola, o ana mataupu, ma ana aoaoga. “E suesue outou i tusi,” ua poloai mai ai le Alii: “o tusi foi ia o loo molimau ia te au” (loane 5:39). I totonu o tusitusiga paia nei ua tatou iloa ai le ala e fegalegaleai ai le Faaola ma tagata o le lalolagi, ma le ala foi e tatau ona tatou fegalegaleai ai le tasi i le isi.

O tusitusiga paia ua tuuina mai ai e le Alii ia i tatou lana talalelei. Na fetalai mai o ia, afai tatou te atinae o tatou olaga i luga o lana talalelei, o le a ia tauamitonuina i tatou i luma o le Tama i le aso faamasino. (Tagai i le 3 Nifae 27:13–16.) O le fausia o o tatou olaga i luga o le talalelei a Keriso o lona uiga o le faatuatua lea i le Alii ma salamo mai a tatou agasala, ia papatisoina, ia maua le meaalofa o le Agaga Paia, ma ia tumau seia oo i le iuga. Ua folafola mai e le Alii afai tatou te atiae i luga o le papa o lana talalelei, o le a le mafai e faitotoa o seoli ona manumalo ia i tatou (3 Nifae 11:39). O lona uiga afai tatou te atiaeina o tatou olaga i le talalelei a Keriso, o le a le pule Satani ia i tatou, peitai o le a mulimuli ane ona faapaiaina i tatou ma siitia a’e i tatou i le aso mulimuli. (Tagai i le 3 Nifae 27:17–22.)

E faapefea ona fesoasoani ia te oe le aoa o tusitusiga paia ina ia e iloa ai le Faaola?

TATALO MA ANAPOGI

O le tatalo ma le anapogi e mafai ai ona fesoasoani ia i tatou ina ia faalatalata atu i le Alii. A o tatou anapopogi ma tatalo i se nofoaga toafilemu, tatou te lagona le alofa o le Faaola. O le a mafai ai ona tatou ta'u atu i le Alii o tatou lagona loloto o i totonu ia i tatou, ma o le a na aumaia ia i tatou se faamafanafanaga ma le filemu o le mafaufau.

Sa faamatalaina e se tasi tamaitai le mea na ia iloa ai lo tatou Tama o i le Lagi ma le Faaola i se tulaga sili atu ona lelei e ala i le tatalo:

O lea tamaitai o se faiaoga. I se tasi aso, sa valaauina ai o ia ina ia toe foi atu i le aiga ona ua malemo lana tama tama. Sa matuai faateia o ia i lenei mea. O lona tiga tele na ia tagi ai, "Lo'u Alii e, lo'u Atua e, aisea?" Sa oo vave ane se tali i se tulaga manino, ma le agalelei ma o se lagona faagaetia lea ia te ia: "Ou te manaomia o ia."

I aso na sosoo ai sa maua ai e ia ni faamafanafanaga matagofie. "A o o'u tuuina atu lo'u loto i lo'u Tama i le tatalo," o lana tala lea, " sa ia faafofoga mai ia te a'u ma i lona lava taimi ma lona lava ala na ia tali mai ai i na tatalo. . . . O lenei tofotofoga semanu e aveeseina ai a'u mai lo'u Tama Faalelagi. . . . Ae ui i lea, ua sili atu lo'u latalata i le na Faia a'u i le taimi nei nai lo se isi lava taimi muamua, ma ua ia faamanuiaina a'u i se molimau ma le malamalama" (Anita L. Hughes, "Why did You Take My Son?" *Ensign*, July 1978, p. 66).

AAI I LE FAAMANATUGA

O le a aumaia e le Agaga o le Alii ia i tatou ni manatunatuga loloto i le soifuaga ma uiga o le Faaola, ona o se tasi o galuega a le Agaga o le molimau lea e uiga ia Keriso (tagai i le loane 15:26), O le mea moni lava, ua na o le Agaga lava o le Alii e mafai ai ona tatou aoaoina le uiga loloto o le taulaga a le Alii mo i tatou.

Tatou te maua pea le Agaga o le Alii e faatasi ma i tatou pe a maea ona papatisoina ma faamanuiaina ma fetagofi atu ma le agavaa i le faamanatuga (tagai i le MFF 20:77, 79).

O le a se mea e tatau ona tatou mafaufau i ai a o tatou fetagofi atu i le faamanatuga?

MULIMULI I LE PEROFETA SOIFUA

E faapefea ona avea le mulimuli i le perofeta soifua ma fesoasoani i le atinaeina o i tatou ia Keriso?

O le Peresitene o le Ekalesia o le fofoga lava lea o le Atua i le lalolagi. I le i ai o ia i lea tulaga, ua ia faalia le finagalo o le Atua i aso nei. O le mea lea, afai tatou te mulimuli i fautuaga a le perofeta, o lo tatou mulimuli lava lea i le Atua ma usiusitai i Lona finagalo. I lenei la auala, a o tatou aoao ina ia usiusitai ma maua le poto masani, o le a faatupuina lo tatou faatuatua i le Alii. O lenei faatuatua o le a galue e avea o se "taula" i o tatou agaga ma unaiaina ai i tatou ina ia faia ni galuega lelei (tagai i le Eteru 12:4). O le a tatou maua ai le lelei ma

avea ma atalii agavaa o lo tatou Atua pe a tatou faia faapea (tagai i le Moronae 7:25–26).

ALOFA MA AUAUNA I LE ALII

Sa ta'u atu e le Tupu o Peniamina i ona tagata e faapea, "Pe a i ai outou i le galuega a o outou uso ua na ona i ai o outou i le galuega a le Atua" (Mosaea 2:17). O le alofa ma auauna atu i isi o le alofa lava lea ma auauna atu i le Alii. Ma a tatou alolofa ma auauna atu i le Faaola, ua mafai ona tatou iloa o ia i se tulaga e sili atu. Ua na o le auauna atu i le Alii e mafai ai ona tatou iloa lagona o loo finagalo ma mafaufau i ai o ia: "Aua pe faapefea ona iloa e le tagata le Alii e lei auauna i ai o ia, o le tagata ese foi ia te ia, ma ua mamao i manatu ma manao o lona loto?" (Mosaea 5:13).

OLA E PEI O KERISO

E mafai faapefea ona tatou ola ia faapei o lesu Keriso?

A o tatou usiusitai i poloaiga a le Alii ma ola i lana talalelei, o le a amata loa ona tatou ola ai e pei ona ia soifua ai ma avea ai i tatou e faapei o ia.

Ia tuuina atu le avanoa i le tagata o le vasega na tofia e tuuina mai lana lipoti mo le tolu i le lima minute e uiga i le Mosaea e 4 ma le 5.

Talu ai ona o upu a le Tupu o Peniamina, o lea na lagona ai e ona tagata le Agaga o le Atua ma ua uunaiina ai ia folafola atu i le Atua o le a latou tausia pea ana poloaiga. O nisi o poloaiga na taua e le Tupu o Peniamina o le a latou tausia o le: ia manatua le silisiliese o le Atua; ia lotomauualalo i latou; ia tatalo i aso uma; ia le faatiga le tasi i le tasi; ia aoao atu i a latou fanau ina ia alofa le tasi i le tasi; ia aveina atu a latou mea i e matitiva; ma ia mama i mafauauga, upu, ma amioga. A o faia e le nuu o le Tupu o Peniamina ia mea, sa faapei i latou o le Faaola. E mafai ona avea i tatou e pei o lo tatou Faaola pe afai tatou te faia ia lava mea.

Ua ta'u mai e Alema ia i tatou e faapea, a tatou ola e pei o le Faaola, o le a tatou maua "ona foliga i o tatou foliga vaaia" (tagai i le Alema 5:14, 19). O le uiga o lenei mea, i se tasi itu, o le a faatumuina i tatou i le alofa o le Atua ma lagona ai le alofa mo isi. O lona uiga tatou te mananao ina ia tausia a tatou feagaiga ma le Alii ma ia agavaa e tauaveina lona suafa.

Faiiuga

A o tatou suesueina tusitusiga paia, tatalo ma anapogi, fetagofi atu i le faamanatuga, mulimuli i perofeta soifua, alofa ma auauna atu i le Alii, ma ola ai e pei o Keriso, o le a mafai loa ona tatou iloa le Faaola ma tatou foliga ai e pei o ia. I lea la faiga o le a tatou atinae ai i tatou lava i ona luga e avea ma o tatou faavae mautu.

Ua folafola mai ia i tatou afai e faavaeina o tatou olaga i luga o le papa o Keriso o le a le mafai ona tatou pa'u'u. O le uiga o lea mea o se olaga e faavae ia Iesu Keriso—le faavae mautu—o le a tumau lea e faavavau. O lona uiga e faapea a avea e faapei o le Alii, o le a mafai ai e i tatou ona ola faatasi ma ia ma lo tatou Tama Faalelagi, ma maua ai mea uma ua ia i laua mo i tatou.

Ua folafola mai e le Faaola ia i tatou, “O le foi na te talia a'u ua talia lo'u Tama; o le foi na te talia lo'u Tama ua talia le malo o lo'u Tama; o lea o le a tuuina atu ai ia te ia mea uma o i ai i lo'u Tama” (MFF 84:37–38).

Ia faamatala atu lau molimau ia Iesu i le avea ai ma ou Togiola ma Faaola. Afai e lava le taimi, ia valaaulia isi uso o loo umia le perisitua e tuuina atu a latou molimau.

Ia tuuina atu i se tasi o le vasega e toe faitau mai le mea na oo i ai le soifuaga o Elder Ballard o loo i le faatomuaga o le lesona.

Lu'i

1. Ia faia e oe lava, o se tasi e umia le perisitua, se tautinoga ina ia iloa le Faaola ma avea faapei o ia.
2. Ia filifili se uiga lelei o le Faaola e te manao ina ia faaleleia atili ai lou olaga. Ia amata nei ona faaatoatoaina lea tulaga.

Sauniuniga a le Faaoga

A o lei tuuina atu lenei lesona—

1. Iloilo ia Mataupu Faavae o le Talalelei, mataupu 3, “Iesu Keriso, lo Tatou Taitai ma lo Tatou Faaola Filifilia,” ma le mataupu 11, “O le Soifuaga o Keriso.”
2. Ia saunia se siata faapenei, “O le Ala e Atiae Ai i Luga o Keriso, le Faavae Mautu,” po o le sauni foi e tusi iluga o le laupapa le faamatalaga.

O le Ala e Atiae Ai i Luga o Keriso, le Faavae Mautu

Suesue i tusitusiga paia
Tatalo ma anapogi
'Ai i le faamanatuga
Mulimuli i le perofeta soifua
Alofa ma auaua i le Alii
Ola e pei o Keriso

3. Ia saunia e tuuina atu lau molimau ia Iesu i le avea ai ma ou Togiola ma Faaola.
4. Ia vave tofi se tasi o le vasega e tuuina atu se tautalaga e tolu i le lima minute e uiga i le mea na tau atu e le Tupu o Peniamina i lona nuu o loo i le Mosaea e 4 ma o le a se uiga faaalua o tagata i lenei savali i le Mosaea e 5. (O itu e tataua ona faaalua i le lipoti o loo maua i le lesona i lalo o le ulutala “Ola e Pei o Keriso”).
5. Fai atu i tagata o le vasega e faitau pe faamatala mai tala ma mau o loo i lenei lesona.

Saolotoga— O se Meaalofa Mai le Atua

Lesona 28

O lenei lesona o loo faamoemoe ina ia fesoasoani ia i tatou ia malamalama lelei i le manatu autu o le saolotoga ma ia aoao mai ia i tatou le taua o le faia o filifiliga sa’o.

Faatomuaga

O lakopo le uso o Nifae, na ia taua i le Tusi a Mamona e faapea, “O lenei, ia outou loto tetele, ma ia manatua ua tuusaoloto lava outou, ina ia filifili e outou le ala o le oti e faavavau, po o le ala o le ola e faavavau” (2 Nifae 10:23).

O le a le mea na te tuuina mai ia i tatou le mana e fai ai filifiliga? Aisea, mo se faataitaiga, na tatou fuafua ai ina ia tatou papatiso? Po o le, aisea ua mafai ai ona tatou filifili po o a lavalava tatou te oofu ai, aoga e aoga ai, po o se galuega e galue ai?

O le tali i ai ua uma ona tuuina mai ia i tatou se meaalofa mai le Atua e taua o le saolotoga. O lenei meaalofa o se mana lea e fai ai filifiliga. O se filifiliga taua tatou te faia, o se filifiliga lea e mafai ona faia e ala i le togiola a le Faaola, e aafia ai le ola e faavavau. E le faamalosia e le Faaola i tatou e talia lana talalelei; peitai afai tatou te filifili e mulimuli ia te ia, o le a ia faamanuiaina i tatou ma aoaoina i tatou i le ala e faaoga ai le saolotoga e avea ai e pei o le Atua.

Saolotoga—o se Tulafono e Faavavau

O le saolotoga o se tulafono e faavavau. Sa faapea mai Peresitene Polika laga, i lana tautalaga e uiga i le saolotoga o le tagata e faapea:

“O se tulafono lenei sa i ai mai le vavau, ma o le a faaauau pea e oo atu i le faavavau faavavau lava. O tagata ola uma ua i ai le atamai ua tataua ona ia te ia le pule e filifili ai” (*Discourses of Brigham Young*, p. 62).

Ia faitau leotele mai e se tagata o le vasega le Mose 4:1–4.

O anafea na tupu ai lenei mea? O le a le mea na tupu?

Ae tatou te lei o mai i le lalolagi, sa tatou auai i se fono faalelagi. O se tasi o mataupu taua na i o tatou luma i lea fono na aafia ai le mataupu e faavavau o le saolotoga. O Lusifelo, po o Satani, na mana o ia e faia le finagalo o le Tama, lea o le a faatagaina ai i tatou ina ia tatou filifili mo i tatou lava.

“O lenei saolotoga e fai ai filifiliga,” na saunoa ai Peresitene Uilifoti Uutilafu, “sa tumau pea ona avea ma tofi o le tagata i lalo o le pulega

ma le malo o le Atua. Na ia umia lea aia tatau e faia ai le filifiliga i le lagi a o lei faia le lalolagi, ma na faatumauina ma puipuia e le Alii mai soo se fouvalega a Lusifelo ma i latou na aufaatasi ma ia. . . . Ona o lenei la saolotoga e filifili ai, ua avea ai oe ma a'u ma tagata sili ona faatuatua i tagata uma, faamoemoeina mo le galuega o loo tatou faia, o olaga tatou te ola ai, ma mea tatou te faia” (*Discourses of Wilford Woodruff*, pp. 8–9).

O le Faaogaina o lo Tatou Saolotoga

E i ai mea tatou te manaomia ina ia mafai ai ona tatou faaogaina lo tatou filifiliga saoloto i lenei olaga. Muamua, e tatau ona *iloa le lelei ma le leaga*; lona lua, e tatau ona i ai so tatou *saolotoga e fai ai filifiliga*; ma lona tolu, a maea ona faataunuaina lo tatou saolotoga, e tatau ona iai ni *taunuuga* e mulimuli mai ai i a tatou filifiliga.

A o talanoaina vaega taitasi, ia tusia i luga o le laupapa; *la Iloa le Lelei ma le Leaga, Saolotoga e Fai ai Filifiliga, Taunuuga o le Faiga o Filifiliga*.

ILOA LE LELEI MA LE LEAGA

Ina ia faamasinoina i tatou ma le tonu e lo tatou Faaoia, e tatau ona tatou malamalama i mea o loo tatou faia i lo tatou iloaina lea o le eseesea i le va o le lelei ma le leaga ma taunuuga o a tatou galuega. Afai o se tagata e laititi le malamalama foi i nei eseesea, e le mafai ona faamasinoina o ia i le auala lava e tasi e faamasinoina ai i latou e malamalama i nei eseesea.

Ona o lenei la mafuaaga, o lea e le mafai ai ona noatia i tatou e le Alii mo ni a tatou filifiliga seia vagana ua valu tausaga lo tatou matutua. O le taimi lena o le a amata ai ona faamasinoina i tatou (tagai i le MFF 68:25–27). O le uiga o lea mea, a mavae loa le atoaga o loo tatou valu tausaga, o le a faamasinoina loa i tatou i mea uma tatou te faia—se i vagana ai ua faaletonu o tatou mafaufau ma e le mafai ai ona noatia i tatou mo a tatou amioga na faia.

Na faamatala mai e Mamona e faapea; “Ua malolo tamaiti, aua ua latou le mafai ona faia agasala. . . .E le mafai e tamaiti ona salamo; o lenei, o se matua leaga lava le faafiti ia te i latou le alofa mama o le Atua, aua ua ola i latou uma ia te ia ona o lona alofa” (Moronae 8: 8, 19).

Na faamatala mai foi e Mamona e faapea o tagata ia “e le o i ai se tulafono” ua “ola ia Keriso” (Moronae 8:22). O lona uiga o lea mea o tagata e le i aoaoina i ai le talalelei po o latou foi e le mafai ona malamalama e le o faamoemoeina i latou e ola ai. O le a le faamasinoina i latou seia vagana ua aoaoina atu ia i latou le talalelei pe sei vagana foi ua latou malamalama i ai.

SAOLOTOGA E FAI AI FILIFILIGA

O le saolotoga e fai ai filifiliga e faatoa i ai lea pe afai o loo i ai se filifiliga e ao ina faia. Afai ua ia i tatou le saolotoga e fai ai filifiliga ae

leai se mea e fai ia i sea filifiliga, ua le o ia i tatou se saolotoga e fai ai sea filifiliga. I se isi faaupuga, e le mafai ona tatou filifili seia vagana ua tuuina mai se filifiliga i o tatou luga. Ua tatou saoloto e fai le filifiliga i le va o le lelei ma le leaga. Mo se faataitaiga, ua faatagaina e le Atua ia Satani na te tetee atu i le lelei. A tatou mulimuli atu i faaosoosoga a Satani, ona faatapulaaina lea o a tatou filifiliga. O taimi taitasi uma tatou te filifilia ai le leaga, ua tatou le maua loa se saolotoga. O le saolotoga e faatoa faaopoopoina pe a tatou filifilia mea sa'o ma le tonu.

Faaali atu le fesoasoani vaaia 28-a, "Matautia—Faasa Taelega."

Ia tuu atu i le tagata o le vasega na tofia e tuu atu le tala e uiga i le faailoga "Matautia—Faasa Taelega" (tagai i "Sauniuniga a le Faaiaoga").

Na silafia lelei e le Alii o le a faatosinaina i tatou i le lelei ma le leaga pe a faia a tatou filifiliga. O le leai o se filifiliga e faia, o le leai foi lea o se saolotoga e fai ai filifiliga. O le mea lea, ua tuuina mai ia i tatou e le Alii ni mataupu faavae, tulafono ma poloaiga e mulimuli ai, ae faaosoosoina i tatou e Satani ina ia aua ne'i usiusitai iai.

Ua fetalai mai le Alii, "Ia e alofa atu i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa" (Mareko 12:30). Ua faapea mai Satani i ni upu ootoo, "E alofa e a i le Atua? Aisea e le faagalo ai ia te ia?" Atonu pe na faapea mai foi Satani e leai se Atua!

Ua fetalai mai le Alii, "Ia e manatua le aso Sapatu e te faapaiaina" (Esoto 20:8). E faapea mai Satani, "Faaaoga le Sapatu e avea ma aso tafao. O le a se taua o iai i le auai atu i sauniga lotu ae le faigaluega i lenai aso?"

Ua fetalai mai le Alii, "Ia e ava i lou tama ma lou tina" (Esoto 20:12). E tuu e Satani le manatu i o tatou mafaufau ina ia aua nei o tatou usiusitai i o tatou matua: "E te pule lava oe ia i lou olaga ma e filifili e oe mea e te manao oe i ai. Ave uma lava mea e tuuina atu e ou matua. E le o toe umi ae matutua i laua, ona tausia lea o i laua e se isi tagata" (adapted from Carl W. Buehner, "Who's on the Lord's Side," *Improvement Era*, June 1961, p. 402).

Sa tusia e Peresitene Spencer W. Kimball se tusi i se alii talavou o ia lea sa tauivi ma se faaiuga e uiga i mea tau lotu. Sa manao Peresitene Kimball ina ia mautinoa ua malamalama lelei lenai alii talavou i ana filifiliga. Na ia tusia faapea:

"Le pele loane:

"O lou tetee ma au finauga e faasaga i mea moni o le talalelei ua ou matua faanoanoa ai lava.

"Ou te iloa ou te le mafai ona faatalitonuina oe mai le mea o loo e talitonu i ai. . . . Ou te le faia lea tulaga, ma pe tusa lava foi pe ou te faia, o le a ou faamalosi ai ou manatu, aua o le filifiliga saoloto o



le tulafono faavae lea a le Atua ma o tagata taitoatasi uma e tatau ona ia i latou le tiutetauave mo le faia o lana lava tali; ae o le mea moni ua taitoatasi i tatou ma faia lana galuega i le faatosinaina o tagata mo le lelei o i latou ia e ono moomia le fesoasoani” (“Absolute Truth,” *Ensign*, Sept. 1978, p. 3).

TAUNUUGA O LE FAIA O FILIFILIGA

E tatau ona tatou malamalama e ui lava ina ua ia i tatou le saolotoga e fai ai le filifiliga, peitai ua leai so tatou saolotoga tatou te filifili ai le taunuuga o a tatou galuega. O taunuuga lelei e mulimuli mai i filifiliga sa’o; o taunuuga leaga e mulimuli mai i filifiliga sese. O le faaiuga lava o le faaaogaina o lo tatou saolotoga tatou te iloa lea i le taunuuga o a tatou filifiliga. O le perofeta o Samuelu i le Tusi a Mamona na ia faailoa mai faapea:

“Ua tuuina atu e ia [le Atua] ia te outou, ina ia outou iloa le lelei ma le leaga; ua tuuina atu foi e ia ia te outou ia outou filifili le ola po o le oti. E mafai foi e outou ona amio lelei, ia toefuataiina ai outou i le lelei, pe toe tuuina atu le lelei ia te outou. E mafai foi e outou ona amioleaga, ia toe tuuina atu ia te outou le leaga” (Helamana 14:31).

O lenei mataupu faavae o le saolotoga e pei lava o le tulafono o le seleselega: O le mea lava tatou te lulu, o le mea foi lena tatou te seleseleina (tagai i le Kalatia 6:7–8). E ola ai le faifaatoaga e tusa ai ma lana tulafono. O le ituaiga o fatu na te filifilia e toto o le a maua ai le tonu o le fua o le ia seleseleina. Afai na te totoina le fua o le saito, o le a na seleseleina le saito, ae le o le sana. E faapena foi ona le mafai ona ia filifili e faatalale i mea ua ia totoina ae selesele ai e ia ni fua lelei.

O le olaga, e pei lava foi o le faatoaga, o iuga po o taunuuga e noatia faatasi lea i se faiga tuusao ma filifiliga e faia. A tatou faia se filifiliga, e tatau ona tatou talia le iuga o lea filifiliga. I nisi taimi, o le a le mafai ona tatou iloa taunuuga atoatoa o a tatou filifiliga seia vagana ai ua faamasinoina i tatou e le Atua. Ae peitai i le tele o taimi, e aafia i tatou i le taimi lava e fai ai a tatou filifiliga. Mo se faataitaiga, i le avea o i tatou ma tagata o le Ekalesia, ua tuuina mai ia i tatou le meaalofa o le Agaga Paia ina ua uma o tatou papatisoga. O le atoatoaga o faamanuiaga i le avea ai o le Agaga Paia ma a tatou soa e le mafai ona iloaitoina seiloga e maea lo tatou toetutu, ae afai tatou te filifili e le ususitai i le Agaga Paia ma faia le agasala, ona tatou le maua foi lea o lona aafiaga i o tatou olaga. O le taunuuga ilbagofie o lo tatou filifili lea e fai le mea sese o le tatou le toe maua lea o se faamafanafanaga, malamalama, alofa, ma le taitaiga e masani ona tuuina mai e le Agaga Paia pe a tatou faia le mea sa’o.

Afai e solia e se alii talavou le Upu o le Poto, o a ni taunuuga o lana mea ua fai? (Ua le o toe agavaa o ia i le siitiaina o lona perisitua. Ua aluese le Agaga. Ua le toe agavaa o ia e ave se misiona. O le a mafai ona faananau atu o ia i mea o le a ono afaina ai lona tino.)

Afai o le a toilalo se tama i le aoaoina atu o le talalelei i lana fanau, o a la ni ona taunuuga? (O le a faaitiitia le alofa i totonu o le aiga. Atonu o le a faigata i tamaiti ona latou iloa le lelei mai le leaga. Atonu na te le toe mauaina lana fanau. O le alualu i luma o tamaiti ua tutaia.)

E tusa lava pe vave oo mai pe faatoa oo mai i le lumanai ia taunuuga, o le a atagia lava i o tatou olaga le auala na tatou faaaogaina ai o tatou saolotoga. O le faamanuiaga o le faia o filifiliga sa'o e le tatau ai ona tatou atuatuvaile i taunuuga e oo vave mai po o taunuuga e oo mai i le lumanai. O le savali lena o le viiga "Fai Mea Tonu."

Usu le viiga "Fai Mea Tonu" (*Viiga*, nu. 148.)

E Faamasinoina i Tatou mo a Tatou Filifiliga

Na saunoa mai Peresitene Iosefa F. Samita e faapea: "Ua tuuina mai e le Atua i tagata uma le saolotoga ma ua tuuina mai ai faatasi ma le avanoa tatou te auauna atu ai ia te ia pe leai foi. . . . Ae o le a ia faamasinoina i tatou mo le faaaogaina o lenei saolotoga, ma e pei ona tuuina atu foi ia Kaino, o le a faapea foi ona fesiligia ai i tatou: "Pe afai e te amio lelei e te le maua ea le fiafia? Ae afai e te le amio lelei, o loo taoto mai i le faitotoa le agasala' (Kenese 4:7)." (*Gospel Doctrine*, p. 49).

Na faamatala atu e Liae le saolotoga i lona atalii o Iakopo: "O lea ua saoloto ai tagata . . . e filifili le saolotoga ma le ola faavavau talu le Puluva sili o tagata uma, pe filifili le faatoilaloina ma le oti, e tusa ma le faatoilaloina ma le mana o le tiapolo" (2 Nifae 2:27).

O le a oo mai le aso o le a taitoatasi ai i tatou ma laulaututu i luma o le Atua ina ia faamasinoina. O iina o le a tatou tuuina atu ai se faamatalaga o mea na tatou vaavaaia ma leoleoina atoa ma filifiliga na tatou faia. Ona faamasino mai lea o le Atua ia i tatou. O ana faamasinoga o le a le gata ina amiotonu ae tumu i le alofa, e faavae i lona alofa ma tulafono o le lagi. Fai mai Alema:

"E tatau foi i le amiotonu a le Atua ona ia faamasinoina tagata e tusa ma a latou galuega, afai foi ua lelei a latou galuega i lenei olaga, ma ua lelei manaoga o o latou loto, e tatau ona toe tuuina atu i latou i mea lelei i le aso gataaga.

"Ae afai ua leaga a latou galuega, e toe tuuina atu ai e fai ma leaga ia te i latou" (Alema 41:3–4).

E saoloto i tatou e fai galuega, ae peitai o le a faamasinoina i tatou mo a tatou gaoioiga; ma o a tatou gaoioiga o le taunuuga lena o a tatou filifiliga. O lea e taua tele ai lo tatou faia o filifiliga sa'o. E mafai ona tatou faia lea mea i lo tatou mulimuli lea i faataitaiga na faia e Iesu Keriso ma ana auauna amiotonu. E mafai ona tatou aoaoina se lesona sili, mo se faataitaiga, mai le olaga o Iosefa i le Feagaiga Tuai.

Ina ua uma ona aumaia o Iosefa i Aikupito, sa avea o ia ma auauna a Potifara, o se alii ofisa a Farao ma o le kapeteni o le au faafeao. Na faamanuiaina Iosefa aua sa filifili o ia e mulimuli i le Alii. Na iloa e

Potifara o mea uma na faia e Iosefa sa lelei, o lea na ia tuuina atu ai ia Iosefa le galuega ma tiutetauave uma sa ia te ia. Ona o le alofa o le Alii ia Iosefa, o lea na ia faamanuiaina ai ma faatamaoigaina ai le aiga ma fanua o Potifara.

Ae ui i lea, a o faagasolo lea taimi, sa amata ona tuinanau le ava a Potifara ia Iosefa. O lagona o le tamaitai mo Iosefa sa tupu pea seia oo i le tasi aso ma faaosoosoina ai Iosefa ia la mulilulua ma ia.

Na iloa e Iosefa tulafono a le Atua e tusa ai ma le mulilua? O a ni filifiliga sa ia Iosefa? O le a le mea na ia filifili e fai?

Fai atu i se tagata o le vasega e faitau mai le Kenese 39:7–12.

A o faafeagai ai ma lenei faaosoosoga, sa manatunatu Iosefa i le faatuatuga tele ua tuuina atu e Potifara ia te ia; a o le itu sili ona taua, sa manatunatu o ia i le Alii ma lana folafolaga ina ia usitai ia te ia. Na iloa e Iosefa o le a mulimuli ane ona faamasinoina lea o ia e le Atua. O lenei iloa na tuuina atu ai ia te ia le malosi e tetea atu ai i le toalua o Potifara. Na tonu ia te ia e usitai i le Atua.

O taumafaiga a le toalua o Potifara ina ia faaosooso ia Iosefa sa lei faamutaina ina ua teena o ia e Iosefa. Sa faaosooso o ia ia te ia i lea aso ma lea aso, ae sa tumau pea ona ia tetea ia te ia. Mulimuli ane, ona o lona ita tele i le faataunuaina o lona manao, sa tuuaiina ai loa e ia Iosefa i le agasala lea sa nofosala ai o ia. O le taunuuga ua tuuina atu Iosefa i le falepuipui.

“Ae peitai sa faatasi le Alii ma Iosefa” aua sa filifili o ia e usiuitai. Mulimuli ane, ua faasaoloto Iosefa mai le falepuipui ma ua avea ma pule ia Aikupito atoa. (Tagai i le Kenese 39–41.)

O le a le mea na manatuaina e Iosefa ina ua faaosoosoina o ia? E mafai faapefea ona avea le faaitaiga a Iosefa e avea ma se fesoasoani ia i tatou i lo tatou faaogaina sao o lo tatou saolotoga?

Faaiuga

Na faaalua e Peresitene Tavita O. Makei e faapea:

“O le tasi mea e sosoo ma le tuuina mai o le ola lava ia, o le aia tatau lea e faatonuonuina ai o tatou olaga, o le meaalofo aupito sili lea a le Atua i le tagata. O le saolotoga e filifili ai, ia sili atu ona faapelepele i ai i lo soo se tasi lava meatotino e mafai ona tuuina mai e lenei lalolagi. O lea mea ua teuina i totonu o le agaga o le tagata. O se meaalofo faalelagi mo tagata ola uma taitoatasi. . . . Ua tuuina mai i le tagata se meaalofo faapitoa ua le tuuina atu i soo se tasi lava o meaola. Ua tuuina atu e le Atua ia te ia le mana e fai ai le filifiliga. Ua na o le tagata ola lava ua fetalai atu i ai le na faia mea uma, “faitalia oe ma lau filifiliga i ai, aua ua tuuina atu ia te oe” (Mose 3:17). A aunoa ma lenei mana mai le lagi e fai ai le filifiliga, e le mafai e tagata ola ona agai i luma” (“Man’s Free Agency,” *Improvement Era*, Dec. 1965, p. 1073).

E tatau ona ia i tatou le saolotoga e fai ai le filifiliga ina ia agai i luma. Ae peitai e tatau ona faaaogaina ma le sa'o lo tatou saolotoga, ona o le a faamasinoina i tatou e le Atua mo filifiliga ua tatou faia. E ao ina tatou filifili ma le poto. Ina ia faia lea tulaga, e tatau ona saili ma le usiustai i lo tatou Tama Faalelagi. E tatau foi ona tatou talanoa atu ia te ia i le tatalo, faalogo i Ana perofeta, ma ia tatau ai mo le taitaiga a le Agaga Paia.

Lu'i

Ia e manatunatu i le tele o filifiliga e te faia i aso taitasi. Manatu mo sina taimi i faaiuga aupito sili ona taua ua e faia ma o latou taunuuga. Filifili se vaega o lou olaga ua e manao e faaleleia atili. Fai ni faaiuga o le a maua ai ni taunuuga e te manaomia.

Mau Faapoopo

2 Nifae 2:11 (faafeagai o mea uma)

2 Nifae 2:27 (saolotoga e filifili ai le saolotoga ma le ola e faavavau po o le faapologaina ma le oti)

MFF 58:26–29 (e le o poloaiina i mea uma)

MFF 101:78 (faamasinoina mo agasala)

Sauniuniga a le Faiaoga

A o lei tuuina atu le lesona—

1. Ia toe iloilo le *Mataupu Faavae o le Faatuatua*, mataupu 4, “Saolotoga e Filifili ai.”
2. Ia vave fesili atu i se tagata o le vasega e sauni na te tuuina mai le tala ua taua i lalo: “A tatou mulimuli i faaososoga a Satani ona faatapulaaina lea o a tatou filifiliga. O faataitaiga ua tuuina atu i lalo ua faaalii ai le itu lenei. Manatu e faapea ua e faia se faailoga i luga o le matafaga e faitauina faapenei: [“Matautia—Faasa Taelega.”] Atonu tatou te manatu o se tapu lea mea. Ae e sa'o? O loo tele lava ni filifiliga e mafai ona tatou faia. Ua tatou saoloto foi e taele i se isi mea. Ua tatou saoloto e savalivali i le matafaga ma ao mai ni atigi figota. Ua tatou saoloto e matamata i le goto ifo o le la. Ua tatou saoloto foi e le amanaiaina le lapataiga ma taele i le vaega matautia. Ae afai loa e [lapataiina i tatou e le faailoga] ma le amanaiaina ona tosoina ifo lea o i tatou i lalo i le vai, ona itiiti loa lea o le tatou filifiliga e fai. E mafai ona tatou taumafai e sosola, po o le mafai ona tatou valaau mo se fesoasoani, ae e ono mafai ona tatou malelemo” (*Gospel Principles*, p. 23.)
3. Ia saunia e usu le “Fai Mea Tonu.” (*Viiga*, nu. 148).
4. Fai atu i tagata o le vasega e faitau pe tuuina mai tala ma mau o loo i totonu o lenei lesona.

Tausia o le Aso Sapati ia Paia

Lesona 29

O le faamoemoega o lenei lesona ina ia aoaoina i tatou e tausia le aso Sapati ia paia.

Faatomuaga

I totonu o le Lunaite Setete i le faagasologa o le 1930, e toatele naua ni tagata sa le maua ni galuega. O le taimi lea o le tele o faafitauli. E toatasi le tagata na umia le perisitua i totonu o le Aai o Sate Leki na maua se galuega i le malo. E sili atu ona lelei le totogi nai lo le tele o isi galuega, ma ua folafola foi i ai le tulaga puipuia. Ae tasi lava le faafitauli sa i ai: o le galuega fou lea e manaomia ai o ia ina ia galue i le Aso Sa. Ae peitai, na te manaomia foi le tupe e tausai ai lona aiga.

Na ia iloa lelei e le masani ona toatamai le Alii pe a galulue tagata i le Aso Sa, ona ia tatalo lea i le Alii ina ia malie mai i lana galuega i le Aso Sapati. Peitai sa tuuina atu ia te ia e le Alii se faalogona faapea, i le itu lava ia te ia, e le tatau ona ia faigaluega i le Aso Sa. Sa talanoa o ia ma lona toalua e uiga i lenei mataupu. Na tofu lagona e i laua o le a tatau ona ta'u atu e ia i lona pule e le mafai ona faigaluega i le Aso Sa. Ina ua faia e ia lea itu, sa lapataiina o ia e le pule o le a na le toe maua le galuega.

O le a se mea e te faia pe ana faapea o oe o le tamaloa lenei?

Ina ua musu lenei tagata e umia le perisitua e faigaluega i le Aso Sa, sa le toe maua loa e ia lana galuega. Ae ui i lea, i se taimi e lei umi mulimuli ane, sa maua ai se tasi galuega e le manaomia ai ona faigaluega i le Aso Sa.

O le Tulaga Paia o le Sapati

I le amataga, e ono ni aso na faaaluina e le Alii e foafoa ai lenei lalolagi, ae o le aso fitu, na malolo ai o ia (tagai i le Kenese 2:2–3). Na ia faaigoaina lenei aso o le Sapati. Na ia faatuina se faaitaiga, e faaalua ai e tatau ona tatou faamamaluina le Sapati e ala i lo tatou malolo mai galuega uma. Mai le amataga, sa tumau pea ona faamoemoe le Atua o le a tuuina atu ia te ia e lana fanau se aso e tasi mai aso e fitu.

A o lei oo i le taimi o Keriso, sa faamamaluina le Sapati i le aso lona fitu o le vaiaso. Ae peitai, ina ua uma le toetu o Keriso, sa suia le Sapati i le uluai aso o le vaiaso (tagai i le Galuega 20:7). Sa taua lea aso o le Aso o le Alii (tagai i le Faaaliga 1:10) e faamamalu ai lona toetu i lea aso (tagai i le Ioane 20:1). O le mea lea, o Keriso o le Alii o le Sapati

(tagai i le Mareko 2:27–28). I le i ai o ia i lea tulaga, ua ia poloaiina ai i tatou ina ia tausī le Sapati “i lo’u aso paia” (tagai i le MFF 59:9–13).

I le taimi o Mose, sa faamamafaina ai e le Alii le taua o le tausī i le Sapati ma o lea na aofia ai le Sapati i totonu o Tulafono e Sefulu.

Faitau le Esoto 20:8–11.

Na faailoa atu e le Alii i le fanauga a Isaraelu e faapea o le Sapati o se mea e matua taua tele ma e faapea o lo latou usiusitai i le faamamaluina o le Sapati o se faailoga lea o lo latou faamaoni ia te ia (tagai i le Esoto 31:12–17).

Sa faamamaluina le Sapati e pei ona faatonuina ai e le Alii i totonu o nei tusitusiga paia faapea ma isi seia oo mai i le taimi o lesu Keriso. I le gasologa o nei senituri, e toatele ni taitai faalelotu e lei musuia na latou tuuina ni tapu se tele i mea e le mafai e se tagata ona faia i le Aso Sapati. Mo se faataitaiga, sa latou aaoaina e faapea, e le mafai ona tutuina se afi pe tape foi i le Sapati. E na o le tasi le lima e mafai ai e se tasi ona tatalaina se nonoa. E tusa ma le tasi le maila le faatapulaa o le mamao e mafai ona savali ai se tasi. O ni ivi e gaugau o le a le mafai ona toe faatulaga pe faafoi i le tulaga na i ai sei vagana ua tuanai le Sapati.

Sa tulaga faigata tele i tagata ona usiusitai i lenei anoano o tulafono, ma ona o lea itu ua latou faagaloina ai le aano moni o le Sapati. E ese ai mai le avea o se aso o faamanuiaga ma le olioli, ae ua avea le Sapati ma avega mamafatu.

O a ni auala ua faagaloina ai e tagata i ona po nei le aano moni o le Sapati?

Na faamatalaina e Peresitene George Albert Smith le uiga moni e tatau ona tatou i ai i le faafeagai ai ma le Sapati: “[O le Alii] ua na tuuese se aso e tasi mai totonu o aso e fitu, e le ina ia avea lea ma avega mamafatu, ae peitai ia aumaia ai le olioli i o tatou olaga ma ia avea o tatou aiga ma nofoaga e faapotopoto faatasi i ai le aiga, . . . e faateleina ai le alofa o le tasi i le isi” (*Improvement Era*, Jan. 1949, p. 9).

E mafai faapefea ona avea le Sapati ma se fiafiaga i o tatou olaga?

Ua faailoa mai e le Alii ua na faapaiaina le Sapati ma ua na faamamaluina. I lenei aso o le a tatau ona tatou malolo ai mai avega, popolega, ma galuega. O se aso e mafai ona tatou faafetai atu ai i le Alii mo le tele o ana faamanuiaga o le soifua maloloina, malosī, faamafanafanaga, ma le olioli faaleagaga. O le Sapati o se aso lea e faalatalata atu ai i lo tatou Tama Faalelagi e ala i le suesue, tatalo, auai i sauniga ma fonotaga lea tatou te tapuai atu ai ia te ia ma taumamafa i le faamanatuga.

Tausia o le Aso Sapati ia Paia

Ua tuuina mai e le Au Peresitene Sili o le Ekalesia ia i tatou ni faatonuga maoti e uiga i a tatou gaoioiga e faia i le aso Sapati.

“O le Sapati e le o se tasi lea o aso e na ona tatou malolo ai mai a tatou galuega, pe ua avanoa e faia ai mea tatou te mafaufau e fai. O se aso e paia, le Aso o le Alii, e ao ina faaogaina e avea ma aso e tapuai ma faamanu atu ai i le Alii” (*Church News*, 11 July 1959, p. 3). E le tele ni tulafono ua tuuina mai ia i tatou e le Alii e uiga i le Sapati; ua na ona ia tuuina mai ni faatonuga e taitaiina ai i tatou i le tausaiina o le aso Sapati ina ia paia.

Faitau le Mataupu Faavae ma Feagaiga 59:9–13. Aisea ua talosaga mai ai le Alii ia i tatou ina ia tatou tausia le aso Sapati ina ia paia? (Ina ia tausia ai i tatou ia le pona mai le lalolagi.)

O le a le uiga o le “ia tausia oe ia le pona mai le lalolagi?”

O le a se mea e tatau ona tatou faia ina ia tausia ai le paia o le aso Sapati? (E mafai ona tatou o atu i le fale tatalo, malolo mai a tatou galuega, avatu au taulaga ma au faamanatuga, ta'uta'u atu au agasala, saunia a tatou mea taumafa ma le lotogatasi, tatalo ma anapogi.)

O le a le uiga o le loto faamaoni? (O le uiga o le loto faamaoni, o le vilivilitai, lotomau, alofa moni, tapuai.)

Ua faaalua manino mai e le Alii e faapea afai tatou te tausia le aso Sapati ia paia, e tatau ona tatou faaogaina le aso e tapuai ai ma faia mea lelei.

O a taulaga?

O taulaga o meaalofa ia i le Alii. E aofia ai le sefuluai ma taulaga. O le Sapati o le aso lea e talafeagai ai ona tuuina atu nei taulaga i le Alii.

O le a le uiga o le “loto e tasi”?

O le loto e tasi o lona uiga ia tasi le faamoemoe. O le saunia o meaai ma le loto e tasi o lona uiga o le saunia lea o taumafa ma le alofa o le Alii ma lana fanau i o tatou loto.

E faaopopo atu i faatonuga ua tuuina mai ia i tatou i totonu o tusitusiga paia ma o tatou perofeta soifua, e mafai ona tatou iloa iinei pe faapefea ona tausia le Sapati ma faamamaluina e ala i le suesue i le soifua o le Faola. I se tasi aso Sapati, mo se faataitaiga, a o afio ane lesu i totonu o se sunako e aoao ai, na la fetai ma se tagata ua gase lona lima. O tusiupu ma Faresaio, ua latou talitonu o le faamaloloina o lea tagata o le a solia ai le Sapati, o lea na latou faapotopoto ane ai i tafatafa o le Faola ma vaavaai po o le a le mea o le a ia faia.

Ina ua silafia e lesu le mea o loo i o latou mafaufau, sa fesili atu ai le Alii ia i latou, “E sa ea i aso sapati ona faia ai ni galuega lelei, po o le faia o galuega leaga? e faaolaina se ola, po o le fasiotia?” Ua silasila atu o ia ia i latou, ona ia fetalai atu lea i le tagata, “Faaloloa i luga ou lima.” Sa faapea ona faia e le tagata, ma ua faamaloloina atoa ai lona lima. (Tagai i le Luka 6:6–10.)

O le isi aso Sapati na fesili ai lesu: “O ai so outou ua i ai se asini po o se povi, ua pa’u i le lua, ua le sisi a’e loa i luga i le aso Sapati?”

(Luka 14:5–6). I lea la tulaga, ua aoao mai ai Iesu, e i ai isi galuega e tatau ona tatou faia i le Sapati. Na saunoa mai faapea Peresitene Spencer W. Kimball:

“E moni e i ai nisi tagata e tatau ona faigaluega i le Sapati. Ma, o le mea moni, e i ai nisi galuega e matuai moni lona talafeagai ai—mo se faaitaiga, o le tausiga o e mamai—e mafai ona auuuna atu lea galuega i le faamamaluina o le Sapati. Ae peitai, o ia ituaiga galuega, o le mea sili ona taua o o tatou lagona.

“A fialia alii ma tamaiti e galulue i le Sapati ina ia faateleina ai lo latou tamaoaiga, ua latou solia poloaiga; aua o le tupe e maua i le Aso Sapati, afai e le tatau ai le galuega, e le o se tupe mama na tupe” (“The Sabbath—A Delight,” *Ensign*, Jan. 1978, p. 5).

E pei ona faailoa mai e Peresitene Kimball, e i ai lava taimi e le mafai ai ona tatou alofia le faigaluega i le Aso Sa. Peitai afai tatou te galulue ai, e tatau ona tausua le Agaga o le Sapati i o tatou loto. O le tausua o le Sapati ia paia e faailoa atu ai lo tatou alofa mo le Alii. E faaailoa atu ai lo tatou faafetai mo lona agalelei mo i tatou. A tatou feagai ai ma se faaiuga e faia se galuega lea e ono mafai pe le mafai ona talafeagai ma le Sapati, e mafai ona tatou fesili ifo ia i tatou lava i fesili nei e tolu:

- Ua faia ai ea se mea lelei?
- E siitia ai le tulaga faaleagaga?
- Faamata e faia e Iesu?

“E masani ona lagona e matua faapea, o mea ia e avea ai le Aso Sa ma se aso lelei mo a latou fanau, ua avea ai foi lena ma aso lelei mo i latou. [O se tasi] tama . . . na faapea mai, ‘O le Aso Sa ou te faaalaina ai se taimi tele ma la’u fanau i lo se isi lava aso. O Aso Toonai e tele nua a’u galuega e faia i tafatafa o le fale . . . ma e le masani ona naunau mai i ai tamaiti. Ae o le Aso Sa, ma te faitauina atu ai ma lo’u toalua ni tala se tele ma usu atu ni pese se tele mo i latou. Matou te savalivali i o matou tuaoi. Ma te faalogo ao latou faamatalaina mai ia i maua ni tala. . . . E fialia tele tamaiti i le Aso Sa aua e tele mea latou te maua mai ia i maua—ma te fialia foi i le Aso Sa aua e tele ni mea ma te tuuina atu mo i latou. . . .’

“ ‘Matou te le faatagaina ni mea mai fafo e faatosina ese ai i matou mai isi,’ fai mai ai se tasi tina, e atagia mai ai tulafono a le tele o aiga. ‘Soo se mea lava matou te faia i le Aso Sa, matou te faia faatasi. . . .Matou te asiasi i o matou aiga—matou te o faatasi o se aiga. Matou te faia ni [fonotaga] faapitoa mo a matou fanau ma ia mautinoa o loo faaautu le polokalama mo le faamalieina o tausaga uma. Ua avea nei o se masani i a matou fanau le le taliaina o se tusi valaau mai a latou uo e faia ai nisi mea e ono mafai ona aveeseina ai i latou mai lo matou aiga

i le Aso Sa' ” (Orson Scott Card, “Making Sunday the Best Day of the Week,” *Ensign*, Jan. 1978, p. 9).

E toatele ni tagata latou te faamamaluina le Sapati:

- O le toatele o faifaatoaga latou te selesele ma faatau atu fua o a latou faatoaga i aso e ono na tuuina atu i le tagata e galue ai. E le gata ina latou faia mea e tatau ai mo lona aso paia ae ua faapea foi ona latou usitai i le poloaiga a le Alii ina ia tapuai atu ia te ia.
- O le toatele o tagata fai lafu povi latou te momoli a latou manu i aso o le vaiaso ma faauma le faapotopotoina o a latou lafumanu i le po o le Aso Toonai ina ia mafai ai ona latou auai i sauniga i le Aso Sa.
- O tagata o loo pulea faleaiga o loo faamanuiaina e tapunia o latou faitotoa i le Sapati ae faaalu le aso e faatonutonu ai galuega po o feau a le Ekalesia.
- O tagata e ona faleoloa e faatau atu ai meaaai e tapuni o latou faleoloa i le Aso Sa ae o loo tatalaina pea isi faleoloa.
- O tagata e pulea pamu penisini e tapuni i Aso Sa ae o loo mafai pea ona maua tupe faasili i aso e ono mo galuega.
- O pule o faleoloa e fai vaega e tapuni o latou faitotoa i le Aso Sa ae faaalu lenei aso e tapuai ai i le Alii.
- O e pulea faletalavai latou te le faatauina atu ni oloa i le Aso Sa. E na o tulaga faanatinati latou te faatinoina ai le talaina atu o vai.
- O tamaiti aoga e suesueina a latou meaaoga i aso o le vaiaso.
- O pule o falegaosimea e tapunia o latou falegaosi i le Sapati.
- O tagata tuli manu e na o aso o le vaiaso e tutuli ai; e maua foi e le au faifaiva se taimi i aso e ono e fagogota ai.
- E fono faatasi aiga ma alu a latou tafaoga i isi aso o le vaiaso, ae le o le Sapati. E toatele nisi e le faia ni a latou pati po o ni tafaoga i le Aso Sa.

O le faia o nei mea e mafai ona avea ma se osigataulaga. Ae peitai, e toetoe lava o pisinisi, galuega, ma isi fuafuaga uma, o loo i ai ni tagata faamaoni, faamanuiaina, o e latou te osigataulaga ma mauaina le olioli i le ususitai i le poloaiga a le Alii o le tausua o lona aso ia paia.

Faitau le Levitiko 23:2.

Faaiuga

Ua ta'u mai e le Alii ia i tatou ina i aua ne'i o tatou faatalale i mea paia. O se tasi o mea aupito sili ona paia ua tuuina mai e le Alii ia i tatou o lona aso paia lea. Fai mai Elder Ezra Taft Benson: “O le aano moni o le Sapati e mo le faamalosiā o le ola faaleagaga, mo se faafouga o a tatou feagaiga, mo tapuaiga, mo se malologa, mo le tatalo. O lona faamoemoe o le fafagaina lea faaleagaga, ina ia mafai ona tatou tausii

ia i tatou ia le pona mai le lalolagi e ala i lo tatou usiusitai atu i poloaiga a le Atua” (“Keeping the Sabbath Day Holy,” *Ensign*, May 1971, p. 6).

Lu’i

Ia saili atu ina ia faateleina le itu faaleagaga o le Sapati. Ia faia lea itu e ala i le faapotopotoina o lou aiga ia i ou tafatafa ma talanoaina amioga a lou aiga i le Sapati. Taumafai e saili se ala e aupito sili ona lelei e tausi ai le aso Sapati ia paia. Faamanatu atu i tagata o le aiga ina ia fesili ifo ia i latou fesili e tolu e fuafua ai pe talafeagai a latou gaioioiga pe leai:

- Ua faia ai ea se mea lelei?
- E siitia ai le tulaga faaleagaga?
- Faamata e faia e Iesu?

Mau Faopoopo

Neemia 13:15–21 (faiga o fefaatauaiga i le Sapati)

Isaia 58:13–14 (ia aua nei sailia ni mea e faamalieina ai i le Sapati)

Levitiko 19:30 (poloaga ina ia tausia le Sapati ia paia)

Sauniuniga a le Faiaoga

A o lei tuuina atu lenei lesona—

1. Ia toe iloilo le *Mataupu Faavae o le Talalelei*, mataupu 24, “O le Aso Sapati.”
2. Fai atu i tagata o le vasega e faitau pe faamatala mai tala ma mau o loo i lenei lesona.

Ua fuafuaina lenei lesona ina ia fesoasoani ai ia i tatou ina ia tatou ola i le tulafono o le sefuluai ma ia loto foai i a tatou taulaga.

Faatomuaga

Tusi le fesili lenei i luga o le laupapa: “Pe faoa ea e le tagata mea a le Atua?”

Ua tele fesili taua o loo i tusitusiga paia ua fesiligia ai i tatou. Mo se faataitaiga, ina ua asiasi atu Keriso i le konitineti o Amerika ina ua mavae lona toetu, sa ia fesili atu ai i Sa Nifae se fesili na tuuina mai muamua e Malaki, o se perofeta o le Feagaiga Tuai: “Pe faoa ea e le tagata mea a le Atua?” (3 Nifae 24:8; Malaki 3:8).

E faapefea ona faoa mea a le Atua?

Faitau le 3 Nifae 24:8.

O le Tulafono o le Sefuluai

O le tulafono o le sefuluai o se poloaiga lea mai le Alii. E ala mai i lenei poloaiga, ua tatou maua ai se avanoa e toe faafoi atu ai ia te ia se vaega o mea uma na ia foai mai ia i tatou. E ala foi i lea poloaiga, ua mafai foi ona tatou atinae lona malo ma faaalua lo tatou faatuatua ia te ia.

E masani ona fesiligia soo le fesili lea, “O le a se sefuluai e totogi atoa ma le faamaoni?” O le sefuluai o le tasi vaesefulu lea o a tatou mea ua faaopoopoina (tagai i le MFF 119). O le uiga o lenei mea o lo tatou tuuina atu lea o le tasi vaesefulu o a tatou tupe maua; po o le, afai o le faaopoopoga e i lafu, fagaga, po o faatoaga foi ae le o tupe, tatou te tuuina atu le tasi vaesefulu o na mea. (Tagai i le *Mataupu Faavae o le Talalelei*, i. 197–98.)

Tatou te totogi le sefuluai e ala lea i le tuuina atu i le sui o le Alii, le epikopo po o le peresitene o le paranesi. Ona ia auina atu lea o nei tupe i le laumua o le Ekalesia, lea o loo tausia ai le talafaamaumau o a tatou sefuluai ma isi lava foai.

E faatasi i le tausaga ona manaomia tagata taitoatasi ina ia faia se faatalanoaga faapitoa ma le epikopo po o le peresitene o le paranesi. I lea la taimi, na te iloiloaina ai na o ia a tatou talafaamaumau o le sefuluai faatasi ma i tatou ma fesili mai pe faamata ua tatou totogiina se sefuluai atoa mo le tausaga. O le fonotaga lenei e taua o le “faatalanoaga o le sefuluai.”

E taua tele i le Alii le totogiina o le sefuluai ona e le mafai ona tatou maua se pepa faataga e ulu atu ai i le malumalu sei vagana ai ua tatou

totogiina atoa le sefuluai. O le isi itu, o alii talavou ma alii e tatau ona avea o tagata togoti atoa a latou sefuluai a o lei siitia o latou perisitua. O Elder Matthew Cowley, o se tasi sa avea muamua ma se uso o le Korama a le Toasefululua, sa na faamatalaina se tala e uiga i se tuafafine Maori lelei sa nofo i totonu o se nuu maotua o Niu Sila, o ia lea na maua le agaga moni o le togoti o le sefuluai:

“I se tasi la aso e pei ona ou masani ai, pe a ou asiasi i nuu e latalata i lea nuu, na ou alu ai ou te vaai i lenei tamaitai lelei, o le taimi lena pe tusa ua valusefulu ona tausaga, ma ua tauaso foi. E lei nofo o ia i totonu o se paranesi maopoopo, e leai foi sana fesoootaiga ma le au perisitua sei vagana ai ua asiasi atu i lea nofoaga alii faifeautalai. . . .

“Ou te taunuu atu o loo i tua lenei tamaitai e latalata i le ta’inafi. Sa tuu atu lo’u lima ma faatalofa ma ia, ma a o o’u sauni e olo lo’u isu i lona isu [o se tu faaMaori] ae faapea mai o ia, ‘Aua e te faatalofa mai ia te au. . . .

“Ona tulai lea o ia i ona lima ma ona tulivae ma ua fetolofai solo i totonu o lona tamai fale. I le tulimanu o lona tamai fale sa i ai se suo. Sa sii e ia le suo ma toe totolo atu agai i le isi itu, ma fuafua le mamao na alu atu ai o ia. Sa taunuu o ia i le mea na faailoga ma amata loa ona eli. . . . E lei pine ae tau [lana suo] i se mea malo. Sa tago ma avae i fafo. . . . o se fagu fualaau aina. Sa ia tatalaina lena fagu fualaau aina ma tago atu i totonu, ma aumai ai se mea ma tuu mai ia te au, ma e foliga mai o ni tupe Niu Sila. E tusa lona aofaiga ma le selau tala Amerika.

“Sa ia faapea mai, ‘O la’u sefuluai lenei. O lea ua mafai nei ona ma faatalofa ma le perisitua a le Atua.’

“Sa ou faapea atu, ‘E le faapena le tele o sau sefuluai e lei togotiina.’

“Sa faapea mai o ia, ‘Ou te iloa. Ou te iloa ou te le o nofo aitalafu ai nei, ae o lea ua ou vave togotiina atu se vaega faaopoopo o la’u sefuluai, ona ou te le iloa po o fea se aso e toe ui mai ai iinei le perisitua a le Atua’

“Ona ou punou atu lea ma olo atu lo’u isu ma lo’u muaulu i lona isu ma lona muaulu, ma sa maligi ifo o’u loimata ma tafe atu i ona alafau” (in Conference Report, Oc. 1948, pp. 159–60).

E mafai faapefea ona faaalua lo tatou alofa mo le Alii i le togotiina o le sefuluai? E faapefea ona faailoa ai lo tatou faatuatua?

Taulaga

E mafai ona tatou tuuina atu nisi tupe e ese mai le sefuluai e fesoasoani ai i le fausia o le malo o le Alii. O nei foai e taua o taulaga. O lo tatou epikopo, peresitene o le paranesi, po o le taitai vaega o le a na faamatala mai ia i tatou avanoa e togoti ai taulaga. O le a ia

faailoa mai ai i tatou le taimi e tatau ai ona totagi a tatou taulaga anapogi; o le a ia tau mai foi ia i tatou le taimi tatou te totagi ai tupe mo se falelotu fou; o le a ia ta'u mai foi le taimi e manaomia ai tupe mo le uelefea; ma o le a ia ta'u mai foi ia i tatou pe fia ni tupe o loo manaomia mo tupe faaalu a le tatou uarota po o le paranesi.

O le tala lenei mai ia Elder Boyd K. Packer e fesoasoani ia i tatou ia tatou malamalama ai i le taua o le totagiina o sefuluai ma taulaga:

I ni nai tausaga talu ai, e toalua ni alii faifeautalai na lipoti atu i le peresitene o le latou paranesi e faapea o se aiga sa laua aoaoina ua faafuaseia lava ona le mananao ina ia papatisoina. Ua iloa e le tama se mea e uiga i le sefuluai ma ua faaleaogaina ai isi feiloaiga na fuafuaina ma faifeautalai.

“Ina ua mavae ni nai aso na sosoo ai,” sa faamatalaina e Elder Packer, “na faatauanaoina e le peresitene o le paranesi ia faifeautalai ina ia latou malaga faatasi ma ia i se isi ana asiasiga i le aiga.

“‘Ua ou malamalama,’ na ia ta'u atu i ai i le tama, ‘ua outou fuafua tou te le auai i le Ekalesia.’

“‘E sa'o,’ o lana tali lea.

“‘Fai mai faifeautalai ia te a'u ua e le malie i le sefuluai.’

“‘Ioe,’ o le tala lea a le tama. ‘La te le'i tauina mai ia te au lena mea. Ae ina ua ou iloa, sa ou fai atu loa i ai, “Ua tele naua lena mea. E le masani ai la matou lotu ona manaomia ni mea faapena. Ua matou manatu ua fai si tele o lena mea, ma o le a matou le auai.”’

“‘Na laua faamatala atu ia te oe e uiga i taulaga anapogi?’ na ia fesili atu ai.

“‘E leai,’ o le tali lea a le tamaloa. ‘O le a lena mea?’

“‘I totonu o le Ekalesia, matou te anapogi mo ni taumafataga se lua i masina taitasi ma tuuina atu le tau o na taumafataga e fesoasoani ai i tagata matitiva.’

“‘La te lei tauina mai lava ia i matou lena mea,’ o le tala lea a le tamaloa.

“‘La te lei taua tupe mo fale?’

“‘Leai, o le a lena mea?’

“‘I totonu o le Ekalesia matou te lafo tupe mo le fausia o falelotu. Afai e te auai i le Ekalesia, atonu o le a e manao e te auai i le faatinoina o galuega ma le foaiina mai foi o tupe. O le taimi nei o loo matou fausiaina ai se falelotu iinei,’ sa ia faamatalaina atu ai i le tamaloa.

“‘E fou lena mea,’ sa ia fai mai ai, ‘la te lei tauina mai lava ia te au lena mea.’

“‘Na laua faamatalaina atu ia te oe le polokalama o le uelefea?’

“ ‘E leai,’ o le tali lea a le tama, ‘O le a lena mea?’

“ ‘Ua lelei, matou te talitonu i le fesoasoani o le tasi i le tasi. Afai e iai se tasi o loo moomia le fesoasoani pe ma’i pe ua leai foi se galuega pe ua mafatia foi, ona matou faapotopoto lea e fesoasoani atu i ai, ma o le a faamoemoe foi oe e te fesoasoani atu i ai.’

“ ‘Na laua faamatalaina atu ia te oe e leai ni a matou faifeau e totogiina?’ O i matou uma lava e tuuina atu o matou taimi, o a matou taleni, o mea matou te maua, ma femalagaiga—e fesoasoani uma ai lava i le galuega. Ae le totogiina i matou i ni tupe.’

“ ‘La te lei tauina mai lava ia i matou se mea e tasi o na mea,’ o le tala lea a le tama.

“ ‘Ua lelei,’ o le tala lea a le peresitene, ‘afai ua outou liliuese ona o se mea itiiti e pei o le sefuluai, ua manino mai ai tou te lei sauni mo lenei Ekalesia. Atonu ua outou faia se faaiuga sao ma e le tatau ona outou auai.’

“A o latou tuumuli ese atu, na toe tomanatu, ma ia faliu atu ma faapea atu, ‘Ua e manatu ea e mafua aisea ona faia e tagata nei mea uma ma le loto fiafia? Ou te lei maua lava se lisiti o le sefuluai. E leai lava se tasi ua sau e ao atu le sefuluai. Ae peitai matou te totogiina lava—ma isi mea uma lava—ma o lo matou manatu o se faamanuiaga tele lava lea.

“ ‘Afai la e te mauaina le mafuaaga pe aisea, o le a mafai la ona e latalata i le penina tautele. . . .

“ ‘Ae ui i lea,’ o le tala lea a le peresitene o le paranesi, ‘o *lau* lava faaiuga. E na ona ou faamoemoe lava o le a e tatalo e uiga i ai.’

“Ina ua mavae ni nai aso, sa toe oo atu lenei tamaloa i le fale o le peresitene o le paranesi. . . . Ua manao o ia e fuafua le papatisoga o lona aiga” (*Ensign*, Nov. 1974, p. 88).

O le a le mea na mafua ai ona manao lenei tamaloa e auai i le Ekalesia? Ia lisi i luga o le laupapa le tele o taulaga ua taua i totonu o le tala. (Taulaga anapogi, tupe o fale, uelefea.)

E mafai foi ona tatou tuuina atu tupe i le faaputuga tupe a faifeautalai ma le paketi a le uarota po o le paranesi. O tupe o le paketi e faaaogaina i mea e pei o le tausiga o falelotu, mea taumafa ma gaoioiga a le uarota po o le paranesi, mea e fai ai aoaoga, ma tusi pese.

Ia faaopoopo “tupe mo faifeautalai” ma “tupe o le paketi” i le lisi o loo i le laupapa.

Faaogaina o Sefuluai ma Taulaga

O sefuluai ma taulaga tatou te tuuina atu i le Ekalesia e faaaogaina i le galuega a le Alii. O le tupe lenei e faaoga e taitai o le perisitua i auala ia ua uma ona atofaina e le Alii. O nei tupe foai e fesoasoani lea e toe aumaia ai o tatou uso ma tuafafine i lo tatou Tama Faalelagi.

Aisea e manaomia ai tupe ina ia faatinoina ai le galuega a le Alii?

O nisi o auala o loo faaaogaina ai a tatou sefuluai ma taulaga—

1. E fesoasoani i le polokalama a faifeautalai.
2. E fesoasoani ai e fausia ma tausia falelotu, malumalu, ma isi lava fale o le Ekalesia.
3. E fesoasoani i le aoaoina o tupulaga talavou i aoga a le lotu, seminale, ma aoaoga faalelotu.
4. E fesoasoani i le lomía ma le tufatufaina o tusi lesona.
5. E fesoasoani i le faalauteleina o gafa ma galuega mo e maliliu.
6. E fesoasoani ia i latou o loo matitiva o e le mafai ona fesoasoani ia i latou lava.
7. E fesoasoani i tupe alu i konafesi aoao.

Faamanuiaga o le Totogiina o le Sefuluai ma Taulaga

Aisea ua avea ai ma avanoa faapitoa le tuuina atu o sefuluai ma taulaga i le Alii?

O le taimi e totogi ai a tatou sefuluai ma taulaga, e tatau ona faia ma le loto i ai. Ua tau mai e tusitusiga paia e faapea ia tuuina atu “aia ma le tiga, aua foi ma le faatauanauiina; aua e alofa le Atua i le ua foi ma le loto malie” (2 Korinito 9:7), ma afai e faia e le tagata “ma le muimui . . . e tauia ia te ia e peiseai ua taofia e ia le meaalofo” (Moronaē 7:8).

Sa i ai se mea na tupu ia Peresitene Marion G. Romney o le a fesoasoani ai ia i tatou e malamalama ai i lenei mau:

“Pe tusa o se kuata senituri ua tuanai, sa ma see atu ai ma Sister Romney i totonu o se uarota lea faatoa amata lava ona latou fausia se falelotu. O le tele o le tupe foi e manatu le epikopo e tatau ona ou faia sa ou matua lagona ai lava le mamafa. Ou te manatu a itiiti mai ua faaluaina le mea e masani ai ona ou faia. Ae ui i lea . . . sa ou faapea atu, ‘Ua lelei, o le a ou totogiina, Epikopo, ae o le a ou totogiina [auauai] ona e le o lava sa’u tupe o i ai.’ Ma o lea na amata ai loa ona ou totogiina. Ma sa ou totogi ma totogi seia oo lava ina ua toe tolu totogina o loo totoe, ae, ina ua ou faitauina le Tusi a Mamona e pei o la’u masani, sa ou tau ane ai i se mau e faapea: ‘ . . . afai e tuuina atu e se tagata se meaalofo ma le muimui; e tauia ai ia te ia e peiseai ua taofia e ia le meaalofo, o lea e tauleagaina ai o ia i luma o le Atua’ (Moronaē 7:8).

“Ua matuai faateia lava au i lea mea ona ua uma ona ou totogiina pe tusa o le afe tala. Ae ui i lea, sa faaauau pea ona ou totogi le vaega o totoe na ou folafolaina ou te totogiina, ma ua iu ai ina ou totogiina le tupe e sili atu. . . . ina ia silafia ai e le Alii ua ou faia lea tulaga ma se uiga lelei” (*Relief Society Magazine*, Feb. 1968, pp. 84–85).

Ua folafola mai e le Alii afai tatou te tuuina atu sefuluai ma le loto i ai atoa ma taulaga o le a ia faamanuia ia i tatou.

Faitau le 3 Nifae 24:10–12.

O le a le mea ua folafola mai e le Alii pe a totogiina a tatou sefuluai?

Na faamatalaina e Peresitene Iosefa F. Samita le tala lenei e uiga i faamanuiaga e oo mai ona o le totogiina o le sefuluai:

“Ou te manatua ma le manino lelei se mea na tupu i aso a o ou ititi. O lo’u tina o se tasi ua maliu lana tane, ae o se aiga e toatele e ao ona tausia. I se tasi taimi pe a matou o atu e tatala le mea na tuu ai a matou pateta, e masani ona la’u e i matou o lana fanau tama se uta o pateta sili ona lelei ma avatu i le ofisa o le sefuluai; o le vaitaimi lea ua matuai utiuti ai lava le pateta. O le taimi lea o loo o’u laititi ai lava, ma o a’u ou te taitai i le vaega lea. Sa matou agai atu i luga i sitepu o le ofisa e totogi ai le sefuluai, ma sauni e la’u i lalo a matou pateta, ae savali mai fafo se tasi o failautusi ma faapea mai i lo’u tina, ‘Le faletua o Samita, o se mea lava e faanoanoa ai ona ua manaomia oe e totogi le sefuluai.’ . . . Na ia otegiaina lo’u tina i le totogiina o lana sefuluai, ma tauvalaau atu soo se upu ia te ia ma lapatai; ma fai mai e i ai isi e malolosi ma mafai ona galulue ae o loo lagolagoina e le ofisa o le sefuluai. Sa faliu atu lo’u tina ia te ia ma faapea atu i ai: ‘. . . E tatau ona e maasiasi ia te oe lava ia. E mafai ea ona e taofia mai se faamanuiaga mo a’u? Afai ou te le totogiina la’u sefuluai, ona ou lagona lea o le a taofia e le Alii lana faamanuiaga mai ia te a’u. Ou te totogiina la’u sefuluai, e le gata o se tulafono a le Atua, ae ou te faamoemoeina foi se faamanuiaga e ala i lo’u faia. O le tausia la o lea tulafono ma isi tulafono, ua i ai lo’u faamoemoe ou te tamaoaiga ai, ma mafai ai ona ou maua ni mea e tausii ai lo’u aiga.’ . . . Na faamanuiaina o ia ona sa ia usitai i tulafono a le Atua. Sa lava ma totoe mea na ia maua e tausii ai lona aiga. E lei faapea e i ai se mea na matou manaomia e pei o isi. . . . O lea tamaitai ua maliu lana tane sa maua e ia avanoa uma o le fale o le Atua. E leai se sauniga o le talalelei e mafai ona teenaina o ia, aua sa ia usiusitai i tulafono a le Atua” (*Gospel Doctrine*, pp. 228–29).

Aisea na faatonuina ai e Sister Smith lana fanau tama ina ia ave pateta lelei mo le sefuluai?

Na faapefea ona fesoasoani lenei mea na tupu ina ia malamalama ai tama i le taua o le sefuluai?

O a faamanuiaga na mauaina e Sister Smith i le totogiina o le sefuluai?

O se taitai o le Ekalesia na ia faamatalaina e uiga i nei faamanuiaga tatou te mauaina mai le totogiina o sefuluai ma taulaga:

“E tausii e le Alii ana folafolaga. Na te tatalaina moni lava faamalama o le lagi ma sasaa ifo ana faamanuiaga i luga o i latou ia e faamaoni ma usiusitai i ana poloaiga. . . . O nei faamanuiaga e mafai ona tino mai i tupe po o ni mea faalelalolagi nei po o le mafai foi ona maua i se itu faaleagaga, lea e maua ai le malosi, filemu, ma le faamafanafanaga” (Henry D. Taylor, *Ensign*, May 1974, p. 108).

Faaiuga

Ua tuuina mai e le Alii ia i tatou tulafono o le sefuluai atoa ma le poloaiga e totogi a tatou taulaga. A tatou faia lea itu, ua tatou atinae le malo o le Atua. Ua tatou fesoasoani e aumaia le fiafia i tagata e toatele i lenei lalolagi, ma fesoasoani atu ia i latou ua maliliu ina ia latou maua ni faamanuiaga o le talalelei.

A tatou usiusitai i nei tulafono, ua tatou faaali atu lo tatou alofa mo lo tatou Tama o i le Lagi, ma lona Alo o Iesu Keriso, ma o tatou uso ma tuafafine. Ua tatou faaalua foi lo tatou faatuatua i le Atua. I le isi itu, tatou te maua ai faamanuiaga faaletino ma le faaleagaga e sili atu lona taua i lo tupe tatou te tuuina atu.

Lu'i

1. Afai e te lei faia lea tulaga muamua, ia e faia loa se tautinoga o le a e totogiina se sefuluai atoa ma auai atu i se faatalanoaga o le sefuluai i lenei tausaga.
2. Ia iloiloia ma le faaeteete au taulaga i le Ekalesia. Afai e te lagona e tatau ona e faia se saofaga e sili atu, ia faia loa lava. Ia fuafua e faia mea uma e te mafaia i lea auala ina ia faalauteleina ai le galuega a le Alii.
3. Aoao i lou aiga faamanuiaga o le totogiina o le sefuluai ma taulaga. Fesoasoani atu ia i latou ina ia usiusitai i nei tulafono.

Mau Faopoopo

Kenese 14:19–20 (sa totogi e Aperaamo ana sefuluai)

2 Nofoaiga a Tupu 31:5–6 (sa totogi e tagata Isaraelu le sefuluai)

Neemia 10:37–38 (sa totogi e le fanauga a Isaraelu le sefuluai)

Alema 13:13–16 (sa totogi e Aperaamo le sefuluai)

MFF 64:23 (afai e totogi le sefuluai o le a le susunuina)

Sauniuniga a le Faiaoga

A o lei tuuina atu lenei lesona—

1. Tusi le fesili “Pe faoa ea e le tagata mea a le Atua?” i luga o le laupapa,
2. Ia toe iloilo *Mataupu Faavae o le Talalelei*, mataupu 32, “Sefuluai ma Taulaga.”
3. Fai atu i tagata o le vasega e faitau pe faamatala mai tala ma mau o loo i lenei lesona.

O le faamoemoega o lenei lesona ia aoaoina i tatou i le taua o le faamaoni.

Faatomuaga

Na tusia e Elder Howard W. Hunter se tala e uiga i se alii talavou o ia lea na aoaoina se lesona taua tele: “Ou te manatua le alii talavou lea . . . na malaga taamilo ma se vaega o tagata o ē na manatu o se mea lelei le faia oni mea e le tatau ona faia. I nisi taimi, na aafia ai o ia i ni nai solitulafono laiti. O se tasi aso na ou maua ai se feau mai le ofisa o leoleo ma ta’u mai ai ia te a’u e faapea ua taofia o ia ona o se solitulafono i ala tetele. Ua maua o ia o avetaavale saosasaoa. . . . Ina ua na iloa le mea na ia faia o le a ono mafai ona taofia ai o ia mai le alu atu i se misiona, o lea na toe faasa’osa’o ai lona olaga, ma ina ua 19 ona tausaga, na maua ai loa lona valaauga.

“O le a le galo ia te au le ma talanoaga ina ua foi mai o ia. Fai mai a ia, a o i ai o ia i le galuega faafaifeautalāi sa masani lava ona mafaufau i le faalavelave na ia faia ona o le talitonuga sese e faapea o le solia o ni mea iti e le taua. Ae peitai, ua oo mai le suiga tele i lona olaga. Ua ia iloa nei e leai se fiafia e maua i le solia o le tulafono, e tusa lava po o le tulafono a le Atua po o tulafono a le malo ua tuuina mai ia i tatou . . .

“Sa matuai faagaetiaina lava au i le tele o le suiga ua i ai nei lea alii talavou a o auauna atu o ia i le misiona ma suesue i faiga faavae o le soifuaga nei. Paga le faigata ona o se auala faigata na ia aoaoina mai ai lenei lesona, ae ui i lea, o se matuai faamanuiaga lava na oo mai pe a mautinoa lelei e le mafai ona solitulafono se tasi ma fiafia pea i lana amio” (“Basic Concepts of Honesty,” *New Era*, Feb. 1978, pp. 4–5).

Pe ua tatou le faamaoni ea i le solia o tulafono o le laueleele? Aisea?

Tusi i luga o le laupapa: *Matou te talitonu i le faamaoni.*

O se tasi o Mataupu Faavae o le Faatuatua na tusia e le Perofeta o Iosefa Samita e faapea,

“Matou te talitonu i le faamaoni, mea moni, . . . amiolelei, ma le faia o galuega lelei i tagata uma lava” (Mataupu Faavae o le Faatuatua 13). I totonu o lenei mataupu ma le tele o isi tusitusiga paia, ua poloaiina ai i tatou e le Alii ina ia tatou faamaoni i o tatou olaga ma a tatou feutagaiga ma isi tagata.

O le a le uiga ia faamaoni?

O le faamaoni o le faia lea o le mea tatou te iloa e sa'o. O lona uiga ia tumu i mea sa'o. Afai tatou te faia ni folafolaga, e tatau ona tatou tausia. Afai e i ai sa tatou aitalafu, e tatau ona tologi. O le faamaoni o le tautala i le mea moni ma amio sa'o. O lona uiga tatou te le pepelo, e le gaoi, e le solia foi tulafono o le eleele. O lona uiga tatou te le taufaasese i soo se auala.

O le Tauga o le Faamaoni

O le faamaoni o se mea tatau lea pe afai tatou te ola i le talalelei a lesu Keriso. O se tagata e le ola i le upu moni pe a aoao i ai, ua le faamaoni o ia ia te ia lava po o le Atua foi. O le faamaoni ia te ia lava, e tatau ona ia mulimuli atu i ona lagona amiotonu. O le faamaoni i le Alii, e tatau ona ia tausia feagaiga ua uma ona ia osia. E tatau ona tatou faamaoni ina ia avea le Agaga Paia ma a tatou paaga.

O le faamaoni ia i tatou lava ma le Atua o lona uiga e tatau foi ona tatou faamaoni ia i latou o e o loo siomia i tatou. Afai o le a tatou faia, o le a faamanuiaina i tatou e le Alii i lona Agaga ma o le a tatou maua ai le faatuatuaaina, faaaloaloga, ma le lotomau o i latou tatou te fegalegaleai. A aunoa ma le faamaoni i isi, e le mafai ona tatou auuana atu pe faalauteleina o tatou valaauga.

Mafaufau po o le a se mea e ao ona e faia i totonu o tulaga nei ua faaalua i lalo. Ua tuuina atu ni faaiuga ma'oti, ae e mafai ona sili atu ni faaiuga e talafeagai ai.

FAATAITAIGA 1

Na faamatalaina e Elder Leslie Stone le mea lenei:

"I se taimi e lei mamao atu, sa matou malaga ai ma Atamu, o le tama a le ma tama, i se malaga agai i Kalefonia. Pe tusa o le aoauli tonu lava na matou malolo ai mo le aiga o le aoauli. Ina ua sau le tamaitai e laulauina meaa i le pili, e lei alu tele lo'u mafaufau i lea tulaga, ma ina ua uma sa tuuina mai se sui o le tupe ia te au, na ou iloa ai e na o le lua sanuisi ua tologi ae tolu na aumai."

O le a se mea faamaoni e ao ona fai? Afai e tupu lenei mea ia te oe, e faapefea ona e aoao atu i lau fanau ina ia ola faamaoni?

Na faaaauu pea le faamatalaga e Elder Stone: "Ou te ioe o le a le atoa le tupe a le teine i le faaiuga o le aso, ma ua oo mai loa i lo'u mafaufau le manatu i le faiga na aoao mai ai e lo'u tama ia te au ina ia faamaoni. Ua ou manatu o le taimi tonu lenei e tatau ai ona ou tautala atu ia Atamu e uiga i le faamaoni, ma o lea na matou nonofo ai loa i lalo ma ou faamatalaina le mea ua tupu. Sa ou fai atu ia te ia o loo i ai se faafitauli ua tupu ia i matou.

"Sa ou fai atu ua tatau nei ona matou o ae tuu le sui o le tupe ma e leai lava se isi ua na iloa le eseese o le tupe, pe mafai foi ona ta'u i le teine o loo matou nofo aitalafu pea ia te ia i le sanuisi e tasi. E lei

faigata ona fai la matou faaiuga ae maua loa le tonu e faapea, afai matou te taofia le tupe lenei ae le o se matou tupe, o le mea e oo i ai o le a matou solia le poloaiga o le, 'Aua e te gaoi.' Na matou malilie o le a le fiafia lo matou Tama Faalelagi ia i matou ma o le a matou le fiafia foi aua o le a matou iloaina i o matou loto matou te lei faamaoni.

“Na ma o atu ma Atamu i le teine o loo tu mai i le laulau, ma sa ou faamatala ia te ia e faapea e le i atoa le totogi o a matou saunisi, ua matou nofo aitalafu ia te ia mo se tala e tasi. Na tei ona fofoga ma ua ia tu mo sina minute, ona ia faafetai mai lea ia i matou mo le ta'uina atu ia te ia o le mea sese. Sa faaaau la matou malaga ae ua manaia la matou faalogona, ma ou te talitonu foi ua malie le finagalo o lo tatou Tama Faalelagi i le mea na matou faia” (“la Faamaoni,” *Liahona*, Aokuso. 1975, p. 7).

FAATAITAIGA 2

O loo manatua e Elder Gordon B. Hinckley e faapea:

“I se taimi e lei leva talu ai nei sa matou tietie atu ai i se nofoaafi mai Osaka agai i Nagoya i Iapani. Sa faafeiloaia i matou i le nofoaga e taunuu i ai pasese, ma ona o le fiafia tele, o lea na galo ai i lo'u toalua lana ato tupe i luga o le nofoaafi.”

Ana faapea e te mauaina le ato tupe a Sister Hinckley, o le a se mea e mafai ona e faia?

Talu ai ona e talitonu Elder Hinckley e toatele tagata e faamaoni, o lea na ia “valaauina ai le nofoaga o nofoaafi i Tokyo e lipoti atu i ai. Ina ua taunuu le nofoaafi i lona taunuuga, ae ua mavae lena o ni itula se tolu mulimuli ane, na telefoni mai le vaega o nofoaafi e faapea o loo i ai pea le ato tupe. Ma te lei toe foi atu i Tokyo, ae pe tusa ma le masina talu ona tuanai le mea na tupu, ae faaoo atu loa le ato tupe ia i maua i le Aai o Sate Leki. O mea uma na i ai i totonu o le ato sa i ai lava ina ua toe faafoi atu” (“An Honest Man God's Noblest Work,” *New Era*, Oct. 1976, p. 47.)

O le a se mea ua faamoemoe mai le Alii tatou te faia pe a tatou mauaina se meatotino a se tasi?

Ua fetalai mai le Alii, “Afai e te toe maua le mea na le iloa a lou tuaoi, ia e saili ma le filiga seia e toe avatu ai ia te ia,” (MFF 136:26). Ua finagalo le Alii ina ia tatou matuai faamaoni lava. I le Alii lava ia, soo se mea lava e le atoatoa lona faamaoni o le le faamaoni lea; e leai se mea e ta'u o se afa faamaoni.

E mafai faapefea ona e iloa le mea e faamaoni ma le mea e le faamaoni?

Fai atu i se tagata o le vasega e faitau mai le Moronae 7:16–17.

O ai le puna o mea lelei? O ai le puna o mea leaga? O a taunuuga o uiga le faamaoni? (Amioleaga, o le le talitonu ia Keriso, teena o ia, ma le le auauna i le Atua.)

O a taunuuga o uiga faamaoni? (Amiolelei, talitonu ia Keriso, auauna i le Atua.)

Fai atu i tagata o le vasega e talanoaina tulaga nei. E tataua ona latou fuafua pe o le tagata o loo aafia ai e matuai faamaoni atoatoa.

-
1. E lei i ai lava se taimi e faapea ua solitulafono ai tama i luga o le aualatele. O ia o se avetaavale lelei. E masani lava ona vaai ma le faaeteete ma taumafai e usitai i tulafono uma o taavale feoi i aualatetele.
 2. A o faigaluega, e faaaogaina e loane faailoga tusi a le kamupani e lafo ai ana tusi i lona tina o loo ma'i (tagai i le MFF 42:54.)
 3. O Siaki ma Leo o se uo lelei tele. E fiafia lava i laua e faatagaina i laua taitoatasi ina ia nonoina mai se mea. A uma ona nonoina mai e le tasi se mea mai lona tuaoi, ona vave lava lea ona ia toe faafoi atu. (Tagai i le Mosaea 4:28; MFF 136:25.)
 4. O Mika Palauni o se tagata galue malosi. E mitamita tele o ia i lana galuega. I ona taimi paganoa, e fau ai e ia se tamai fale e teu ai mea i lona aiga mai mea faufale o lana galuega.

Faamaoni i le Aiga

O le toatele o i tatou e moomia ina ia aoaoina le faamaoni. O lona uiga o lenei mea, o i latou o loo umiaina le perisitua e le gata ina tauivi ina ia faamaoni, ae ia taumafai foi e aoao a latou fanau ina ia faamaoni. Fai mai Peresitene N. Eldon Tanner: "O lenei aoaoina o le faamaoni e amata i totonu o le aiga. Ua tofua i tatou taitoatasi ma mea totino faaletagata lava ia e le mafai ona aveeseina e aunoa ma le maliega a le e pule ai. O se tamaititi na te faia sea faamaoni i totonu o le aiga o le a le mafai ona ia solia le faiga faavae i fafo atu o le aiga. I le isi itu, o le le lava o ni aoaoga faapena e tupu ai le le faaaloalo i aia tatau ma mea totino a isi tagata" (*Ensign*, May 1978, p. 44).

O le a se mea e mafai ona tatou faia i o tatou aiga e aoaoina ia uunaiina ai le faamaoni?

Na saunoa mai Peresitene Polika laga i se tasi taimi: "Ia faamaoni. Oi talofa ia i latou o e folafola atu o i latou o le Au Paia e le faamaoni. O loto faamaoni e maua mai ai galuega faamaoni" (as quoted by Spencer W. Kimball in *Faith Precedes the Miracle*, p. 234).

A faatalanoaina i tatou ina ia talia pe siitia le perisitua, po o le mauaina o pepa faataga o le malumalu, o le a tuuina mai ai ia i tatou ni fesili e uiga i lo tatou agavaa. O nei faatalanoaga e maua ai e i tatou le avanoa ina ia tatou faamaoni atu i o tatou taitai o le perisitua ma ta'uta'u atu a tatou agasala. Afai tatou te faamaoni (ma o le faamaoni e moomia mo le salamo moni) o le a mafai ai ona faamagaloina a tatou agasala ma mauaina le mana e ala mai i lo tatou perisitua. O se tasi o fesili e tuuina mai pe a tatou mauaina se pepa faataga o le malumalu e faatatau lea i lo tatou faamaoni.

O se mea na tupu i se tasi tagata o le Ekalesia, na faamatalaina e Peresitene Ruben Dario Pacheco o Caracas i Venesuela, e faamatala mai ai le ituaiga faamaoni o loo faamoemoeina mai ia i tatou:

Na manao Peresitene Pacheo e ave lona aiga i le malumalu. Ina ua mavae ni galuega faigata se tele ma ni sauniuniga faaleagaga, sa faaputuina loa e ia ma lona aiga se tupe mo le faigamalaga umi. Sa auina atu e Peresitene Pacheo lona afafine i le faletupe e aumai se limaselau tala Amerika. Fai mai a ia, “Sa ave e lo’u toalua le teutusi ma teu i se mea e aunoa ma le faitauina o le tupe. O le po a o lumanai ai lo matou tuuvaese atu, sa ou fesili ai loa mo le tupe ma ou iloa ai ua matua mamafa lava le teutusi. Sa matou faitauina le tupe ma ua latou tuuina mai ia i matou le \$4,065. Sa ou matua te’i. . . .O loo faaalua mai i le lisiti a le faletupe se aofaiga e \$500 na faatauina mai—o lona uiga e \$3500 le tupe a le faletupe ua sese mai ia i matou!

“Sa taumafai nisi o a matou uo e le auai i le Ekalesia sa i ai i lo matou fale i lona po e faatauanau i matou e faaoga le tupe mo la matou malaga i le lunaite Setete. I lo’u lava faamaoni, ou te lei vaai muamua lava i ni tupe se tele faapea muamua i lo’u olaga. Ae peitai, sa ou fai atu ma lou leo malosi faapea, ‘E le mafai ona tatou taofia lenei tupe aua e le o sa tatou tupe. O le faamoemoega o la tatou malaga i le malumalu o le osia lea o feagaiga ma le Alii. O le a se lelei o ia feagaiga pe a tatou le faamaoni?

“Sa matou toe faafoiina atu le tupe i le faletupe; sa latou iloina ua leilola a latou tupe ae leai ni pepa o faamauiina ai e iloa ai le tagata na tuuina atu i ai le tupe. Fai mai nisi tagata o le faletupe ia te a’u, ‘Aisea ua e faia ai lona mea? E leai se tasi na te iloa o loo ia te oe le tupe.’ Na o le pau lava la’u tali: ‘Ona o a’u o le Mamona’ ” (quoted by Mario G. Echeverri, “Venezuela,” *Ensign*, Feb. 1977, p. 30).

Na faapefea ona faaalua e le aiga o Pacheo i a latou upu ma a latou mea na fai lo latou faamaoni? O ai na iloina lo latou faamaoni? Ona o le taimi muamua lea faatoa oo ai lea aiga i se mea faapea, o le a sou manatu i se faalogona o le aiga a o faamauiina i latou i totonu o le malumalu? Ia valaaulia i latou o loo umia le perisitua Mekisateko e fetufaai atu ni mea na tutupu ia i latou e lei mamao atu o ni faaitaiga o le faamaoni.

O Faamanuiaga o le Faamaoni

O taumafaiga ma galuega mamafa e manaomia e fai ai feutagaiga faamaoni ma isi, ma le Alii, ma i tatou lava. Ae afai tatou te faia, e matuai aoga lava ona tau. Mo se tasi o mafuaaga, ua tatou iloa le amio pulea—o se faiga lea e mafai ona fesoasoani ai ia i tatou ina ia faamanuiaina a tatou taumafaiga i soo se laasaga o lenei olaga. O mea ua taua i lalo o nisi o faamanuiaga e oo mai ia i tatou pe a tatou faamaoni:

TATOU TE ATINAEINA LE FAATUATUAINA

O le a faatuatua ina i tatou e isi tagata pe afai tatou te faamaoni ma faia mea tonu. O le a latou faalagolago mai ia i tatou ma o mai ia tatou mo se fesoasoani ma le taitaiga. Na faamatala e Peresitene Spencer W. Kimball e uiga i se tagata faapena:

“I se tasi o malaga i le Aai o Mekisiko, na talosagaina ai a’u e se tasi o peresitene o siteki ina ia ou faauuina se tasi o epikopo ua uma ona valaauina. Sa ou fiafia tele e faia lea galuega. Na o mai le Peresitene ma le epikopo fou faatoa valaauina i totonu o lo matou potu ma matou feiloai ma faamasani. E pei la ona ou manatuaina, o lenei tagata faatinoiti ae uiga ese sa faailoa mai ia te au o se tagatanuu moni lea o Initia Aztec. O lenei lava mea ua faafiafiaina atili ai a’u ona e i ai lava lo’u fiafia faapitoa i tagata Initia.

“Sa faailoa mai ia te au e uiga ia te ia ma lona aiga ma lana galuega. E foliga mai o loo faafaigaluegaina o ia e se tagata e matua tele lana pisinisi, ma o la tatou epikopo fou ua tuu atu i ai le faatuatuaga o le tausiga o tusi. Ua tonu i lea tagata e ana le pisinisi ina ia auina atu lona toalua i Europa i se malologa faaumiumi, ma ua ia oo ane i lenei uso ma tuu atu ia te ia le tiutetauave atoatoa ma ua tautino mai ua na o le pau lenei o le tagata faigaluega ua i ai lona faatuatuaga atoatoa e tuuina uma atu i ai ana faamatalaga o mea tau tupe.

“A o faaee atu o matou lima i le ulu o lenei alii talavou, na tumu lo’u loto i le fiafia ma sa ou faafetai atu i le Alii mo tagata o e ono mafai ona faatuatuaina, mo tagata e mafai ona latou musumusuina le loto talitonu ma le alofa” (in Conference Report, Mexico City Area Conference 1972, p. 32).

O lea le taua o le faatuatuaina e uo, tagata e faifaimea faatasi, ma i latou e ana galuega?

O le a se taua o le faatuatuaina e le Alii?

Afai tatou te faamaoni, ua tatou musumusuina atu le talitonuina ma le faatuatuaina o o tatou tagata ma le Alii. O le tala lenei, na faamatalaina e se tasi o atalii o Jacob Hamblin, e faailoa mai ai lea mea:

“O le aso na auina ai a’u e lo’u tama e faatau se solofanua i se alii sili o Initia Navajo. Ua na o au o se tagata laititi ma sa ou tietie i le solofanua, ma taitai atu le solofanua o le a faatau. Na sau le alii matua lenei ma sii ese au mai la’u solofanua. Na ou fai atu i ai o loo manao lo’u tama e faafesui ai le solofanua mo ni palanikeke. Na ia aumaia i fafo ni palanikeke se tele matagofie, ae, sa ta’u mai e lo’u tama ia te au ina ia ou mautinoa ua ou faia se fefaatauaiga talafeagai, ma sa lulu atu lo’u ulu ma fai atu i ai e toe aumai nisi palanikeke. Ona ia toe aumaia lea o nisi taaiga pa’u pafalo se lua ma nisi palanikeke se tele, ma ina ua ou manatu ua lelei tele a’u o lea na ou taaiina ai loa ma tuu i luga o la’u solofanua ma foi atu loa i le fale. Ina ua ou tuuina atu i lo’u tama ia palanikeke, sa tago o ia ma tatala, ma vaai iai, ona amata lea ona ia tuueseeseina. Sa ia tuuina le isi palanikeke i luga o le isi ma fai mai ia te a’u ou te toe oso i luga o le solofanua ma toe ave palanikeke nei ma ta’u i le alii sili ua tele naua palanikeke na ou aumaia. Ina ua ou toe foi, sa tago le alii sili ma ave palanikeke ma ata. Fai mai a ia, ‘Na ou iloa lelei o le a e toe foi mai; ou te iloa e le mafai e lakopo ona

tuuina ni palanikeke se tele faapena; e te iloa o lakopo o lo matou tama ma o lou tama foi' ” (told by Le Roi C. Snow in Preston Nibley, *Inspirational Talks for Youth*, p. 101).

TATOU FAAFIAFIA I LE ATUA

E le fiação le Atua pe a tatou le faamaoni. O i latou o loo umia le perisitua ua faapitoa lava ona le fiação ai o ia pe a le faamaoni i latou. E faapefea i se tagata le faamaoni po o se tama ona fai ma sui o le Atua faamaoni ma le alofa?

Na faamatalaina e Elder Howard W. Hunter se tala i le ala e mafai ai e le faamaoni ona faafiafia i le Atua ma aumaia ai le olioli i le tagata lava ia: “O loo i ai le olioli e maua e le tagata mai le faamaoni. O le a ou ta’u atu pe faapefea ona maua. O lenei faiga e te maua ai le sootaga ma le Matai ma e mafai ona e maua ai le Agaga o le Agaga Paia. O le solia o uiga faatulagaina o le faamaoni o le a le maua ai e oe nei faamanuiaga silisili e lua. E te talitonu e mafai e se tagata e pepelo ma faaoleole . . . ona maua le mafutaga a le Matai po o le mauaina o le Agaga o le Agaga Paia?” (“Basic Concepts of Honesty,” *New Era*, Feb. 1978, p. 5).

E LELEI LA TATOU FAALOGONA IA I TATOU LAVA

A tatou faamaoni, tatou te lagona se faalogona lelei ia i tatou lava.

E faapefea ona faateleina lo tatou faaaloalo i isi ona o lo tatou faamaoni?

O se tagata faamaoni e i ai lona agaga faaaloalo. E leai se mea e mafai ona ia natia ma e mafai ona ia vaai sa’o atu lava i mata o soo se tasi. O se tagata le faamaoni, i le isi itu, e lagona lona taugofie, matamuli, ma e masani ona fefe. Ma e tatau ia te ia; o le le faamaoni e le mafai ona le iloaina. Na fesili Elder Howard W. Hunter e faapea: “E te manatu e mafai ona tuua na o oe pe a e faia se amioga le faamaoni? E manatu e le mafai ona iloaina oe pe a e kopi i se suega, e tusa lava pe na o oe le tagata o loo i totonu o le potu?” (“Basic Concepts of Honesty,” *New Era*, Feb. 1978, p. 5).

TATOU TE FAATOSINA MAIA ISI MO LE LELEI

O lo tatou faamaoni o se faatosina lea mo le lelei—e le gata i o tatou aiga ae faapea foi i isi. Na faamatalaina e Peresitene Spencer W. Kimball se mea na tupu lea na mafai ai e se faaitaiga lelei ona faatosina ai tagata:

“I luga o le nofoaafi mai Niu loka agai atu i Baltimore, sa ma nonofo ai i le vaega e aai ai ma se tagata faipisinisi ma sa ma talatalanoa.

“ ‘Ua e oo ea i le Aai o Sate Lekī? Ua e faafofoga i le Afaipese a le Tapeneko?’ O nei fesili na taitaiina atu ai i maua i nisi o fesili taua. ‘O le a le tele o ni mea ua e iloa e uiga i le Ekalesia ma ana aoaoga, faiga masani, ma ona tagata?’

“ ‘E itiiti lava lo’u iloa i le Ekalesia,’ o lana tali lea, ‘ae peitai ou te iloa se tasi o ona tagata.’ Sa [ia fausia] ni fale i Niu loka. ‘O loo i ai se tagata faigaluega togipau o loo osifeagaiga ma a’u,’ o lana faamatalaga lea sa faaauau pea. ‘O se tagata faamaoni ma e tumu i le faaaloalo. Ou te lei fai lava ia te ia ina ia fai sana ofo mo se galuega. O lona agaga e tumu i le faaaloalo. Afai e faapea tagata Mamona e pei o lenei tagata, ou te fia iloa se mea e uiga i le Ekalesia lea e maua mai ai tagata faamoemoeina faapena. Sa matou tuu atu ia te ia ni tusi ma auina atu ia te ia ni faifeautalai o i ai i Niu loka e faaliliu ia te ia” (in Conference Report, Mexico City Area Conference 1972, p. 30).

Faaiuga

Ua poloaia i tatou e le Alii ina ia tatou faamaoni. O le mea lea e tatau ai ona tatou iloa le eseese e i le va o le faamaoni ma amioga le faamaoni. E tatau ona tatou faamasani i le faamaoni i mafauauga, talanoaga, ma galuega i totonu o o tatou aiga, i tagata tatou te tuaoi, ma totonu o le Ekalesia. E tatau foi ona tatou aoao i a tatou fanau le amiotonu ma le faamaoni. Afai tatou te faia ia mea, o le a mafai ona le alualua o tatou manatunatuga, filemu o tatou mafaufau, se lagona o le tauaogaina, ma le mafutaga a le Agaga Paia.

Faitau le Mosaea 4:30.

O le a le mea na lapataia ai i tatou e le Tupu o Peniamina?

Afai e te lagona ua musuia ai oe, ia tuuina atu loa lau molimau i le mataupu o le faamaoni.

Lu’i

1. I le gasologa o le vaiaso a sau, ia iloilu ou mafauauga, upu, ma gaoioiga e suesue ai lou usiusitai i le poloaiga ina ia faamaoni. Saili le fesoasoani a le Alii ina ia mafai ai ona foia soo se amioga le faamaoni ua e maua i totonu o lou olaga faaletagata.
2. *Tama*: fefautuaai ma lou toalua ina ia sailia ni auala e aoao atu ai ia oulua fanau lenei mataupu amiotonu.
3. *Alii talavou*: ia fuafua nei ina ia e faamaoni i ou matua ma taitai o le ekalesia. Ia fuafua e usiusitai i tulafono a le Atua ma tulafono o le eleele.

Mau Faapoopo

Esoto 20:15–16 (poloaiga ina ia aua nei gaioi pe molimau pepelo)

Alema 27:27 (tagata o Amoni faamaoni ma amiotonu)

3 Nifae 1:22 (ua auina atu e Satani le pepelo e faaleagaina ai le faatuatua)

MFF 42:20–21 (faasalaga mo tagata gaioi ma tagata tala pepelo)

MFF 51:9 (ia faamaoni tagata uma)

MFF 97:8 (e talia e le Alii tagata faamaoni)

MFF 98:10 (ia sailia ma le filiga tagata faamaoni ma tagata faautauta)

Sauniuniga a le Faiaoga

A o lei tuuina atu lenei lesona—

1. Ia toe iloiloina *Mataupu Faavae o le Talalelei*, mataupu 31, “Faamaoni.”
2. Ia valaaulia i latou o loo umia le perisitua e fetufaai atu ni faataitaiga talu ai nei o le faamaoni na latou oo i ai pe na latou maitauina foi.
3. Fai atu i tagata o le vasega e faitau pe faamatala mai tala ma mau o loo i lenei lesona.

O le Mama o Mafaufauga

Lesona 32

O lenei lesona e tatau ona fesoasoani e faamalosia ai la tatou tautinoga ina ia mama o tatou mafaufauga.

Faatomuaga

Sa taua e Peresitene Spencer W. Kimball le tala faatusa lenei e faailoa atu ai le ono aafia o se tagata i mafaufauga mama ma le ola amiotonu:

O le alii o Lord George sa soifua i se olaga leaga. Sa le faamaoni o ia. O ia o se tagata taalo tupe ma le inu ava, ma o ona foliga ua atagia ai le olaga sa ola ai o ia. O ni foliga e matua leaga lava.

O se tasi aso na gau ai lona alofa i se teine faatauvaa lava e ola i le atunuu o lona igoa o Jenny Mere, ma ia fai atu loa i le tamaitai la te faaipoipo. Na fai lea tamaitai i le alii e le mafai ona faaipoipo o ia i se tagata e matua amioleaga ona foliga. E manao o ia i se tamaloa ua i ai ni foliga o se tagata paia ona e mafai ona atagia ai le alofa i foliga o sea tagata.

Na tonu loa ia Lord George o le a suia lona olaga, peitai na ia iloa e le mafai e Jenny Mere ona faaipoipo ia te ia i le tulaga o loo i ai o ia. O le mea lea na alu ai loa Lord George i se tagata o i ai le poto faapitoa i le faiga o mata pulepule. Sa filifilia e le alii lenei se mata pulepule, ua faavevela, ma faapipii atu loa i foliga o Lord George. Ina ua vaai o ia i le faata, na iloa ai e Lord George ua ia te ia ni foliga o se tagata paia e matua foliga faapelepele. O ona foliga vaaia ua matua ese lava ma e le taumate o le a vave ona malie ia Jenny Mere e faaipoipo ia te ia.

Sa faatau lo laua fale i se nuu i tua e i ai sina tamai togalaau. Na maua mulimuli e Lord George ua matua suia atoa lona olaga. Ua amata nei ona fiafia o ia i mea o le natura ma le lalolagi o loo siomia ai o ia. Ua agai ina faatumuina o ia i le agalelei ma le alofa.

Ae peitai e lei matua malie ia Lord George ina ua na amataina se olaga fou. Sa taumafai o ia i le mea na te mafaia ina ia faatumuina le mea lea ua le mafai ona maua i taimi ua tuanai. Sa taumafai o ia e toe tuuina atu tupe uma na ia maua ona o le lē faamaoni. O aso taitasi ua agai ina lelei lana amio ma ona mafaufauga ua sili atu ona mama.

I se tulaga e lei mafaufauiina, sa toe maua ai e nisi o ana uo tuai o ia ma le mea o loo nofo ai. Na latou o mai i lona togalaau ma taumafai e faatauana o ia ina ia toe foi atu i lona olaga tuai ma le amioleaga.

Ina ua musu o ia e faia lea mea, sa latou osofaia o ia ma ua masaesae ai le mata pulepule mai ona foliga.

Sa faagaugau lona ulu. Na ia lagonaina lona olaga fou e pei ua muta, ma ua faaleagaina lana faaipoipoga. A o tu o ia ma lona ulu faagaugau ma le mata pulepule ua taatia i luga o le mutia i lalo ifo o ona vae, sa tamoe atu Jenny Mere ia te ia ma faapa'u atu i ona tulivae i ona luma. Ina ua tilotilo atu o ia Lord George, o le a sou manatu o le a se mea na ia iloaina? loe! Laina mo le laina, foliga mo foliga, o ona foliga ua tutusa lelei lava ma le mata pulepule. O ona foliga ua avea nei ma foliga o se tagata paia.

Ina ua maea ona faamatalaina lenei tala, sa faapea atu Peresitene Kimball, "E leai se mea tatou te masalomia ai le itu e faapea, o le ola o loo ola ai se tasi ma mafaufauga o loo mafaufau o loo faaaliga manino mai ona foliga." (Adapted from *Ensign*, May 1975, pp. 80–81.)

O o Tatou Mafaufauga e Tau Atu i Faatinoga

E faapefea ona aafia a tatou faatinoga i o tatou mafaufauga?

E masani ona tautalagia soo e Peresitene Tavita O. Makei le taunuuga ma le afaina o gaoioiga i o tatou mafaufauga. I se tasi taimi na fai mai ai a ia: "O mafaufauga o fatu ia o gaoioiga, ma e muamua atu i gaoioiga. . . . O le manao faifai pea o le Faaola ma ana taumafaiga o le fia totoina lea i totonu o le mafaufau ni mafaufuaga mama, manatu lelei, lagona faatamalii, i le iloaina lelei lea o upu sao ma gaoioiga sao o le a mulimuli mai ai" (*Stepping Stones to an Abundant Life*, p. 206).

O le a se mea e fesoasoani i se tagata ina ia faamaoni ma amiotonu i mea uma?

O se vaega o le ola amiotonu o le mafaufau lea i ni mafaufauga mama. O le faataitaiga lelei lava o Nifae. O le atalii o se perofeta maoae, sa saili Nifae ina ia ona maua se faaaliga e pei lava ona maua e lona tama. O lona amiotonu na tauia, ma o lea foi na avea ai o ia ma perofeta mo ona tagata.

O le a le mea na faia e Nifae na fesoasoani ai ia te ia ina ia amiotonu?

Na tuuina mai e Nifae ni manatu e fesoasoani ai pe faapefea ona ola i le amiotonu ina ua tusia e ia upu nei:

"Aua e fiafia lo'u agaga i tusi paia, ua mafaufau foi i ai lo'u loto ma ua ou tusi ai mo le aoaoina ma le aoga i a'u fanau. Faauta, ua fiafia lo'u agaga i mea a le Atua, e mafaufau pea lo'u loto i mea ua ou vaايا ma faalogoina" (2 Nifae 4:15–16).

E aafia tele a tatou mea e fai i o tatou mafaufauga. A amiotonu o tatou mafaufauga, ona tatou faia foi lea o gaoioiga amiotonu. Afai tatou te mafaufau i mea leaga, o le a mulimuli ane ona tatou faia lea o le agasala lea ua leva ona tatou manatunatu i ai.

"Sa faamatalaina e Peresitene Tavita O. Makei le tala lenei:

"I le tele o tausaga ua mavae, sa sau ai se alii talavou ia te a'u a o avea a'u ma peresitene o le Misiona a Europa, ma sa ia faia se tautinoga o se mea sese ma se agasala na ia faia. Na ia faamaonia o ia lava na faia lea mea ina ua ia fai mai e faapea, o ia sa i totonu o le faletusi i le taimi na tapuni ai, ma ina ua loka le faitotoa, na gauai atu loa o ia i le faaososoga. Ua ia tuuaina le mea na tupu mo lona pa'u.

"Ae sa ou faapea atu, 'E le o le mea na tupu, e le o le faitotoa na loka, e le o le faaososoga foi. Na ia te oe le mafauauga ae e te lei alu i totonu o le faletusi. Ana faapea e te lei mafaufau i mea leaga, semanu e leai se avanoa malosi faapena e mafai ai ona faatosina pe faaososina oe, o se faifeautalai, ina ia pa'u. E muamua lava i taimi uma mafauauga nai lo gaoioga' " ("Cleanliness Is Next to Godliness," *Instructor*, Mar. 1965, p. 86).

Sa tusi e James Allen e faapea:

"O le mafaufau o le tagata e mafai ona faatusaina i se togalaau, lea e ono mafai ona faatoaina ma le poto uma lava po o le lafoaiina ina ia matua vaoa; peitai pe vaaia lelei pe faatalale i ai ae ao lava ina tupu mai ai ni fua. Afai e le maua ai ni fatu aoga e toe tuu atu i ai, o lona uiga o le a matua tele naua ni fatu le aoga o vao leaga o le a pau i totonu, ma o le a faaaauu pea ona faateleina lo latou lava ituaiga.

"Ma e pei lava ona faatoaina lelei e le faitogalaau lona togalaau, i le faamamaina lea o le togalaau mai vao leaga, atoa ma le totonu ai o ni fugalaau ma fualaau aina na te manaomia, e faapea foi ona mafai e le tagata ona teuteuina le togalaau o lona mafaufau, ma vele ese mai ai mafauauga leaga uma, le aoga, ma le le mama, ae faatoa ma le faamoemoe ia tulaga lelei i ni fugalaau ma ni fualaau aina e tatau ai, e aoga, ma ni mafauauga mama. O le tausisia o nei taualumaga, o le a le pine ona maua e le tagata o ia e pule i le faatoaga o lona agaga, ma o ia o le faatonu o lona lava soifuaga. O ia foi . . . ua malamalama i ai, i se faiga atoatoa e sao ma tonu pe faapefea ona galulue faatasi le malosi o le mafaufau ma mea taitasi o manatu i totonu o le gaosia o se tagata, tulaga e mafai ona oo i ai, ma lona taunuuga" (*As a Man Thinketh*, p. 15).

O le a se mea e tatau ona tatou faia ina ia maua ai se faatoaga e maua ai ni meaai lelei ma ni fugalaau? O le a se mea ua tatou faia pe afai o loo vaoa o tatou togalaau?

O le a se mea e ao ona tatou faia ina ia maua ai se mafaufau e taitaiina atu ai i tatou i ni gaoioga lelei? O a ni mea ua faia i o tatou mafaufau ua taitaiina ai i tatou i mea leaga ma amio e leai se aoga?

Na saunoa mai faapea Elder Bruce R. McConkie, "Afai o loo tatou mafaufau loloto i totonu o o tatou agaga i mea o le amiotonu, ona tatou amiotonu lea" (*Ensign*, Jan. 1974, p. 48). O loo faapea mai se isi faaupuga, "Ua fetalai mai le Alii e le afio o ia i totonu o malumalu e le paia, ae afio o ia i loto o e amiotonu" (Alema 34:36). O mafauauga

mama e fesoasoani ai ia i tatou ina ia mafai ona tatou ola faapena ina ia faatasi mai le Agaga o le Alii ia i tatou; ma afai ua ia i tatou le Agaga Paia, o le a mulimuli ane ona faapaiaina lea o o tatou olaga.

Ia Tausia Mafaufauga ia Mama

Tuu atu i se tagata o le vasega e faitau mai le Filipi 4:8.

O le a se mea ua ta'u mai e Paulo ia i tatou e mafaufauga i ai? Ia lisi uma tali i luga o le laupapa. (O mea uma ua moni, o mea uma ua tauleleia, o mea uma ua tonu, o mea uma ua mama, o mea uma ua matagofie, o mea uma ua logoleleia.)

Ua le lava le tausia o o tatou mafaufauga ina ia saoloto mai mea leaga pe afai o le a avea i tatou e pei o Keriso. E tatau ona tausia o tatou mafaufauga ia faatumuina i mafaufauga lelei ma le tauleleia. Soo se taimi lava tatou te faia ai, e tatau ona tatou manatunatu i mea moni o le talalelei. O se tasi auala e aupito sili ona lelei e fai ai lenei mea o le tausia lea o folafolaga ua tatou faia pe a tatou fetagofi atu i le faamanatuga: ina ia tatou manatua pea le Faola.

A o avea Peresitene Spencer W. Kimball ma se tasi o le Korama a le Toasefululua, na faapea mai o ia: "A e vaai i totonu o le lomifefiloi mo se upu e aupito sili ona taua, e te iloa o le a lena upu? E ono mafai ona faapea o le upu 'manatua.' Talu ai ona o outou uma ua uma ona osia ni feagaiga—ua outou iloa ai le mea e ao ona faia ma ua outou iloa pe faapefea ona faia ia mea—o le mea aupito sili ona tatou manaomia o le manatua. O le mafuaaga lena e o ai tagata uma i le faamanatuga i Aso Sapatati taitasi—ia auai i le faamanatuga ma faalogo atu i tatalo a le au ositaulaga ina ia latou 'manatua pea o ia ma tausia ana poloaiga ua tuuina mai ia i latou' " (*Circles of Exaltation*, [address delivered to seminary and institute personnel at Brigham Young University, 28 June 1968]).

E mafai faapefea ona tatou manatua pea le Faola? (Ia tuu atu i se tagata se toatasi pe toalua foi o le vasega e fetufaai mai ni o laua manatu pe faapefea ona "manatua pea o ia.")

Na tuuina mai e le perofeta tautaua o Alema ni fautuaga poto i lona atalii o Helamana e ono mafai ona fesoasoani ia i tatou ina ia tatou manatua pea le Faola.

Tuu atu i se tagata o le vasega na te faitauina le Alema 37:35–37.

O le a se eesese o le a tupu mai pe a taulai o tatou mafaufauga i taimi uma i le Alii? (O le a mafai ona tatou teena faaososoga ma maua ai le faatuatua e sili atu, usiusitai, ma le alofa.)

E faapefea ona fesoasoani le tatalo ia i tatou e tausii ai o tatou mafaufauga ma amioga ia mama?

O aafiaga leaga o loo siomia ai i tatou i lenei lalolagi, ma ua faaaogaina e Satani nei mea e taumafai ai e faatosina o tatou mafaufauga. E tele ana auala na te faaososoina ai i tatou, ae peitai e tele ni mea e ao ina tatou faia e teena ai o ia pe afai tatou te aloese mai le faalogo ma le faitau i mea leaga. Ua faamaninoina mai e Elder J. Thomas Fyans lenei mataupu e ala lea i lona faaaogaina o

vaitafe i Amerika i Saute e faamanino mai ai le itu i le afaina o o tatou mafauauga i mea tatou te faitau pe vaai i ai:

“O se tasi o mea mataina [i vaitafe o Amerika i Saute] o le eseese lea o o latou lanu. O le Madeira, mo se faataitaiga, e taua o se vaitafe pa'epa'e ona o lona suavai o loo tafe atu ai ni vaega ninii o le ele i lona alavai. O le lanu uliuli o le Rio Negro e sau mai mea ninii ua pala e aafia ai le suavai i totonu o vaomatua ia e tafe mai ai. A o isi lava vaitafe e tafe atu i luga o le oneone paepae ma e masani ona foliga lanulauava pe lanumoana malosi foi.

“E pei lava ona faalanuina nei vai ona o mea ninii mai le eleele ia e aafia ai i le suavai ao tafe mai, ua faapena foi vaitafe o o tatou mafauauga ua faaleagaina i mea ia o loo tafe mai luga o o tatou mafauauga” (in Conference Report, Buenos Aires Area Conference 1975, pp. 28–29).

E faapefea ona faatusaina le mafauafau i se vaitafe?

O a ni mea leaga ua faaaogaina e Satani ma taumafai e faatosina ai o tatou mafauauga? (Ata ma tusitusiga leaga, tagata amio pa'aa ma le le taupulea, gagana masoa, ma nisi lava ituaiga o musika, siva, ma faafiafiaga.)

Talu ai ona o ia mea e matua faatamaia ai lo tatou ola faaleagaga, ua tataua ia i tatou ona aloese mai mea leaga ia e mafua ai ona leaga o tatou mafauauga. Ae peitai, e i ai nisi taimi, e tusa lava po o le a lo tatou taumafai malosi e aveese o tatou mafauafau mai mea le mama, ae tumau pea ona tatou tauivi ma se mafauauga le mama ma le leaga lea o loo uunaiina mai pea i o tatou mafauauga. Ua tatou ola nei i se lalolagi ua tumu i mea leaga, ma o le fetaiiai ai ma mea leaga e masani ona tatou le mafai ona sao mai ai. O le a se mea e ao ina tatou faia pe a fetaiiai i tatou ma se tulaga faapea?

Na faamatala mai e Elder Boyd K. Packer se tasi auala e mafai ai ona tatou faasagatau atu i mafauauga leaga:

“O le mafauafau e pei lava o se tulaga—e masani lava ona sisi i luga le pupuni seiloga tatou te momoe. O loo tumau pea ona i ai se gaoioiga o loo faatinoia i luga o lea tulaga. E ono mafai ona faapea o se faleaitu, o se tala faanoanoa, malie po o le le malie, lelei po o le leaga; peitai o taimi uma lava o loo i ai se gaoioiga o loo fai ai i luga o lea tulaga o le mafauafau.

“Ua tau ane ea i ai lou mafauafau i lena itu e aunoa ma se manatu mamafa i ai, i le totonugalemu o soo se gaoioiga e fai, o le a ofi ane ai i totonu se mafauauga malie mai fafo ma faatosina i lou mafauafau? . . .

“Afai e te faatagaina ia mafauauga ia faaaauu pea, o le a tuua loa e mafauauga soo se itu lelei le tulaga. O le a tuua oe, ana na e malie atu i ai, i le faatosina a mafauauga amioletonu. Afai e te gauai atu i ai, o le a latou faia loa ni taga mo oe i luga o le tulaga o lou mafauafau i soo se mea e oo lava i tapulaa o mea e te onosaia. E mafai ona latou

faatinoina se vaaiga faanoanoa, lotovale, po o le inoino. E mafai e ia mafaufauga ona masoa, le mafaufau, po o le faaleagaina ai

“O le a sau mea e fai i se taimi faapena? . . .

“Ou te aoao atu ia te outou lenei mea. Filifili mai totonu o viiga musuia o le Ekalesia se viiga e fialia iai, se viiga e i ai ni upu e faagaetia ai lou agaga ma o se musika lea e talafeagai lelei, se pese lea e te faalogoina ua pei e musuia ai oe e le Agaga. Mafaufau malie i ai i totonu o lou ulu. Ia tauloto upu o le pese. Tusa lava pe e te lei aoga i mea tau musika, ae mafai lava ona e manatunatu i se viiga.

“Ia faaoga nei loa lea viiga e fai ma nofoaga e lolo atu i ai ou mafaufauga. Ia avea ma ou nofoaga o sulufaiga i taimi faafuasei. Soo se taimi lava e te lagona ai ua agai atu nei lagona mai fafo o lou mafaufau i luga o le tulaga o lou mafaufau, usu loa ma le pese lenei, e pei ona i ai.

“A o amata le musika ma amata ona faatinoina upu i lou mafaufau, o le a amata loa ona mou malie ese atu upu le aoga. O le a suia e le viiga lagona atoa o i luga o le tulaga o lou mafaufau. Talu ai ona o lea viiga e mama toe faagaetia loto, o le a mou ese atu ai loa ma mafaufauga eleelea, ona o mea lelei ua e filifilia, e le masani ona fefiloi faatasi ma mea leaga, e le mafai e le mea leaga ona faatagaina le oo atu i ai o le malamalama. . . .

“O le taimi lava e te iloa ai ona faamama le tulaga o lou mafaufau mai mafaufauga leaga, faapisi loa i le aoaoina o ni mea tatau ma talafeagai ai. Sui le vaaiga o mea o loo siomia ai oe ina ia mafai ona musuia ai oe i mea o loo e vaai atu i ai ma mafaufauga e faagaetia ai. Faatumu lou mafaufau i mea amiotonu” (*Teach Ye Diligently*, pp. 46–47).

O a nisi auala e mafai ona tatou faaogaina e faatonutonu ai o tatou mafaufauga? (Tatalo. Tauloto se solo, mau, po o se mafaufauga. Mafaufau i se mea paia na oo ia te oe po o se nofoaga.)

“O le fialia moni e le faalagolago lea i ni mea mai fafo. . . . O le ituaiga fialia lea e tumau i totonu ia te oe o le fialia lea e puna mai mafaufauga i totonu ma lagona. E tatau ona e mafaufau nei i ai a o e talavou. Ua tatau nei loa ona e faatoaina lou mafaufau pe a e mana'o e te maua le fialia e le uma. E tatau ona e faatoaina lou mafaufau i ni mafaufauga lelei ma ni manatu lelei. Aua o se mafaufau e gaogao e tupu ai le le fialia ma e le mafai ona tumau lava ia. O se mafaufau gaogao na te sailia le faamalie e avea ma mea e sui ai le fialia” (William Lyon Phelps, quoted by Harvey Fletcher, *The Good Life*, p. 137).

Faitau le Salamo 1:1–3.

Faiuga

O o tatou mafaufauga e afaina ai mea tatou te faia. O mafaufauga mama ma mana'o e taitaiina atu ai i tatou ina ia tatou ola i le

amiontonu. O mafauauga leaga e pogai ai ona tatou le maua le agaga o le Alii ma e mafai ona taitaiina atu ai ina ia faia ni amioleaga.

Ina ia tausia ia mama o tatou mafauafau, e tatau i taimi uma ona tatou saili ma manatunatu e uiga i mea a le Atua. E tatau ona tatou manatunatu loloto i mea moni o le talalelei ma tatalo i aso fai pea. A o tatou faia lea itu, ua folafolaina mai ia i tatou ni faamanuiaga e matua tele. Ua folafola mai e le Alii, “Ia teuteuina ou manatu i le mama e le aunoa; ona malosi ai lea o lou faatuatua fai ifo i luma o le Atua. . . . E avea le Agaga Paia ma au aumea tumau” (MFF 121:45–46).

E mafai ona tatou tausia o tatou mafauauga ia mama e ala i le alofia o mea leaga i totonu o o tatou olaga. A oo mai se mafauauga leaga i o tatou mafauafau, ua tatau loa lava ona tatou amata ona mafauafau i se mea e ono musuia ai i tatou e le Agaga o le Atua. E mafai ona tatou faaaogaina se viiga, se tauloto, se mau, po o se isi lava mafauauga e fai. E mafai foi ona tatou amata ona tatalo i soo se taimi lava e oo mai ai se mafauauga le mama i o tatou mafauafau.

Lu’i

1. Ia tele ni taimi o le aso e mafauafau ai i mea a le Alii. Taumafai i le mea sili e te mafaia ina ia “manatua pea ai o ia.”
2. Manatua o lou mafauafau e pei o se togalaau. Taumafai i le mea sili e te mafaia e faatoa ai i ni mafauauga lou mafauafau.
3. Ia saili se auala e faau ai ou mafauauga. O le ala lelei e faia ai lenei tulaga o le taulotoina lea o se viiga e sili ona e fiafia i ai, mau po o solo. Soo se taimi lava lua te feagai ai ma se mafauauga le mama, ia mafauafau loa lava faasolo i ni upu ua e taulotoina. O le a latou uunai ese le mafauauga leaga.

Sauniuniga a le Faiaoga

A o lei tuuina atu lenei lesona—

1. Fuafua ia faaafia ai i latou o i lau vasega ua umia le perisitua i le lesona i le tele o le taimi, ina ia aafia ai o latou olaga.
2. Fai atu i tagata o le vasega e faitau pe faamatala mai tala ma mau o loo i lenei lesona.

Tuuina Atu o le Faamagaloga ma le Taliaina o le Faamagaloina

Lesona 33

O le faamoemoega o lenei lesona ina ia uunaiina i tatou ina ia faamagaloga atu i isi tagata ma ia aoaoina pe faapefea ona tatou talia le faamagaloina mo i tatou lava.

Faatomuaga

I le faataoto lenei, na aoaoina ai i tatou e le Faaola e uiga i le alofa o le Tama Faalelagi mo i tatou:

O se tagata e toalua ona atalii. Sa le fialia le atalii laititi i le nofo ai i le fale ma o lea na talosaga atu ai i lona tama mo lona vaega o le oa a le aiga. Ona ia malaga atu ai lea i se isi atunuu, lea sa vave ai ona faamaumauina ai ana tupe uma ma ua solia ai poloaiga a le Atua.

Ina ua uma ona faaaluiina e le atalii faamaimau oa lenei mea uma sa ia te ia, ona tupu loa lea o se oge tele lava. E lei pine ae fiaai o ia, o lea na maua ai sana galuega o le fafagaina o puaa. Ae sa tumau pea lona mativa ma lona fiaai ma ua ia manao e ai meaai e tuuina atu i puaa.

I lona puapuaga, na iloa ai e lenei alii talavou lona sese. Ua na manatua e faapea e oo lava i auaua a lona tama o loo tele a latou meaai. Ma tonu loa ia te ia o le a toe foi atu i lona aiga ma fai atu i ai ina ia avea o ia ma auaua. Ina ua latalata atu o ia i lo latou aiga, na iloa mamao atu e le tama o loo sau o ia ma o lea na tamoe atu ai loa e faafetaui ia te ia. A o feiloai i laua, sa faapea atu le atalii, “Lou tama e, ua ou agasala i le lagi, atoa ma ou luma, ma ua le aoga ona toe taua a’u o sou atalii.” Ae peitai sa matua fialia le tama ina ua toe maua mai lona atalii i le aiga, o lea na ia tago ai i le ofu tele sili ona lelei ma faaofu ai o ia. Ua na avatu ia te ia seevae ma faasee ai o ia ma tuu atu se mama i lona lima. Ona ia fai atu lea i ana auaua ina ia saunia se aiga tele.

Ina ua iloa e le uso matua, o le sa tumau pea lona faamaoni, le mea ua tupu, ona ita ai lea o ia. E lei faia lava e le tama ia te ia se aiga faapea. Sa faamafanafana le tama ia te ia ma ta’u atu ia te ia o mea uma lava a le aiga o au mea ia. A o lona uso sa alu e faamaumau lona tofi a ua toe foi mai i le aiga, o le mafuaaga lea o le fialia. Ua faapea atu o ia, “O lou uso lenei na oti, ae ua toe ola, na leiloa, ae ua toe maua.” (Tagai i le Luka 15:11–32.)

Ua taitasi i tatou ma agasala. Ma ona o lea itu, ma talu ai o le Alii e alofa ia i tatou, sa puapuagatia ma maliu ai o ia ina ia tuuina mai ia i

tatou se ala e faamagaloina ai i tatou mai a tatou agasala. I le talanoaina o lana taulaga, na ia fetalai mai e faapea, "Aua faauta, o A'u, le Atua na puapuagatia i nei mea mo tagata uma, ina ia latou le puapuagatia pe afai latou te salamo" (MFF 19:16).

Faaali atu le fesoasoani vaaia 33-a, "Na puapuagatia Keriso mo a tatou agasala i le Faatoaga o Ketesemane."

I totonu o le tasi mau, ua fetalai mai ai le Alii, "Faauta, o le ua salamo i ana agasala, e faamagaloina o ia, ma o A'u, le Alii, ou te le toe manatua lava" (MFF 58:42). E ao ia i tatou taitoatasi uma ona salamo ina ia maua ai le faamagaloga mai le Alii. A tatou salamo, o le a olioli lo tatou Tama o i le Lagi—e pei o le tama o loo i le faataoto. Ia manatunatu i lou lava ola ma le fiafia e te maua mai le salamo i agasala ma ua faamagaloina.

O le a le mea sa moomia ona faia e le atalii laititi o loo i le faataoto e suia ai lona olaga? (Iloaina ana mea sese, toe foi i le aiga, ma ta'uta'u atu ana agasala.)

O a ni lagona e te manatu na i ai i le atalii i le taimi na latalata atu ai i le fale? (Atonu sa ia lagonaina le fefe po o le le taliaina. Atonu sa ia lagona le fiafia e toe foi i le fale. Atonu sa ia lagonaina foi e sao lea mea o loo ia faia.)

O le a sou manatu o le a se lagona na oo ia te ia ina ua faafeiloai o ia e lona tama? O le a sou lagona e uiga i le Faaola, i lou iloina lea ua mafai ona faamagaloina a tatou agasala ona o ona puapuaga?

O le Faamagaloina o Agasala e Maua ai le Olioli

O Alema le ltiiti o le atalii lea o se perofeta a le Atua, ae peitai na faia e ia ni agasala matuia. O se tasi o ana agasala matuia na ia faia o lona taumafai lea e faaleaga le Ekalesia a le Atua e ala i le taitaieseina o tagata mai le mea moni. I le avea ai o ia ma taitai o le Ekalesia, na lagona e le tama o Alema se faanoanoa e matua tele ona o amioleaga a lona atalii ma tatalo ai i aso fai pea i le Alii ina ia mafai e lona atalii ona salamo mai mea ua na faia.

Ona o le faatuatua ma talosaga a lona tama, o lea na asiasi ane ai se agelu ia Alema le ltiiti, i se tasi aso. O se malosi ese sa tautala ai le agelu na amata ai ona gatete Alema. Na amata ona talitonu o ia i le mana o le Atua. Na faatonu e le agelu ia Alema ina ia taofi lona taumafai e faatamaia le Ekalesia. Ina ua alu ese le agelu, sa matua gatete lava Alema ma ua le mafai ona tautala. Na pa'u o ia i le eleele ma sa leai se malosi sa ia te ia mo aso e tolu. Ina ua mafai ona toe tautala o ia, na ia tau atu i tagata e faapea ua na iloa se suiga tele i lona olaga ma ua salamo mai ana agasala. Na tonu loa ia Alema ina ia tausia poloaiga a le Atua ma faia mea uma na te mafaia e toe faaleleia ai ana agasala i aso ua mavae. O le malosi tele o ana taumafaiga na avea ai o ia ma faifeautalai tautaua ma mulimuli ane na avea ma perofeta o le Ekalesia. (Tagai i le Mosaea 27.)



I le faamatalaina o le mea na oo ia te ia:

“O lenei foi, e tolu ao ma po e tolu sa tigaina ai a’u i tiga o le agaga ua faasalaina.

“Ua oo foi ina o faapea ona tigaina au i le puapuaga, ina o atuatuvaale au i le manatu i a’u agasala e tele, faauta, sa ou manatua, a o ou faalogo i lo’u tama o vavalo i le nuu e uiga i le afio mai o Iesu Keriso, o le Alo o le Atua, e togilolaina agasala a le lalolagi.

“Ina o taofi atu e lo’u loto i nei manatu, sa ou tagi ifo i lo’u loto: Iesu e, le Alo o le Atua, ia e alofa mai ia te au, o loo i le au oona, ma ua noanoatia i filifiliga o le oti e faavavau.

“O lenei foi, faauta, ina o o’u manatu i lenei mea, ua le toe mafai ona ou manatua o’u tiga, ioe, ua ou le toe atuatuvaale i le manatu i a’u agasala.

“Ioe, maeu lava le olioli ma le malamalamaaga ofoofogia na a’u vaايا; ioe, sa faatumuina lo’u agaga i le olioli matua tele, e tusa ma le tele o lo’u tiga!

“Ioe . . . sa le mafai se tasi mea ona silisili ma oona e tutusa ma o’u tiga. Ioe, ma . . . o le tasi mea, e le mafai ona silisili ma malie se tasi mea e tusa ma lo’u olioli” (Alema 36:16–21).

O le a le mea na faia e Alema ina ia faamagaloina ai? (Salamo mai agasala ma valaau atu i le Atua mo le faamagaloina.) Na faapefea ona iloa e Alema ua faamagaloina o ia? (Na faatumuina lona loto i le olioli.)

Na iloa foi e le nuu o le Tupu o Peniamina le olioli e maua i le faamagaloina o agasala. Ina ua latou faalogo i le lauga mulimuli a le Tupu o Peniamina, sa salamo i latou ma talosaga atu mo le faamagaloina o a latou agasala. Ua faamatalaina e tusitusiga paia e faapea “ua oo mai le Agaga o le Atua ia te i latou, ma ua faatumuina i latou i le olioli, ona ua maua le faamagaloina o a latou agasala, ma ua filemu o latou loto fuatiaifo ona o le faatuatua tele ia Iesu Keriso” (Mosaea 4:3).

E Manaomia ona Tatou Faamagalo Atu i Tagata Uma

Ona o le alofa atoatoa o le Faaola ia i tatou, ua ia finagalo ai e faamagalo i tatou pe a tatou salamo faamaoni. Ona o lea, ua ia talosaga mai ia i tatou ina ia tatou foliga ia te ia. Afai tatou te foliga ia te ia, o le mea lea, e tataua ona tatou nofo sauni e faamagalo le tasi i le isi.

Tuu atu i se tagata o le vasega e faitau mai le Mataupu Faavae ma Feagaiga 64:8.

Aisea na faasa’o ai e Keriso lona au soo? (Latou te lei fefaamagaloi.)

Tuu atu i se tagata o le vasega na te faitauina mai le Mataupu Faavae ma Feagaiga 64:9–11. Tusi i luga o le laupapa: *Ua manaomia oe ina ia faamagalo atu i tagata uma.*

O le a le uiga o le finagalo o le Alii ina ua faapea mai o le agasala pito i matautia o loo tumau i totonu ia i tatou pe a tatou le faamagalo atu?

Na faailoa mai e Iesu le mataupu faavae o le faamagalo atu e ala lea i le faamatalaina o le faataoto i le auauna le alofa:

Na aitalafu mai e se tasi auauna le sefuluafe taleni mai lona matai—o se aofaiga tele lea tupe. Ina ua oo mai le taimi e toe totogi ai lenei aitalafu, na aioi atu lenei auauna i lona matai ina ia onosai; ua na le maua ni tupe, ae o le a na totogiina lava i se taimi. Ona alofa ai lea o le matai mo lana auauna ma faamagalalo lana aitalafu mai ia te ia. Ae ui lava i lea, o lenei lava auauna e tasi, ua alu atu o ia ua faatauana ma le malosi nisi ona uso a auauna ina ia totogi mai ia te ia se aofaiga itiiti o tupe o loo nofo aitalafu ai. Ina ua le mafai e lea tagata ona totogi, ua avatu e le auauna lenei tagata i le falepuipui. Ina ua iloa e le matai le mea ua tupu, ona tiga ai lea o ia i le auauna le alofa ma manaomia ai loa o ia ina ia totogi uma le aitalafu na ia aitalafu ai. (Tagai i le Mataio 18:21–34.)

Na faaiu e lesu le faataoto ma aoao atu i tagata e faapea: “E faapea foi ona faia e le Tama o i le Lagi ia te outou pe afai tou te le taitasi ma faamagalalo ma o outou loto atoa i o outou uso pe a latou agaleaga mai” (Mataio 18:35).

E faapefea ona foliga i tatou i le auauna lea na faamagaloina lana aitalafu tele? Afai tatou te le faamagaloina isi tagata, e faapefea ia ona faatusatusa i tatou i le auauna le alofa.

O le faataitaiga sili o le loto faamagalalo e maua mai lea i le soifuaga o le Faaola. A o tautau o ia ma le tiga i luga o le satauro, na tatalo o ia ina ia faamagalalo e le Tama ia fitafita na faasatauroina o ia. “Lo’u Tama e,” ia e faamagalalo atu ia te i latou; aua ua latou le iloa le mea ua latou faia” (Luka 23:34).

Na saunoa mai faapea Peresitene Spencer W. Kimball: “Ina ia i ai i totonu o le mea sa’o, e ao ina tatou loto faamagalalo, ma e tatau ona tatou faia lea tulaga e aunoa ma lo tatou manatu pe faamata ua salamo lo tatou fili pe leai, po o le a le faamaoni o lona suiga, pe faamata ua manao o ia ina ia faamagaloina. E ao ina tatou mulimuli i le faataitaiga ma le aoaoga a le Matai” (*O le Vavega o le Faamagalalo Atu*, i. 283).

O le Faamagalalo Atu i Isi e Maua Ai le Filemu

O le tele o taimi, a agasala se tasi ia i tatou, ona tatou tiga lea ma lē malie. O nei lagona e mafai ona le lelei ai le soifuaga, e tusa lava pe leai se mea sese ua tatou faia. Afai tatou te faatagaina nei lagona ina ia tumau i totonu o o tatou loto, ona tatou tulieseina lea o le Agaga o le Alii. O se tasi lenei o mafuaaga ua poloaiina ai e le Alii i tatou ina ia faamagalalo atu ia i latou o e sese mai ia i tatou.

Na saunoa mai Peresitene Ioane Teila e faapea, “Ina ia i ai i totonu o o outou loto le agaga o le faamagalalo atu ma ina ia aveeseina mai ai i o outou loto le agaga o le inoino ma le felotoa’i, e maua mai ai le filemu ma le olioli” (quoted by Heber J. Grant in Conference Report, Oct. 1920, p. 7).

O le filemu e maua mai le faamagaloina o isi o loo faaalua lea i totonu o le tala lenei na faamatalaina e Peresitene Spencer W. Kimball:

I le 1918, e toatolu ni alii ofisa o le tulafono na fasiotia ina ua latou taumafai e pueina ni tagata solitulafono se toatele. O le tama o Glen Kempton o se tasi lea o alii ofisa na fasiotia. I se taimi mulimuli ane, na pueina ai e tagata fasioti tagata, faamasinoina ma auina atu i le falepuipui mo le olaga atoa.

O le a sou lagona agai i se tagata na ia fasiotia lou tama? Aisea e faigata ai ona faamagaloina se tagata faapea?

Na faamatalaina e Brother Kempton le mea na oo ia te ia:

“A o avea au o se tama laititi i tausaga amata o lo’u olaga, sa tupu mai i totonu o lo’u loto se mea tiga ma le inoino i le tagata ua iloa na fasiotia lo’u tama, aua na tautino mai lava e Tom Powers o ia na fasiotia lo’u tama.

“Ua mavae atu le tele o tausaga, ua ou tuputupu a’e, ae sa i ai pea lenei faalogona mamafa i totonu ia te a’u. Ona ou maua lea o se valaaulia ou te alu atu i se misiona i le misiona i Setete i Sasae. A o ou galue ai iina o se faifeautalai, sa vave ona tupu a’e lo’u iloa ma la’u molimau i le talalelei, aua sa faaalu uma le tele o lo’u taimi e suesue ai le talalelei ma talai atu. I se tasi aso a o ou faitau i le Feagaiga Fou, sa ou tau ane i le Mataio, mataupu e lima, fuaiupu 43 i le 45. . . .”

Faitau faatasi ma le vasega le Mataio 5:43–45.

Sa faaauau pea le faamatalaga a Brother Kempton:

“O totonu o lenei mataupu, o loo faapea mai ai fetalaiga a le Faaola e tatau ona tatou faamagalalo atu. O upu nei e faatatau ia te a’u. Sa ou faitau pea lava pea i nei fuaiupu ae tumau pea lo latou uiga o le faamagalalo atu. E lei umi se taimi talu ona tuanai ai lea mea, ae ou maua loa i totonu o le vaega e 64 o le Mataupu Faavae ma Feagaiga, fuaiupu 9 ma le 10, nisi afioga a le Alii”

Toe faitau faatasi ma le vasega le Mataupou Faavae ma Feagaiga 64:9–10.

“Ou te le iloa pe faamata ua salamo Tom Powers pe leai, ae peitai ou te iloa ua i ai nei se mea e ao ina ou faia pe a ou toe talii atu i le aiga, ma ua tonu ia te au ina ia faia lea lava mea pe a uma le misiona.

“Ina ua mavae lo’u foi atu i le aiga, sa ma fetau ma faaipoipo ma se tamaitai lalelei o le Au Paia o Aso e Gata Ai, ma na faamanuiaina e le Alii lo maua aiga i se fanau aulelei e toalima. Ua gasolo ina vave tuanai atu tausaga ma sa agalelei le Alii ia i matou, peitai sa agasala pea lo’u loto i totonu ia te au i taimi uma lava ou te manatu ai i le galuega lea ou te lei faia.

“I ni nai tausaga e lei leva talu ai, ae ua toeitiiti lava oo i le Kerisimasi, o le vaitausaga lea e matua tele ai le alofa o Keriso ma o le a ulufia ai i tatou e le agaga o le foai atu ma le faamagalalo atu, sa ma i ai ma lo’u toalua i Phoenix i Arisona i se malaga puupuu. Ina ua uma la ma mataupu i le aoauli o le aso lona lua, sa ma foi mai loa i le fale. A o ma

tietie mai, sa faaalua lo'u manatu ina ia ma ui atu i Florence ma oo atu ai loa i lo matou aiga, aua o iina tonu lea e tu ai le falepuipui o le malo. Sa vave ona malie mai lo'u toalua.

“Ma te taunuu atu ua uma taimi faatulagaina mo asiasiga, peitai sa ou alu pea i totonu ma fesili mo le pule o le falepuipui. Sa faasino mai ia te au lona ofisa.

“Ina ua uma ona faailoa atu lo'u tagata ma faaalua lo'u manao ou te fia fetai ma talanoa ia Tom Powers, sa oo i foliga o le pule o le falepuipui ni foliga faaletonu, peitai ina ua mavae sina malologa puupuu, sa faapea mai a ia, 'E mafai ona faia lona tulaga,' Ona ia auina atu lea o ni leoleo i le malae ma toe taliu mai faatasi ma Tom. Sa faailoa atu i maua, ma taitai atu i totonu o le potu lea na faia ai se talanoaga umi. Na alu le ma talanoaga i tua i le tolusefulu tausaga talu ai, i lona taeao malulu ma le nenefu o Fepuari, ua toe faamanatu le talaaga matautia o le mea na tupu. Atonu po o se itula ma le afa na ma talanoa ai. Mulimuli ane, sa ou fai atu loa, 'Tom, ua e faia se mea sese lea ua e nofoaitalafu ai i le atunuu ma o lea foi mea sese ou te lagona e tatau ona e faaauau pea ona totogi, e pei lava ona tatau ia te a'u ona faaauau pea ona totogi le tau o le tausia o a'u e aunoa ma se tama.'

Faali atu le fesoasoani vaaia 33-e, “Tom Powers ma Glenn Kempton.”

“Ona ou tu lea i luga ma faaloaloa atu lo'u lima. Ua tu foi o ia i luga ma tago mai i ai. Sa faaauau la'u tala, 'I lo'u lotu atoa, ou te faamagalo atu ia te oe mo lenei mea matautia ua tupu i o ta olaga.'

“Sa punou ifo lona ulu, ma sa ou alu ese loa mai lea mea. Ou te le iloa le lagona na oo ia te ia i le taimi lea, ou te le iloa foi le lagona o loo ia te ia i le taimi nei, ae o lau molimau ia te outou, o se mea ofoofogia ma le taua le taimi e lafoaia ai le ita ma le lotu tiga, ae sui tulaga ai le agaga faamagalo atu.

“Ou te faafetai i le alii pule i le falepuipui mo lona agalelei, ma sa ou iloa a o ou savali ifo i lalo mai le fasitepu, ua sili le faamagalo atu nai lo le tau ma sui, aua na ou faia lona mea.

“Sa oo mai ia te au se lagona lelei ma le toafilemu a o ma foi atu i lo matou aiga i le tau segisegi o le afiafi. Sa ou lafo atu lou lima o le agaga faafetai ma fusi mai lo'u toalua, o le na ia te ia le lotu malamalama, aua sa ou iloa, ua ma maua se olaga lelei ma le manuia” (siitia mai le *Vavega o le Faamagalo Atu*, i. 294–96).

Faaiuga

A tuana'i le papatisoga, o le a faamagaloina e le Faaola i tatou mai a tatou agasala pe afai tatou te salamo. Mulimuli ane, ua tatau loa ona tatou mulimuli atu i le Faaola ma faia mea uma lava ua manaomia ai i tatou e ia. O se tasi o ia mea ua manao o ia tatou te faia, o le faamagalo atu lea i isi tagata. A o tatou faamagalo atu, ua na folafola



mai ia i tatou le fiafia ma le filemu, ma aoao mai ia i tatou e faapea o ia mea uma e lua o le faamagalalo atu ma le faamagalalo mai o ni mea ia ua tatau ai mo lo tatou faaolataga e faavavau.

Lu'i

1. Pe ua i ai se mea ua e faia ua taofia ai oe mai le maua o se mafaufau toafilemu? Afai e i ai, saili nei loa ina ia iloa ona malamalama i le faamagaloga a le Faaola e ala i le salamo mai agasala ma le faamamaina o lou ola.
2. Mafaufau i lou ola. E i ai se tasi ua na faamanua ia te oe po ua faatiga ia te oe i soo se auala? Afai e i ai, ia faia soo se mea e tatau ona fai ina ia faamamaina ai lou agaga mai soo se inoino e ala lea i le faamagaloina o lea tagata i lou loto atoa.

Mau Faapoopo

Mataio 6:14–15 (o loo poloaiina ai ina ia faamagalalo atu i isi tagata)

Mataio 7:1–5 (o le a faamasinoina i tatou i lea lava faamasinoga)

Mataio 18:21–22 (faamagalalo ia fitusefulu ni fitu)

Efeso 4:32 (fefaaamagaloi)

MFF 42:88 (ia faalelei ma i latou ua faatiga ia te outou)

Sauniuniga a le Faaoga

A o lei tuuina atu lenei lesona—

1. Ia toe iloilo le *Mataupu Faavae o le Talalelei*, mataupu 19, "Salamo."
2. Suesue i tala o loo faaogaina i totonu o le lesona:
 - a. O le atalii faamaumau 'oa (Luka 15:11–32)
 - e. Alema le Itiiti (Mosaea 27 ma le Alema 36)
 - i. O le auauna le loto faamagalalo (Mataio 18:21–35)
3. Ia saunia oe faaleagaga e ala lea i lou faitauina muamua o le lesona, ma ia faaeteete i soo se faafitauli o i totonu o lou lava olaga i le itu i le faamagalalo atu.
4. Fai atu i tagata o le vasega e faitau pe tuu mai tala ma mau o loo i lenei lesona.

Meaalofa Faaleagaga

Lesona 34

O lenei lesona ua fuafuaina e fesoasoani ai ia i tatou ina ia malamalama i meaalofa a le Agaga ma ina ia sauniaina ai i tatou ina ia matua tinou e sailia ia meaalofa.

Faatomuaga

Faaali atu le fesoasoani vaaia 34-a, “E mafai e le mana o le perisitua ona puipuia i tatou mai mea leaga.”

Ia Mati o le 1961, na agi ai se afa matautia i atumotu o Toga o loo i le Pasefika i Saute. Na malepe fale. O laau tetele na mafuilufuli. O fale na vaeluaina ma felelei i le matagi. E toatele tagata na manunua. O isi na maliliu ai.

I totonu o se tasi nuu, sa faapupuu ai se aiga o le Au Paia o Aso e Gata Ai i totonu o si o latou tamai fale, ona o le fefefe mo o latou ola. I le faamatalaina o lenei mea, na faapea mai le tama o le aiga na mafai lava ona ia lagonaina le luluina o le latou fale, e peiseai o le a pa’u i lalo. Na ia iloa afai e nonofo ai pea lona aiga i totonu o le fale o le a latou feoti uma ai, ma afai foi e alu atu o ia i fafo mo se fesoasoani o le a oti ai foi. A o tauivi o ia ma se faaiuga e faia, na ia lagonaina ai le uunaiina o ia e faaoga lona perisitua e puipuia ai lona aiga.

Na oso loa i luga o le nofoa, ma tuu lona lima i le vaega o le tauluga lea e manatu o ia i le vaega muamua lea o le a alu ese. Ona ia faapea atu lea, “I le mana o le perisitua o loo ia te au, ma i le suafa o lesu Keriso, ou te fai atu ai ina ia e tumau ai pea seia uma lenei afa.” Ina ua uma ona ia faia nei upu, e lei toe lulu loa le fale, ua le toe pao foi le tauluga.

Ina ua mavae le afa, na o lona fale lava sa tu pea. (Adapted from Eric Shumway in *Stories of Insight and Inspiration*, comp. Margie Calhoun Jensen, pp. 71–73.)

Afai e tupu mai se faalavelave faafuasei i le taimi nei, faamata e te lagona ua e saunia e faaoga lou faatuatua ma lou perisitua?

Afai tatou te faamaoni ma agavaa, o le a tuuina mai e le Alii ia i tatou ni faamanuiaga faaleagaga. Na faamatalaina e Iakopo, le perofeta o le Tusi a Mamona se tulaga faapena na i ai ona tagata: “O le mea lea na matou suesue ai i le au perofeta, ma ua matou maua faaaliga e tele, o le agaga o le valoaga, ina ua ia te i matou molimau uma nei matou te maua ai le faamoemoe, e mausali lo matou faatuatua,

34-a, E mafai e le mana o le perisitua ona puipuia i tatou mai mea leaga



e moni, e i'u ina mafai e i matou ona poloai atu i le suafa o Iesu, ona usiusitai ai lea ia i matou o laau e ola, po o mauga, po o peau o le sami" (Iakopo 4:6).

O a Meaalofa a le Agaga?

O meaalofa a le Agaga o ni faamanuiaga faapitoa ia o le malamalama faaleagaga ma le mana. E taua ia mea o meaalofa aua ua tuuina mai ia i tatou e le Alii lava ia. I le avea ma meaalofa, o le a taofia mai ia i tatou seia oo i le taimi, e ala i lo tatou faatuatua, ua tatou faailoa ai lo tatou naunautai ma le tatau ai ona talia ia meaalofa.

E mafai ona e mafaufau i soo se meaalofa faaleagaga?

O nisi meaalofa a le Agaga o loo faamatalaina mai i tusitusiga paia. O le tele lava o loo lisiina atu i le 1 Korinito 12, Moronae 10:8–18, ma le Mataupu Faavae ma Feagaiga 46:8–29.

Ia valaaulia tagata o le vasega e faitau le Mataupu Faavae ma Feagaiga 46:13–26.

O a meaalofa faaleagaga o loo lisiina mai i lenei mau? (Atonu e te manao e lisi i luga o le laupapa ia meaalofa faaleagaga nei faapea ma isi o loo ta'u mai e le vasega.)

Faaaliga	Molimau
Faamasinoga tonu	Malamalama
Atamai	Aoaoga
Apoapoi	Talai atu
Faatuatua e faamalolo ai	Faatuatua e malolo ai
Vavega	Valoaga
Faaaliga vaai	Iloatinoina o agaga
Tautala i gagana	Faamatalaina o gagana

Tuu atu i le vasega e mafaufau i soo se meaalofa ua latou mauaina.

Mauaina o Meaalofa Faaleagaga

E tele ni meaalofa faaleagaga o loo i ai i le Alii ma ua naunau e tuuina mai nei meaalofa ia i tatou. Ae ao ona tatou saunia i tatou lava e taliaina. Afai tatou te saunia, o le a tuuina mai ia i tatou meaalofa ia ua silafia e le Alii ua tatou nofo sauni e talia. Ae ui i lea, e itiiti lava ni tagata, o loo fiafia i nei meaalofa uma: "Aua e le tuuina atu meaalofa uma ia te i latou taitoatasi, aua e i ai meaalofa e tele, ae tuuina atu e le Agaga o le Atua se meaalofa i tagata taitoatasi. Ua tuuina atu i nisi le tasi, ae ua tuuina atu i isi le tasi, ina ia manuia ai i latou uma" (MFF 46:11–12).

O lo tatou tiutetauave o le sailia lea po o a meaalofa ua tuuina mai ia i tatou ma ia ola agavaa e faaaogaina ia meaalofa. E masani lava ona faailoa mai meaalofa ua ia i tatou pe tatou te sailia pe a faamanuiaina i tatou i se tofiga po o se valaauga pe tatou te mauaina foi se faamanuiaga faapeteriaka. Mo se faataitaiga, o se faifeautalai ua valaauina i se atunuu mamao, e mafai ona folafolaina i ai le meaalofa o le tautala i gagana e fesoasoani ai ia te ia e aoao se gagana fou. E mafai ona faatonuina se faiaoga ina ia saili le meaalofa o le aoao

atu. E mafai e tamaiti ona mauaina se fesoasoani mai o latou tama i le faailoa lea i ai o meaalofa faaleagaga e tatau ona latou atinaeina.

Ua poloaiina i tatou e le Alii ina ia saili meaalofa e sili (MFF 46:8). Ua aofia ai meaalofa e pei o le faatuatua, molimau, faaaliga, ma le atamai. A o tatou tautalagia le taua o le maua mai o meaalofa faaleagaga sili, na saunoa mai faapea Peresitene Iosefa Filitia Samita: “O la’u faamasinoga tonu e faapea e toatele ni tagata o le Ekalesia ua papatisoina mo le faamagaloina o a latou agasala, ma o i latou foi ua faaee atu i ai aao i luga o o latou ulu mo le meaalofa o le Agaga Paia, ae peitai latou te lei maua lava lea meaalofa—o lona uiga, o le faaaliga o ia meaalofa. Aisea? Aua latou te lei tuuina atu i latou lava ina ia latou talia nei faaaliga. Latou te lei faamaualalo lava ia i latou. Latou te lei faia lava ni laasaga e saunia ai i latou mo le faatasi mai o le Agaga Paia. O le mea lea, latou te ola ai i lenei olaga e aunoa ma lea atamai” (“ ‘Seek Ye Earnestly the Best Gifts,’ ” *Ensign*, June 1972, p. 3).

E ui lava e tatau ona tatou sailia meaalofa a le Agaga, ae tatau ona tatou sailia mo ni mafuaaga tatau. E le fialia lo tatou Tama Faalelagi ia i latou o e mananao i ni faailoga e tau lava ina ia faamalieina ai lo latou loto masalosalo (tagai i le Mataio 12:39). E le tau manaomia ni sauniuniga po o se taumafaiga e moomoo ai mo ni faailoga faapena. E tatau ona tatou saili ma le faamaoni i meaalofa faaleagaga, ma o le uiga o lona mea, o le i ai lea o ni mafuaaga tatau a o tatou sauni atu e talia ia meaalofa.

E mafai faapefea ona tatou taliaina meaalofa a le Agaga?

Ina ia mauaina meaalofa a le Agaga, e tatau ona tatou faia mea nei:

FAAMAMA O TATOU OLAGA

E tatau ona tatou faamamaina o tatou olaga e ala lea i le faaauau pea ona salamo mai a tatou agasala. O se a ituaiga salamo e manaomia ai taumafaiga i aso taitasi.

USIUSITAI I POLOAIGA

E tatau ona tatou usiusitai i poloaiga a le Alii. O le usitai o se tasi lea o mea e aupito sili ona manaomia mo le taliaina o meaalofa faaleagaga. A o tatou tausia poloaiga, ona tatou agavaa lea mo meaalofa faaleagaga.

ANAPOGI

Atonu e moomia ona tatou anapogi ina ia mafai ai ona manumalo i le faamaualuga ma maua ai le lotomaualalo lea e moomia mo le mauaina o meaalofa faaleagaga. O le anapogi e fesoasoani lea ia i tatou e faamuamua o tatou manaoga faaleagaga nai lo o tatou manaoga faaletino. E fesoasoani ia i tatou e aveesea le manatu

faapito ma uunaiina i tatou ina ia tatou manatu mamafa i mea faaleagaga.

TATALO

E tatau ona tatou tatalo ma le faatuatua ina ia tatou mauaina nei meaalofa faaleagaga. Ua poloaiina e le Alii i tatou ina ia tatou ole atu muamua a o tatou te lei faamoemoe e mauaina se faamanuiaga (tagai i le Mataio 7:7–11). O ia ituaiga tatalo e manaomia ai le faatuatua—o le faatuatua o le a tatou mauaina ia meaalofa—ma le faatuatua i Le na auala mai ai meaalofa.

Ua tuuina mai e Elder James A. Cullimore nisi o fesili e mafaufau i ai a o tatou saili atu mo meaalofa faaleagaga:

“I le avea ai ma tagata o le Ekalesia, faamata ea o matua malosi atoatoa lo tatou faatuatua? O tatou fesootei ea ma le Agaga ina ia mafai ai ona faamanuiaina i tatou i nei meaalofa silisili? Tatou te talitonu ea e mafai ona faia se vavega pe mafai ona tuuina mai ai se faamanuiaga? Pe masani ea ona tatou valaau atu ea i le perisitua e pei ona tatau ai ona tatou faia ina ia faamalolo i e mamai? Pe tatou te talitonu ea e faamaloloina i tatou? E i ai ea so tatou faatuatua e mafai ona faamalolo? Pe o saunia pea ea le perisitua e tuuina atu se faamanuiaga? O le a le malosi o lou faatuatua?” (*Ensign*, Nov. 1974, p. 27).

Mafaufau i sina taimi e uiga i lou olaga. O le a se mea e tatau ona e faia ina ia saunia ai oe lava ia e mauaina meaalofa faaleagaga?

Faaagaina o Meaalofa Faaleagaga

E ui lava atonu tatou te agavaa e faaaogaina se meaalofa, ae mafai foi ona faatonuina i tatou e aua (tagai i le Alema 14:10–11). I nisi taimi, e mafai ai ona tatou maua se meaalofa ae le manaomia seia oo i le taimi e talafeagai ai.

Faaali atu le fesoasoani vaai 34-e, “Na aoaoina Iosefa Samita e le mana o le Agaga.”

I se tasi taimi na valaauina ai le Perofeta o Iosefa Samita ina ia folafola atu le talalelei i se vaega o tagata Initia Amerika. Sa lei malamalama tagata i le gagana faaPeretania, ma le mafai foi e ia ona tautala i la latou gagana. O lea na ia totogiina ai se tagata faaliliu upu mai le malo e faamatalaina ana upu i la latou gagana. Na tautala atu le Perofeta i tagata Initia mo ni nai minute, ona faaliliu lea e le faamatala upu i la latou gagana. Ina ua faaalua le le fiafia o tagata Initia i lana savali, na faailoa atu i le Perofeta o loo tauina atu e le faamatala upu mea pepelo ina ia feita ai tagata Initia ia te ia. Sa uunai ese e Iosefa le faamatala upu ma ia tuuina atu se lauga ia i latou. Sa latou malamalama i upu uma lava. (Adapted from E. Cecil McGavin, *The Historical Background of the Doctrine and Covenants*, p. 156.)



O a meaalofo faaleagaga na faaaogaina e le Perofeta o Iosefa Samita ina ua tupu lenei mea? (O le iloā o mea lilo, faaaliga, meaalofo o gagana, aoao atu.)

A o tatou talia a tatou meaalofo, e ao ina tatou faaeteete ina ia aua nei o tatou faalialiavale ona o ni mea ua tatou oo i ai pe o le tautala atu foi i le lalolagi e uiga i ia mea. (tagai i le MFF 84:65–73). E mafai ona tatou fetufaai atu ni mea faaleagaga na tatou oo i ai i tagata o o tatou aiga ma a tatou uo sili, ae tatau ona tatou manatua o a tatou meaalofo e paia ma e tatau ona tautala i ai ma le faaeteete (tagai i le MFF 63:64).

O Faamoemoega o Meaalofo Faaleagaga

Ua faailoa mai e le Alii faapea o meaalofo faaleagaga ua tuuina atu ia i latou o e alolofa ia te ia ma tausī i ana poloaiga uma (tagai i le MFF 46:9). E tatau ona tatou suesue ma manatua po o a meaalofo faaleagaga o loo avanoa mo i tatou (tagai i le MFF 46:10). E ala i le faaaogaina tatau o nei meaalofo, o le a faamaloloina mai, o le a tulia agaga leaga, o le a tatou maua faaaliga, maua le atamai, ma o le a fesoasoani ai i faifeautalāi e fesoatai i le tele o gagana eseese. E ala mai i meaalofo a le Agaga, e mafai ai e le Agaga Paia ona taitai, faamafanafana, uunai, ma aoaoina i tatou. O nei meaalofo e fesoasoani ia i tatou ina ia tatou savavali sao i luma o le Alii ma taofia i tatou mai le taitaiseseina e aoaoga sese.

O le mafuaaga tatou te sailia ai meaalofo faaleagaga e le tatau ona i ai se manatu faapito. Ua tau mai ia i tatou e Paulo e faapea e tatau ona tatou sailia ia meaalofo mo le lelei e maua ai mo isi tagata ma le Ekalesia. (Tagai i le 1 Korinito 14:12.) Ua na faatusaina le Ekalesia i se tino ina ia faaalā ai le taua o meaalofo a tagata taitoatasi i vaega uma o le Ekalesia (tagai i le 1 Korinito 12:12–31). E pei lava ona manaomia e le tino ia lima, vae, mata, ma taliga, e faapea foi ona manaomia e le Ekalesia ia meaalofo ma valaauga. O le mea lea, e tatau ai ia i tatou uma taitoatasi ona faaaogaina a tatou meaalofo ma faateleina ai a tatou galuega. A o tatou faia lea itu, o le a faamanuiaina tagata uma. (Tagai i le MFF 46:11–12.)

Sa faamatalaina e Elder Franklin D. Richards nisi o faamanuiaga e maua mai le Agaga Paia i le taimi e manaomia ai:

“Ua lolafola mai e le Faola e faapea o le a avea le Agaga Paia ma faamafanafana i tagata e tatau ai i taimi o ma’i ma le oti.

“E toatele nisi ua latou molimauina le faamafanafanaga a le agaga na oo ia i latou i taimi o le faanoanoa, ma fesoasoani ai ia i latou e sailia le filemu ma le malamalama.

“I nai vaiaso ua tuanai na ou maua ai se avanoa e feiloai ai ma ni tamaitai lelei se toalua, o ni uo mamae, o e ua malilili o laua taitoalua i se faalavelave matautia tau vaalele. Pe na ou vaaia ea o faaalā e i

laua le faanoanoa ma le loto mafatia? O le mea moni, e leai. O lo'u faatoa molimauina lea o se lototele ma se malosi uiga ese. Sa molimau mai uma i laua i le mea moni faapea sa lagona e i laua le faamafanafanaga a le Agaga, sa la ua iloa e i ai se faamoemoega i le valaauga ua tuuina atu i o laua taitoalua, ma ua laua mautinoa o le a sologa lelei mea uma ia te i laua faapea o laua aiga pe afai latou te ola i le Ekalesia ma tausia poloaiga a le Alii" ("The Continuing Power of the Holy Ghost," *Ensign*, July 1973, p. 117).

Afai e lava le taimi, ia faataga nisi o le vasega e faaali atu a latou molimau e uiga i faamanuiaga na latou maua e ala i meaalofo faaleagaga.

Faaiuga

"Ia saili ma le faamaoni i meaalofo e aupito sili ona lelei, ia manatua i taimi uma po o le a le mafuaaga na tuuina mai ai;

"Aua e moni, ou te fai atu ia te outou, ua tuuina atu ia mea mo le lelei o e alofofa mai ia te a'u ma tausia a'u poloaiga uma, o lē tausisi i le faia faapea, ina ia faamanuiaina i latou uma o e saili ma ole mai ia te a'u ae le ole mai mo se faailoga ina ia latou faaumatia ai o latou tuinanau.

"O lenei foi, e moni ou te fai atu ia te outou, ou te loto ina ia faatumauina pea i o outou mafaufau le uiga o nei meaalofo, ua tuuina atu i le Ekalesia.

"Aua e le tuuina atu meaalofo uma ia te i latou taitoatasi, aua e i ai meaalofo e tele, e tuuina atu e le Agaga o le Atua.

"Ua tuuina atu i nisi le tasi, a o isi ua tuuina atu i ai se isi, ina ia manuia ai i latou uma" (MFF 46:8–12).

Lu'i

1. Saili ia maua po o a meaalofo faaleagaga ua uma ona tuuina atu ia te oe po o le tuuina mo oe. Faaauau pea ona faamamaina lou olaga e ala i le salamo ma le usiusitai, ma ia anapogi ma tatalo i le agaga faamaulalo ina ia iloa ai po o a isi mea e tataua ona e faia e saunia ai oe e te taliaina meaalofo faaleagaga.
2. *Tama*: Fesoasoani i lau fanau ina ia latou iloaina a latou meaalofo ma atinaeina ia meaalofo.
3. *Alii talavou*: Saili i fautuaga a ou matua ma taitai ina ia fesoasoani ia te oe i le atinaeina o au meaalofo faaleagaga.

Mau Faapoopo

Ioane 11:22 (fesili i le Atua mo ana meaalofo)

Galuega 2:17–18 (ia maua e tupulaga talavou meaalofo)

1 Korinito 7:7 (ua tofu le tagata ma lana lava meaalofo e tataua ai)

1 Timoteo 4:12–16 (aua e te faatalale i lau meaalofa)

Iakopo 1 :17 (o meaalofa e mai le Atua)

Alema 9:21 (e tele meaalofa sa i tagata Sa Nifae)

Sauniuniga a le Faiaoga

A o lei tuuina atu lenei lesona

1. Toe iloilo le *Mataupu Faavae o le Talalelei*, mataupu 22, “O Meaalofa a le Agaga.”
2. Fai atu i tagata o le vasega e faitau pe faamatala mai tala ma mau o loo i lenei lesona.

Fausia o le Malo o le Atua

Lesona 35

O le lesona lenei o le a tatau ona uunaiina ai i tatou ina ia faia la tatou vaega i le fausiaina o le malo o le Atua.

Faatomuaga

Sa faamatalaina talu ai e Elder Gordon B. Hinckley se tala e uiga i se alii ofisa talavou ma le poto o le fuavaa mai Asia na malaga atu i le lunaite Setete mo le faateleina o lona atamai. A o aoaina o ia i le Fuavaa a le lunaite Setete, sa feiloai ai lenei alii talavou ma ni tagata o le Ekalesia. Ona o lana talosaga, sa latou aoaina ai o ia e uiga i le talalelei. Sa pa'i atu le Agaga i lona loto, ma ua papatisoina ai o ia.

Fai mai Elder Hinckley:

“Na faailoa mai lea alii ia te au ae ua toeitiiti lava toe talii atu i lona atunuu. Sa ma talatalanoa i nei mea, ona ou faapea atu lea, 'O ou tagata e le o ni Kerisiano. E te malaga mai se nuu sa pito i sili ona faigata i tagata Kerisiano. O le a le mea o le a tupu pe a e toe talii atu nei i lou aiga ma ua avea oe ma Kerisiano, aemaise lava o se Kerisiano Mamona?’

“Sa le mautonu ona foliga, ma ia tali mai, 'O le a le fiafia lo'u aiga. Ma ou te manatu o le a latou tulieseina au. O le a latou faauigaina au o se tagata oti. A o lo'u lumanai ma la'u galuega, ou te manatu o le a tapunia avanoa uma mo a'u.’

“Sa ou fesili atu, 'Ua e naunau ea e te totogiina se tau tele faapena mo le talalelei?’

“O ona mata lanu uli, ua susu i ona loimata, o loo susulu mai pea i ona foliga aulelei enaena a'o ia tali mai, 'O le mea moni lenei, a ea?’

“Ona o lo'u matamuli ina ua ou faia lea fesili, sa ou tali atu ai loa, 'loe, o le mea moni lenei.’

“Ona tali mai lea o ia, 'O le a la le isi mea e popole ai?’ ” (“The True Strength of the Church,” *Ensign*, July 1973, p. 48).

Aisea na tuuese ai e lenei alii talavou lona aiga ma lana galuega mo le malo o le Atua? (Aua na ia iloa o le talalelei e sili atu lona taua nai lo se isi lava mea.)

O lo Tatou Tiutetauave le Fausia o le Malo

Ia tuu se pepa lautele o loo i ai le upusii lenei i luma o le vasega, po o le tusi foi o upu i luga o le laupapa.

Na saunoa mai Polika laga i se tasi taimi: “O le malo o le Atua e na o le pau lava lea o le mea e sili atu ona taua nai lo mea uma. O isi lava mea e leai sona aoga tatou te maua ai, tusa lava po o i lalo nei po o le ola atali” (*Discourses of Brigham Young*, p. 444).

O le a le malo o le Atua?

Na saunoa mai faapea Peresitene Iosefa F. Samita, “O le malo o le Atua o le faalapotopotoga lea a le Ekalesia a Iesu Keriso o le Au Paia o Aso e Gata Ai, lea o loo pule faamalumalu ai le Alo o le Atua, ae le o se tagata” (*Gosples Doctrine*, p. 72).

Talu mai le taimi na toe aumaia ai le malo o le Atua i le lalolagi, sa i ai i tagata taitoatasi uma le tiutetauave ina ia vaavaai ua faaauau ona tupu. O i tatou uma taitoatasi ua noatia i tatou i se tiutetauave ina ia faia mea uma tatou te mafaia e avatuina i tagata se malamalama o le talalelei ma faamalosia i latou ua avea ma tagata o le Ekalesia. O la tatou galuega o le galuega a le Atua, ina ia faataunuu le faaofuina o le tagata i le tino ola pea ma le ola e faavavau (tagai i le Mose 1:39). A o tatou fesoasoani atu i le fausiaina o le malo o le Atua, ua le gata ina tatou saunia le lalolagi mo le toe afio mai o le Faaola, ae ua tatou fesoasoani foi i o tatou uso ma tuafafine ina ia latou maua le ola e faavavau. E leai se mea e sili atu ona taua nai lo lenei galuega.

I le fausiaina o le malo o le Atua, e ao ina tatou manatua o le aiga, o le faavae autu lea o le malo. O le mea moni lava o le faamoemoe autu o le malo o le Atua ina ia faaeaina aiga i totonu o le malo o le lagi (tagai i le Aperaaamo 2:6–11; MFF 65). E tatau lava ona tatou mautinoa i taimi uma, o le mea lea ia tatou le faatalale ai i o tatou aiga a o tatou auauna atu i totonu o le Ekalesia ma fausiaina le malo o le Atua i lenei lalolagi. Ua manino le fautuaga a le Alii: “Ai se ao ina faia mea e tausii ai lona lava aiga, ia tuu atu ia te ia e tausii, na te le mau mauina ai foi lona pale; ma tuu atu ia te ia e galue i le Ekalesia” (MFF 75:28).

O le Tulafono o le Faapaiaga

Ina ua papatisoina i tatou, sa tatou faia ni folafolaga i le Alii. Mo le mafuaaga e tasi, sa tatou folafola atu o le a “tatou auauna ia te ia ma tausii i ana poloaiga” (Mosaea 18:10). Ina ua tatou mauaina o tatou faaeega paia i totonu o le malumalu o le Alii, sa tatou faia ai foi ni folafolaga paia. O se tasi o ia folafolaga o le a tatou ola lea e tusa ai ma le tulafono o le faapaiaga.

E tusa ai ma le tulafono o le faapaiaga, tatou te tuuina atu o tatou taimi, o a tatou taleni, ma a tatou meatotino mo le fausiaina o le malo o le Atua, e pei ona manaomia ai i latou. Ua faaigoaina e le Alii lenei tulafono o se tulafono faaselesitila ma ua faaalua ai e faapea e matua taua tele lea tulafono i lana galuega i le lalolagi.

Faitau le Mataupu Faavae ma Feagaiga 105:1–5 ma le 88:22.

Aisea e tatau ai ona tatou malamalama i le tulafono o le faapaiaga ma naunau e ola ai?

E tusa ai ma lenei tulafono, na faapea mai le Perofeta o Iosefa Samita, “O se lotu na te le manaomia le ofoina atu e fai ma taulaga mea uma, e le o lava se mana e faatupuina ai le faatuatua e manaomia [e taitaiina atu] ai i le ola ma le faaolataga” (*Lectures on Faith*, 6:7).

E pei ona faamatalaina mai e le Perofeta, e tataua ona tatou atinae se ituaiga o faatuatua lea o le a taitai atu ai i tatou i le ola e faavavau. O sea faatuatua e maua mai pe a tatou faamuamua mea o le malo o le Atua i totonu o o tatou olaga. O le faia o ia mea o le a faaali atu ai i le Alii o ia ma lona malo e sili atu ona taua ia i tatou nai lo mea o lenei lalolagi. E fesoasoani ai foi ia i tatou ina ia atinae se alofa mo isi tagata atoa foi ma le malosi faaleagaga. Ona o lenei la mafuaaga, ua poloaiina ai i tatou e le Alii ina ia auauna atu ia te ia ma o tatou loto atoa, mafaufau atoa, manatu atoa, ma le malosi atoa (tagai i le MFF 4:2).

Ola i le Tulafono o le Faapaiaga i Aso Nei

E ui lava o le tulafono o le faapaiaga o loo manaomia ai i tatou ina ia tatou loto e tuuina atu mea uma ua tatou maua i le Alii mo le fausiaina o lona malo, ae “ua le masani ai i taimi uma ona valaauina i tatou ina ia tatou ola ia talafeagai ai ma le tulafono atoa o le faapaiaga” (Bruce R. McConkie, *Ensign*, May 1975, p. 50). O le tulaga lenei o loo i ai le Ekalesia i ona po nei.

E ui lava tatou te le o ola atoatoa i le tulafono o le faapaiaga i le taimi nei, e mafai faapefea ona tatou faaali atu lo tatou naunau e ola ai?

O nisi nei o mea e mafai ona tatou faia i ona po nei ina ia ola ai i le tulafono o le faapaiaga:

- E mafai ona avea i tatou ma faifeautalai i o tatou tuaoi, uo, aiga, ma isi lava tagata.
- E mafai ona tatou faia ni sailiga o gafa ma galuega faalemalumalusa.
- E mafai ona tatou auauna ma le faamaoni i o tatou valaauga i le ekalesia.
- E mafai ona tatou totagiina se sefuluai faamaoni ma foai atu isi taulaga e pei ona manaomia ai e le Alii.
- E mafai ona tatou tatalo atu mo le taitaiga e iloa ai le mea o loo finagalo ai le Alii.
- E mafai ona tatou tausia o tatou aiga ma fesoasoani i isi o loo fia maua le fesoasoani.

Na faapea mai Iosefa Samita: “Ina ia faapaiaina e se tagata sana meatotino . . . i le Alii, e le sili atu lea pe itiiti ifo nai lo le fafagaina o tagata fia aai, faaofu i e ua le lavalava, asiasi atu i e ua lei ni a latou tane, ma e ua lei ni tama, o e mamai, ma e puapuagatia, ma le faia o mea uma na te mafaia e fesoasoani ai i o latou puapuaga, ma ia

auauna atu o ia ma lona aiga i le Alii” (*Teachings of the Prophet Joseph Smith*, p. 127).

O se avanoa lelei le faapaiaina o o tatou taimi ma taleni mo le fausiaina o le malo o le Alii. E le o se tagata na fai mai ia i tatou ina ia tatou loto e tuuina atu mea uma i le malo o le Atua. “O le siufofoga lava o [Keriso] na valaauliaina i tatou ina ia tatou faapaiaina o tatou taimi, o a tatou taleni, ma mea tatou te maua ina ia faaaauuina ai le galuega. O lona siufofoga lava o loo valaau mai mo le auaunaga ma le osigataulaga. O lana galuega lenei. O ia . . . o loo taitaia ma faatonutonuina le taunuuga o lona malo” (Bruce R. McConkie, *Ensign*, May 1975, p. 52).

Faapaiaina o Taimi, Taleni, ma Mea Tatou te Maua

TAIMI

E faapefea ona tatou faaaogaina o tatou taimi e fesoasoani ai i le fausia o le malo o le Atua?

Ua tofu i tatou taitoatasi ma le luasefulufa itula i aso taitasi, ae peitai e eseese uma le faaaogaina—ae o lona faaaogaina e sili atu lona taua. O nisi o i tatou e faamaimau le taimi; o nisi e le maopoopo le faatulagaina lelei ina ia faia mea uma tatou te mananao ai mo o tatou aiga, o le Ekalesia, o a tatou galuega, ma o tatou nuu. Ua uma ona saunoa mai Peresitene Spencer W. Kimball afai tatou te faatulagaina ma le tatau o tatou taimi, “o le a maua le taimi e auauna atu ai i faalapotopotoga ma korama a le Ekalesia; taimi mo le galuega faafaifeautalai; o le taimi e avefa ai ma peresitene o le korama, taitai o ausilali, epikopo, peresitene o le Aualofa, [po o] se faiaoga” (*O le Vavega o le Faamagalo Atu*, i. 256).

TALENI

E faapefea ona tatou faaaogaina a tatou taleni e fausia ai le malo o le Atua?

E tofu uma i tatou taitoatasi ma taleni; ua fetalai mai ai le Alii (tagai i le MFF 46:11). Na saunoa mai faapea Polika laga: “O le a se mea aupito sili ona lelei e tatau ona e tuuina atu mo le malo o le Atua? O taleni ia na tuuina mai e le Atua ia te oe. E fia? O taleni taitasi uma lava” (*Discourses of Brigham Young*, p. 445).

O le tala lenei, na faamatalaina e Sister Joann Ottley, e faailoa mai ai pe faapefea ona mafai ona tatou auauna atu i le Alii ma a tatou taleni: “Na tuuina mai e le Alii i la’u tane ma a’u ni taleni faapitoa o le musika. Ua ma faaaluiina toetoe lava o o maua olaga atoa e suesue ai ma faaleleia nei meaalofa. E tele ni faaiuga e ao ina ma faia e uiga i lo latou faaaogaina. A o ma i ai i Europa i le aoga, na ma iloa ai o loo ia te i maua se faaiuga faigata ma sili ona taua e ao ona faia. Na ma iloa lelei afai ma te nonofo mau ai i Europa o le a tele ni o ma avanoa e faamanuiaina ai i maua. Ae ui i lea, o le mea na faasilisili i o ma manatu, o le faia lea o le mea na finagalo le Alii ma te faia. Sa ma loto

ina ia ma usiusitai, a o tala atu o lona usiusitai, sa ma moomoo ai ina ia faaaogaina i maua e le Alii i le fausiaina o lona malo i lenei lalolagi.

“Sa ma anapogogi e le aunoa ma tatalo soo mo le taitaiga a le Agaga ina ia iloa le finagalo o le Alii. Na maua e i maua le tali a o faia se sauniga faamanatuga i le faaiuga o se vaiitami o le anapogi. Na maua e i maua uma le faatonuga lava e tasi mai le Agaga Paia—e faapea o la ma galuega o loo i ai lea i lo ma atunuu. E tatau ona ma toe foi atu i le lunaite Setete.

“Ona sosoo ai lea ma ni masina se tele o saililiga, sauniuniga, ma suega. Ona faia lea e le Alii se auala ina ia mafai ai ona ma toe foi atu i le Aai o Sate Leki. Sa avea a’u ma se tasi o le Afaipese a le Tapeneko ae faigaluega la’u tane i le Matagaluega o Musika a le lunivesite o luta.

“I se taimi puupuu mulumuli ane ai, sa valaauina ai la’u tane e le Au Peresitene Sili o le Ekalesia ina ia avea ma tagata e taitaia le Afaipese a le Tapeneko. E moni lava sa saunia i maua e le Alii mo se galuega faapitoa.

“O le mea moni, o o ma taimi, taleni, ma mea uma na ma umia e le o ni a mea mea ia, a o mea a le Alii. O le fiafiaga aupito sili e mafai ona tatou seleseleina i lenei lalolagi o le faaaogaina lea o ia mea i le fausiaina o le malo o le Atua” (i le *O le Tamaitai o le Au Paia o Aso e Gata Ai, Vaega E*, Lesona 10, “Fausiaina o le Malo o le Atua”).

O a ni uiga sa ia Brother ma Sister Ottley na mananao ai ina ia faaaogaina a la taleni e fausia ai le malo? (Sa laua talitonu o a la taleni e mai le Alii ma o mea foi a le Alii.)

Fai atu i le vasega e lisi mai nisi taleni i luga o le laupapa. Ia talanoaina pe mafai faapefea ona faaaogaina nei taleni taitasi i le fausiaina o le malo o le Atua.

Fai atu i le vasega e mafaufau e uiga i a latou lava taleni ma mafaufau pe faapefea ona mafai ona latou faalauteleina le galuega a le Alii e ala lea i lo latou fetufaai atu o a latou taleni.

MEA TOTINO

E ui lava ina tuuina mai e le Alii ia i tatou mea uma ua tatou umia, ae o nisi taimi tatou te iloa ai ua faigata tele ona tuuina atu mea ua tatou umia e fesoasoani ai i lana galuega. O lo tatou natura lava o le manatu faapito, ma seia vagana ai ua i ai se alofa moni mo o tatou uso a tagata, o lo Tama o i le Lagi, ma lona Alo o lesu Keriso, ona faatoa faaaogaina lea o a tatou mea totino, e aofia ai tupe, e faia ai ni mea lelei. O se tala i le Feagaiga Fou o loo faaalua mai ai le faigata i nisi taimi—ae ese atu lona taua—o le naunau e faamatuu atu mea totino ua tatou umia i lenei lalolagi.

Na alu ane se taulealea ia lesu i se tasi aso ma faapea ane, “O le a se mea ou te faia ina ia ou maua ai le ola e faavavau?”

Sa tali atu lesu e faapea e tatau ona ia tausi i poloaiga, e le tatau ia te ia ona mulilua, fasioti tagata, gaoi, molimau pepelo, po o le taufaasese i isi tagata. Na fai atu foi i ai lesu e tatau ona ava i lona tama ma lona tina.

Sa tali mai lenei taulealea talavou e faapea ua uma ona ia faia nei mea uma lava. Sa tali atu lesu, “E tasi le mea e le o ia te oe. Ina alu ia, ma faatau atu au mea uma, ma avatu i e matitiva, ona e maua lea o le oa i le lagi, i le e sau ai ma ave le satauro, ma e mulimuli mai ia te au.” Ina ua faalogo le taulealea talavou lenei i lea mea, ona alu ese ai lea o ia ma le tiga, aua ua tele ana oloa. (Tagai i le Mareko 10:17–22.)

O nisi taimi, e pei o lenei taulealea mauoa, ua tatou le nofo sauni e tuuina atu ni mea ua ia i tatou i le Alii. I nisi foi taimi tatou te lagona ai e peiseai ua tatou tuuina atu ni mea e sili atu nai lo ni mea tatou te mafaia. E silafia e le Alii lo tatou tulaga, ma e faapea foi ona ia faia mo i tatou. O i latou ia e le mafai ona tuuina atu se mea latou te mananao ina ia tuuina atu, fai mai le Tupu o Peniamina:

“O lenei, ou te fai atu i e matitiva, o outou ua le i ai ni mea, ae ui i lea, ua lava ina ia outou tumau ai i lea aso ma lea aso, ma tautala atu ia te outou uma o e faafiti i le tagata aisi o lo ua leai ni mea ia te outou. O lo’u manao ia outou fai ifo i o outou loto, ua ou le avatu aua ua le ia te a’u ni mea, ana i ai po ua ou avatua.

“O lenei foi, afai tou te fai ifo lenei upu i o outou loto, ma tutumau ma le le agasala” (Mosaea 4:24–25).

E tusa lava po o le tupe, taimi, po o taleni, e tatau lava ona tatou fiafia e tuuina atu i le Alii mea uma ua ia i tatou. Afai e faigata ona tuuina atu i le taimi muamua, e moomia lava lo tatou taumafai. A tatou faia faapea, o le a tatou iloaina le atinaeina o lo tatou faatuatua i le Alii, o le alofa i isi, ma se naunautaiga ina ia tuuina atu mea uma ua ia te i tatou e fesoasoani ai i le fausiaina o le malo o le Alii.

Faaiuga

Ua i ai so tatou tiutetauave i le avea ai ma tagata O le Ekalesia a lesu Keriso o le Au Paia o Aso e Gata Ai ina ia fausia le malo o le Atua. E mafai ona tatou faataunuaina e ala lea i lo tatou tausia o la tatou folafolaga e auauna atu i le Alii ma o tatou loto atoa, mafaufau atoa, manatu atoa, ma le malosi atoa. O le uiga o lenei mea e faapea e tatau ona tatou nofo saunia e tuuina atu i soo se taimi, taleni, ma mea totino o loo manaomia mai ia i tatou e fausia ai le malo o le Atua. A tatou faia faapea, ua tatou atinaeina lo tatou faatuatua ma le alofa ma faaali atu i le Alii o lea tatou te faamuamua lona malo. O le ola i le tulafono faasesitila—o le faapaiaina lea o mea uma ua ia te i tatou mo le fausiaina o le malo o le Atua—e manaomia tele pe afai e fai ma o tatou tofi le malo selesitila.

Lu’i

Ia faaalu se taimi o le aso e mafaufau ai e uiga i lou nofo sauni e tuuina atu na o mea ua manaomia e le Alii mai ia te oe. Saili po o le a le lelei o lou ofoina atu o ou taimi, taleni, ma tupe mo le galuega a le Alii.

Mau Faaopoopo

Tanielu 2:44 (o le a agai pea i luma le malo o le Atua)

Luka 12:16–20 (faataoto i le mauoa faavalevatea)

Galuega 2:44–45 (o uluai Kerisiano sa tutusa mea na latou maua)

1 Nifae 13:37 (fesoasoani ina ia atinae ai Siona)

Iakopo 2:18–19 (ia muai saili le malo o le Atua ae le o le tamaoaiga)

4 Nifae 1:3 (sa tutusa mea uma na maua e tagata sa Nifae)

MFF 42:29–36 (ia avatu i e matitiva)

Sauniuniga a le Faiaoga

A o lei tuuina atu lenei lesona—

1. Ia faia se pepa lautele o le upusii a Polika laga o loo maua i le itulau 293 o lenei tusi lesona (po o le tusi lolomi foi i luga o le laupapa i luma o le vasega).
2. Faitau le *Mataupu Faavae o le Talalelei*, lesona 34, "Atinaeina o a Tatou Taleni."
3. Toe iloilo le lesona 19 o lenei tusi lesona.
4. Fai atu i tagata o le vasega e faitau pe faamatala mai tala ma mau o loo i lenei lesona.

Tusi na Sii Mai ai Faamatalaga

- Allen, James. *As a Man Thinketh*. Salt Lake City: Bookcraft.
- Ballard, Melvin J. *Sermons and Missionary Service of Melvin J. Ballard*. Salt Lake City: Deseret Book Co., 1949.
- Benson, Ezra T. *God, Family, Country—Our Three Great Loyalties*. Salt Lake City: Deseret Book Co., 1974
- Church Educational System. *Life and Teachings of Jesus, New Testament Volume 1*. Salt Lake City: The Church of Jesus Christ of Latter-day Saints, 1974.
- O le Ekalesia a Iesu Keriso o le Au Paia o Aso e Gata Ai. *Tiute ma Faamanuiaa o le Perisitua, Vaega A*. Salt Lake City: The Church of Jesus Christ of Latter-day Saints, 1979.
- . *Mataupu Faavae o le Talalelei*. Salt Lake City: O Le Ekalesia a Iesu Keriso o le Au Paia o Aso e Gata Ai, 1978.
- . *O le Tamaitai o le Au Paia o Aso e Gata Ai, Vaega E*. Salt Lake City: O Le Ekalesia a Iesu Keriso o le Au Paia o Aso e Gata Ai, 1980.
- . *Teaching Personal and Family Preparedness*. Flipchart. Salt Lake City: The Church of Jesus Christ of Latter-day Saints, 1978.
- Covey, Stephen R. *Spiritual Roots of Human Relations*. Salt Lake City: Deseret Book Co., 1970.
- Durrant, George D. *Love at Home, Starring Father*. Salt Lake City: Bookcraft, 1973.
- Evans, Richard L. *Richard Evans' Quote Book*. Selected by Bruce B. Clark. Salt Lake City: Publishers Press, 1971.
- Featherstone, Vaughn J. *A Generation of Excellence: A Guide for Parents and Youth Leaders*. Salt Lake City, Bookcraft, 1975.
- Fletcher, Harvey. *The Good Life*. Salt Lake City: Deseret Sunday School Union, 1961.
- Grant, Heber J. *Gospel Standards: Selections from the Sermons and Writings of Heber J. Grant*. Compiled by G. Homer Durham. Salt Lake City: Deseret News Press, 1969.

-
- Hanks, Marion D. *The Gift of Self*. Salt Lake City: Bookcraft, 1974.
- Hartshorn, Leon R., comp. *Classic Stories from the Lives of Our Prophets*. Revised and enlarged. Salt Lake City; Deseret Book Co., 1975.
- Hinckley, Bryant S. *The Faith of Our Pioneer Fathers*. Salt Lake City: Deseret Book Co., 1956.
- Jensen, Margie Calhoun, comp. *Stories of Insight and Inspiration*. Salt Lake City: Bookcraft, 1976.
- Kimball, Edward L. and Andrew E. Kimball, Jr. *Spencer W. Kimball: Twelfth President of The Church of Jesus Christ of Latter-day Saints*. Salt Lake City: Bookcraft, 1977.
- Kimball, Spencer W. *Faith Precedes Miracles*. Salt Lake City: Deseret Book Co., 1972.
- _____. *O le Vavega o le Faamagalo Atu*. Salt Lake City: Bookcraft, 1969.
- Lee, Harold B. *Ye Are the Light of the World*. Salt Lake City: Deseret Book Co., 1974.
- McConkie, Bruce R. *Mormon Doctrine*. 2nd ed. Salt Lake City: Bookcraft, 1966.
- McKay, David O. *Gospel Ideals*, 2nd printing. Salt Lake City: Improvement Era, 1954.
- _____. *Secrets of a Happy Life*. Compiled by Llewelyn R. McKay. Salt Lake City: Bookcraft, 1967.
- _____. *Stepping Stones to an Abundant Life*. Compiled by Llewelyn R. McKay. Salt Lake City: Book Craft, 1971.
- Nibley, Preston, comp. *Inspirational Talks for Youth*. Salt Lake City: Deseret News Press, 1941.
- Packer, Boyd K. *Teach Ye Diligently*. Salt Lake City: Deseret Book Co., 1975.
- Romney, Marion G. *Look to God and Live: Discourses of Marion G. Romney*. Compiled by George J. Romney. Salt Lake City: Deseret Book Co., 1971.
- Sill, Sterling W. *Leadership*. 3 vols. Salt Lake City: Bookcraft, 1958.
- Smith, Joseph. *History of The Church of Jesus Christ of Latter-day Saints*. 7 vols. 2nd ed. Rev. Edited by B. H. Roberts. Salt Lake City: The Church of Jesus Christ of Latter-day Saints, 1932–51.
- _____. *Teachings of the Prophet Joseph Smith*. Selected by Joseph Fielding Smith. Salt Lake City: Deseret Book Co., 1938.

-
- Smith, Joseph F. *Gospel Doctrine*. 5th ed. Salt Lake City: Deseret Book Co., 1939.
- Smith, Joseph Fielding. *Doctrines of Salvation*. 3 vols. Compiled by Bruce R. McConkie. Salt Lake City: Bookcraft, 1954–56.
- . *Joseph Fielding Smith—A Prophet among the People*. Edited by J. M. Heslop and Dell R. Van Orden. Salt Lake City: Deseret Book Co., 1971.
- . *Seek Ye Earnestly*. Compiled by Joseph Fielding Smith, Jr. Salt Lake City: Deseret Book Co., 1970.
- Speeches of the Year*. Published annually by Brigham Young University. Provo: Brigham Young University Press.
- Talmage, James E. *Jesus the Christ*. 3rd ed. Salt Lake City: The Church of Jesus Christ of Latter-day Saints, 1916.
- Tanner, N. Eldon. *Seek Ye First the Kingdom of God*. Compiled by LaRue Sneff. Salt Lake City: Deseret Book Co., 1973.
- Taylor, John. *The Meditation and Atonement*. Salt Lake City: Deseret News Co., 1882.
- Woodruff, Wilford. *Discourses of Wilford Woodruff*. Selected by G. Homer Durham. Salt Lake City: Bookcraft, 1946.
- Young, Brigham. *Discourses of Brigham Young*. Selected by John A. Widtsoe. Salt Lake City: Deseret Book Co., 1941.

Faasino Upu

A

Aiga

e mafai e gaioioiga ona faamalasia,
124–26

gaioioiga, taua o, faamatalaga mai ia

Tavita O. Makei, 124

aoaoga i, 230

faavavau, faamatalaga mai ia Iosefa
Filitia Samita

fiafia faatasi o se, 122–29

faamatalaga i le taua o le, mai ia

Marion D. Hanks

fesoasoani, i tagata e atinae taleni,
174–76

e mafai e le Agaga Paia ona taitaiina,
105–8

taua o le, 124

faamatalaga e uiga i le, mai ia N.

Eldon Tanner

taua o le faapaleniina, galue ma le

fiafia, faamatalaga e uiga i ai, mai ia

Franklin D. Richards

taua o, fesoootaiga, 64

taitaiga o, 104–10

faatulagaina, galuega, 132–34

fuafuaina, gaioioiga, 126–27

filifilia, sini, 151–53

manaoga faaleagaga o, e faafetaiaia
e le tama, 102

faamatalaga i ai, mai ia Marvin J.

Ashton, 64

faamalasia, e ala i afiafi faaleaiga,
111–21

sauniga o le malumalu mo, 74–75

taua o le, galue, 130–32, 134–36

faamatalaga e uiga i ai, mai ia Tavita
O. Makei

faamatalaga e uiga i ai, mai ia Loren
C. Dunn

Faamatalaga e uiga i ai, mai ia Neal A.
Maxwell

Aoao, tiute o le, 40

Aoaiina o fanau, 167

A'oga, taua o le auai, 226

Aoaoga

Uunaiina tagata o le Ekalesia ina ia maua
le aoaoga, 224–26

faamatalaga e uiga i ai, mai ia N.

Eldon Tanner, 224

faaaauu i le olaga atoa, 226

i le aiga, 230

tala e faamanino mai ai, mai ia

Marion D. Hanks

faamatalaga e uiga i ai, mai ia

Richard L. Evans, 231

ma sauniuniga a le tagata lava ia ma
le aiga, 65

Aoaoga i Aiga

taua o, 48–53

faamoemoega o, 48

faamatalaga e uiga i ai, mai ia Boyd

K. Packer

Augatuaa

faamaumauga o, 72–74

sauniga o le malumalu mo, 74–76

Au Peresitene

ki o le perisitua o le aia a, 7, 16

faamatalaga e uiga i ai, mai ia Iosefa

F. Samita

faamatalaga e uiga i ai, mai ia Iosefa

Filitia Samita

sosoo atu i ai, o le Ekalesia, 9

Autalavou, manaoga o le, faamatalaga e
uiga i ai, mai ia Marion D. Hanks, 120

Auaunaga,
tulaga o le, 183–83, 195–96,
199–200
faauigaina e Spencer W. Kimball, 195
taitai ina ia faataunuaina, 183
faamatalaga e uiga i ai, mai ia Iosefa
Samita, 197

Afiafi faaleaiga
taitaiga, 116–19
faamoemoega o, 111, 119–121
faamatalaga e uiga i ai, mai ia Marion
D. Hanks, 120
faamalosiā le aiga e ala i, 111–21

Agaga. *Tagai* i le Agaga Paia

Agaga Paia
e mafai ona taitaiina le aiga, 105–8
mulimuli i le taitaiga a le, 106–7
meaalofa o le, tuuina atu e ala i le
faaee atu o lima, 31
taua o le faalogo i musumusuga a le,
104–5
faaitaitaiga o, faamatalaina e Bruce R.
McConkie, 104
faamatalaga e uiga i ai, mai ia Iosefa
Fillitia Samita, 107

Agaga Paia, meaalofa o le
faasologa o le tuuina atu, 31, 42–43
faamoemoega o le, 27–31

Agaga Sa. *Tagai* i le Agaga Paia

Agamalu, uiga o se taitai lelei, 182

Alii, taua o le alofa ma le auauna atu, 237

Alofa, manaomia mo, 99
faamatalaga e uiga i ai, mai ia Loren
C. Dunn

Alofa le faatuaaia, uiga o se taitai lelei,
182

Alofa mama, uiga o se taitai lelei, 182–83

Alualu i luma
faavavau, lagolagoina e sini, 154–58
faavavau, pulea e le tagata o ia lava,
162

Anapogi, faamoemoega o le, 236

Aperaamo, folafolaga i fanau a, 3

Aposetolo
umaina ki o le perisitua, 7–9
sinia o loo soifua, e na o ia e
faaaogaina uma ki o le perisitua, 9

Aso Sapati
tausia, ia paia, 247–52
faamatalaga e uiga i ai, mai ia
Spencer W. Kimball
paia o le, 247–48
faamatalaga e uiga i ai, mai ia Ezra
Taft Benson, 251

Arona, atalii o, 3

E

Elia
ki na tuuina mai e, 72, 77
faamatalaga e uiga i ai, mai ia
N. Eldon Tanner
agaga o, 72

F

Faaamea
tiutetauave o le perisitua, 89–94
faamatalaga e uiga i ai, mai ia Delbert
L. Stapley
faamatalaga e uiga i ai, mai ia Harold
B. Lee, 89

Faaaliga mo le Ekalesia atoa e mauaina
na o le Perisitene lava, 12

Faaee atu o lima mo le meaalofa o le
Agaga Paia, 31

Faaigoaina ma le faamanuiaina o fanau,
34–36, 42

Faaiipoipoga, faamoemoega o le
malumalu, 33–34

Faola
lesu Keriso o le, 233–35
manaomia mo le, 233–34

Faauga, faasologa mo le, 43

Faauga
i le Perisitua Mekisateko, 31
i tofiga o le perisitua, 44

Faamai,
mafuaaga o, 210–11
teteina o, 211–12

- Faamagalo, e manaomia, e tagata uma, 279–80
faamatalaga e uiga i ai, mai ia Spencer W. Kimball, 280
- Faamagaloga
tuuina atu ma le mauaina, 276–84
aumaia ai faamanuiaga, 277–79
aumaia ai le filemu, 280–82
tala o loo faamatala mai ai, mai ia Spencer W. Kimball, 280–82
- Faamanuia e mamai, 36
- Faamanuiaga
a le tama, 46
faataitaiga o le, saunia e Ezra Taft Benson, 108
faamatalaga e uiga i ai, mai ia Ezra Taft Benson, 16
faamatalaga e uiga i ai, mai ia A. Theodore Tuttle, 16
o le taitaiga ma le faamafanafanaga, 36–37, 46
peteriaka, 36
- Faamanuiaga faaletama,
e mafai ona fesoasoani i tagata o le aiga e atinae ai taleni, 176
faataitaiga o, mai ia Ezra Taft Benson, 108
faasologa mo le tuuina atu, 46
faamoemoega, 36
faamatalaga e uiga i ai, mai ia Ezra Taft Benson, 16
faamatalaga e uiga i ai, mai ia Theodore Tuttle, 16
- Faamanuiaina e se tasi e umiaina ia ki, 11
- Faamanuiaga faapeteriaka, 36
- Faamaoni
faamanuiaga o le, 264–66
faamatalaga e uiga i ai, mai ia Howard W. Hunter, 266
tala e faamatala ai, mai ia Spencer W. Kimball, 264–65, 266–67
uiga o le, 261
i le aiga, 263–64
- faamatalaga e uiga i ai, mai ia N. Eldon Tanner, 263
taua o le, 260–63, 267
faamatalaga e uiga i ai, mai ia Brigham Young, 263
tala e faamatalaina ai, mai ia Gordon B. Hinckley, 262
tala e faamatalaina ai, mai ia Howard W. Hunter, 260
tala e faamatalaina ai le taua o le, O. Leslie Stone, 261–62
ma taitai o le perisitua, 263
- Faamaloloina mai se valaauga e tuuina atu e le taitai pule faamalumalu, 11
- Faamalositino ma sauniuniga a le tagata ma aiga, 62
- Faamasinoina
ma le auunaga, 183–84
mo filifiliga, 244–45
- Faamanatuga
faasologa o le taulimaina, 43
faamoemoega ma le uiga o le, 27, 236
- Faamoemoega i le olaga, manaomia mo le, 99–10
- Faapaiaga, tulafono o le, 294–98
faamatalaga e uiga i ai, mai ia Brigham Young, 296
faamatalaga e uiga i ai, mai ia Bruce R. McConkie, 295–96
faamatalaga e uiga i ai, mai ia Joseph Smith, 294, 295
faamatalaga e uiga i ai, mai ia Spencer W. Kimball, 296
- Faapaiaina o tuugamau, 38
- Faapaiaina e le Agaga, 2–3
- Faapaiaina o le suauu, 44–45
- Faapalepale, uiga o se taitai lelei, 181–82
- Faasafua atu
o le taitaiga, 196–200
o le auunaga, 183
o le pule mai ia Mose, 12
faamatalaga e uiga i ai, mai ia Harold B. Lee, 183

- faamatalaga e uiga i ai, mai ia
N. Eldon Tanner, 198
- Faatalanoaga
faia ma le aoga, 203–8
faamoemoega o, 203–6
faamatalaga e uiga i ai, mai ia
N. Eldon Tanner, 206
- Faatosinaga a se taitai lelei, 181
- Faatuatua moni, e fuafua ai le mana e
faamanuia ai, 40
faamatalaga e uiga i ai, mai ia Iosefa
Filitia Samita, 20
- Faatulagaga i le Ekalesia, 11–13
- Faiā o faaiuga, musuia, 186–94
fautuaga e uiga i ai, mai ia Hartman
Rector, Jr., 190
fautuaga e uiga i ai, mai ia Marion G.
Romney, 190
- Faiaoga o Aiga
valaauga o le, 48
e manaomia e aiga ni, 55–56
ina ia fesoasoani ai i tama, 56–58
tiutetauave o le, 53–55
faamatalaga e uiga i ai, mai ia David
O. McKay
faamatalaga e uiga i ai, mai ia Harold
B. Lee
- Faitautusi ma le iloa tusitusi ma
sauniuniga a le tagata ia ma le aiga,
65
- Faitogalaau
taui o le, 138–39, 148–50
faamatalaga e uiga i ai, mai ia
Spencer W. Kimball, 138, 139, 143,
150
- Fanau
ina ia aoaoina ma le alofa, 167
faaigoaina ma le faamanuiaina o,
34–36, 42
faamatalaga e uiga i aoaoga, mai ia
F. Enzo Busche, 166–67
faamatalaga e uiga i aoaoga, mai ia
L. Tom Perry, 166
- faamatalaga e uiga i aoaiga, mai ia
N. Eldon Tanner, 166
- Feagaiga, uiga o le, 2
- Fetufaai atu le talalelei 79–88
- Filifiliga
faamasinoina mo, 244–45,
taunuuga o le faia o, 243–44
saolotoga e fai ai, 242–43
faamatalaga e uiga i ai, mai ia David
O. McKay, 245
faamatalaga e uiga i ai, mai ia
Spencer W. Kimball, 241–43
- Fomai
fesootai ma le, mai ia Spencer W.
Kimball, 212–13
tatau ona faafesootai mo se mai,
212–14
- Fono i le lagi, 239
- Fonotaga,
taitaia ma le aoga, 202–3, 206–8
faamoemoega o, 201
- G**
- Galuega tau gafa
o le a fesoasoani le Tama Faalelagi
ina ia faia, 76–77
faaitaitaiga o le, faamatalaina mai e
Melvin J. Ballard, 76–77
faamoemoega o le, 74–76
faamaumauga o, 72–74
- Galuega faafaifeautalai, 79–88
aafiaga o le aiga, 81–87
faamatalaga e uiga i ai, mai ia
Spencer W. Kimball, 81
- Galue. *Tagai* i le Aiga
- I**
- Iesu Keriso
atinae i luga o, 235–38
valaauina Aposetolo, 7–9
foafoaina le lalolagi i le mana o le
perisitua, 19
umia ki uma o le perisitua, 7
taua o le ola ia faapei o, 237–38

sauniga e faia i le suafa o, 41
igoa faaleperisitua mo, 19
faavae mautinoa o le olaga, 233–38
molimau a, mai ia Melvin J. Ballard,
233

K

Kofe, faasaina e le Upu o le Poto, 217
Ki. *Tagai* i Ki o le Perisitua

L

Lelei, iloa o le, 240
Lagolagoina o le pulega, tiutetauave o
taitai, 184
Lauti, faasaina e le Upu o le Poto, 217

M

Ma'i
teteina o, 211–15
uiga o, 213–14
o le a le mea e fai, pe a tupu mai,
212–14
Ma'i, faamaloloina o, 36, 45
Mafaufauga
tausia, ia mama, 271–74
faamatalaga e uiga i ai, mai ia Boyd
K. Packer, 273–74
faamatalaga e uiga i ai, mai ia J.
Thomas Fyans 272–73
faamatalaga e uiga i ai, mai ia
Spencer W. Kimball, 272
tala e faamatalaina mai ai le taua o le,
mai ia Spencer W. Kimball, 269–70
taitaiina atu ai i gaoioiga, 270–71, 274
faamatalaga e uiga i ai, mai ia Bruce
R. McConkie, 271
faamatalaga e uiga i ai, mai ia David
O. McKay, 270
Malamalama
poloaiiga ina ia sailia, 224–25
faamatalaga e uiga i ai, mai ia David
O. McKay, 225
faamatalaga e uiga i ai, mai ia
N. Eldon Tanner, 224
o le lelei ma le leaga, 240

Maliliu, sauniga o le malumalu mo, 74–78
faamatalaga e uiga i ai, mai ia
Joseph Smith, 77
faamatalaga e uiga i ai, mai ia
Spencer W. Kimball, 77–78
faamatalaga e uiga i ai, mai ia Wilford
Woodruff, 74–76
Malo o le Atua
taua o le fausiaina, 293
faamatalaga e uiga i ai, mai ia
Brigham Young, 293
tala e faamatalaina ai, mai ia Gordon
B. Hinckley, 293
tiutetauave mo le fausiaina, 293–94
Malumalu
sauniga mo e ua maliliu, 74–76
faamatalaga e uiga i ai, mai ia Wilford
Woodruff, 74–76
sauniga mo le aiga, 74–76
faaaloalo mo le, faamatalaga e uiga i
ai, mai ia Harold B. Lee, 33–34
Mama o mafaufauga, 269–75
faamatalaga e uiga i ai, mai ia Boyd
K. Packer, 273–74
faamatalaga e uiga i ai, mai ia
Spencer W. Kimball, 272
tala e faamatalaina ai, mai ia J.
Thomas Fyans, 272–73
tala e faamatalaina ai le taua o le, mai
ia Spencer W. Kimball, 269–70
Mama, o mafaufauga, e faaalua i mea e
faia, 269–70
Manaoga, faavae o le tagata, 99–100
Manatu lelei o se tagata ia te ia lava, 99
Meaalofa, faaleagaga
anoanoai, 287
tuuina atu i e faamaoni, 285
faamatalaina mai i mea na oo ia
Iosefa Samita, 289
mauaina, 287–289
faamoemoga o, 291
faamatalaga e uiga i ai, mai ia
Franklin D. Richards, 291

fesili tatou te mafaufau i ai a o sailia,
mai ia James A. Cullimore, 289
faaaogaina o, 289
Meaai fetau ma sauniuniga a le tagata
lava ia ma le aiga, 62
Meainu malolosi, e faasaina e le Upu o le
Poto, 217
Meainu vevela
faauigaina o le lauti ma le kofe, 217
faasaina e le Upu o le Poto, 217
Musumusuga i le faia o filifiliga, 186–94

O

Ositaulaga, tiute o le, 41

P

Papatisoga

i le afi ma le Agaga Paia, faamatalaga
e uiga i ai, mai ia Iosefa Samita, 27
mo le faamagaloina o agasala, 27
faasologa o le, 42–43

Perisitua

pule o le, e ese mai le mana, 19
faamanuiaga a le, 13–17
faamatalaga e uiga i ai mai ia H.
Burke Peterson, 13
faamanuiaga o le, 31
faamanuiaga o le, e avanoa mo
tamaitai, 31
tuuina atu ma le faauuina i tofiga i le,
44
uiga o le, 4, 7, 19
tiute o le, 40–41
o le umiaina, e fai ma sui o Keriso, 19
faamamaluina, 18–25
faamatalaga e uiga i ai, mai ia Polika
laga, 22
faamatalaga e uiga i ai, mai ia Harold
B. Lee, 23
faamatalaga e uiga i ai, mai ia James
E. Talmage, 21–22
faamatalaga e uiga i ai, mai ia Robert
L. Simpson, 23–24

faamatalaga e uiga i ai, mai ia
Vaughn J. Featherstone, 24
taua o le, 1, 4, 5–6
faamatalaga e uiga i ai, mai ia Iosefa
Filitia Samita, 5–6
faamatalaga e uiga i ai, mai ia Reed
Smoot, 1
faamatalaga e uiga i ai, mai ia
Spencer W. Kimball, 4–5
ki o le, 7–17
faamatalaga e uiga i ai, mai ia Iosefa
F. Samita, 7
faamatalaga e uiga i ai, mai ia Iosefa
Filitia Samita, 7, 9–11
faalauteleina,
malamalamaaga i le, o Orson Pratt, 5
faamatalaga e uiga i ai, mai ia Marion
G. Romney, 5
tautoga ma le feagaiga a le, 1–6
faamatalaga e uiga i ai, mai ia Marion
G. Romney, 2
faamatalaga e uiga i ai, mai ia
Spencer W. Kimball, 3
tofiga o le, 3–4, 11, 40–41
faauuina i le, 11, 31
faauuina i le Mekisateko, moomia mo
le faaeaga, 31
mana o le, 19–21
faamatalaga e uiga i ai, mai ia H.
Burke Peterson, 19
faamatalaga e uiga i ai, mai ia Joh
Taylor, 19
tulaga manaomia mo le mauaina, 1
igoa moni o le, 19
Perofeta
o le Ekalesia e na o ia le tagata na te
faaaogaina uma ki o le perisitua, 16
mulimuli i le o loo soifua, 236
Pulega, e lagolagoina, o se tiutetauave
faaletaitai, 184
Pulea o le tagata lava ia, manaomia ona,
100

Pulea o le tagata lava ia
 atinaeina ma le aoaoina, 161–69
 ma le saolotoga, 162–63
 mauaina, 163–64
 fesoasoani i fanau ina ia atinaeina,
 164–67
 moomia mo le alualu i luma e
 faavavau, 162
 faamatalaga e uiga i ai, mai ia Tavita
 O. Makei, 163, 164
 faamatalaga e uiga i ai, i fanau, mai
 ia F. Enzo Busche, 166–67
 tala e faamatalaina ai, mai ia Sterling
 W. Sill, 161

S

Saolotoga, 239–46
 o se tulafono e faavavau, 239–40
 faamatalaga e uiga i ai, mai ia Polika
 laga, 239
 ma le pulea o le tagata lava ia,
 161–69
 faamatalaga e uiga i ai, mai ia Wilford
 Woodruff, 240
 faaaogaina, 240–44
 Saolotoga e fai ai filifiliga, 241–43
 faamatalaga e uiga i ai, mai ia Tavita
 O. Makei, 245
 faamatalaga e uiga i ai, mai ia
 Spencer W. Kimball, 241–43
 Saolotoga ma le pulea o le tagata lava ia,
 162–63
 Saunia o lagona ma sauniuniga a le
 tagata lava ia ma le aiga, 64
 Sauniga,
 na faataunuaina e atalii o Mose ma
 Arona, 3
 pule e moomia e faataunuaina ai, 26
 o le faamafanafanaga ma le taitaiga,
 34–38
 uiga o le, 26
 o le faaeaga, 26–34, 38
 faataunuaina, 40–47

faamoemoega o, 26–39
 faamatalaga e uiga i ai, mai ia
 Lorenzo Snow, 38
 faamatalaga e uiga i ai, mai ia Wilford
 Woodruff, 26
 ituaiga o, 26
 Sauniuniga
 Ekalesia, 66–67
 faamatalaga e uiga i ai, mai ia
 Spencer W. Kimball, 67
 a le tagata lava ia ma le aiga 60–68
 faamatalaga e uiga i ai, mai ia H.
 Burke Peterson, 61
 Sefuluai
 faamanuiaga o le tologiina, 257–59
 tulafono o le, 253–54
 ma le pulea lelei o le tagata lava ia,
 162
 faamatalaga e uiga i ai, mai ia Henry
 D. Taylor, 258
 tala e faamatalaina ai le agaga o le,
 mai ia Iosefa F. Smita, 257–58
 tala e faamatalaina ai le agaga o le,
 mai ia Matthew Cowley, 254
 faaaogaina o le, 256–57
 Sini
 mauaina o, 158–59
 fesoasoani i le alualu i luma e
 faavavau, 154–58
 se mea na oo i ai, faamatalaina e
 J. Thomas Fyans, 153
 se mea na oo i ai, faamatalaina e
 N. Eldon Tanner, 152–53
 se mea na oo i ai, faamatalaina e
 Spencer W. Kimball, 151, 158–59
 a le tagata lava ia ma le aiga, 151–60
 filifiliga e le tagata ia ma le aiga,
 151–53
 faamatalaga e uiga i ai, mai ia
 O. Leslie Stone, 159
 Soifua maloloina, faatumauina le malosi,
 210–15
 Suauu, faapaiaina o le, 36, 44

T

Taitai

- uiga o le, 179–81
- taua o le, faamatalaina e Victor L. Brown, 178
- uiga lelei o se, 181–83

Taitaiga

- faia o faaiuga ma le, 186–94
- tuuina atu ma aiaiga o le, 196–99
- atinaeina, 178–79
- tiutetauave o le, 183–84
- faamatalaga e uiga i ai, mai ia Bruce R. McConkie, 179
- faamatalaga e uiga i ai, mai ia Harold B. Lee, 179–81
- auaunaga ma le, 195–96

Taitai perisitua, tiutetauave o le, 13

Taulaga

- faamanuiaga o le tuuina atu o, 257–58
- tala e faamamatalaina ai le agaga o, mai ia Boyd K. Packer, 255–56
- tala e faamatalaina ai le agaga o, mai ia Mario G. Romney, 257
- ituaiga o, 254–56
- faaaogaina o, 256–57

Tautoga ma le Feagaiga o le perisitua,

- 1–6
- faamatalaga e uiga i ai, mai ia Marion G. Romney, 2
- faamatalaga e uiga i ai, mai ia Spencer W. Kimball, 3, 4

Taleni

- atinaeina o, 170–77
- mauaina o a tatou, 171–72
- o tagata uma e i ai, 170–71
- malamalamaaga o Heber J. Grant i le atinaeina, 173–74
- fesoasoani i tagata o le aiga e atinaeina, 174–76
- faamatalaga e uiga i ai, mai ia

Franklin D. Richards, 172

- faamatalaga e uiga i ai, mai ia Spencer W. Kimball, 170
- faamatalaga e uiga i ai, mai ia Sterling W. Sill, 173

Tama

- fautuaga i, mai ia Iosefa Filitia Samita, 184
 - faatalanoaga o le fanau e le, 102
 - malamalamaaga o N. Eldon Tanner e uiga i, 102
 - o le ulu o le aiga, 13, 95–103
 - faamatalaga e uiga i ai, mai ia Iosefa F. Samita, 97
 - o le peteriaka o lona aiga, 95–103
 - o le tali faaaliga mo lona aiga, 16
 - faamatalaga e uiga i ai, mai ia Theodore Tuttle, 16
 - o le taitai faaleagaga o lona aiga, 13
 - tiute faaletaitai o le, 184
 - faamanuiaga faaleperisitua mai le, 13–16
 - faaitaiga, na tuuina mai e Eldred G. Smith, 97–98
 - tiutetauave o le, mo manaoga masani o le aiga, 98–100
 - tiutetauave o le, mo taumafaiga faafaifeautalai a le aiga, 81
 - faamatalaga e uiga i ai, mai ia Spencer W. Kimball, 81
 - tiutetauave o le, mo manaoga faaleagaga o le aiga, 102
 - matafaioi o le, faamatalaga e uiga i ai, mia ia Spencer W. Kimball, 95
 - o mea e sili ona manaomia e fanau mai ia, 127–29
- ### Tapaa, e faasaina i le Upu o le Poto, 217
- ### Tatalo
- faalautele ai le mana e faamanuia ai, 40
 - taua o le, 236
- ### Tiakono, tiute o le, 40

Tiapolo, malamalama o le, 240

Tiute, e ao i taitai ona aoao, 183

Tino, faafouina o le, 2–3

Togalaau

fuafuaina o le, 139–44

totoina o le, 146

saunia o le vaega o le a totoina ai,
144–46

faamoemoega o le, 146–48

Tomai

atinaeina o, ma le saunia o le tagata
lava ia ma le aiga, 65–66

faamatalaga e uiga i ai, mai ia Marvin
J. Ashton, 65–66

Tuaina atu o le perisitua, 44

Tuugamau, faapaiaina o, 45

Tupe, puleaina o, ma le saunia o le
tagata lava ia ma le aiga, 66

Tusi o tala o le olaga, 70–72

faamatalaga i le taua o le, mai ia
Spencer W. Kimball, 71

Tusi o mea e faamanatu, 69–70

Tusitusiga paia, suesueina o, 235
malamalamaaga na faamatalaina mai
e Spencer W. Kimball, 151

U

Usiusitai e fuafua i ai le mana e
faamanuia ai, 40

Upu o le Poto

faamanuiaga o le usiusitai i le,
219–22

ola ai, 216–23

ma le pulea lelei o le tagata lava ia,
162

faamatalaga e uiga i ai, mai ia Iosefa
filitia Samita, 218

Faamalamalamaga o Ata 1–16

1. Iesu le Keriso. Ata na tusia e C. Bosseron Chambers; faaogaina i le faatagaga a le Bernard Picture Co., Inc.
2. O le aoaoga i aiga e amataina i se faatalanoaga ma le tama.
3. O faiaoga o le aiga e aoaoina le aiga i lalo o le taitaiga a le tama.
4. O faiaoga sogasoga o aiga e auaina atu i le aiga i soo se auala e mafai ai.
5. E lipoti atu e le aunoa e faiaoga o aiga ia manaoga o aiga sa laua aoaoina i le taitai o le perisitua.
6. O alii talavou uma taitoatasi e tatau ona saunia i le itu tau tupe ma soo se auala lava ina ia alu atu e faamisiona.
7. O le faauo atu i o latou tuaoi o se auala sili lea ona lelei mo tagata o le Ekalesia e faataunuaina ai le galuega faafaifeautalai.
8. O le aoaoina atu e faifeautalai o le talalelei i se uo a se tasi i totonu o lona fale o se lagona uiga ese lea.
9. O tagata o le Ekalesia latou te fetufaai atu le talalelei i a latou uo o le a latou olioli pea ma i latou e faavavau.
10. O le tausia o se tusi o le talaaga o le olaga o se vaega taua lea i le faia o le galuega o gafa.
11. E tatau i tama ona taitaiina o latou aiga i le tuufaatasia lea o se tusi e manatua ai mea uma.
12. Ua talosagaina aiga uma ina ia galulue faatasi i le faatumuina o a latou pepa o augatupulaga e fa.
13. O le galulue faatasi i se galuega tau uelefea o le a faavaeina ai se alofa faaleuso ma fesoasoani ai i le tuuina atu o mea mo e matitiva ma e le tagolima.
14. O le saunia o le tagata lava ia ma le saunia o le aiga e aofia ai le saunia ia lava o ni meaai, lavalava, mea e tafu ai afi mo le tausaga atoa.
15. I fesoasoani tagata o le Ekalesia i le tausiga o tagata matitiva e ala lea i le tuuina atu o se taulaga anapogi loto foai.
16. O le fesoasoani atu ia i latou o loo fia maua se fesoasoani o le faailoga lea o se tagata moni o le Au Paia o Aso e Gata Ai.

